


سی حرفیاں

میاں محمد شفیع اختر ڈھانگری



تحقیق و تدوین:
حنین ضاحر

سی حرفیاں میاں محمد شفیع اختر ڈھانگری

تحقیق و تدوین: حنین ضاحر



اسپنے درجیاں دے غلی سفر وچ تحقیقی حوالے نال اک کمپیز ایساں جو مذہبوں لاء اراج تیکر
میرے من بھادندار سیاتے اوہدا شوق سوا یا ہوند ارجیا اوہی پچانی دے صوفی ادبی خوانے
دی بھال ہووہتے پرکھتہ سوس بوجتا کر کے ایسے راہ دی پاندھی رہی ہر اک مدھر گھٹ
پنہا اندر واندرو جس لگی کر فوس کھوجا کرودھ بھال دے ایس کھوج ول خورے کیوں نہیں
آوندے؟؟ عید ڈاکٹر فقیر محمد شیخ عبدالعزیز محمد آصف خاں تے شریف صابر وانگ اٹھی
گھائی چوچن والے ورے جی وی کردی ایس پاسے آون گے؟؟ ایس چندا دا اظہار اک دن
ڈاکٹر عبداللہ جان جاہد بورا نال کسے موضوع آتے گل بات کر دیاں کینہا تے اوہ اسپنے
مخصوص لیجے وچ فراولے: ”بہن! میرا ایک شاگرد ہے وہ پنجابی میں تدوین متن کرنا چاہتا
ہے میں اسے آپ کے پاس بھیجتا ہوں اس کی رہنمائی فرمادیں۔ اوہناں دے اعتماد
تے انکس اگے میرے سارے حرف نواسے بہن مینوں وچوں وچ اسپنے اک پرانے
شاگرد دی اک کھروی یادوی تازہ ہون لگی جھدی سودھکاری کھوج نے مینوں اک وار
تے راسے پادتاسی۔ پر چین ساخراون تول و دھنکلیا۔ ایسنے راہ پی پانای میں لہہ راہ پی
تکدی رہی۔۔۔ سوچاں! خورے ایہ سنڈا کہیہ کرے گا؟ پر بد ایسنے مینوں اپنا کم گھلیا تے
میرے ولوں ڈاکٹر عبداللہ جان جاہد لئی دعا لئی جھناں پنجابی تول ایٹاں تحقیقی کھوجا رتے
سودھکار نو جوان دتا۔ اوہدے سودھ سلیقہ تول دیکھ کے اسپنے استاد محترم جناب حفیظ صاحب
بوران دی گل بھیجی ہوندی دیکھی کہ ہر دن پاک ہستیاں آتے کہ کم کرن بیٹھو تے اوہناں دے
فیض نال ہوندے نیں۔ چین ساخرا تے وی بلا شہ تشبیہ سلسلے دے عظیم بزرگ شاعر میاں محمد
شفیع اختر ڈھانگری دا ہتھ اسے چین ساخرا دی ایہدے نال یقینا کوئی سا بھرا ہے۔
بزرگاں نال محبت تے سا بھرتوں بنا ایہ کم ہووی نہیں سکدے۔ ایہ جذباتی تے روحانی تعلق
اپنی قضاں علی تے کھوج پرکھولوں ویکھتے تے چین ساخرا دیہ کم نہ صرف پنجابی صوفیانہ ادب
وچ اک نواں اضافہ اسے سگوں ایس نال اوس دا ناں کھوجا ران وچ شمار ہون لگے گا،
مینوں پک اسے رتب اوہدے راہندا ویکھے سونے رکھے۔
(پروفیسر ڈاکٹر ذبیر حسن)

سی حرفیاں میاں محمد شفیع اختر ڈھانگروی (تحقیق و تدوین)

حسنین ساحر

بزمِ تخلیق و تحقیق

اسلام آباد <> پاکستان

حقوق اشاعت بحق حسین ساحر محفوظ ہیں

اشاعت: نومبر 2020ء

قیمت: 900/- روپے



سی حرفیاں میاں محمد شفیع اختر ڈھانگروی (تحقیق و تدوین)

محقق و مدون:

حسین ساحر

پروف ریڈنگ:

محمد فاروق فضل حیدر

سرورق:

محمد شیراز اعوان

ناشر:

پروفیسر محمد ثقلین ضیغم

چیرمین، بزمِ تخلیق و تحقیق، اسلام آباد



BAZM-E-TAKHLEEQ-O-TEHQEEQ

AK Designers, 1st Floor, Ramzan Plaza, Bhara Kahu, Islamabad.

Mob: 0333-5499585, 0313-5341415, Email: bttbibt@gmail.com

اپنے دادا جی

ملک مرزا خان مرحوم

اپنے والد صاحب

ملک شبیر حسین مرحوم

تے والدہ

محترمہ بھاگ بھری

دے ناں



ایہ مقالہ شعبہ پاکستانی زبانیں، علامہ اقبال اوپن یونیورسٹی، اسلام آباد نوں ایم فل دی
ڈگری لئی پیش کیتا گیا سی۔ پروفیسر ڈاکٹر نبیلہ رحمن، چیئر پرسن، شعبہ پنجابی، اورینٹل
کالج، پنجاب یونیورسٹی، لاہور دی زیر نگرانی ایس مقالے دی تکمیل ہوئی۔



توتیب

- 09 اعترافیہ ❁ (حسین ساحر)
12 کھوج سودھ: بھرے راہاں تے ❁ (پروفیسر ڈاکٹر نبیلہ رحمن)
..... حصہ اول

”مقدمہ“

- 15 [1] احوال و آثار میاں محمد شفیع اختر ڈھانگروی
15 ❁ ﴿احوال﴾ ❁
15 1- خاندانی پچھوکڑ
20 2- میاں محمد شفیع اختر ڈھانگروی دے والدین
20 3- میاں محمد شفیع اختر ڈھانگروی دی پیدائش
22 4- تعلیم تے پیشہ
24 5- ازدواج تے اولاد
27 6- آستانہ عالیہ جلالپور شریف نال وابستگی
31 7- حلقہ احباب
35 8- میاں محمد شفیع داعمومی علمی استفادہ/مطالعہ
36 9- شاعری
41 10- بیت اللہ شریف دی زیارت
42 11- وفات
43 ❁ ﴿آثار﴾ ❁
43 1- پنجابی تصنیفات (قلمی)
44 2- اُردو/فارسی تصنیفات (قلمی)
45 ❁ ﴿شخصیت﴾ ❁
45 1- سراپا تے معمولات

- 49 2- میاں محمد شفیع: اک صوفی تے درویش
- 54 3- میاں محمد شفیع دی ذات نال منسوب چند روحانی واقعات
- 55 4- میاں محمد شفیع اختر ڈھانگروی اپنی آل اولاد دی نظروں
- 59 [۲] سی حرفیاں میاں محمد شفیع اختر ڈھانگروی: موضوعی تے فکری مطالعہ
- 59 ☆ متقی سی حرفیاں
- 61 ☆ مرثیہ سی حرفیاں
- 62 ☆ رومانی عشقیہ سی حرفیاں
- 63 1- توحید
- 65 2- عشق رسول صلی اللہ علیہ وسلم
- 67 3- تصوف
- 79 4- میاں محمد شفیع دا نظریہ عشق
- 84 5- تقدیر تے تدبیر
- 87 6- دنیا دی بے ثباتی تے آخرت دی فکر
- 88 7- نفس امارہ دی مذمت
- 90 8- وچھوڑے داد دوتے ملاپ دی تانگھ
- 91 9- متفرق مضمون
- 93 [۳] سی حرفیاں میاں محمد شفیع اختر ڈھانگروی: فنی مطالعہ
- 93 1- ہیئت
- 98 2- زبان تے بیان
- 104 3- صنائع بدائع (معنوی تے لفظی)
- 112 4- قافیہ تے ردیف
- 114 5- کردار نگاری
- 115 6- سراپا نگاری
- 115 7- منظر نگاری
- 116 8- تمثیلی رنگ

- 117 9۔ بحر ایں دی ورتوں
- 119 [۴] محاکمہ

..... حصہ دوم.....

”سی حرفیاں میاں محمد شفیع اختر ڈھاگرووی (مدونہ متن)“

- 01۔ جدائی یار دل جانی نشانی دوزخ دارد
- 128 معاذ اللہ غلط گفتیم کہ دوزخ زو نشان دارد
- 02۔ در فراق معشوق
- 145
- 03۔ ”نیاز نامہ“ پیا سنا طیار غار برادر طریقت محمد عبدالجید خفقا نی تھوٹوی
- 156
- 04۔ سوال جواب ہیر را بچھا
- 165
- 05۔ بحضور لامع النور دامت فیو حکم الی یوم الدین
- 174
- 06۔ فراقیہ در احوال خویش می گوید
- 185
- 07۔ در باب عشق
- 196
- 08۔ فراقیہ بدرد و سوز عاشقانہ
- 207
- 09۔ بہ مناقب و فراقیہ جناب قبلہ والد ماجد میاں محمد عظیم
- 218
- 10۔ تکرار ہیر بامادر
- 228
- 11۔ ہدیہ حسن دل پذیر و رشک بدر منیر
- 245
- 12۔ بہ مناقب شیخ المشائخ حاجی الحرمین الشریفین حضرت قبلہ عالم و عالمیاں سجادہ نشین ابوالبرکات سید محمد فضل شاہ دام اللہ برکاتہم مسند آرائے جلاپور شریف
- 254
- 13۔ بہ مدح شرافت پناہ قبلہ گاہ جناب صاحبزادہ والا جاہ سید محمد فضل شاہ صاحب مسند آرائے جلاپور شریف دام اللہ تعالیٰ برکاتہم
- 263
- 14۔ بہ مدح حضرت خواجہ غریب نواز سید محمد فضل شاہ صاحب سجادہ نشین جلاپور شریف دام اللہ برکاتہم
- 274
- 15۔ در توصیف و تعریف حضرت سجادہ نشین جلاپور شریف مدظلہ
- 284

- 16- در مدح شریف جناب قبلہ عالم خواجہ غریب نواز سید محمد فضل شاہ صاحب 294
- 17- بہ تشریف شریف نسبت روحانی بہ آں ذات گرامی قدر حضرت قبلہ عالم و 304
- عالمیاں ابوالبرکات سید محمد فضل شاہ سجادہ نشین جلالپور شریف دام اللہ برکاتہم 314
- 18- سی حرفی نالہ درد انگیز : یادگارِ مظہر 314
- 19- بروفاتِ حسرت آیات خواجہ غریب نواز ابوالبرکات سید محمد فضل شاہ 329
- 20- مدت ہوئی میں دید سے نا مستفید ہوں 346
- جس کو نہ کوئی سن سکے میں وہ پُکار ہوں 346
- 21- نہ کسے طبیب دلہا نہ کسے شفیق دلہا 356
- بجز ایں کہ در رخ تو ہمہ درد را درائے 356
- 22- دل ڈوب ڈوب جاتا ہے آتے ہو یاد جب 366
- پر کیا کروں کہ موت پہ یاں دسترس نہیں 366
- 23- بیا ساقی بمن کاس الکرامے 375
- چرا ارزاں نہ پیغام و سلائے 375
- 24- فرقت کے شند شعلوں میں آہ جل بجھا ہوں میں 385
- بجھ جائے خود بخود جو سحر وہ دیا ہوں میں 385
- 25- سی حرفی بروفاتِ حسرت آیات نسیم اطہر جگر پارہ عزیزِ مقبول بیگم 395
- 26- ”فریادِ سیدہ“ بہ فراق جگر گوشہ سیدہ بی بی ضیا مرحومہ مغفورہ دختر نیک اختر 304
- حضرت قبلہ سید محمد فضل شاہ 304
- 27- سی حرفی بروفاتِ حسرت آیات محمد سلیم ولد محمد بشیر (بڑا گواہ) 413

..... حصہ سوم

”فرہنگ“

428

463

مآخذ

اعترافیہ

”سی حرفیاں میاں محمد شفیع اختر ڈھاگرووی (تحقیق و تدوین)“ دراصل میرے ایم فل لئی پیش کیے گئے تحقیقی مقالے دی کتابی رچنا ہے۔ ایس موضوع اُتے مقالہ لکھن دا مشورہ میرے وڈے بھائی پروفیسر محمد ثقلین ضیغم نے دتا سی۔ میاں محمد شفیع دے پوتے میاں اظہر رشید تے پروفیسر ثقلین ضیغم بچپن دے دوست نیں۔ ایسے نسبت نال ثقلین ضیغم ہوریں خود میاں محمد شفیع دے صاحبزادے میاں عبدالرشید ہوراں کول جہلم گئے تے میاں محمد شفیع دے تمام پنجابی قلمی نسخے تے بیاضاں لیا کے میرے حوالے کیتیاں۔ ڈاکٹر عبداللہ جان عابد ہوراں نال مشاورت توں بعد، میں میاں محمد شفیع دے تمام پنجابی کلام دی تدوین کرن دا ارادہ کیتا۔ لیکن تحقیقی خاکے دی تیاری دے دوران ڈاکٹر ارشد محمود ناشاد ہوراں دے مشورے موجب میاں محمد شفیع ہوراں دے پنجابی کلام چوں صرف سی حرفیاں دی تدوین نوں موضوع بنایا گیا۔

انسان دی سفلتا وچ خداداد صلاحیتاں توں علاوہ اساتذہ، احباب تے اہل خانہ دیاں دعاواں، رہنمائی تے مشاورت وی شامل حال رہندی اے۔ ”سی حرفیاں میاں محمد شفیع اختر ڈھاگرووی“ دی تکمیل وچ کئی شخصیات دا کسے نہ کسے حوالے نال عمل دخل رہیا اے۔ سب توں پہلے ذکر کراں گا پروفیسر محمد ثقلین ضیغم ہوراں دا جیہناں نہ صرف مینوں میاں محمد شفیع دے ناں نال متعارف کروایا بلکہ اوہناں دا تمام تحریری مواد وی فراہم کیتا تے مقالے دے مکمل ہون تک معاون وی رہے۔ اوہناں توں بعد میاں محمد شفیع دے صاحبزادے میاں عبدالرشید ہوراں دا شکر گزار آں جیہناں کمال فیاضی دا مظاہرہ کر دیاں ہویاں اپنے والد دے سارے پنجابی قلمی نسخے تے روزنامچیاں دے اٹھ دفتر میرے حوالے کر دتے۔ حالاں

کہ محققین نوں ایس کپھوں وارٹاں ولوں بہت اوکڑاں تے بے رُخی داسا مناوی کرنا پیندا اے۔ لیکن مینوں میاں عبدالرشید تے اوہناں دے صاحبزادیاں (جناب اظہر رشید، جناب مظہر جمیل، جناب مڈر فاروق، جناب بدر سمیل) ولوں ہر طرح دا تعاون حاصل رہیا۔ خاص کر مظہر جمیل ہوراں نوں میں شروع توں لے کے آخر تک ہر قسم دے تعاون لئی ہمیشہ تیار پایا۔

ڈاکٹر عبداللہ جان عابد ہوراں دامنون آں جو ہمیشہ شفقت دامنظاہرہ کردے نیں تے مصروفیات دے باوجود میرے لئی خاص طور تے وقت کڈھدے نیں۔ پروفیسر ڈاکٹر نبیلہ رحمن ہوراں دی نگرانی وچ ایہ مقالہ تکمیل دے مراحل چوں گزریا۔ اوہ خصوصی شکرے دے مستحق نیں۔ ایہناں دوواں محترم اساتذہ دی رہنمائی توں بغیر شاید ایہ کم میرے لئی ممکن نہیں سی۔ ڈاکٹر حاکم علی برڑو صاحب ایم فل دے آغاز توں لے کے تکمیل تک ہر معاملے وچ شفقت دامنظاہرہ کردے رہے۔ اوہناں توں علاوہ ڈاکٹر عبدالواجد تسم، ڈاکٹر ارشد محمود ناشاد، پروفیسر شوکت محمود شوکت تے جناب ضیاء الرحمن بلوچ دامنون آں جیہناں دی رہنمائی شامل حال رہی۔ میرے اوہ اساتذہ جیہناں میرے تعلیمی کیریئر دی بنیاد رکھی اوہناں دا ذکر بطور خاص کراں گا۔ جناب یحییٰ رحمن، جناب محمد اسماعیل علوی مرحوم، جناب حافظ سراج الدین مرحوم، جناب محمد حلیم، جناب محمد حنیف چودھری، جناب راجا قدیر، جناب رفیق سندھی، جناب اقبال میمن، جناب محسن علی شاہ، جناب عبدالرحمن، جناب ستار شیخ مرحوم، جناب شبیر احمد (کرکڑ) جناب سعید اصغر تے جناب محمد منظور مرحوم۔ ایہ اوہ ناں نیں جیہناں نوں میں کدی وی فراموش نہیں کر سکدا۔

جناب رضا محمد نیازی، ڈاکٹر نکلیل کاسیروی، جناب شاکر اعوان، جناب محمد لطیف سیال، جناب قمر زمان نصیف، جناب شبیر احمد بھائی، غلام سرور کھوسہ، جناب حفیظ گل، جناب شیراز اعوان، جناب خرم شہزاد، جناب ظہیر احمد جنجوعہ، جناب زاہد اقبال شیخ،

جناب بلال اعوان، جناب قمر علی، جناب کامران شاکر، جناب محمد ابو بکر صدیق، محمد سبطین ضیغم، سلمان شبیر مرزا، نور سحر، مریم بتول، تحریم سحر، پروفیسر صوفیہ ہاشمی تے پروفیسر صائمہ سعید داکٹر۔

استھے جناب محمد تنخی خان تے محمد فاروق فضل حیدر دا خصوصی شکریہ ادا کراں گا کیوں کہ ایہناں دوواں دوستاں نے صرف دوستی ہی نہیں نبھائی بلکہ روزانہ دی بنیاد تے میرے کم دی پراگریس وی کچھ دے رہندے نیں۔ صرف ایہ مقالہ ای نہیں، بلکہ میرے جتنے وی تحقیقی تے تخلیقی کم ہُن تیکر منظرِ عام تے آچکے نیں، اوہناں کچھ ایہناں دوستاں دی ہلاشا واداد بڑا کردار اے۔

اہل خانہ دے تعاون تے دعاواں نوں کدے وی نظر انداز نہیں کیتا جاسکدا تے نہ ہی میرے کول ایسے الفاظ نیں کہ میں اوہناں دا شکریہ ادا کرے گاں۔ ایس مقالے دے مکمل ہون تے میرے والد صاحب ملک شبیر حسین مرحوم توں زیادہ شاید ہی کسے نہیں خوشی ہوئی ہووے گی۔ میری پی ایچ ڈی دی تکمیل ویکھنا اوہناں دی وڈی خواہش سی لیکن جو مالک سچے نوں منظور۔۔۔ اللہ کریم اوہناں دا اگلا جہان چنگا کرن تے اوہناں نوں بلند درجات عطا ہوں۔ اللہ ذکر کیتے گئے تمام محترم اصحاب دا حامی و ناصر ہووے۔ آمین۔

حسنین ساحر

hassnain1234@hotmail.com

کھوج سودھ: سجرے راہاں تے

اپنے ورہیاں دے علمی سفر وچ تحقیقی حوالے نال اک کھیتز ایساں جو مڈھوں لاءِ
 اج تیکر میرے من بھاوند ا رہیا تے اوہدا شوق سوا یا ہوندا رہیا، اوہ سی..... ”پنجابی دے صوفی
 ادبی خزانے دی بھال، سودھ تے پرکھ“ سو میں بوہتا کر کے ایسے راہ دی پاندھی رہی پر اک
 سدھر گھٹ چنتا اندرو اندر ودھن لگی کہ نویں کھوجکار سودھ بھال دے ایس کھوج ول خورے
 کیوں نہیں آوندے.....؟؟ کیہ ڈاکٹر فقیر محمد فقیر، شیخ عبدالعزیز، محمد آصف خاں تے شریف
 صابر وانگ اوکھی گھاٹی چڑھن والے ور لے جی وی کدی ایس پاسے آون گے.....؟؟!!
 ایس چنتا دا اظہار اک دن ڈاکٹر عبداللہ جان عابد ہوراں نال کسے موضوع اُتے
 گل بات کر دیاں کیتا تے اوہ اپنے مخصوص لہجے وچ فوراً بولے ”بھن! میرا ایک شاگرد ہے
 وہ پنجابی میں تدوین متن کرنا چاہتا ہے میں اُسے آپ کے پاس بھیجتا ہوں اُس کی رہنمائی
 فرمادیں۔“

اوہناں دے اعتماد تے اخلاص اگے میرے سارے حرف نوائے، ہُن مینوں
 وچوں وچ اپنے اک پرانے شاگرد دی اک کھروی یاد وی تازہ ہون لگی جیہدی سودھکاری
 کھوج نے مینوں اک وار تے راہے پادتا سی۔

پرحسین ساحر اوس توں ودھ نکلیا۔ ایہنے راہ کیہ پانا سی میں ایہدا راہ ہی نکدی
 رہی..... سوچاں! خورے ایہ منڈا کیہ کرے گا؟ پر جد ایہنے مینوں اپنا کم گھلیا تے میرے ولوں
 عبداللہ جان عابد لئی دعا نکلی جیہناں پنجابی نوں ایناں محنتی کھوجکار تے سودھکار نو جوان دتا۔

اوہدے سودھ سلیقے نوں ویکھ کے اپنے اُستاد محترم جناب حفیظ تائب ہوراں دی
 گل سچی ہوندی دیکھی کہ ”جدوں پاک ہستیاں اُتے کم کرن بیٹھو تے اوہناں دے فیوض

نال ہوندے نیں، حسنین ساحر اُتے وی بلاشبہ چشتیہ سلسلہ دے عظیم بزرگ شاعر میاں محمد شفیع اختر ڈھاگرووی دا ہتھ اے۔ ایہ جملہ لکھدیاں نکلے ہوندیاں دی کھیڈ دے بول وی خورے کدروں چیتے آون لگے۔

بے باغ بہشت، چے چراغ چشت
باغ مہکے کلیر دا، چراغ بے اجیر دا
باغے وچ جانا اے، چراغ وی جلانا اے

بال پئے دی یاد دا ایہ فلش بیک وی ایویں نہیں ٹریا۔ حسنین ساحر دی ایہدے نال یقیناً کوئی سانجھ اے۔ بزرگاں نال محبت تے سانجھ توں بنا ایہ کم ہووی نہیں سکدے۔ ایہ جذباتی تے روحانی تعلق اپنی تھاں۔ علمی تے کھوج پرکھ ولوں ویکھیے تے حسنین ساحر دا ایہ کم نہ صرف پنجابی صوفیانہ ادب وچ اک نواں اضافہ اے سگوں ایس نال اوس دا ناں کھوجکاراں وچ شمار ہوون لگے گا، مینوں پکت ہے۔ رب اوہدے راہ سداسو کھے سوتے رکھے۔

پروفیسر ڈاکٹر نبیلہ رحمن

چیمز پرسن، شعبہ پنجابی،

اورینٹل کالج، پنجاب یونیورسٹی، لاہور

حصہ اول



مقدمہ



[۱]

احوال و آثار میاں محمد شفیع اختر ڈھانگروی

﴿احوال﴾

انسانی شخصیت دی اٹھان وچ اُس دے خاندانی پس منظر دی بہت اہمیت ہوندی اے۔ ضروری نہیں کہ فن وراثت وچ ملے یا کسے تعلق دی وجہ نال وجود وچ آئے، لیکن ایس گل توں انکار نہیں کیتا جاسکدا کہ فنکار دے بہتے رویے، اُس دے خاندانی پچھوکڑ تے حالات توں اثر لیندے نیں۔ فن دا تجزیہ کردیاں ہویاں فنکار دی شخصیت نوں نظر انداز کرنا ممکن نہیں ہوندا۔ میاں محمد شفیع اختر ڈھانگروی دی شخصیت دی پرکھائی اوہناں دے خاندانی پچھوکڑ تے زندگی دے حالات دا جائزہ ضروری اے۔

1۔ خاندانی پچھوکڑ:

جہلم دے مختلف شہری تے دیہاتی علاقیاں وچ کشمیری قبائل دے لوک آباد نیں۔ جیہڑے مختلف ادوار وچ کشمیر چوں ہجرت کر کے آئے۔ ایہناں ای قبیلیاں چوں اک قبیلہ ”منہاس راجپوت“ وی اے۔ منہاس راجپوت برہما جی دی اولاد رام چندر جی دی نسبت نال سورج بنسی ہون دے دعویدار نیں۔ برہما جی دی اکونجی پست وچ راجا جامبو لوچن اور راجا جامبو لوچن دی اٹھونجی پست وچ راجا جوگ راج ہوگزریا اے۔ جس دے دو بیٹے ”ملن ہنس“ تے ”سورج ہنس“ سن۔ راجا ملن ہنس دی اولاد نے ”ملن ہنس

راجپوت، اکھویا، جیہڑ اکثر استعمال نال ”منہاس“ بن گیا۔ راجا ملن انہس منہاس دیپ، منہاس دیو اور منہاس دے ناواں نال مشہور ہويا۔ اُس دا زمانہ 400 بکری یا 457 عیسوی دیا جاندا اے (1)۔ جموں دے منہاس راجپوت ڈوگرہ منہاس اکھواندے نیں۔ ڈیزل ایسٹن موجب ڈوگرہ جموں دے کسے وی باشندے نوں کہیا جاندا اے (2)۔

میاں محمد شفیع دا تعلق ڈوگرہ منہاس قبیلے نال اے۔ ڈوگرہ منہاس یا منہاس راجپوت قبیلے وچ رندھیر سنگھ دی اولاد وچ ”میاں پیڑا“ ہو گزرے نیں جیہڑے ایس خاندان دے پہلے فرد سن جیہناں اسلام قبول کیتا۔ یعنی ایس خاندان وچ مسلم لڑی میاں پیڑا توں ہی چلی اے۔ میاں پیڑا دی اٹھویں پشت وچ میاں محمد شفیع پیدا ہوئے۔ میاں محمد شفیع دی خاندانی پیڑھی انج اے: میاں محمد شفیع ولد میاں محمد عظیم ولد میاں سید محمد چشتی ولد میاں محمد ہاشم ولد حافظ صالح محمد ولد میاں محمد ولد میاں نور محمد ولد میاں عبدالرحمن ولد میاں نانک ولد میاں پیڑا۔ ایس خاندان وچ حافظ صالح محمد بھیٹ (ڈھانگری مرزا) وچ وسوں کیتی تے حالے تک اوہناں دا خاندان ای آباد اے۔ میاں محمد شفیع اپنی خاندانی پچھوکڑ بارے لکھدے نیں:

”مفتی محمد شفیع اختر ولد میاں محمد عظیم ولد میاں سید محمد ولد میاں ہاشم دین ولد حافظ صالح محمد قوم منہاس ڈوگرہ راجپوت چند پشتیں اوپر جا کر ہمارے مورث اعلیٰ مسمیٰ بہ ”میاں پیڑا“ نے اسلام قبول کیا۔ اور حافظ صالح محمد سے ہماری سکونت بمقام بھیٹ متصل ملہ جوگیاں ضلع جہلم میں رہی۔“ (3)

موضع بھیٹ، ”ملہ جوگیاں“ دے دامن وچ پھیلیا ہویا اے۔ ایس ویلے بھیٹ دا علاقہ تحصیل سوباوہ دی یونین کونسل نگیاں دے زیر انتظام ہے۔ ایس پورے علاقے نوں ڈھانگری مرزا آکھیا جاندا اے۔ ڈھانگری نام دے دو علاقے ”ڈھانگری

بوا“ تے ”ڈھانگری بالا“ چکسوری، میر پور آزاد کشمیر وچ وی موجود نیں۔ ڈھانگری لفظ ”ڈھانگ“ توں نکلیا اے جس دے معنی ڈھلوان، چوٹی یا ٹیلہ دے نیں۔ جہلم دا ایہ علاقہ وی چھوٹے بڑے پہاڑاں اور ٹیلیاں تے مشتمل اے۔ ایس لئی ایہ گل بعید از قیاس نہیں کہ ایس علاقے نوں زمینی خدوخال دے پیش نظر ”ڈھانگری“ دا نام دتا گیا۔ ڈھانگری مرزا وچ ہی حافظ صالح محمد دا خاندان پھلیا تے پھلیا۔ میاں محمد شفیع دے اجداد کشمیر نال تعلق رکھدے سن۔ اپنے اجداد دے علاقے نال محبت اک فطری امر اے۔ اوہناں دے اک قلمی نسخے وچ آغا شورش کشمیری دا ایہ شعر لکھیا اے جو اوہناں دے ایس احساس دی عکاسی کردا اے (7):

ہے ارض کشمیر سے اک نسبت قدیم
گو واں نہیں، پہ واں کے نکالے ہوئے تو ہیں

میاں محمد شفیع دا گھر حالے وی اوتھے ای ہے جتھے اوہناں دے اجداد آباد ہوئے۔ اوہ تھان ”ڈھوک محمود“ دے نال مشہور اے۔ حافظ صالح محمد دے پوتے ”میاں سید محمد چشتی“ اک صوفی درویش ہون دے نال صاحب طرز پنجابی شاعر وی سن۔ اوہناں دے وڈے بیٹے داناں ”میاں محمد عظیم“ تے چھوٹے داناں ”میاں خدا بخش“ (میاں خدا بخش برٹش آرمی وچ ملازم رہے اور 1956ء وچ فوت ہوئے)۔ میاں محمد عظیم ایس مقالے دے مرکز تے محور میاں محمد شفیع دے والد سن۔ حافظ صالح محمد اک عالم دین سن۔ مذہب نال وابستگی اوہناں دی اولاد نوں، اوہناں ولوں ورثتی طور تے ملی جس دے اثرات کئی پشتاں بعد اراج وی مشاہدہ کیتے جاسکدے نیں (5)۔

1.1- میاں سید محمد چشتی:

میاں سید محمد چشتی (1827ء-1907) دے والد داناں میاں محمد ہاشم سی۔ آپ دا پنجابی کلام ”سی حرفیاں میاں سید محمد چشتی“ دے سرناویں پیٹھ 2017ء وچ بزم تخلیق

و تحقیق، اسلام آباد نے شائع کیا، جس دی تدوین دی سعادت راقم نوں حاصل ہوئی۔ مذہب نال لگاؤ اوہناں نوں ورثے وچ ملیا سی۔ اوہ حضرت غلام حیدر شاہ چشتی نظامی دے مرید سن۔ اوہناں دی ساری حیاتی تصوف و طریقت وچ گزری۔ درویش صفتی تے قناعت پسندی اوہناں دی شخصیت دا خاصہ سی۔ اوہناں ساری حیاتی اللہ، رسول صلی اللہ علیہ وسلم اور مرشد دی اطاعت تے محبت وچ گزار دی۔ میاں سید محمد چشتی دیاں کجھ سی حرفیاں، اوہناں دے پوتے میاں محمد شفیع اختر ڈھاگروی نے اپنے قلمی نسخے ”ارمغانِ چشتی“ وچ محفوظ کیتیاں سن (تے کجھ کلام منتشر صورت وچ اوہناں دے عزیزاں کولوں حاصل ہو یا اے)۔ میاں محمد شفیع ایہناں سی حرفیاں دے اخیر وچ لکھدے نیں:

”ناظرین باتمکین! یہ مجموعہ اشعار موسوم بہ تحفہ سید محمد چشتی حیدری مرحوم ساکن بھیت کا ہے۔ کیونکہ جناب ممدوحؒ اُمّی محض تھے اور شعر اُس والہانہ عشق کے ماتحت کرتے تھے۔ جو انہیں حضرت خواجہ غریب نواز پیر غلام حیدر علی شاہ صاحب جلال پور شریف کے ساتھ تھا۔ سوز اور گداز جوان کے اشعار میں پایا جاتا ہے۔ یہ اُس پاک اور بے لوث محبت کا صدقہ ہے جو انہیں اپنے پیرِ کامل کے ساتھ تھا۔ زیادہ تر اشعار آپ کے برادر زادہ میاں محمد طیب مرحوم ولد میاں غلام مصطفیٰ نے قلم بند کیے۔ پھر وہ نسخہ ضائع ہو گیا۔ جو کہ بڑی مشکل کے ساتھ دستیاب ہوا۔ یہ اس ناچیز کی کوشش کا نتیجہ ہے جو کہ پیش نظر ہے۔ جناب ممدوحؒ نہایت سادہ زندگی بسر کرتے تھے۔ حضور خواجہ غریب نواز جلالپوریؒ سے ایک سال پیشتر فوت ہوئے۔ ۱۳۲۵ھ جمادی الاول کے آخری عشرہ میں اس دنیا فانی سے رحلت کی۔“ (6)

میاں سید محمد چشتی دیاں سی حرفیاں صوفیانہ فکر دیاں آئینہ دار نیں۔ نمونہ کلام:

ظ: ظاہراں ویکھ لو پیر میرے جھنڈا وِچ جلاپور لایا اے
رل کے عالماں فاضلاں ساریاں نے، ہتھ بن کے سیس نوایا اے
سچا دین رسول مقبولؐ والا، خواجے پیر مینوں سکھلایا اے
گلے پاک دی مہر لگا سیدن دَم دَم میں یار پکایا اے (7)

.....

خ: خواہش سرکار نوں جدن ہوئی گن آکھنے نال جہان کیتا
کیتا اپنے نور تھیں آپ نبی وِچ دوہیں جہانیں سلطان کیتا
مومنو مومنو دین رسولؐ والا جھنڈا جس دا لال نشان کیتا
سیدن اس دربار دا منگتا میں جیندی خاطر زمیں آسمان کیتا (8)

.....

ب: بہت وڈیا یا سی رب سچے جس دا نور ظہور مشہور ہویا
سمھنا انبیا دا سرتاج نبیؐ جس دی خاطر بیت المعمور ہویا
ترے سے کٹھ مرسل ہو رہی سارے سرورؐ جیہا نہ کوئی مشہور ہویا
لگی پریت نوں توڑ نہ مول سیدن جیہو خاص جناب منظور ہویا (9)

میاں محمد شفیع اختر ڈھاگرو دی اپنے دادا میاں سید محمد چشتی نال بہت عقیدت رکھدے سن۔ میاں محمد شفیع نوں ہمیشہ ایس گل دا دکھ رہیا کہ اوہناں دے دادا جی اوہناں دی پیدائش توں پہلے ہی فوت ہو گئے اور اوہ اپنے دادی جی دی شفقت توں محروم رہے۔ میاں محمد شفیع باقاعدگی نال میاں سید محمد چشتی دی قبر تے حاضری دیندے سن۔ اپنے روزنامے وِچ تحریر کردے نیں (10):

”برمرقد حضرت جد امجد میاں سید محمد چشتی مرحوم بتاریخ ۱۲۸ اگست

۱۹۳۷ء مندرجہ ذیل بیت تحریر کردم (اختر)

س: سنا ایں کیوں خاموش ہو کے ذرہ کھول پردہ دسیں جھات بابا
اسیں تہنڈے دید نوں ترس مومے کدی نال ساڈے کردیوں بات بابا

ساڈے بھاء دا چن غروب ہویا وے جگ اندھیرڑی رات بابا
محمد شفیع گئیوں سینہ سل میرا لا کے غماں والی گجھی کات بابا“

2- میاں محمد شفیع اختر ڈھاگرووی دے والدین:

میاں سید محمد چشتی دے وڈے صاحبزادے میاں محمد عظیم 1875ء نوں بھیٹ
(ڈھاگرووی مرزا) ضلع جہلم وچ پیدا ہوئے۔ میاں محمد عظیم وی اپنے والد میاں سید محمد چشتی
دے نقش قدم تے چل دیاں ہوياں سلسلہ چشتیہ دے بزرگ حضرت غلام حیدر شاہ دے
مرید ہوئے۔ اوہ اپنے سکے چچا میاں غلام مصطفیٰ دی بیٹی معصومہ بی بی (پیدائش: 1878ء)
نال رشتہ ازدواج وچ منسلک ہوئے۔ معصومہ بی بی دے پیکے وی ڈھوک محمود داخلی
ڈھاگرووی مرزادے و سنیک سن۔ معصومہ بی بی دا اک ای بھائی سی جس دا نام ”نیک محمد“
سی۔ 7 فروری 1924ء نوں نیک محمد دی وفات نال میاں سید محمد چشتی دے چھوٹے بیٹے
میاں غلام مصطفیٰ دی لڑی ختم ہو گئی۔ میاں محمد عظیم تے معصومہ بی بی دیاں دو بیٹیاں (برکت
بی بی، زہنب بی بی) تے دو بیٹے (محمد شفیع تے عبدالغنی) پیدا ہوئے۔ ”محمد شفیع“ ایس مقالے
دا موضوع نیس۔ تے دو جانیٹا عبدالغنی چھوٹی عمر وچ ای فوت ہو گیا سی۔ میاں محمد شفیع دی
والدہ معصومہ بی بی اک سادہ طبیعت، شفیق تے خدا ترس خاتون سن۔ میاں محمد عظیم دی
وفات 18 دسمبر 1958ء نوں ہوئی جب کہ معصومہ بی بی نے 8 مئی 1947ء وچ وفات
پائی (11)۔

3- میاں محمد شفیع اختر ڈھاگرووی دی پیدائش:

میاں محمد شفیع اختر ڈھاگرووی دی پیدائش ڈھوک محمود، داخلی ڈھاگرووی مرزا وچ
ہوئی۔ قومی شناختی کارڈ اور پاسپورٹ دے مطابق اوہناں دی تاریخ پیدائش 03 مئی
1910ء اے۔ جب کہ اوہ خود اک تحریر وچ اپنی تاریخ پیدائش دے متعلق انج جانکاری
دیندے نیس:

”29 ستمبر 1909ء بروز اتوار میری تاریخ پیدائش ہے۔ اور یہ مولوی عبدالعزیز ولد محمد شاہ ساکن رہانہ متصل رہتاس نے اپنے پاس تحریر کی ہوئی تھی۔ جبکہ وہ بمقام بھیٹ سکول ماسٹر تھے۔ اور جہلم سرکاری سول سرجن کے کاغذات میں یکم اکتوبر 1909ء درج ہے۔ اور سکول کے شوقیلیٹ پر 3 مئی 1910ء کا اندراج ہے۔ اسی پر بعد کے سرکاری دستاویزات میں عمل درآمد ہوتا چلا آ رہا ہے۔“ (12)

اُپر والی تحریر 1956ء دی اے۔ جب کہ میاں محمد شفیع نے اپنے روزنامے وِج 29 اکتوبر 1937ء نوں اپنی سالگرہ دادن لکھیا اے:

”آج میری اٹھائیسویں سالگرہ ہے۔ اللہ کریم کا فضل و کرم شامل ہو۔“ (13)

رونامچہ (جلد پنجم) وِج 29 اکتوبر 1938ء نوں اپنی اُتویں سالگرہ تسلیم کردے نہیں:

”یہ میری عمر کا آج اُتیسواں سال ختم ہوتا ہے۔ اور یہ دن میری پیدائش کا ہے۔“ (14)

ایس توں علاوہ میاں محمد شفیع دے قلمی نسخے ”حدیثِ غم“ صفحہ 266 اُتے 29 اکتوبر 1940ء نوں اپنی سالگرہ دے موقع تے فارسی نظم ”تاسف بر عمر رفتہ“ لکھی اے (15)۔ میاں محمد شفیع نے ”مجموعہ اشعار پنجابی“ دے ابتدائی صفحات وِج اپنے خاندان دے افرادی فہرست مرتب کیتی اے۔ جس وِج اپنی تاریخ پیدائش یکم اکتوبر 1909ء تحریر کیتی اے جس دے بارے اوہ آپ ہی دسدے نیں کہ یکم اکتوبر والی تاریخ پیدائش دا اندراج جہلم سول سرجن دے کاغذات وِج اے۔ 1956ء یا اُس توں بعد دیاں لکھتاں وِج اوہناں اپنی تاریخ پیدائش 29 ستمبر 1909ء لکھی اے۔ ”گنجینہ اسرار“ وِج میاں محمد شفیع

نے اپنی تاریخ پیدائش 29 اکتوبر 1909ء تحریر کی تھی اے جس نوں قلم زد کر کے 29 ستمبر 1909ء لکھیا گیا اے (16)۔ ممکن اے اوہناں نوں پرکھ پرچول توں بعد اصل تاریخ پیدائش دا پتہ لکھیا ہووے۔ 1956ء توں بعد دیاں تحریراں وچ اپنی تاریخ پیدائش 29 ستمبر 1909ء ہی لکھی اے۔ ایس لئی اسیں میاں محمد شفیع دی اصل تاریخ پیدائش 29 ستمبر 1909ء ہی تسلیم کراں گے۔

4- تعلیم تے پیشہ:

میاں محمد شفیع اختر ڈھانگروی دیاں لکھتاں چوں حاصل ہوئی جا نکاری موجب اوہناں نے پرائمری سکول بھیٹ وچ اپنی تعلیم دا آغاز کیتا۔ اوہناں دے پہلے استاد مٹی محمد مالک (قوم گوجر ساکن باگڑیاں) سن۔ چھویں جماعت تک اوہناں بھیٹ وچ ہی تعلیم حاصل کیتی۔ چھویں جماعت توں بعد 1922ء نوں اختر ڈھانگروی مڈل سکول دو میلی وچ داخلہ لیا۔ اُس دور دے سیاسی حالات توں متاثر ہو کے میاں محمد شفیع تعلیم دا سلسلہ جاری نہ رکھ سکے۔ ایس بارے لکھدے نیں:

”۔۔۔۔۔ ان دنوں تحریک خلافت زوروں پر تھی۔ میری رہائش شہر کے محلہ میں تھی۔ یہاں روز جیسے جلوس نکلتے جس میں سرکاری ملازمتوں اور سکولوں کی تعلیم سے بائیکاٹ پر زور دیا جاتا۔ اور میں بھی ان لوگوں کے بھرے میں آ گیا۔ اور سکول کی تعلیم سے دل اچاٹ ہو گیا۔ غیر حاضری کا بھی عادی ہو گیا۔ آخر میں نے سکول چھوڑ دیا“۔ (17)

ایس توں بعد میاں محمد شفیع دینی تعلیم حاصل کرن لئی اپنے والد دے پھوپھی زاد بھائی مولوی عبد المجید ولد فتح دین ساکن پڑی درویشہ کول چلے گئے۔ مولوی صاحب چکوروہ وچ درس دیندے سن۔ اوتھوں بنیادی مذہبی تعلیم حاصل کرن مگروں میاں محمد شفیع جلاپور

شریف مرشد خانے تے چلے گئے۔ صاحبزادہ سید محمد محمود شاہ نے اوہناں نوں اپنے نال رکھ لیا تے گھر دے سامان اور پیسہ نقدی دی تمام ذمہ داری اوہناں نوں سونپ دتی۔ میاں محمد شفیع ابس ذمہ داری نوں اپنے لئی اک اعزاز سمجھدے سن۔ میاں محمد شفیع 1928ء دے اخیر تک جلاپور رہے، فیرواپس بھیٹ آگئے۔ 16 جنوری 1929ء نوں کئی سال دے وقفے بعد ستویں جماعت وچ داخلہ لے کے دوبارہ تعلیم دا آغاز کیتا تے 1930ء وچ اوہناں مڈل دا امتحان پاس کر لیا۔

4.1۔ ملازمت بطور نائب مدرس:

1930ء وچ میاں محمد شفیع نے مڈل دا امتحان پاس کیتا تے نال ای خان عبدالرحیم خاں، اے ڈی آئی سکولز جہلم نے اوہناں نوں بھیٹ سکول وچ نائب مدرس تعینات کر دتا۔ تقریباً دو سال نائب مدرس دی ملازمت توں بعد میاں محمد شفیع نوں ایہ ملازمت چھڈنی پئی کیوں جے اوہناں دی عمر پنجی (پچیس) سال توں زیادہ ہو چکی سی۔ تے نارل سکول لالہ موسیٰ وچ اوہناں دا ٹیچر زٹرینگ لئی داخلہ وی نہیں سی ہوسکدا (18)۔

4.2۔ محکمہ ڈاک وچ ملازمت:

ستمبر 1932ء وچ صاحبزادہ سید محمود شاہ نے جہلم وچ سپرنٹنڈنٹ دی حیثیت نال چارج سنبھالیا تے اوہناں میاں محمد شفیع نوں خود بلوا کے محکمہ ڈاک وچ چٹھی رساں دے طور تے بھرتی کروا دتا۔ 29 ستمبر 1932ء نوں اوہناں دا ضمانت نامہ مکمل کیتا گیا تے 22 دسمبر 1932ء نوں محکمہ ڈاک وچ اوہناں دی ملازمت دا آغاز ہویا۔ 1956ء تک میاں محمد شفیع چٹھی رساں دی حیثیت نال ملازمت کیتی۔ جون 1956ء وچ اوہناں نوں کیش اوورسیئر دی ذمہ داری عارضی طور تے سونپی گئی۔ 21 جون 1961ء وچ میاں محمد شفیع نوں کیش اوورسیئر دے عہدے تے مستقل کر دتا گیا۔ میاں محمد شفیع 03 مئی 1970ء نوں تقریباً 38 سال دی ملازمت توں بعد ریٹائر ہوئے (19)۔

4.3۔ جلد سازی:

جلد سازی میاں محمد شفیع دامستقل ذریعہ معاش تے نہیں سی لیکن کافی عرصے تک ایہ کم اوہناں دی اضافی آمدنی دا باعث بنیا رہیا۔ مسجد اں وچ رکھے ہوئے قرآن تے اپنے مرشد خانے دی لائبریری دیاں کتاباں اُتے چلداں کرن دا اوہناں نوں بڑا شوق ہوندا سی۔ کتاب نال میاں محمد شفیع نوں بہت محبت سی۔ ایسے لئی اوہ کتاب دی حفاظت دا التزام بڑے شوق نال کردے سن۔ میاں محمد شفیع نے اپنیاں تمام تصنیفاں نوں آپ ہی کاغذ خرید کے تے جلد کر کے کتابی شکل دتی اے۔ جلد سازی اوہناں دا اضافی (part time) ذریعہ معاش سی: ایس حوالے نال اوہناں دا اک شعر پیش ہے (20):

دب گیا ہے جلد سازی میں مرا ذوق سلیم
پیٹ کا دھندہ ادب پر میرے غالب آ گیا

5۔ ازدواج تے اولاد:

میاں محمد شفیع اختر ڈھانگروی دا ویاہ 23 اگست 1930ء نوں موضع مار دے وسنیک میاں محمد ابراہیم دی صاحبزادی ”فاطمہ بی بی“ نال ہو یا (21)۔ فاطمہ بی بی اک سادہ، گھریلو تے دیندار خاتون سن۔ فاطمہ بی بی دی تاریخ پیدائش 8 اگست 1917ء اے جب کہ اوہناں 7 اگست 1978ء نوں اکاٹھ سال دی عمر وچ وفات پائی۔ میاں محمد شفیع نے اوہناں دی وفات دا مادہ تاریخ انج کڈھیا اے:

☆ دگر سال رحلت بگویم ترا ... جد فاطمہ شد ز آغوش من/ 1397ھ

☆ بی بی فاطمہ بی نیک خاتمہ رفت/ 1977ء

☆ یو دا غریق رحمت/ 1977ء، ہم زہے غفران مآب/ 1397ھ (22)

میاں محمد شفیع نوں فاطمہ بی بی دی وفات دا بہت گہرا صدمہ ہو یا۔ اک وجہ تے ایہ سی کہ دوواں دا تقریباً ادھی صدی دا ساتھ سی۔ تے دوجی وجہ ایہ بنی کہ میاں محمد شفیع اپنی

شریک حیات دی وفات ویلے گھر موجود نہیں سن۔ اوہ جلاپور شریف اپنے مرشد خانے تے گئے ہوئے سن۔ اوہناں دی غیر موجودگی وچ فاطمہ بی بی اللہ نوں پیارے ہو گئے۔ اُس زمانے وچ موجودہ دور دی طرح موبائل تے ٹیلیفون جیہاں سہولتاں نہیں سن۔ ایس کارن اوہناں نوں بروقت اطلاع نہیں مل سکی۔ میاں محمد شفیع اپنی شریک حیات فاطمہ بی بی دے آخری دیدارتوں محروم رہے۔ اپنے ایس دکھ دا اظہار میاں محمد شفیع نے انج کیا اے (23):

س: سَت اگست دِل خست میرا مری وسدی جھوک اجاڑ گئی
لانو لائیکے درد جدائیاں دے رخت صبر قرار دے ساڑ گئی
اچن چیت آ بخت کرخت ہوئے اڈ کونج جیوں طرف پہاڑ گئی
محمد شفیع اس غم تھیں نم اکھیں کبھی بلم کلیجے گڑ گئی

.....

و: ورہے چھ ماہیاں گذر جاسن کس فاطمہ تڈھ نوں یاد کرنا
قیدی جسم وچ گور دے قید خانے پہلے حشر تھیں کس آزاد کرنا
کتے بیٹھ نویکلے وچ گوشے تیری یاد وچ پیا فریاد کرنا
محمد شفیع میاں وچ خواب آ کے میری روح ناشاد نوں شاد کرنا

.....

الف: ایہ افسوس نہ عمر جاسی ہتھیں اپنے کیتی نہ ٹور تیری
پرہی نہیں نماز اخیر تیری ہتھیں اپنی کھٹی نہ گور تیری
اچن چیت نہ دتوئی بھیت کوئی کئی موت نے آن کے ڈور تیری
محمد شفیع کے عامان نوں خبر اس دی میرے نال آہی گل ہو تیری

میاں محمد شفیع تے فاطمہ بی بی نوں اللہ تعالیٰ دس بیٹیاں تے اک بیٹے نال نوازیاء۔ میاں محمد شفیع دے اپنے قلمیں مرتب کیتی گئی فہرست دے مطابق، اوہناں دی اولاد دی تفصیل انج اے:

☆ شفیعہ بیگم المعروف محمد بی: پیدائش: 14 جولائی 1932ء / وفات: 31 اگست 2002ء

☆ زکیہ بیگم: پیدائش: 29 نومبر 1934ء	وفات: 21 اپریل 1999ء
☆ رفیعہ بیگم: پیدائش: 31 اکتوبر 1936ء	وفات: 25 جنوری 2014ء
☆ حمیدہ بیگم: پیدائش: 6 نومبر 1940ء	وفات: 3 دسمبر 1941ء
☆ حمیدہ بیگم: پیدائش: 18 دسمبر 1942ء	وفات: 2 جولائی 2005ء
☆ شمیم اختر: پیدائش: 18 فروری 1945ء	وفات: 26 فروری 1945ء
☆ بی بی مقصودا اختر: پیدائش: 25 جون 1946ء	وفات: 7 اکتوبر 1948ء
☆ میاں عبدالرشید: پیدائش: 19 اپریل 1948ء	بقید حیات
☆ مقبول بیگم: پیدائش: 23 نومبر 1950ء	بقید حیات
☆ عزیزہ بیگم: پیدائش: 23 دسمبر 1952ء	وفات: 30 دسمبر 1952ء
☆ فریدہ بیگم: پیدائش: 4 جنوری 1955ء	بقید حیات (24)

5.1 - میاں عبدالرشید:

میاں عبدالرشید، میاں محمد شفیع دے اکلوتے صاحبزادے تے اولاد وچ اٹھویں نمبر تے نیں۔ اوہناں دی پیدائش سٹاں بیٹیاں توں بعد 19 اپریل 1948ء نوں ہوئی۔ میاں محمد شفیع دی اک نظم جہڑی بیٹے دی پیدائش تے لکھی گئی (25):

سُت بساکھ جمادی الثانی نو تاریخ حسابوں
تے اپریل مہینہ اُئی ہويا کرم جنابوں
دو شنبہ دن برکت والا وقت فجر دے بھائی
کیستی عبدالرشید پیارے قدم رنجہ فرمائی
رانج سن عیسیٰ دا آہا اُئی سو اٹھتالی
تیراں سو تے اڑسٹھ ہجری کرم کیتا رب والی
سٹاں دھیاں مچھوں کیستی رب غریب نوازی
منگاں رب رحیم کریموں اس دی عمر درازی
یا رب نیک ہووے ایہ بیٹا نالے کرماں والا
یارب توہیں اس دا حافظ ناصر تے رکھوالا

چالیس سال سی عمر مری جد مہر مولا فرمائی
دل دی کلی شگفتہ ہوئی رحمت واگ ولائی
میاں شفیع منگ مولا کولوں ہر دم نیک دعائیں
عزتاں پاوے نیک اعمالوں اندر دوہیں سرائیں

میاں عبدالرشید نے ابتدائی تعلیم توں بعد قائد اعظم یونیورسٹی اسلام آباد وچ پنجی سال بطور ڈپنسر ملازمت کیتی۔ اوہناں دا ویاہ اپنی خالہ ”حیات بی بی“ دی صاحبزادی ”امینہ بیگم“ (پیدائش: 2 جنوری 1947ء) نال اپریل 1972ء وچ ہويا۔ میاں عبدالرشید دے چار بیٹے اظہر رشید، مظہر جمیل، بدر سہیل، مدر فاروق تے اک بیٹی صوفیہ رشید اے۔ چاروں بیٹے بھارہ کہو اسلام آباد وچ رہندے نیں جب کہ بیٹی، عثمان شریف نال ویاہ توں بعد دو میلی ضلع جہلم وچ آباد اے۔ میاں عبدالرشید وی اپنے اجداد دی طرح آستانہ عالیہ جلاپور شریف نال وابستہ نیں۔ درویش صفت انسان نیں۔ عجز، انکسار تے قناعت پسندی اوہناں دی شخصیت دا خاصہ اے۔ ریٹائرمنٹ توں بعد ہُن اپنے آبائی علاقے بھٹ (ڈھانگری مرزا) وچ گوشہ نشینی دی زندگی گزار رہے نیں (26)۔

6۔ آستانہ عالیہ جلاپور شریف نال وابستگی:

جلاپور شریف تحصیل پنڈدادنخان ضلع جہلم دا اک قصبہ اے۔ جلاپور شریف حضرت غلام حیدر علی شاہ (1838ء..... 1908ء) دی نسبت نال پوری دنیا وچ شہرت رکھدا اے۔ حضرت غلام حیدر شاہ، خواجہ شمس الدین سیالوی دے مرید تے پیر مہر علی شاہ دے پیر بھائی سن۔ آستانہ عالیہ جلاپور شریف دی بنیاد اوہناں نے رکھی (27)۔ چشتیہ نظامیہ سلسلے دی ایس بزرگ ہستی توں بعد اوہناں دے صاحبزادے سید محمد مظفر علی شاہ (1862ء..... 1917ء) سجادہ نشین ہوئے۔ اوہناں توں بعد پیر سید محمد فضل شاہ آستانہ عالیہ جلاپور شریف دے سجادہ نشین بنے (28)۔

میاں محمد شفیع اختر ڈھاگرو دی دے دادا میاں سید محمد چشتی حضرت غلام حیدر علی شاہ دے مرید سن۔ آستانہ عالیہ جلاپور شریف نال وابستگی اوہناں دی اولاد نے وی قائم رکھی۔ میاں سید محمد چشتی نے اپنے بیٹے میاں محمد عظیم نوں حضرت غلام حیدر شاہ دے ہتھ بیعت کرایا۔ فیرمیاں محمد عظیم نے وی اپنی ایس خاندانی روایت نوں قائم رکھیاتے اپنے بیٹے میاں محمد شفیع نوں اپنے مرشد خانے لے گئے۔ میاں محمد شفیع نے 6 جمادی الثانی، 1337ھ بمطابق 11 مارچ 1919ء نوں سید محمد فضل شاہ دے ہتھ بیعت دی سعادت حاصل کیتی۔ اُس ویلے اوہناں دی عمر 9 سال سی۔ میاں محمد شفیع ایس بارے لکھدے نیں:

”پوتھی جماعت کے امتحان کے بعد میں اپنے والد صاحب کے ہمراہ جلاپور شریف قبلہ حضرت صاحب کے عرس پر حاضر ہوا۔ اور جناب حضرت صاحب کے سجادہ نشین سید محمد فضل شاہ صاحب سے

بیعت ہوئی۔“ (29)

میاں محمد شفیع نے روحانی فیض سید محمد فضل شاہ کولوں حاصل کیتا۔ میاں محمد شفیع دے صاحبزادے میاں عبدالرشید نے وی اپنی خاندانی روایت نوں قائم رکھیا ہویا اے۔

6.1۔ پیر سید محمد فضل شاہ جلاپوری:

پیر سید فضل شاہ جلاپوری رحمۃ اللہ علیہ 4 جمادی الاول 1312ھ بمطابق ماہ نومبر 1894ء بروز شنبہ سید مظفر شاہ دے گھر جلاپور شریف تحصیل پنڈا دخنان ضلع جہلم وچ پیدا ہوئے۔ آپ سید غلام حیدر علی شاہ دے پوتے سن تے اوہناں دے ہی دست مبارک تے بیعت د اشرف حاصل کیتا اور خلافت نال سرفراز ہوئے۔ اوہناں عارفانہ روایات توں علاوہ اصلاح معاشرہ اور برصغیر دے مسلماناں نوں بیدار کرن واسطے وی اہم کردار ادا کیتا۔ سید محمد فضل شاہ دے دوسرے وڈے کارنامیاں وچ سب توں وڈا تے اہم کارنامہ جماعت ”حزب اللہ“ دا قیام سی۔ ایس جماعت دا قیام 30 دسمبر 1927ء نوں سید غلام حیدر علی شاہ

دے عرس دے موقع تے عمل وچ لیا گیا۔ تمام علما تے مشائخ دی موجودگی وچ اتفاق رائے نال سید فضل شاہ نوں ”امیر حزب اللہ“ تسلیم کیتا گیا (30)۔ حزب اللہ اک اصلاحی تحریک سی جسدا مقصد نہ تے انگریزاں یا ہندوواں دی مخالفت کرنا سی اور نہ ہی کسی فرقے دی حمایت یا مخالفت۔ حزب اللہ دا مقصد مسلماناں دی ذہنی، معاشرتی، تمدنی، اقتصادی، عملی تے اجتماعی زندگی وچ مثبت انقلاب برپا کرنا سی۔ ایہ اک متحرک اور فعال تنظیم سی جس دے ہزاراں رضا کار ہر ویلے اصلاحی کماں واسطے تیار رہندے سن (31)۔

میاں محمد شفیع اختر ڈھانگری اپنے مرشد سید محمد فضل شاہ نال بہت محبت و عقیدت رکھدے سن۔ اوہناں دی شاعری وچ مرشد دی مدح تے عقیدت دا بیان بہت زیادہ ملدا اے۔ میاں محمد شفیع دے اپنے مرشد دے حوالے نال چند اشعار بطور نمونہ پیش کیتے جاندے نیں (32):

دھن دھن بھاگ بھاگ جنہاں دا خوبہ پیر جلالی ہے
سید سخی کرامت والا حسبوں نسبوں عالی ہے
پیر مرے سر تاج نورانی ظل اللہ مقبول ربانی
خلق مروت عین محمدی واہ وا عکس کمالی ہے
پیر فضل شاہ فضل الہی جگ وچ جاری فیض کمالی
آون لوک مراداں پاون وقت نہ کوئی خالی ہے

سید فضل شاہ نے یکم دسمبر 1966ء نوں ایس دنیا توں چلانا کیتا۔ میاں محمد شفیع نے اوہناں دی تاریخ وفات انج لکھی:

بگوسال فوت گرامی قدر :: زے ”فیض سید محمد فضل“ / 1966ء

میاں محمد شفیع اپنے مرشد پیر سید محمد فضل شاہ دے بہت قریب سن۔ مرشد تے مرید دی قربت دا اندازہ کئی سو خطوط دی دستیابی نال چنگی طرح ہو جاند اے۔ میاں محمد شفیع نے

اپنے مرشد دے خطوط اپنے کول الہم دی صورت و بیج جمع کیے سن۔ جیہڑے اج وی اوہناں دے صاحبزادے میاں عبدالرشید کول محفوظ نیں۔ کئی مرید ایسے ہوندے نیں جیہناں دا مقصد دنیاوی حرص تے لالچ ہوند اے جس پاروں اوہ اپنے مرشد دے اگے کچھ بھڑ دے نظر آندے نیں۔ لیکن میاں محمد شفیع دا مقصود تے منزل کچھ ہوری۔ اوہ تے راہ حقیقت دے مسافرن۔ اوہناں دی اپنے مرشدناں خط و کتابت بہت زیادہ رہی۔ اوہناں دے مرشد وی اوہناں دی طلب تے باطن دی سچائی دے پیش نظر خصوصی شفقت دا مظاہرہ کر دے سن۔ سید محمد فضل شاہ دے چند خطوط و چوں اکتباسات پیش نیں جیہناں نوں پڑھن توں بعد ایہ گل واضح ہو جاندی اے کہ میاں محمد شفیع اپنے مرشد دی نظر و بیج کوئی عام مرید نہیں سن۔ اور مرشد تے مرید دوویں اک دو جے دے حالات توں باخبر رہندے سن:

نائب مدرس دی ملازمت ملنے دے موقع تے:

”ہمیں یہ معلوم کر کے کہ آپ کو بھیٹ کے سکول میں ملازمت کی جگہ مل گئی ہے، خوشی ہوئی۔ دعا ہے کہ خداوند کریم آئندہ بھی آپ کو دینی و دنیاوی معاملات میں کامیابی نصیب فرمائیں۔“

(26 جولائی 1930ء)

میاں محمد شفیع دی بیٹی حمیدہ بیگم دی وفات دے موقع تے:

”آپ کی لڑکی کی فوتیدگی کی خبر معلوم کر کے نہایت ہی رنج و قلق ہوا۔ ہمیں اس معاملہ میں آپ سے دلی ہمدردی ہے۔ دعا ہے کہ خداوند کریم مرحومہ کو غریق رحمت کرے اور پسماندگان کو توفیق صبر جمیل عطا فرمائیں۔ آمین۔“ (15 دسمبر 1941ء)

پیر سید محمد فضل شاہ دی طرفوں اپنی صحتیابی دی خبر:

”ہم عرس مبارک کے بعد بغرض علاج لاہور گئے تھے مگر ۲۲ مئی ۱۹۴۶ کو وہاں سے بخیریت تمام گھر واپس آ گئے ہیں۔ اور اب ہماری

صحت خداوند کریم کے فضل و کرم سے نسبتاً اچھی حالت میں ہے۔ (23 مئی 1946ء)

سید محمد فضل شاہ نال عقیدت تے محبت دے بیان نال میاں محمد شفیع داسارا کلام بھریا پیا اے۔ جس بارے مزید تذکرہ اگلے ابواب وچ کیتا گیا اے۔

7- حلقہ احباب:

میاں محمد شفیع داخلہ احباب بہت وسیع سی۔ اوہناں دے دوستان وچ اکثریت اوہناں دے پیر بھائیاں دی سی۔ میاں محمد شفیع دے قلمی نسخے ”انشائے اختر“ وچ شامل خطوط توں اندازہ ہوندا اے کہ اوہناں دے اہم دوستان وچ مولانا عبد المجید خفقی، تھوٹوی، مولانا عبد المجید کڑی شریف، حافظ نذر حسین شاد فاروقی، خوشی محمد تھوٹوی، عبدالغنی، محمد افضل پھڈیالوی، شیخ محمد عالم بکلیالوی، حافظ بشیر میروی، منظور میروی، حافظ غلام احمد سلوٹی والے اور ماسٹر شرف علی وغیرہ شامل سن۔ انج تے میاں محمد شفیع نوں سارے دوست ہی پیارے سن لیکن اوہناں دیاں تحریراں راہیں معلوم ہوندا اے کہ سب توں ودھ کے عزیز دوست ”مولانا عبد المجید خفقی تھوٹوی“ سن۔

7.1- مولانا عبد المجید خفقی:

مولانا عبد المجید خفقی جہلم دے اک گاؤں تھوٹ دے رہن والے سن۔ مولانا صاحب اک علمی تے ادبی شخصیت سن۔ پنجابی وچ شاعری بہت ودھیا کر دے سن۔ مولانا خفقی دے متعلق جھڑی تھوڑی بہت جانکاری حاصل ہوئی، اوہ صرف میاں محمد شفیع دیاں تحریراں دے ذریعے ممکن ہوئی۔ مولانا خفقی، میاں محمد شفیع دے پیر بھائی سن۔ اوہناں دی اک بیٹی زبیدہ بیگم (گوجرانوالہ وچ مقیم نیں) دے متعلق، اک منظوم خط دے ذریعے جانکاری ملدی اے جو میاں محمد شفیع نے اوہناں نوں مولانا خفقی دی وفات دے موقع دے لکھیا سی (33)۔

عبدالحمید خفقی نال میاں محمد شفیع دی محبت تے عقیدت دا اندازہ اوہناں دی شاعری توں چنگی طرح ہو جاندا اے جہڑی اوہناں اپنے دوست نال محبت تے عقیدت دے اظہار لئی کہتی اے۔ مولانا خفقی تے میاں محمد شفیع دیا رانہ تقریباً سٹھ سال داسی۔ ایس حوالے نال اوہ زبیدہ بیگم نوں اپنے منظوم خط وچ لکھدے نیں (34):

تھ فاتحہ خیر اٹھا منگاں ایسا سنگ ناہیں لہنہار دھیے
سٹھ سال دا سی ساڈا بھائی چارہ، چارہ چلیا نہ آخر وار دھیے
آہی چار جولائی ذی قعد چھیویں ہويا کوچ وچ بیت الاہرار دھیے
سینے داغ جدائی دا لا کے گئے گور پئے کدوں آونہار دھیے
محمد شفیع دی خیر اخیر دے واری اپنی تے چلنہار دھیے
جاپے آخری خط ایہ ہوگ میرا ناہیں زندگی دا اعتبار دھیے

مولانا عبدالحمید خفقی 4 چار جولائی 1987ء نوں فوت ہوئے۔ میاں محمد شفیع دی ”سی حرفی نیازنامہ“ وچ اپنے یالئی محبت تے عقیدت دا کھل کے اظہار کیتا گیا ہے۔ مولانا خفقی پنجابی زبان وچ شاعری کردے سن۔ یٹھ اوہناں دا اک منظوم خط نمونے دے طور تے پیش ہے جو اوہناں جہلم دے معروف پنجابی شاعر ”غلام سرور سرولوی“ (35) دے نام لکھیا سی (36):

”بنام غلام سرور سرولوی شاعر پنجابی۔ ۲ جون ۱۹۳۲ء“

بے ایمان درگاہ تھیں رد ہوئے جہڑے ہون بد بخت بخیل کوئی
کیتی گل نہ حسد بخیلیاں دی رکھ دے وچ غیر دلیل کوئی
ہوندے دولتاں والڑے جگ اندر دنیا دار کنجوس بخیل کوئی
ساڈے بخل تے حسد کنجوسیاں دی کہڑی آپ دے پاس دلیل کوئی
تسیں خوب پیار نکھیر دے او سمجھو غیر جو ہووی خلیل کوئی
سمجھو اس نوں یار پیار والا ہووے جہڑا بد ذات رذیل کوئی
چنگی ویکھ کے خوب دوا دیوہ ہووے غماں تھیں جہڑا علیل کوئی

رکھن کھوٹ اوہ مول نہ وِچ سینے جہڑے اصل تھیں ہون اِصیل کوئی
 معنی پاوندے حسن تے عشق والے غز رمز دے جہڑے قبتیل کوئی
 کیتی مشق سی رشک دے نال میں تے دولت ویکھ کے طرح قبیل کوئی
 کہیا من تساڈڑے ظن بیٹھا ناقص عقل تے فہم قلیل کوئی
 منکت اسیں ساں حُلق پیار والے تساں سمجھیا ڈوم تے بھیل کوئی
 سانوں شوق سی یار محبتاں دا کیتوئی دے دی مول نہ قیل کوئی
 وڈا چاہ سی فیض اٹھاوندے دا تیرے شعر دی ویکھ چھبیل کوئی
 بیبا پرت نہ ڈٹھبوئی طرف ساڈے شوم شامتی اتے بخیل کوئی
 لائیاں پھیریاں وانگ پروانیاں دے تیرے حسن دی ویکھ چھبیل کوئی
 لیا حُلق پیار آزما تیرا ذات راجیاں انت کوڑیل کوئی
 سمجھ پھل گلاب دا ہتھ پایا ناہی سار جے خار مغیل کوئی
 تیرے آن دوار پکار کیتی پاؤ خیر سرکار زنبیل کوئی
 جیویں کیتوئی رو سوال ساڈا دیواں کس دے نال تمثیل کوئی
 حاتم وانگ سخاوتاں ہورناں تے ساڈے بھاہ دے شوم بخیل کوئی
 کھلی رہے تحصیل عوام اُتے ساڈی وار آ پئی تعطیل کوئی
 اساں سمجھیا کھان محبتاں دی ویکھ طبع رکھیل نکیل کوئی
 کسے دل دی تساں نہ گل کیتی سانوں سمجھ حقیر ذلیل کوئی
 رکھ ڈک طیلیاں وِچ اس نوں چاڑ گرد حصار فصول کوئی
 فتوحات ایہ تہہ نصیب ہوون باجھ غیر دے دخل دخیل کوئی
 قسم رب دی محض مزاح آہی سمجھیں غیر نہ ہور تاویل کوئی
 کہوے نال اصول وصول رہیوں باجھ رنج ایہ گنج تحصیل کوئی
 نال غیر دے پان پیار جہڑے ہوون جگ وِچ انت ذلیل کوئی
 عمر بال معصوم نہ بال سینے منزل عشق دی انت طویل کوئی
 شعر شاعری رب دا فضل ہوندا لوک آکھ دے قال تے قیل کوئی
 رکھ ثابتی صدق صفا کامل، ایہدے باجھ نہ ہور سمیل کوئی

بہار مسافرا دُور دیا سدا رہن دی نہیں دلیل کوئی
لٹی چت مجید میں جی دے کے بازی عشق دی باجھ وکیل کوئی

7.2۔ مولانا الحافظ محمد عبدالمجید (کڑی شریف):

مولانا الحافظ محمد عبدالمجید (1962ء-1885ء) کڑی شریف ضلع جہلم دے
وسنیک سن۔ حافظ صاحب، پیر فضل شاہ دے والد پیر حیدر شاہ دے مرید سن۔ اوہ پنجابی،
اُردو تے فارسی دے صاحب طرز شاعر ہون دے نال نال اک جید عالم دین وی سن۔
اوہناں دا کلام ”مناقب الابرار“، ”پنج گنج اسلام“، ”ابر نیساں“، ”معراج نامہ“، ”تذکرۃ
الحسن“، ”جمال حیدری“، ”جھوک مسلم“، ”شائے محمد“ تے ”بہار پریم دی“ دے ناواں نال
شائع ہويا۔ نمونہ کلام (37):

”طلب صادق و ہمت مرداں“

طلب کپی رکھ ہمت کر کے جو لوڑے سو پاوے
چاہے طالب صادق ہووے قدم نہ مول ڈولاوے
ذکر، فکر تے ورد دعائیں دل تھیں نہ بھلاوے
ہر ہر سہاہ نگاہ کرم دی منگے عرض سداوے
گریہ زاری آوے کاری دل دا سوز و دھاوے
”تھہ کم ول دل رکھ صنم ول“ نام دہاندا جاوے
”لوڑن والا رہے نہ خالی“ پاک نبی فرماوے
بھر دامن مقصود مجیدا اوڑک لے گھر آوے

7.3۔ حافظ نذر حسین شاد فاروقی:

حافظ نذر حسین شاد فاروقی (2017ء-1928ء) دا شمار وی میاں محمد شفیع دے
قریبی دوستاں وچ ہوندا اے۔ شاد فاروقی، مولانا الحافظ محمد عبدالمجید دے صاحبزادے
نیں۔ شاد فاروقی ہوراں نوں وی میاں محمد شفیع دی طرح پیر فضل شاہ دے ہتھ تے بیعت دا
شرف حاصل ہويا۔ شاد فاروقی پنجابی، اردو تے فارسی دے شاعر ہون دے نال نال اک
جید عالم دین سن تے مختلف مذہبی موضوعاں تے اوہناں کئی نثری کتاباں وی تصنیف کیتیاں

نہیں۔ اوہناں دا کجھ پنجابی کلام کتابچیاں دی صورت وچ شائع ہو چکیا اے۔ اوہناں دیاں پنجابی کافیاں دی تدوین دا شرف راقم نوں حاصل ہو یا جو ”پریم دوارے مست نظارے“ دے سرناویں پیٹھ 2020ء وچ شائع ہوئیاں۔ ”سوز و سازِ حیات“ دے ناں نال اوہناں دا اُردو مجموعہ کلام 2016ء وچ شائع ہو یا۔ شاد فاروقی دیاں زیادہ تر شعری تے نثری تخلیقات حالے وی غیر مطبوعہ نیں۔ نمونہ کلام (38):

تری چشمِ عنایت مجھ پہ گر اک بار ہو جائے
مری رگ رگ میں روحِ زندگی بیدار ہو جائے
اگر جلوہ نما وہ حسنِ شعلہ بار ہو جائے
تو ہر ذرہ جہاں کا مخزنِ اسرار ہو جائے
بجا ہے! مانتا ہوں زندگی کام کی شے ہے
کروں کیا؟ زندگی سے جو دل بے زار ہو جائے
مجھے محرومیِ تقدیر پر اتنا بھروسہ ہے
نظر ڈالوں چمن پر وادیِ پُر خار ہو جائے
بجا ہے ضبط کی تلقین مگر میں کیا کروں نا شاد
اگر سوزِ دروں کا آنکھ سے اظہار ہو جائے

8۔ میاں محمد شفیع داعمومی علمی استفادہ مطالعہ:

میاں محمد شفیع مطالعے دے بڑے شوقین سن۔ ہر موضوع دیاں کتاباں دا مطالعہ کر دے سن۔ کتاباں پڑھن تے جمع کرن دا اوہناں نوں اتنا جنون سی کہ کتاب کسے کول دیکھدے تاں گھر لے جان دے اور اپنے لئی پوری کتاب دی خود کتابت کر کے کاپی تیار کر لیندے۔ اوہناں دے گھر موجود چھوٹی جیہی لائبریری وچ اوہناں دے اپنے ہتھ نال لکھیاں کئی کتاباں موجود نیں۔ میاں محمد شفیع نوں اگر کسے کتاب وچ کوئی کم دی گل نظر آندی تاں فوراً اپنے کول نوٹ کر لیندے سن۔ اوہناں اپنی ذاتی لائبریری نوں ”رشید یہ لائبریری“ دا نام دتا سی۔

فارسی، اُردو تے پنجابی ادب دیاں کتاباں میاں محمد شفیع دے مسلسل مطالعے وچ رہیاں۔ فارسی، اردو اور پنجابی دے تمام کلاسیکی شاعراں دا اوہناں بڑے گوہ نال مطالعہ کیتا سی۔ زبان و ادب توں علاوہ قرآن، حدیث، تفسیر تے تصوف وی اوہناں دے مطالعے دا خصوصی موضوع رہے۔ علامہ اقبال دے بڑے مداح سن۔ اوہناں دی کوئی وی کتاب اوہناں دے ہتھ لگ جاندی تاں پوری پڑھ کے ہی دم لیندے سن۔ میاں محمد شفیع دے ہتھ نال لکھیاں علامہ اقبال دیاں تقریباً تمام کتاباں اوہناں دی لائبریری وچ محفوظ نیں۔ اوہ اقبال دے شعری آبجگ تے مزاج دے بہت دلدادہ سن۔ فارسی دے شاعراں چوں حافظ شیرازی تے مولانا روم دی ادبی عظمت دے قائل سن۔ پنجابی وچ وارث شاہ، ہاشم شاہ تے میاں محمد بخش توں بہت متاثر سن۔ اوہناں توں علاوہ پنجابی دے تقریباً تمام کلاسیکی شاعر اوہناں دے مطالعے وچ شامل سن۔

9۔ شاعری:

میاں محمد شفیع اختر ڈھاگرووی نے تن زبانیں فارسی، اُردو تے پنجابی وچ شاعری کیتی اے۔ جیہڑ اجذبہ تے خیال جس زبان وچ سہولت نال ادا ہوندارہیا، اُس نوں اُسے طرح ادا کر دے رہے۔ اپنی طبیعت وچ کدی لسانی حد بندیاں نوں دخل نہیں ہون دتا۔ اوہناں دی طبیعت اُردو تے پنجابی دی نسبت فارسی ول زیادہ مائل سی۔ فارسی زبان دے ماہر سن۔ ایہ وجہ اے کہ اوہناں نے اپنی پنجابی شاعری وچ فارسی لفظاں دا بے دریغ استعمال کیتا اے۔ میاں محمد شفیع نے اُردو تے فارسی زبانیں وچ حمد، نعت، غزل تے نظم، جب کہ پنجابی وچ حمد، نعت، غزل، سی حرفیاں، باران ماہ، منقبت، مرثیہ، تے دوہڑے تخلیق کیتے۔ اوہناں دا ایہ کثیر تخلیقی سرمایہ اوہناں دے صاحبزادے کوں قلمی صورت وچ محفوظ ہے۔

میاں محمد شفیع دے پنجابی توں اڈ کلام دا نمونہ پیٹھ دتا جاندا اے۔

اُردو کلام دامنونہ (39):

”ساقی نامہ“

جلا عشق سے تن بدن ساقیا
کہوں کس پہ دل کی جلن ساقیا
شراب محبت پلا ساقیا
مجھے مست اپنا بنا ساقیا
مرے دل سے دوئی مٹا ساقیا
نظر آئے جلوہ ترا ساقیا
رہے یاد مجھکو نہ فردا و دوش
بنا لے مجھے اپنا حلقہ بگوش
جسے لوگ کہتے ہیں دیوانگی
عطا کر مجھے جام فرزانگی
غم عشق سے مجھ کو سرشار رکھ
مجھے دور دنیا سے سرکار رکھ
عطا کر مجھے دردِ دل کی دوا
بسوئی من مست ساغر بڑھا
غم عشق ساقی بڑی چیز ہے
میتھر نہیں ہے یہ شاہوں کو شے
مجھے ساغر عشق سے گھونٹ دے
گلا خامیوں کا مرے گھونٹ دے
بنا لے مجھے اپنا تو ساقیا
مرے نیک دل نیک خو ساقیا
میں چھوڑوں گا ہرگز نہ دامن ترا
ہے جب تک نہیں کام بنتا مرا
ہے وابستگی ضامن اس بات کی
نہ جائے گی خالی صدا آہ مری

کبھی تو اسے رحم آ جائے گا
 مری خستگی دیکھ جب پائے گا
 ترے ہاں نگاہوں کے بٹتے ہیں جام
 زمانے میں ہے ہاں ترا فیض عام
 ہے نسبت سے تیری میرا اشتہار
 وگرنہ میں ہوں اک خدائی خوار
 مرے بندہ پرور اے بندہ نواز
 بجا ہے مجھے ذات پہ تیری ناز
 ذرا اپنی بندہ نوازی دکھا
 نہیں ہوں میں کچھ اس کو کچھ تو بتا
 ہزاروں ہوئے آپ سے فیض یاب
 دیا تو نے چڑیوں کو زورِ عقاب
 مجھے بھی اگر بخش دیتے یہ جام
 یہ ممکن تھا میرا بھی بن جاتا کام
 بہ آں نسبت من کہ ہوں حیدری
 بہ محشر نہ ہو میری پردہ دری
 پلا دے مجھے ساقیا جامِ عشق
 کہ اختر ہے زنجیری دامِ عشق

فارسی کلام دانمونہ (40):

غزل

گنہگارم اگر توبہ کنم از عشق روئے تو
 کہ سجدہ کرد نم باید بجائے قبلہ سوئے تو
 غلط اندیشہ در اجتہاد خویش اے واعظ
 کہ آدم را ضمیرے سوئی حق آمد نہ سوئے تو
 اگر پروانہ سوز و خویش را بر شمع حسن تست
 دگر بلبل بگیر و گل تو دردے ہست بوئے تو

توئی موجود در عالم توئی مشہود بر چشم
 ہر آئینہ در آئینہ جمال ثلث و روئے تو
 نہ از زمزم نہ از کوثر نہ از بادہ نہ از شربت
 نخواہد تشنہ دیگر مگر بجرعہ ز جوئے تو
 توئی آں مست کر دتی زمام از دست بگسستی
 ہنوز آئی و میگوئی نخواہم دید روئے تو
 حسیناں را مجال تاب جلوہ از کجا باشد
 کہ ماہ ہم بر فلک شرمندہ تر از حسن روئے تو
 ازیں بہتر نہ آمد در خیال و فکر و ادراک
 منم خوش کام اختر روز وصل از گفتگوئے تو

9.1 - اصلاح سخن:

میاں محمد شفیع اک طبع زاد شاعر سن۔ اوہناں کسے جگہ اپنے کسے استاد دا تذکرہ
 نہیں کیتا جس کولوں باقاعدہ طور تے اصلاح لئی ہووے۔ میاں محمد شفیع دے صاحبزادے
 میاں عبدالرشید موجب اوہناں کسے نوں شاعری وچ استاد نہیں کیتا۔ البتہ اک تھاتے
 میاں محمد شفیع، محمد حنیف قریشی نو انکوئی کوئی دا ذکر ایس حوالے نال کردے نیں:
 ”۔۔۔۔۔ مجھے پنجابی شعر کہنے کا شوق ہوا۔ اور محمد حنیف قریشی

نو انکوئی جو عمدہ شعر کہتے تھے۔ ان سے معمولی تلمذ ہوا۔“ (41)

میاں محمد شفیع دی عمر پندرہاں یا سولہاں سال سی جدوں محمد حنیف قریشی نو انکوئی نال
 علیک سلیک ہوئی۔ ایہو زمانہ سی جدوں میاں محمد شفیع دی شاعری دا آغاز ہويا۔ اوہناں اکثر
 تھاتوں تے ایس گل دا اعتراف کیتا اے کہ اوہ عروض نال واقفیت نہیں رکھدے۔ ایس
 پکھوں اک جگہ لکھدے نیں:

”ناظرین! یہ ایات جو اس بندہ درگاہِ حیدریہ نے اپنی عقیدت مندی

کی بنا پر وقتاً فوقتاً تحریر کیے۔ اور جنہیں چند بار اپنے مدوح گرامی
[سید محمد فضل شاہ] کو سنانے کا بھی اتفاق ہوا۔ جن کو سن کر حضور نے
وادی بھی دی۔ اور زبان فیض ترجمان سے ارشاد فرمایا ”من ندانم

فاعلاتن فاعلات: شعر می گویم باز آب حیات۔“ (42)

میاں محمد شفیع دی طبع موزوں سی۔ لیکن اوہناں دی شخصیت دا عجز تے انکسار
اوہناں نوں ایس کی دا اعتراف کرن تے مجبور کر داسی۔ ایسے حوالے نال اوہناں دا اک بند
پیش اے (43):

ک: سہند ادراک تے عقل اقل، ناقص فہم نالے معلومات کوئی نہ
نالے علم عروض تھیں ناواقف، جاناں شعر سندی تصریحات کوئی نہ
میم مدح تھیں جان تے ہول طاری، جاناں نقص تے سقم نکات کوئی نہ
محمد شفیع جی نظر حضور دے تھیں، ہو سکے نہ حل، ایسی بات کوئی نہ

9.2۔ تخلص:

میاں محمد شفیع اختر ڈھانگروی دا اصل ناں ”میاں محمد شفیع“ سی جہڑا اوہناں دے
والد نے رکھیا سی۔ اُردو تے فارسی شاعری وچ ”اختر“ تخلص کر دے سن۔ اوہناں پنجابی
شاعری خصوصاً سی حرفیاں وچ اپنا اصل ناں ”محمد شفیع“ استعمال کیتا اے (44)۔ اپنی
تحریریں دے اخیر وچ دستخط دے طور تے وی ”اختر ڈھانگروی“ لکھ دے سن۔ اوہناں
دے قلمی نسخیاں وچ جگہ جگہ پورا ناں ”میاں محمد شفیع اختر ڈھانگروی“ لکھیا ملدا اے۔ میاں
محمد شفیع اپنے روزنامے وچ یکم مارچ 1936ء نوں لکھ دے نیں:

”والد صاحب قبلہ نے میرا نام محمد شفیع رکھا۔ مئی 1929ء میں
تخلصم شرف علی ولد حوالدار فضل احمد ڈھوک صوبہ کانرا مل سکول لالہ
موسیٰ کی آمد پر میں نے اپنا تخلص ”اختر ڈھانگروی“ تجویز
کیا۔“ (45)

میاں محمد شفیع اختر ڈھانگروی نے اپنا قلمی ناں یا تخلص ”اختر ڈھانگروی“ اپنے علاقے ڈھانگری مرزادی نسبت نال تجویز کیتا۔ دیہاتاں وچ سکول ماسٹر تے پوسٹ مین نوں ”منشی“ کہیا جاندا سی۔ ایسے نسبت نال اوہناں نوں مقامی لوگ ”منشی محمد شفیع“ وی آکھدے سن۔ اک مذہبی شخصیت تے عالم دین ہون پاروں اوہناں نوں ”مولوی محمد شفیع“ وی آکھیا جاندا سی۔ پیر سید محمد فضل شاہ وی اپنے خطوط وچ اوہناں نوں ”مولوی محمد شفیع“ ہی لکھدے سن۔ میاں محمد شفیع نے اپنے قلمی ناں اختر ڈھانگروی نال کدھرے کدھرے ”چشتی حیدری“ دا اضافہ وی کیتا اے۔ اوہناں دے سرکاری دستاویزات وچ پورا ناں ”میاں محمد شفیع اختر ڈھانگروی“ لکھیا ملدا اے، جیہڑا اوہناں دے شناختی کارڈ تے پاسپورٹ اُتے وی درج اے۔

10- بیت اللہ دی زیارت:

ہر مسلمان دی سب توں وڈی خواہش ہوندی اے کہ اوہ زندگی وچ کم از کم اک واری خانہ کعبہ اطواف تے اوہناں تھاواں دی زیارت لازمی کرے جتھے جتھے ساڈے نبی صلی اللہ علیہ وسلم دے مبارک قدم جاندے رہے۔ میاں محمد شفیع اختر ڈھانگروی وی تمام عمر بیت اللہ شریف دی زیارت توں شرف یاب ہون دی خواہش کردے رہے۔ جے تڑپ جچی ہووے تاں اللہ دی طرفوں کوئی نہ کوئی وسیلہ ضرور بن جاندا اے۔ میاں محمد شفیع نوں مارچ 1986ء وچ اللہ دے گھر ولوں بلاوا آیا تاں اوہناں عمرہ دی سعادت حاصل کیتی۔ میاں محمد شفیع اپنے ایس مبارک سفر دا تذکرہ اک نعت اندروی کردے نیں (46):

مدینے والڑے آقا دا یارو!
ہے دریائے کرم دا فیض جاری
مرے تے جد کرم آقا دا ہو یا
بجھد اللہ مری بھی آئی واری

بڑی مدتوں دی میری آرزو سی
 عمر اس آرزو دے وچ گزاری
 ہوئے اسباب جاون دے مہیا
 کریمی تے جد آئی ذات باری
 مدینے والے آقا بلایا
 سنی رب نے میری بھی آہ و زاری
 نویں مارچ رجب تھیں چار دن گھٹ
 ٹری دینے شہر ول ساڈی لاری
 بھمد اللہ تعالیٰ رب دے فضلوں
 ہوئی آسان سی منزل ایہ بھاری

11- وفات:

میاں محمد شفیع اختر ڈھانگروی نے صحت مند حیاتی گزاری۔ اوہناں نوں بڑھاپے
 وچ وی کوئی بیماری نہیں سی۔ پیدل چلنا پھرنا اوہناں دا آخر دم تک معمول رہیا اے۔ میاں
 محمد شفیع اپنے مرشد خانے جلاپور شریف گئے ہوئے سن۔ 19 مارچ 1990ء دی شام
 اچانک طبیعت خراب ہوئی تے اپنی بیٹی حمیدہ بیگم دے گھر کالاکو جراں (جہلم) تشریف لے
 گئے۔ ساری رات بخار دی حالت وچ یا تے اپنے بیٹے میاں عبدالرشید دا کچھدے رہے یا
 فیراہ سوال کر دے کہ چھتاں نہیں بچے؟ آخر 20 مارچ 1990ء دی صبح جدوں گھڑیاں چھ
 بجایا تاں پنجابی زبان دے گوشہ نشین تے درویش صفت شاعر میاں محمد شفیع اختر ڈھانگروی
 ایس فانی جہان توں چلانا کر گئے۔ اوہناں دی تجہیز و تکفین اپنے آبائی علاقے بھیت
 (ڈھانگری مرزا) وچ ہوئی۔ اوہناں دی قبر بابا فاضل شاہ دے دربار دے نزدیک، اپنے
 دادا میاں سید محمد چشتی دی قبر دے بالکل نال اے (47)۔

آثار

میاں محمد شفیع اختر ڈھاگروی دی کوئی وی کتاب شائع نہیں ہو سکی۔ اوہناں دا تمام ادبی سرمایہ قلمی نسخیاں دی صورت وچ موجود اے۔ اوہناں دے پنجابی تے اردو فارسی شاعری دیاں کتاباں (قلمی) دی تفصیل الگ الگ دتی جا رہی اے۔ ایہناں ساریاں قلمی نسخیاں دی کتابت میاں محمد شفیع نے اپنے ہتھیں کیتی اے۔

1۔ پنجابی تصانیف (قلمی):

☆	فریاد عاشق	1925ء
☆	کلام اختر ڈھاگروی	1928ء تا 1934ء
☆	ارمغان اختر	1930ء تا 1960ء
☆	انشائے اختر ڈھاگروی	1934ء تا 1987ء
☆	پنجابی غزلاں	1937ء تا 1959ء
☆	مجموعہ سی حرفیاں	1956ء تا 1971ء
☆	ارمغان چشتی	1961ء تا 1980ء
☆	مجموعہ اشعار پنجابی (الف)	1961ء تا 1989ء
☆	وصال امیر حزب اللہ	1966ء تا 1980ء
☆	مجموعہ اشعار اختر (الف)	1970ء تا 1978ء
☆	مجموعہ اشعار اختر (ب)	1970ء تا 1978ء
☆	مجموعہ اشعار پنجابی (ب)	1980ء تا 1987ء
☆	سی حرفی محمد سلیم ولد محمد بشیر	1985ء
☆	نعتیہ کلام	1987ء

2۔ اُردو و فارسی تصانیف (قلمی):

☆	غزلیات معہ دیگر	1930ء
☆	سوزِ عشق	1931ء
☆	نوائے راز	1931ء
☆	بیاضِ اختر (المعروف داستانِ راز)	1932ء
☆	جذباتِ اختر (الف)	1933ء
☆	حدیثِ غم	1939ء
☆	مضرب (جلد اول)	1943ء
☆	مضرب (جلد دوم)	1946ء
☆	تاثرات	1947ء
☆	جذباتِ اختر (ب)	1948ء
☆	تحفہ درویش	1949ء
☆	حرفِ شوق	1949ء
☆	دلِ گداز	1950ء
☆	سبوحِ مے	1954ء
☆	سازِ شکستہ	1960ء
☆	فیضِ سرمدی (الف)	1961ء
☆	چراغِ سحر	1964ء
☆	فیضِ سرمدی (ب)	1966ء
☆	نقشِ آخرین (حصہ اول)	1971ء
☆	حرفِ آخر	1971ء
☆	نقشِ آخرین (حصہ دوم)	1976ء

☆	تازہ خواہی داشتن	1979ء
☆	چراغِ سحر	1984ء
☆	تکمیلِ شوق	1986ء
☆	بلغِ العلّیٰ بکمالہ	1987ء
☆	ملفوظات حضرت امیر حزب اللہ	1947ء
☆	منظوم درود شریف	س۔ن
☆	گنجینہٴ اسرار (روزنامہ)۔ اٹھ جلدیں	

﴿شخصیت﴾

عام طور پر انسان دے ظاہری قد کاٹھ سے نین نقشے نوں اس دی شخصیت سمجھیا جاندا اے۔ جب کہ شخصیت انسان دے ذہن یا فکری عکاس ہوندی اے۔ انسان دا چال چلن تے روزمرہ دے معمولات توں اُس دی شخصیت دا اندازہ ہو جاندا اے۔

1۔ سراپا تے معمولات:

میاں محمد شفیع دارنگ گندمی، اکھیاں روشن تے لمیاں، رخسار بھرے بھرے، لمبا نک، تے چوڑی پیشانی سی۔ چہرے تے گھنی لمبی داڑھی سی۔ جو بڑھاپے وچ بالکل سفید ہو چکی سی۔ سفید داڑھی نال اوہناں دے چہرے دی نورانیت ہو روی اگھڑویں ہو گئی سی۔ آپ دادر میانہ قد تے سڈول جسم سی۔ محکمہ ڈاک وچ ملازمت دی وجہ توں ساری عمر پیدل چلن دا معمول رہیا۔ ایس لئی جسمانی طور تے صحت مند سن۔ بچی اکھ تھلے زخم دا نشان سی۔ ہمیشہ ہلکے رنگ دے کپڑے پسند کردے سن۔ زیادہ تر سفید تے بغیر چمک دے کپڑے پاندے سن۔ اوہناں شلووار قمیض یا گرتے پاجامے توں علاوہ کوئی لباس زیب تن نہیں کیتا۔ سرتے پگڑی

یاسفید ٹوپی ضرور رکھ دے سن۔ جوانی وچ کالی شیر وانی بڑے شوق نال پاندے سن (48)۔
میاں محمد شفیع دی بہو امینہ بیگم، اوہناں دے روزانہ دے معمولات بارے وچ ار
کردے میں:

”صبح بہت جلدی جاگن دے عادی سن۔ تہجد تے دیگر وظائف
دی ادائیگی تو بعد فجر دی نماز ادا کردے سن۔ قرآن دی تلاوت
باقاعدگی نال کردے سن۔ ریٹائرمنٹ توں بعد زیادہ تر لکھن پڑھن
وچ ہی مشغول رہندے سن۔ قلم تے کاغذ اوہناں دے تنیکے نال
رکھیا ہوندا سی۔ راتیں جو کجھ ذہن وچ آندا لکھ لیندے تے صبح
اُٹھ کے اُس نوں دوبارہ اپنی نوٹ بک وچ لکھ لیندے سن۔
برسات دے موسم نال اوہناں نوں خصوصی لگاؤ سی۔ برسات وچ
گوشہ نشین ہو جاندا تے لکھن پڑھن دل اوہناں دارِ حجاز و دھ
جاندا سی“۔ (49)

میاں محمد شفیع دا گھراک بلند مقام تے ہے۔ جس جگہ اوہناں دا کمرہ سی اُس
دے پچھلے پاسے کھڑکی کھل دی سی جس دے باہر بہت ہی خوبصورت منظر اے۔ سامنے گھنے
درختاں دے جنگل تے سرسبز و شاداب نکلیاں وڈیاں پہاڑیاں نیں۔ میاں محمد شفیع اس کھڑکی
دے سامنے بیٹھ کے لکھن پڑھن دے کم کردے سن۔ چونکہ اوہناں دی زندگی وچ اوہناں
دے گراں تک بجلی نہیں سی پہنچی، ایس لئی اوہ دیوے یا لائین دی روشنی وچ لکھدے
پڑھدے سن۔ دن دے ویلے صحن وچ بیٹھنا پسند کردے سن۔ اوہناں دے پوتے اظہر رشید
اپنے بالین دیاں خوشگوار یاداں دسدے نیں:

”دادا جی جدوں وی باہروں چکر لگا کے گھر آندے تاں ویہڑے
وچ منجی تے لیٹ جاندا سن۔ میں اوہناں دی کھونڈی دے
سہارے اوہناں نوں لتیاڑا ساں تے نال نال اوہ مینوں قرآنی

سورتاں یاد کرو اندے سن۔ اور پچھلا سبق وی سندے سن۔ ایس طرح اوہ بہانیاں بہانیاں نال مینوں پڑھاندے رہندے سن۔“ (50)

اظہر رشید اپنے دادامیاں محمد شفیع دی اک ہور بڑی خوشگوار گل دے سدے نیں:

”جدوں اوہناں دیاں اکھاں دا آپریشن ہو یاسی، تاں راتیں تیکے نال رکھے ہوئے کاغذ تے شعر لکھ دیندے سن۔ نظر نہ آن دی وجہ توں لفظاں اتے لفظ لکھے جاندے سن۔ فی صبح مینوں کہندے سن کہ میرے شعر کسے کاغذ تے صاف کر کے لکھ۔ ایہ میرے لئی بڑا وڈا امتحان ہوندا سی۔ اصل امتحان تے اُدوں ہوندا سی جدوں لکھن واسطے کاغذ دی تھاں اوہناں دے ہتھ وچ اخبار آ جانداسی۔ اخبار اُتے کالے قلم نال لکھیا اُنج وی نظر نہیں آندا تے اگر لفظاں اُتے لفظ لکھے جاندے تاں فر میرے لئی اک ہور مصیبت بن جاندی کیوں کہ دادا جی ایس طرح دی تحریر خط شکستہ وچ بہت باریک لکھدے سن۔“ (51)

میاں محمد شفیع نفاست پسند، جاذب توجہ تے ہر دلعزیز شخصیت دے مالک سن۔ اوہ سب نوں خندہ پیشانی تے خلوص نال ملدے سن۔ اوہناں دا مزاج نہایت متین، لب و لہجہ شائستہ تے مہذب سی۔ اوہ لوکاں نوں فوراً اپنا گرویدہ بنا لیندے سن۔ نہ صرف دوست احباب تے رشتے دار بلکہ اوہناں دے نال محکمہ ڈاک وچ کم کرن والے (Colleagues) سب لوک اوہناں نوں بہت پیار کردے سن۔ میاں محمد شفیع بہت پرکشش اور کرشماتی شخصیت دے مالک سن۔ اوہناں نال ملاقات توں پہلے اگر کسے دے دل وچ کوئی رنجش ہوندی، تاں سامنے آندیاں ہی اوہ اوہناں دا گرویدہ ہو جانداسی۔ اوہناں دے صاحبزادے میاں عبدالرشید دے مطابق اک واری محکمہ ڈاک دے کسے

وڈے افسرنوں ذاتی رجس دی وجہ نال کسے شکایت کیتی کہ میاں محمد شفیع اپنے پیشہ ورانہ فرائض دی انجام دہی وچ کوتاہی ورت رہے نیں۔ اس افسر نے جدوں آپ دی جائے تعیناتی تے چھاپہ ماریا اور آپ نال ملاقات کیتی تاں اوہ فوراً ہی آپ دا گرویدہ ہو گیا (52)۔

میاں محمد شفیع اک سماجی شخصیت سن۔ اہل علاقہ اوہناں نوں بڑی عزت تے عقیدت دی نگاہ نال دیکھدے سن۔ اڑوس پڑوس توں علاوہ اپنے گراں تے دور دراز دے عزیز رشتہ داراں دی خوشی غمی وچ لازمی شرکت کردے سن۔ سب لوک اوہناں نال مختلف معاملات وچ مشاورت وی کردے سن۔ آپ ہمیشہ ثالثی تے مصالحتی کردار ادا کردے رہے۔ باقاعدہ امامت تے نہیں کیتی لیکن حسب ضرورت امامت وی کردے سن۔ ایس توں علاوہ نکاح خوانی وی کردے سن تے نماز جنازہ وی پڑھاندے سن۔ ایسے لئی میاں محمد شفیع نوں اوہناں دے مرشد سید فضل شاہ تے دو جیمہ قادی لوک ”مولوی محمد شفیع“ وی کہندے سن (53)۔ اوہناں دی نہ صرف اپنے گراں بلکہ دُور دراز علاقیاں وچ وی بڑی شہرت سی۔ اج وی اوہناں دی آل اولاد نوں اوہناں دے حوالے نال پہچانیاں جاند اے۔ ایس حوالے نال اوہناں دے پوتے میاں مظہر جمیل کہندے نیں:

”جدوں وی نیڑے تیڑے دے کسے گراں وچ جانا ہووے،
اوتھے سانوں کوئی وی نہیں پہچاند۔ دادا جی نوں فوت ہو یوں
تقریباً ستائی سال ہو گئے نیں۔ لیکن حالے وی سانوں اوہناں
دے ناں نال اپنی پہچان کرائی پیندی اے۔ لوک اوہناں نوں
حالے وی نہیں بھلے۔“ (54)

میاں محمد شفیع دی شخصیت دی اک خوبی ایہ وی سی کہ اوہ اپنے دوستاں تے قریبی رشتہ داراں نال مسلسل رابطے وچ رہندے سن۔ اوہناں دے زمانے وچ رابطے دا وڈا ذریعہ خط و کتابت سی۔ میاں محمد شفیع باقاعدگی نال اپنے دوستاں نوں خط لکھدے تے

اوہناں دے حالات بارے واقفیت حاصل کر دے سن۔ اوہناں قلمی نسخے ”انشائے اختر ڈھانگروی“ وچ اک سوتوں زیادہ اپنے منظوم خطوط محفوظ کیتے نیں جیہڑے مختلف دوستاں یاراں نوں لکھے گئے سن۔ پیٹھ اوہناں دا اک منظوم خط ”بنام حافظ بشیر میروی“ بطور نمونہ پیش اے (55):

ہوئی مدت مدید بعید آیا نامہ نہیں تشریف بشیر صاحب!
 شاید عشق صحیفیوں نام میرا کیجا تساں تخریف بشیر صاحب!
 اساں آہی امید جے زندگی وچ رہساں ہم ردیف بشیر صاحب!
 نام رب دے درد فراق والے ظموں کرو تخفیف بشیر صاحب!
 اکھر لکھ کے گھل پیار والے صدقہ دین حنیف بشیر صاحب!
 المکتوب نصف الملاقات آکھن سب اہل تصنیف بشیر صاحب!
 قسم رب دی اساں پیار تیرا کیجا نہیں خفیف بشیر صاحب!
 محمد شفیع دن چار حیاتڑی دے گویا فصل خریف بشیر صاحب!

میاں محمد شفیع دے گراں تے گرد و نواح دے دو جے علاقیاں دے لوک اپنے بچیاں دے ناں اوہناں کو لوں رکھواندے سن۔ میاں محمد شفیع علم الاعداد دے ماہر سن۔ اوہ اعداد دے مطابق بچیاں دے نام رکھ دے سن۔ ایس توں علاوہ اوہناں دی روحانی کشش وی اک وجہ سی کہ ہر کوئی خواہش کر داسی کہ اوہناں دے نومو لو د بچے دانان میاں محمد شفیع تجویز کرن۔

2- میاں محمد شفیع: اک صوفی تے درویش:

میاں محمد شفیع اختر ڈھانگروی نوں مذہب نال محبت اپنے اجداد و لوں ورثے وچ ملی سی۔ اوہناں دے دادا میاں سید محمد چشتی توں بعد ایس خاندان دی مستقل نسبت آستانہ عالیہ جلاپور شریف نال ہو گئی۔ میاں محمد شفیع نے جلاپور شریف دے سجادہ نشین سید فضل شاہ

دے ہتھ شرف بیعت حاصل کرن توں بعد ساری عمر مرشد اور احکام شریعت دی اطاعت و بیچ گزار دتی۔ میاں محمد شفیع اک باعمل صوفی سن تے ایس حقیقت توں چنگی طرح واقف سن کہ اک صوفی دا نصب العین یا عشق، اللہ دی ذات ہوندی اے۔ اوہ جان دے سن کہ سلوک دی آخری منزل تک پہنچن لئی پہلی منزل فنا فی الشیخ نوں حاصل کرنا بہت ضروری اے۔ میاں محمد شفیع نوں اپنے مرشد سید محمد فضل شاہ نال انتاں دا عشق تے محبت سی جس دا اظہار اوہناں عملی طور تے وی اور اپنی شاعری دے ذریعے وی کیتا۔

میاں محمد شفیع اک سچے صوفی سن۔ رات دے پچھلے پہر جاگنا تے عبادت کرنا اوہناں دا روزانہ دامعومل سی۔ آپ نماز پنجگانہ، تلاوت قرآن پاک، ورد و وظیفے تے نفلی عبادتاں دا باقاعدگی نال اہتمام کر دے سن۔ اوہناں دے روزنامے وچ تحریر 16 جنوری 1937ء دی کارگزاری ملاحظہ ہووے:

”سحر بیدار ہوا۔ نماز تہجد ادا کی۔ اور ذکر جبر کیا۔ وظائف پڑھے۔
نماز فجر ادا کی اور مائز روانہ ہوا۔۔۔ بھیٹ کی اوپر والی مسجد میں
نماز ظہر باجماعت ادا کی۔۔۔ ڈھوک محمود آیا۔۔۔ عصر کی نماز ادا
کی۔۔۔ شام کی نماز باجماعت ادا کی اور بعدہ ذکر جبر کیا۔ آج
خوب لذت حاصل ہوئی۔۔۔ عشاء کی نماز باجماعت ادا کی۔۔۔
صبح کا پروگرام مرتب کیا اور سو گیا۔“ (56)

ایہ اک دن دامعومل نہیں بلکہ اوہناں دی ہر رات تے ہر دن ایسے طرح گزارا سی۔ میاں محمد شفیع اک باعمل صوفی سن۔ اوہناں دی شخصیت دی مسکینی، عجز تے انکسار اوہناں دی درویش صفتی دی ثبوت اے۔ اوہناں کدے وی اپنی علمیت یا روحانیت نوں لوکاں تے آشکار نہیں ہون دتا۔ نام و نمود دی خواہش تے اوہناں دی شخصیت وچ سرے توں ہی نہیں سی۔ میاں محمد شفیع دی درویش صفتی دا ایہ عالم سی کہ اوہناں اپنی شاعری دی

اشاعت و اکدی سوچیاوی نہیں۔ اپنے قلمی نسخے ”ارمغانِ اختر“ وچ ایس بارے لکھدے
نیں:

”یہی حرفیاں جو میں نے وقتاً فوقتاً اپنی عقیدت کے اظہار میں تحریر
کی ہیں۔ ان کو بغرض اشاعت تحریر کرنے کا کبھی خیال تک بھی نہیں
آیا۔“ (57)

میاں محمد شفیع نے اپنے کلام یا دیگر تحریراں وچ کسے وی جگہ سلوک دیاں منزلاں
بارے کھل کے تذکرہ نہیں کیا۔ البتہ روزنامے دی طرز تے لکھی گئی نثری تصنیف ”گنجینہ
اسرار“ وچ مختلف جگہ تے اپنے روحانی تجربات دا اظہار اشاریاں کنایاں وچ ضرور کیتا
اے۔ ایس کتاب وچ اوہناں دیاں تحریراں نوں سمجھنا آسان نہیں۔ ایس گل دا اعتراف
میاں محمد شفیع گنجینہ اسرار دے شروع وچ خود وی کردے نیں:

”ناظرین! یہ کتاب جو اسرار و رموز کی حامل ہے اس کی تشریح میں
کوشش کرنا ناظرین کے لیے ایک دقت طلب مسئلہ ہے اور ناکام
جدوجہد ہوگی۔ یہ اسرار، گو میں نے اوراق پر درج کیے، مگر معانی کو
اپنے ساتھ قبر میں لے جاؤں گا۔“ (58)

میاں محمد شفیع نوں کدی وی شہرت دی تمنا نہیں رہی۔ ایہو وجہ سی کہ اوہناں اپنے
کلام دے نال نال اپنی ذات نوں وی مکمل طور تے لوکاں دے سامنے نہیں آن دتا۔ اوہناں
دیاں لکھتاں وچ کدھرے کدھرے روحانی حوالے نال اشارے موجود نیں۔ مثلاً:

”فضا ابر آلود۔ معمولی ترشح ہو رہا تھا۔ کہ اچانک بجلی چمکی۔ بعد اور
دُوری کی ظلمت یکفخت کا نور ہو گئی۔ شیخ مکرم نے مجھے نوازش محبوبی
سے مستفید کیا۔ اور بس۔“ (59)

اس تصنیف وچ اک ہو رہا جگہ روحانی ترقی دا ذکر کردے نیں:

”تیسرا سال ختم ہوا۔ روحانی ترقی میں ایک گونہ کامیابی شامل حال رہی۔ الحمد للہ۔ اللہ کریم اثبات علی صراط الحبیب والشوق الی یوم القیمۃ فرمادینا۔ آمین۔“ (60)

میاں محمد شفیع مذہب و شریعت دی پابندی نوں ضروری سمجھدے سن۔ اوہ تصوف تے شریعت نوں دکھ نہیں سن ویکھدے۔ اوہناں دی نظر وچ تصوف دا اوہورا ستہ درست سی جہڑا شریعت دے نال نال چلدا سی۔ ایسے حوالے نال گنجینہ اسرار صفحہ 73 تے 11 فروری 1937ء دا احوال لکھدے نیں:

”وادی میں محمل مقصود کا مجنوں کے ہاتھ آنا گونہ عنوان کامیابی ہے۔ مگر یہاں احکام اللہ کو مد نظر رکھتے ہوئے بے نیازی تھی۔ نیچی آنکھیں شرم سے جھکی ہوئی معافی کی طلب گار تھیں۔ اپنے رفیق کی موجودگی میں میں نے اسی پردہ کو پھر چاک کیا۔ کہ اے وادی محبت کے مسافر اور عشق و محبت کے سمندر کے شناور تیرے لیے زیبا نہیں کہ تیرا کوئی قدم رضائے الہی کے بغیر اٹھے۔ یہ خامی ہے۔ اس کو تو دور کر، تاکہ تجھ پر نورِ سرمدی آشکار ہو“۔ (61)

میاں محمد شفیع دے نواسے محمد اصغر دسدے نیں:

”میری والدہ (زکیہ بیگم) نے سیاسی کہ نانا جی اُتے اک واری عجیب جذب تے بے خودی دی کیفیت طاری ہوگئی سی۔ اوہ جیہناں روحانی کیفیات نوں لوکاں توں لکنا ناچا ہندے سن اوہ ظاہر ہون لگ پیاں۔ اک واری تے نانا جی خانگی تے معاشرتی ذمہ داریاں توں بالکل بے نیاز ہو گئے۔ اوہناں تے عجیب جیہی مجذوبانہ کیفیت طاری ہوگئی۔ فیر اوہناں دے مرشد دی نظر دا فیضان سی کہ نہ صرف سارے معاملات پہلے دی طرح ہو گئے بلکہ اوہناں نوں مرشد نصیحت کیستی کہ تسیں بہت ساریاں بیٹیاں دے

باپ ہو۔ اوہناں دی پرورش تے تربیت کرن توں ودھ کوئی
سعادت نہیں۔ ایس لئی خانگی ذمہ داریاں وِچ کوتاہی نہیں ہونی
چاہی دی۔ اُس توں بعد اوہناں دا اپنی ذات تے ضبط ہمیشہ قائم
رہیا۔“ (62)

میاں محمد شفیع دے پڑوسی فاروق احمد، اوہناں دی شخصیت بارے کہندے نیں:
”میاں محمد شفیع صاحب اک ولی سن۔ اوہ کوئی عام بندے نہیں
سن۔ انتہائی شفیق، ملنسار تے ہنس مکھ۔۔۔۔۔ میرا اوہناں نال اکثر
اٹھنا بیٹھنا ہندا سی۔ اوہناں نال جدوں وی ملاقات ہوندی، اک
عجیب جیہاں سُرورتے روحانی چاشنی محسوس ہوندی سی۔ میں کدے
وی اوہناں کولوں کوئی بیہودہ لفظ نہیں سی سُنیا۔ علاقے دے لوکاں
وِچ اوہناں دا اک خاص مقام تے عزت سی۔ اوہناں امامت وی
کروائی، نکاح وی پڑھائے تے تراویح وی پڑھاندے ہوندے
سن۔ اوہ اک درویش سن جیہناں وِچ ریاکاری نہیں سی تے نہ ای
ریاکاری نوں پسند کردے سن۔“ (63)

اک صوفی جتنی وی کوشش کرے، کسے نہ کسے طرح، اُس دی کوئی نہ کوئی خوبی
لوکاں دے سامنے آ ہی جاندی اے۔ میاں محمد شفیع محکمہ ڈاک وِچ ملازم سن۔ جہلم دے
پنڈاں گراواں وِچ اوہناں داروز دا آن جان سی۔ جولوک اوہناں نوں نہیں وی جاندے سن
اوہ وی اوہناں دا بہت احترام کردے سن۔ اوہناں دے نورانی چہرے اور خوش اخلاقی نوں
ویکھدیاں ہویاں لوک اپنے بچیاں یا مال مویشیاں نوں دم کرن دا اسرار کردے سن۔
اوہناں اپنے روزنامچیاں وِچ وی دم درود دا ذکر کیتا اے۔ میاں محمد شفیع اوہ صوفی سن جیہناں
اپنی ساری حیاتی خالق حقیقی، رسول اللہ صلی اللہ علیہ وسلم اور اپنے مرشد دی اطاعت اور محبت
وِچ گزار دی۔ اوہ ہمیشہ قناعت پسندی تے عجز و انکسار دی مجسم تصویر بنے رہے۔

3- میاں محمد شفیع دی ذات نال منسوب چند روحانی واقعات:

میاں محمد شفیع دی ذات نال بے شمار روحانی واقعات منسوب نیں لیکن اوہناں وچوں صرف کجھ واقعات دا تذکرہ کیتا جاندا اے۔ جیہناں توں اوہناں دی درویش صفتی، حلیمی، تے خاکساری جھلکدی اے۔

میاں محمد شفیع محکمہ ڈاک وچ اک چٹھی رساں دی حیثیت نال ملازم سن۔ ڈیوٹی دے دوران کسے رستے توں جا رہے سن کہ اک عورت نے اوہناں نوں بُرا بھلا کہنا شروع کر دتا۔ اوہ عورت دراصل کسے ہوور دے بھلیکھے وچ سی۔ میاں محمد شفیع نے اُس عورت نوں تیر سمجھایا پئی تینوں کوئی غلط فہمی ہوئی اے۔ غلطی نہ ہون دے باوجود اوہناں اُس کولوں معذرت کیتی لیکن عورت دارو یہ انتہائی ہتک آمیزی۔ بہتا سمجھان دے باوجود اوہ خاموش نہ ہوئی۔ میاں محمد شفیع دے صبر دا پیمانہ لبریز ہو گیا۔ غصے وچ اوہناں دے مونہوں نکل گیا ”تیرے منہ وچ کیڑے پین، چپ کر جا“۔ کجھ دن گزرے تے میاں محمد شفیع نوں خبر ملی کہ اُس عورت دامنہ کسے بیماری نال خراب ہون پاروں اندروں زخمی ہو گیا سی۔ تے ہُن زخماں وچ کیڑے پے گئے نیں۔ میاں محمد شفیع بہت روئے اور اللہ کولوں بہتیاں معافیاں منگیاں۔ اور اُس دی صحتیابی لئی دُعاواں کردے رہے (64)۔

میاں محمد شفیع جدوں ڈاکخانہ بھون وچ ڈیوٹی دے رہے سن اُدوں لہورتوں اک بندہ اوہناں نوں ڈھونڈ دا ڈھونڈ دا پہنچا۔ میاں محمد شفیع اُس نوں نہیں سن جاندا نہ ہی اوہ بندہ پہلے میاں محمد شفیع نوں جاندا سی۔ میاں محمد شفیع نے اس اوپرے مہمان دی خدمت خاطر کرن توں بعد آمد دی وجہ کچھی تاں اس بندے دسیا پئی ”اُنہوں خواب وچ علامہ اقبال دے دیدار ہوئے۔ علامہ صاحب نے خواب وچ بطور خاص تاکید فرمائی کہ بھیٹ ڈھاگمروی مرزا دے میاں محمد شفیع نوں میرا سلام دینا۔ ہُن تسی علامہ صاحب دا سلام قبول کرو تے مینوں اجازت دیو“۔ میاں محمد شفیع دا ایہ واقعہ ڈاکخانے وچ موجود لوکاں دے

کارن کافی مشہور ہویا۔ میاں محمد شفیع نے ایہ واقعہ اپنے روزنامے وچ وی تحریر کیتا سی لیکن دیمک لگے کاغذاں تے تحریر پڑھن دے قابل نہیں۔ نہ ہی اُس شخص دانانا کاغذ تے باقی رہیا اے (65)۔

اکثر بچیاں نوں مٹی کھان دی لت لگ جاندی اے۔ جتنے وی جتن کیے جان اوہ مٹی کھان توں باز نہیں آندے۔ بھیٹ دے مقامی لوک میاں محمد شفیع دی قبر دی خاک بچیاں نوں چٹا دیندے نیں تے بچے مٹی کھانا چھڈ دیندے نیں۔ میاں محمد شفیع دی قبر کچی، سادہ تے اپنے خاندان دے مرحومین دیاں قبریں دے وچکاراے۔ کوئی مزار، خانقاہ، دیوایا جھنڈا موجود نہیں۔ لیکن فیروسی سنن وچ آیا اے کہ لوگ اوہناں دی قبر تے نہ صرف حاضری دیندے نیں بلکہ متناں وی مندے نیں (66)۔

4۔ میاں محمد شفیع اختر ڈھاگرووی اپنی آل اولاد دی نظر وچ:

میاں محمد شفیع اپنی اولاد لئی اک جلالی شخصیت سن۔ لیکن ایہ سختی صرف دکھان لئی سی۔ اندروں انتاں دے رحم دل، شفیق تے محبت کرن والے انسان سن۔ اپنے اکلوتے بیٹے میاں عبدالرشید نال بہت پیار کردے سن۔ میاں عبدالرشید اپنے والد بارے کہندے نیں:

”اکلوتا بیٹا ہون دی وجہ توں میرے نال والد صاحب دی خصوصی محبت اک فطری امر سی۔ میں اوہناں دالا ڈلا وی بہت ساں لیکن اکلوتا ہون دی وجہ توں میرے لئی سختی وی بہتی ورتی جاندی سی۔ کیونکہ اوہناں دے سارے ارمان تے چاہواں اکلے میرے نال وابستہ سن۔ لیکن ایہ گل وی حقیقت اے کہ اوہناں کدی وی میریاں بھیڑیاں اُتے مینوں بے جا ترجیح نہیں دتی۔ کدے وی میرے اُتے میری صلاحیت توں ودھ بوجھ نہیں پایا۔ والد صاحب ہر ویلے لکھن پڑھن وچ مشغول رہندے سن لیکن کدے وی مینوں زبردستی ادب یا شاعری طرف لگان دی کوشش نہیں کیتی۔ جب

تک حیات رہے، گھر دیاں ذمہ داریاں واکمل بوجھ میرے تے
نہیں آن دتا۔ گھر داسارا انتظام اوہناں اپنے ہتھ وچ ای رکھیا۔
اخیر تک اوہناں دارعب اور دبدبہ گھر وچ قائم رہیا۔“ (67)

میاں محمد شفیع عورتاں دے حقوق اور خصوصاً بیٹیاں دے حقوق دا بہت خیال
رکھدے سن۔ اوہ اپنیاں بیٹیاں نوں بہت پیار کردے سن۔ بیٹیاں تے کدے وی اپنے بیٹے
نوں ترجیح نہیں دتی۔ میاں محمد شفیع دی بیٹی فریدہ بیگم نے اپنے والد بارے کجھ اس طرح وچار
کیتا اے:

”میرے والد صاحب بیٹیاں نوں کدے وی بوجھ نہیں سن
سمجھدے۔ بھائی عبدالرشید دی پیدائش توں پہلے میریاں ست
بھیناں دا جنم ہویا۔ اوہناں ہر بیٹی دی پیدائش نوں اللہ دی خاص
رحمت سمجھیا۔ اوہ کدی وی مایوس نہیں ہوئے۔ کدی وی گھر اندر
اپنیاں بیٹیاں نوں ایہ احساس نہیں ہون دتا کہ اوہناں دا بیٹایا
جانئیں کوئی نہیں۔“ (68)

میاں محمد شفیع اپنی اکلوتی بہو ایمنہ بیگم اُتے خصوصی شفقت فرماندے سن۔ اوہناں
ہمیشہ اپنی بہونوں اپنی بیٹی دی طرح محبت کیتی۔ ایمنہ بیگم دے اپنے ماموں تے سسر میاں
محمد شفیع بارے وچار:

”ماماجی (میاں محمد شفیع) مینوں ہمیشہ اپنی سگی بیٹی طرح پیار کردے
سن۔ اوہ جدوں تک حیات رہے، کدی وی مینوں ایہ محسوس نہیں
ہون دتا جے میں اس گھر دی بیٹی نہیں، تُو نہہ آں۔ سچ تے اے
وے کہ اوہ ساورے گھر وچ میرا سب توں وڈا سہارا سن۔“ (69)

عام مثال دتی جاندی اے کہ اصل کولوں سود زیادہ پیارا ہوندا اے۔ اسے طرح
بیٹے توں ودھ بیٹے دی اولاد پیاری ہوندی اے۔ میاں محمد شفیع نوں اپنے پوتے اظہر رشید
نال بہت محبت سی۔ ایس محبت کچھ کئی وجہاں چھپیاں سن۔ اک تے اظہر رشید اوہناں دے

پوتے سن، دوجی وجہ اے کہ پہلے پوتے سن تے تیجی وجہ ایہی سی کہ اکلوتے بیٹے دی اولاد سن۔
اظہر رشید اوہناں دی اگلی پیڑھی دی بنیاد سن، ایس لئی اوہناں دی تمام تر توجہ اپنے پوتے
اُتے سی۔ اظہر رشید نے اپنے دادا جی نال بہت ویلا بتایا سی۔ اپنے دادا جی دی شخصیت
بارے کہندے نیں:

”میرا اپنے دادا جی نال دو طرح دارشتی سی۔ اک محبت دا تے دوجا
ڈردا۔ دادے پوتے دی محبت تاں اک فطری امر سی، لیکن ڈرائس
لئی کہ اوہ میری تعلیم و تربیت دے حوالے نال میرے اُتے بہت
تختی کر دے سن۔ میری ہر خواہش تے ڈیمانڈ پوری کر دے سن
لیکن پڑھائی دے معاملے وچ کوئی رعایت نہیں سی۔“ (70)

میاں محمد شفیع دے نواسے تے زکیہ بیگم دے صاحبزادے محمد اصغر دے خیالات
اپنے نانا جی دے بارے اوہناں دی شخصیت دے کئی پہلو کھول دے نیں:

”میرے نانا جی دے نواسے تے نواسیاں بہت زیادہ تعداد وچ
نیں۔ میرا شمار نانا جی دے اوہناں چند نواسیاں وچ ہوندا اے
جیہناں نوں شروع توں ای احساس سی کہ نانا جی بہت بڑے آدمی
نیں۔ اوہ کوئی عام بندے نہیں۔ مثال مشہور اے ”مچھلی دریا میں،
پرندہ ہوا میں“۔ ایسے طرح اک پڑھے لکھے بندے نوں وی
پڑھے لکھے ماحول تے احباب دی ضرورت ہوندی اے۔ اک
پڑھیا لکھیا بندہ، پڑھے لکھے لوکاں وچ رہ کے ای مزید ترقی کر دے
اے۔ لیکن نانا جان دا ایہ بہت وڈا کارنامہ اے کہ اوہ اک دور دراز
علاقے وچ رہ کے علم و ادب دی خدمت کر دے رہے۔ جتھے
اکثریت اُن پڑھے تے نیڑے نیڑے اوہناں توں علاوہ کوئی
پڑھیا لکھیا بندہ نہیں سی۔ دنیاوی تعلیم تے دُور دی گل اے بنیادی
سطح دی دینی تعلیم وی نہ ہون برابری۔ زیادہ تر لوکاں نوں تے

ٹھیک طرح نماز پڑھنا وی نہیں سی آندا۔ ایسے ماحول وچ ساڈے
 ناناجی نے علم و ادب دی شمع روشن رکھی۔ اوہناں اپنے کردار تے
 عمل نال لوکاں دی تربیت کیتی۔ عجز و انکسار دی انتہا دیکھو کہ
 اوہناں کدی وی کسے تے اپنی علیت دا رعب نہیں جھاڑیا۔ ہمیشہ
 شفقت تے خلوص دا مظاہرہ کیتا۔ اوہناں دا مطالعہ بہت وسیع
 سی۔ کتاب نال عشق کر دے سن۔ مذہب تے ادب دے
 موضوعات اُتے اوہناں کثیر تعداد تے مشتمل کتاباں دی لائبریری
 بنائی سی۔ میں جدوں وی اپنے ناکے جانداں اسان اوہناں دیاں
 کتاباں بڑے شوق نال پڑھداں۔ (71)

مکمل دی گل ایہ وی کہ بحیثیت انسان میاں محمد شفیع اوہناں تمام صفتاں دے مالک
 سن جو اک اچھے انسان وچ ہونیاں چاہی دیاں نیں۔ اوہ اک حساس تے خوددار انسان
 سن۔ ہمیشہ رزق حلال کمایا تے کھاد۔ اوہ اک اچھے شہری، اک شفیق باپ، محبت کرن
 والے شوہر، وفادار دوست تے فرض شناس سرکاری اہلکار سن۔ دوجیاں دے دکھ درد نوں اپنا
 دکھ درد سمجھ دے سن۔ کسے نوں مصیبت وچ دیکھ لیندے تاں اوہناں دا حساس دل تڑپ
 اُٹھدا سی۔ اُس دی مدد وی کر دے تے اُس لئی دعاواں وی کر دے سن۔ اوہ اک نفیس
 انسان سن۔ باطنی تے خارجی اعتبار نال نفاست پسند سن۔ اوہناں دی طبیعت وچ نفاست،
 چال وچ نفاست، لباس وچ نفاست الغرض اوہناں دا ظاہر باطن صاف ستھرا سی۔



[۲]

سی حرفیاں میاں محمد شفیع اختر ڈھانگروی: موضوعی تے فکری مطالعہ

موضوع دے حوالے نال سی حرفی دی جھولی ونو و ن موتیاں نال بھری پئی اے۔ گل مجاز دی ہووے یاں حقیقت دی، دنیا دی ہووے یاں دین دی، اخلاق دا بیان ہووے یاں بد ہادادرد، ملاپ دی تا نگھ ہووے یاں ہجر دے گرا لٹ مرشد دے پیار توں لے کے لوک قصیاں تائیں ہر مضمون سی حرفی وچ بیان کیتا جاسکدا اے (72)۔ میاں محمد شفیع اختر ڈھانگروی نے وی اپنی سی حرفیاں وچ توحید، رسالت، تصوف، مرشد نال عقیدت، عشق حقیقی، عشق مجازی، تے اخلاقیات جیسے موضوعات نوں بڑی وسعت تے گہرائی نال بیان کیتا اے۔ میاں محمد شفیع دیاں 27 سی حرفیاں ایس کتاب وچ شامل نیں جیہناں نوں زمانی ترتیب دتی گئی اے۔

ایہناں سی حرفیاں دے سرناویاں توں ای ایہناں دے مضامین دا اندازہ ہو جاندا اے۔ ساریاں سی حرفیاں وچ مختلف مضامین دا بیان اے لیکن ایہناں تے سب توں ودھ گوڑھا رنگ تصوف دا اے۔ میاں محمد شفیع اختر ڈھانگروی دیاں سی حرفیاں دی موضوعاں دے حوالے نال وڈا اس طرح کیتی جاسکدی اے:

منقبتی سی حرفیاں:



منقبت والفظی مطلب تعریف تے وڈیائی بیان کرنا اے۔ منقبت بارے

”نور اللغات“ وچ انج لکھیا ہویا اے:

”منقبت۔ (ع۔ بافتح و فتح سوم و چہارم) مؤنث۔ تعریف و توصیف۔ صفت و ثنا۔ اصطلاح شعراء میں اس تعریف سے مراد ہوتی ہے جو اہل بیت اور صحابہ کی شان میں ہو جیسے ائمہ کی منقبت لکھی ہے۔“ (73)

پروفیسر انور جمال موجب اے مذہبی شاعری دی (موضوع دے لحاظ نال) اصطلاح اے جس دا مطلب تعریف کرنا، مناجات کرنا وغیرہ اے۔ منقبت اس نظم نوں آکھ دے نیں جس وچ مذہبی عقیدے دی بنیاد تے کسے اسلامی ہیرو دی تعریف و توصیف بیان کیتی جائے (74)۔ منقبت نوں قصیدے ہی دا اک انداز سمجھنا چاہیدا اے (75)۔ منقبت لئی مدح و لفظ وی ورتیا جاند اے۔ یعنی اللہ تے اللہ دے رسول توں اڈ کسے صحابی، تابعین، تبع تابعین، غوث، قطب، ابدال، ولی یا بزرگ دی تعریف منقبت اکھواندی اے۔ پنجابی ادب وچ منقبت دی روایت بہت پرانی اے۔ پنجابی شاعراں نے ہر صنف وچ اپنے مرشد دی تعریف کیتی اے۔ وڈے وڈے اولیائے کرام نے وی اپنی شاعری وچ مرشد دی مدح بیان کیتی اے۔ پنجابی ادب دا خزانہ دو جیاں صنف توں علاوہ منقبتی سی حرفیاں نال وی بھریا ہویا اے۔ سی حرفی دا موضوع کجھ وی ہووے، اس وچ مرشد دی توصیف لازمی شامل کیتی گئی اے۔

میاں محمد شفیع اختر ڈھانگرو دی 7 منقبتی سی حرفیاں ایس کتاب وچ شامل نیں۔ نمونہ پیش اے:

الف: اس دے اسم توں جان واراں، جیہڑا فوق فضیلتاں لے آیا
لے کے ضو محمدی وچ ورثے، ڈیرا شہر جلاپور آن لایا
اودے فیض درجات دی بات کیہ اے جیندی ذات تھیں شرف سادات پایا
محمد شفیع ایہ شاہ ولایتاں دا، جس دے پائے دا کسے نہ اوڑ پایا

ث: ثبت کیتا دل دی لوح اُتے، حضرت آپ دا اسم نکریم کر کے
ف: ف تے ل نوں ادب سیتی، پڑھاں بسم اللہ سو تعظیم کر کے
ف: فضل ربی سبحان اللہ، پایا شرف ایہ حرف ترقیم کر کے
محمد شفیع میں ہوئی تسکین قلبی خولجہ آپ نوں پیر تسلیم کر کے

.....

ط: طرح تساڈڑے حسن والی اس طرح تے گرہ لگان مشکل
سو نہ رب دی اس جہان اندر، مدح چہا نہیں ہوو عنوان مشکل
میرا عقل محدود، شعور ناقص، ہوندی مدح دی کہن زبان مشکل
محمد شفیع اس مدح شریف والی، رب کرے تے ہووے آسان مشکل

مرثیہ سی حرفیاں:



مرثیہ کیہ ہوندا اے؟ ایس بارے پروفیسر انور جمال لکھدے نیں:
”اس سے مراد ہے (نظم میں) مرنے والے کی تعریف کرنا، یعنی
مرثیہ تعزیتی نظم ہے اور موضوع کے لحاظ سے صنفِ شاعری ہے۔
اصطلاح میں مرثیہ اس نظم کو کہتے ہیں جس میں شاعر کسی مرنے
والے کی تعریف و توصیف کر کے اس کی خوبیوں کو اجاگر کرتا
ہے۔“ (76)

پنجابی ادب وچ شخصی مرثیہ وی لکھے گئے نیں تے حضرت امام حسین دی
شہادت بارے وی۔ مرثیہ دے ایہ دوویں انداز متوازی ملدے نیں۔ مرثیہ وچ چونکہ
مرحوم دی سیرت اور حسن اخلاق دی تعریف کیتی جاندی اے، ایس لئی مزاج دے لحاظ نال
مرثیہ تے قصیدے وچ مماثلت پائی جاندی اے (77)۔ میاں محمد شفیع دیاں ایس کتاب
وچ 5 مرثیہ سی حرفیاں شامل نیں۔ ایہناں سی حرفیاں وچ میاں محمد شفیع نے اپنے اندر دادر
تے کرب جس طرح بیان کیتا اے، پڑھن والا اُس نوں محسوس کیتیاں بغیر نہیں رہ سکدا۔
نمونہ کلام:

ن: نام تیرا لذت نال بھریا مظہر مٹھرا شہد تے شیر بیسی
بیکر سچ پچھو نور اکھیاں دا ٹھنڈک دے دی بدر منیر بیسی
اودے پیار دے زلف دے سچ اندر میرے دے دا کبک اسیر بیسی
محمد شفیع میں وقت بڑھپڑے دے کھاناں مظہر دے ہجر دا تیر بیسی

.....

خ: خبر سلیم دی موت والی سُن دے سار جگ پے کہا گئی
رنگی موت دے زہر دی قہر والی لوں لوں اند گویا دھا گئی
ڈاں موت دی میرے سلیم سندا ہائے ڈچھ کلیجڑا کھا گئی
محمد شفیع نہ اکھیوں نیر چلے تقدیر انہیریاں پا گئی

☆ رومانی / عشقیہ سی حرفیاں:

عام بول چال وچ رومان، رومانس یا رومانی جیسے لفظ حسن پرستی تے عشق و عاشقی
نال جڑیاں کیفیتاں دے اظہار لئی استعمال ہوندے نیں۔ ہر دور وچ ایس دی نویں تعریف
سامنے آئی۔ عشق تے محبت دے بارے ہر چیز رومانی اکھوان لگ پئی، زبان دی بناوٹ،
سجاوٹ تے محاکاتی تفصیل پسندی وی رومان دے زمرے وچ آگئے تے ماضی پرستی تے
قدامت پسندی نوں وی رومانویت تسلیم کیتا گیا۔ لیکن اک گل واضح ہے کہ ایس دا تعلق فکر
دی نسبت تخیل تے تصور نال بہت گورھا اے۔ رومانویت اک رجحان اے۔ پنجابی ادب
دیاں مختلف صنفیں وچ مڈھ قدیم توں ای رومانویت کسے نہ کسے حوالے نال موجود رہی
اے۔

میاں محمد شفیع اختر ڈھاگروی دیاں سی حرفیاں تے وی رومانویت دارنگ موجود
اے۔ ایس کتاب وچ اوہناں دیاں 14 سی حرفیاں نوں رومانویت دے ٹولے وچ شامل
کیتا جاسکدا اے۔ نمونہ کلام ملاحظہ ہووے:

ض: ضرب ایہ مہنڈڑی جان اُتے میریاں مایاں دا گیا ککھ ناہیں
تیرے دَماں دی منگدی خیر بندی رانجھا ہیر دا سیر کوئی وکھ ناہیں

تیری گلی دے کتڑے کھیڑیاں تھیں چنگے کھیڑے کوئی نامے اکھ ناہیں
محمد شفیع پر رانجھیا مایاں نوں حاصل ہیر نمائی دا ناہیں

.....

الف: آ پیاریا واریاں میں تیری یاد تھیں جان آباد رکھدی
دل سوختہ ہجر جدائیاں تھیں جھگا خوشی دا نت برباد رکھدی
اکھیں نیر تے تپ سریر میرے سینے دھکھ تے مکھ فریاد رکھدی
محمد شفیع میاں جگ توں جاں اوترے جے میں نیت دے وچ فساد رکھدی

.....

ی: یاری دا پالن اوکھا یاری نہیں سوکھلوی
کچ کنواری چا لئی کھاری قدروں بھاری جھلڑی
ماہی آب کباب ہوئی جان کڑاہی تلڑی
آکھ شفیع پڑھ کلمہ طیب عشق ثبوتی بھلوی

ایہ تے میاں محمد شفیع دیاں سی حرفیاں دی موضوعاتی وندسی لیکن ایہناں سی حرفیاں
وچ کئی طرح دے مضامین بیان ہوئے نیں۔ میاں محمد شفیع نے جیہناں اہم موضوعاں نوں
چھوہیا اے، اگے اوہناں تے گل بات کہتی جائے گی۔

1- توحید:

اللہ تعالیٰ اپنی ذات تے صفتاں وچ واحد تے لاٹانی اے۔ اُس دیاں
صفتاں وچ اُس دا کوئی شریک نہیں۔ تمام کائنات اک ذات نے پیدا کیتی اے تے دنیا
دیاں سب طاقتاں اس دے سامنے ہیچ نیں۔ موت تے زندگی، صحت تے بیماری، نفع تے
نقصان سب اس ذات اُحد دے اختیار اندر اے۔ اُس دی ذات نوں زوال نہیں۔ اوہ
ہمیشہ توں ہے تے ہمیشہ رہے گا۔ اللہ تعالیٰ نوں واحد، قادرِ مطلق، خالق، مالک تے رازق،
صفات وچ لاشریک، تے معبودِ واحد تسلیم کرنا عقیدہ توحید اکھواندا اے، تے ایہ عقیدہ
ایمان دی پہلی شرط اے۔ اللہ دی واحدانیت تے حضرت محمد دی رسالت تے ایمان رکھنا

اسلام دا پہلا رکن وی اے۔

توحید، شریعت تے تصوف اک دو جے واسطے لازم و ملزوم نیں۔ میاں محمد شفیع اختر ڈھاگرووی اک صاحب شریعت صوفی سن۔ ذات اُحد اوہناں دی منزل سی۔ اوہ چنگی طرح سمجھدے سن کہ ایس منزل تک اپڑن لئی اللہ دی واحدانیت دا اقرار اتنا ہی ضروری اے جتنا کہ زندگی لئی ہوا تے پانی ضروری نیں:

الف: اک اوہ لاشریک صاحب جس دی نہیں نظیر مثال کوئی
صاحب امر دا خود مختار حاکم، جس دا حکم نہ سکدا ٹال کوئی
مالک ملک حدوث قدیم دا اوہ، جس ذات نوں نہیں زوال کوئی
محمد شفیع توحید دی کنہ پاوے، ناقص عقل دی نہیں مجال کوئی

میاں محمد شفیع اپنے محبوب حقیقی دے لازوال تے مقتدر علی ہون دا اقرار انج کر دے نیں:

الف: اس جہان وچ سدائے صرف بادشاہی اللہ پاک دی اے
رب جی قیوم قدیم قادر اوہدے ہتھ وچ ڈور افلاک دی اے
سورج چن تارے اوہدے امر اندر جتھے پہنچ نہ فکر چالاک دی اے
محمد شفیع واحد لاشریک اللہ بندہ جان عاجز مشیت خاک دی اے

اسلامی تصوف دی بنیاد عشق الہی تے رکھی گئی اے۔ عشق دے بغیر تصوف دا کوئی تصور نہیں۔ محبت کرنا انج تے انسان دی فطرت وچ شامل اے پر تصوف اُس نوں محبوب دے انتخاب بارے آگاہی وی دیندا اے کہ محبوب اوہنوں بناؤ جہڑا جمیل ہون دے نال نال غیر فانی وی ہووے تے محبت دا جواب وی محبت نال دیوے۔ اچھی کامل ترین ہستی تاں صرف اللہ دی ہی ہوسکدی اے۔ انسان دی پیدائش دا اہم مقصد وی رب العالمین دی محبت اے۔ ایہ وجہ اے کہ صوفیاں نے اللہ دی محبت نوں اپنی زندگی دا اصل مقصد قرار دتا اے۔ ایس گل دی تفہیم میاں محمد شفیع دے ایس بندتوں بخوبی ہو جاندی اے:

الف: الف دیاں الفتاں رہن باقی، حرص خام کولوں خالی جام ہووے
ذاتی اسم ہووے نقش قلب اُتے، غیر سلسلہ قطع تمام ہووے
ذکر ذوق تے شوق مافوق اندر، میری صبح ہووے میری شام ہووے
محمد شفیع مقصود ایہ زندگی دا، دھن بھاگ جے عشق انعام ہووے

دو عالم نیں، عالم بقاتے عالم فنا۔ انسان عدم توں وجود وِچ آیا۔ میثاق دے دن
اللہ تعالیٰ نے رُوحاں کولوں پچھیا ”کیا میں تہاڈا رب آں؟“ تاں جواب وِچ رُوحاں نے
اقرار کیتا ”بے شک تسیں ہی ساڈے رب او“۔ میاں محمد شفیع روز ازل دے اس اقرار توں
وی پہلے دی گل کر دے نیں کہ جدوں روح وجود وِچ آئی سی، اُس زمانے دی حسن ازل
دے عشق وِچ گرفتار اے۔ اللہ تعالیٰ نے انسان نوں بنایا ہی اپنی عبادت لئی سی۔ تاں غیر
روح اُس میثاق نوں کس طرح بھُل سکدی اے تے کس طرح ممکن اے کہ اک صوفی اپنے
محبوب دے عشق توں ہٹک جاوے:

الف: استوں پہلے دی میں رانجھن یار کوکیندڑی
کن فیکونوں پہلے لکیاں توں کیوں پئی ہٹکیندڑی
عشے دی گل وس نہ میرے لکھی کون مٹیندڑی
آکھ شفیق جنیوں رب نوں بھاوے طعنے کیوں مریندڑی

2۔ عشق رسول صلی اللہ علیہ وسلم:

توحید توں بعد اسلام داد و جانیا دی عقیدہ، عقیدہ رسالت اے۔ عقیدہ رسالت دا
مفہوم انج اے کہ اللہ تعالیٰ نے سیدنا آدم علیہ السلام توں لے کے حضرت محمد صلی اللہ علیہ وسلم
تک مختلف زمانیاں وِچ انساناں دی رہنمائی لئی نبی تے رسول مبعوث فرمائے۔ حضرت محمد
الیں سلسلے دی آخری کڑی نیں تے آپ توں بعد ہور کوئی نبی نہیں آئے گا۔ اگر کوئی نبی ہون
دا دعویٰ کرے گا تاں اوہ کافر اکھوائے گا۔ اُس کافر تے یقین کرن ولاوی کافر تے مرتد

ہو دے گا۔ تصوف نوں کھ رکھ کے گل کرے تاں اک صوفی عقیدہ رسالت یا عشق رسول دے جذبے توں وانجارہ کے اپنا گوہر مقصود حاصل نہیں کر سکا۔ کیونکہ محبوب حقیقی دا حصول، اُس دے محبوب نوں محبوب بنان توں بغیر ممکن نہیں۔

تصوف دیاں تن منزلاں نیں۔ فنا فی الشیخ، فنا فی الرسولؐ تے فنا فی اللہ۔ فنا فی الشیخ، فنا فی الرسولؐ دی پوڑھی اے تے فنا فی الرسولؐ، فنا فی اللہ دی پوڑھی اے۔ فنا فی الرسولؐ دے بغیر فنا فی اللہ دی منزل دا حصول ناممکن اے۔ حضور نبی کریم صلی اللہ علیہ وسلم وجہ تخلیق کائنات نیں۔ حضورؐ دی اتباع تے اوہناں دی نبوت اُتے ایمان دے بغیر نجات حاصل نہیں ہو سکتی تے نہ ہی قرب الہی دیاں راہواں کھل سکدیاں نیں۔ دنیا دا قیام تے کائنات دی تخلیق اللہ دی مہربان منت اے۔ اللہ نوں راضی کرن لئی ضروری اے کہ پہلے اللہ دے محبوب نال محبت ثابت کیتی جائے۔ میاں محمد شفیع عشق رسولؐ نال سرشار نظر آندے نیں۔ اوہ اپنیاں سی حرفیاں وچ آپؐ دی شان انج بیان کر دے نیں:

الف: ازل تھیں ابد دے دال توڑیں، مرکز میم محمدی جان آڑیا
کارن پیارڑے ایڈ پیار کیے، عرش فرش زمین اسمان آڑیا
ساڈا قدر کیہ نعت سناونے دا، واصف جہاں دا آپ رحمن آڑیا
محمد شفیع جبریل امین کولوں، کچھو پاک رسولؐ دی شان آڑیا

.....

الف: ازل تے ابد دی حد اندر، مرکز میم محمود محمدی اے
لوح قلم حضور غیاب جو کچھ، عرش فرش مقصود محمدی اے
اتھ جن انسان حیران سارے، واصف آپ معبود محمدی اے
محمد شفیع مطلوب مرغوب خاطر، ارفع ذات وجود محمدی اے

.....

ر: رفعنا لك ذكرك ثابت جس دا شان قرانوں
کعبوں کھ بھنوا نہ میرا نہ کڈھ دین ایمانوں

ذکر تصور ہر دم جس دا لہے نہ کدی دھیانوں
آکھ شقیق حق کملی والے صفتاں بول زبانوں

3۔ تصوف:

”جس کسی نے تصوف کی تحقیق پر قلم اٹھایا اس نے اس کی وجہ تسمیہ کی چھان بین پر صفحے کے صفحے کا لے کر دیے۔ ہم اس کو بیکار سمجھتے ہیں۔ وجہ تسمیہ کچھ بھی ہو، ہم کو تو یہ دیکھنا چاہیے کہ اس علم کا موضوع کیا ہے۔“ (78)

خواجہ عبدالکیم انصاریؒ دے ایس قول نال اتفاق کر دیاں ہو یاں اسیں صرف ایہ دیکھاں گے کہ تصوف کیا اے تے ایس دا مقصد کیا اے؟ تصوف دا لفظ اُس طریق کار یا اسلوب عمل واسطے اختیار کیتا جاندا اے جس تے صوفی عمل کرے۔ تصوف توں مراد اوہ ریاضتاں تے مجاہدے نیں جیہڑے قلب دے پردے ہٹا کے حقیقتاں دا انکشاف کرن۔ تصوف اوہ علم اے جس دے ذریعے نفس دا تزکیہ، اخلاق دا تصفیہ تے ظاہر و باطن دی تعمیر دے احوال پہچانے جان دے نیں۔ اپنے نفس نوں ریاضت تے مجاہدے دے ذریعے رذیلہ اخلاق توں پر تار کے اخلاق حمیدہ یعنی زہد و علم، صبر و اخلاص تے صدق و صفائی جیسے خصائل حسنہ تے آمادہ کرن دا ناں تصوف اے۔ اللہ تے اللہ دے رسول صلی اللہ علیہ وسلم دی محبت تصوف دا اساسی عنصر اے۔ شریعت نال قربت رکھن والے صوفیا دے نزدیک تصوف دی قرآنی اصطلاح تزکیہ نفس اے جب کہ حدیث دی اصطلاح وِج اس نوں احسان کہندے نیں۔ صوفیائے کرام اپنیاں لکھتاں وِج ایہ گل دی تسلیم کر دے آئے نیں کہ تصوف یا صوفی دے لفظاں دا قرآن تے حدیث وِج کدھرے ذکر نہیں آیا۔ ایس واسطے تصوف دا لفظ مطلوب اے تے نہ ہی صوفی وِج لفظ مقصود۔ ایس بارے خواجہ عبدالکیم انصاریؒ کہندے نیں:

”اس میں شک نہیں کہ قرآن میں لفظ تصوف کہیں موجود نہیں بلکہ

سرکارِ دو عالم کی وفات کے بعد تقریباً پونے دو سو برس تک اسلامی تاریخ یا کسی کتاب میں بھی یہ لفظ نہیں پایا جاتا لیکن قرآن میں کئی جگہ ایک اور لفظ آیا ہے جس کا موضوع بالکل وہی ہے جو تصوف کا ہے۔ یہ لفظ ”حکمت“ ہے۔ (79)

تصوف دے متعلق صوفیاں تے عالماں نے بہت کچھ لکھیا۔ ہر کسے اپنے انداز وِچ ایس دی تشریح کرن دی کوشش کیتی اے۔ جس نوں جو محسوس ہو یا اُس نے اُسے احساس نوں تصوف دا نام دے دتا۔ پروفیسر سید صفی حیدر نے شاید اسے کارن آکھیا اے:

”تصوف قلب انسانی کی ایک کیفیت کا نام ہے، وہ سرتاپا ذوق و وجدان ہے، اس لئے اس کی کوئی منطقی تعریف نہیں کی جاسکتی۔“ (80)

مکدی گل ایہ وے کہ تصوف کائنات دیاں حقیقتاں دی پہچان تے ذاتِ ازل تک پہنچن دا اک طریق کار اے۔ ایس طریق نوں مختلف سلاسل دے بزرگاں نے اپنے اپنے تجربات دے مطابق وضع کیتا اے۔ علی عباس جلاپوری ”وحدت الوجود تے پنجابی شاعری“ وِچ ایہناں سلسلیاں بارے جاکاری دیندے نیں:

”بارہویں صدی عیسوی وِچ صوفیاں دے سلسلے ظاہر ہون لگ پئے سن۔ سبھ توں پہلاں قادریہ سلسلہ بنیا۔ جس دے بانی شیخ عبدالقادر گیلانی (1166-1078ء) سن جیہڑے بغداد وِچ ابو حنیفہ نعمان بن ثابت دے مقبرے دے مجاور سن، اوہناں دے پتر سید شاہ میر ہندوستان آئے تے ایتھے وی ایہہ سلسلہ قائم ہو گیا۔ چشتیہ سلسلہ شیخ ابوالخق شامی توں یادگار ہے جیہڑے شیخ العلودینیوری دے مرید سن۔۔۔ خولجہ معین الدین حسن سنجری نے خولجہ عثمان چشتی توں خرقہ لیا تے ہندوستان وِچ آ کے ایس سلسلے دی اشاعت کیتی۔“ (81)

ہندوستان وچ سلسلہ چشتیہ تے قادریہ نوں سب توں زیادہ مقبولیت حاصل ہوئی۔ ہندوستان وچ چشتیہ سلسلے دا آغاز حضرت معین الدین اجمیریؒ نے کیا۔ اوہناں دے پہلے مرید حضرت قطب الدین بختیار کاکیؒ کن جیہناں خواجہ اجمیریؒ دی وفات مگروں چشتیہ سلسلے دی سانجھ سہال کیتی۔ حضرت قطب الدین بختیار کاکیؒ دے دستِ حق پرست تے حضرت بابا فرید گنج شکرؒ نے بیعت دی سعادت حاصل کیتی۔ مرشد دی وفات توں بعد ایس سلسلے دا انتظام بابا فریدؒ نے سہالیا۔ بابا فریدؒ نے نہ صرف چشتیہ فکر نوں پھیلایا بلکہ پنجابی صوفیانہ شاعری نوں وی جیون دان کیا۔ بابا فریدؒ توں بعد چشتیہ سلسلے نال تعلق رکھن والے شاعراں وچ علی حیدر ملتانی، سید وارث شاہ، محرم علی چشتی، گل محمد چشتی، طالب چشتی، نور احمد چشتی، حافظ جمال اللہ ملتانی، میاں مراد بھٹی، منشی غلام حسن شہید عرف گامن ملتانی، غلام مرتضیٰ شاہ، حکیم فضل الہی، خواجہ غلام فرید، میاں سید محمد چشتی، حافظ عبد المجید کڑی شریف، پیر عبد الغفور ہزاروی، میاں عاقل محمد جوگی اور پیر مہر علی شاہ دے نام شامل نیں۔ میاں محمد شفیع اختر ڈھاگروی وی ایس روایت دا حصہ نیں۔ میاں محمد شفیع تے اوہناں دے دادا میاں سید محمد چشتی دا کلام اشاعت توں محروم رہیا۔ ایس پاروں اوہناں داناں کسے تذکرے وچ شامل نیں۔

میاں محمد شفیع اُتے چشتیہ روایت دا بڑا گورہا اثر اے۔ مرشد دی مدح تے مرثیاں توں علاوہ اوہناں دیاں سی حرفیاں اُتے بظاہر مجاز دارنگ اے لیکن دو جے صوفی شاعراں دی طرح مجاز دے پردے وچ اوہناں حقیقت دی گل کیتی اے:

محمد شفیع توحید دی گل کیتی، پردہ عشق مجاز دا پا میاں

اوہناں دے کلام وچ عشقِ الہی، عشقِ رسولؐ، مرشد نال عشق، صوفیانے کرام نال عقیدت تے تصوف دیاں اصطلاحاں وغیرہ مشاہدہ کیتیاں جاسکدیاں نیں۔ میاں محمد شفیع دی شاعری وچ صوفیانہ عناصر دا ویرہا اکیتا جائے گا۔

مرشد اوہ ہستی اے جس دے فیض نال ای سالک سلوک دیاں منزلاں لانگھ سکدا اے۔ معرفت دی منزل تے اپڑن لئی صوفی نوں رہبر دی لوڑ ہوندی اے، جیہنوں تصوف دی اصطلاح وچ مرشد یا شیخ آکھیا جاندا اے۔ صوفیاں دے نزدیک نجات و لان والا تے رب سچے دی پہچان کران والا مرشد ہی ہوندا اے۔ کامل مرشد مل جاوے تے طریقت دیاں منزلاں آسان ہو جان دیاں نیں۔ ایہناں منزلاں دا حصول وی اُسے صورت وچ ممکن ہوندا اے کہ اک سالک اپنے مرشد دی ذات وچ مکمل طور تے فنا ہو جاوے۔ فنا ہون دا مطلب مرشد نال عقیدت، محبت تے بغیر کسے شک شبہ دے اطاعت کرنا اے۔ میاں محمد شفیع دا کلام مرشد نال عقیدت تے محبت نال بھریا پیا اے:

الف: اعظم ایہ پیراں دا پیر میرا، کشتی چشتیاں دی بنے لان والا
وحدت عشق دا سبق پڑھان والا، دُور گیاں نوں کول بُلان والا
سبق نفی اثبات سمجھان والا، موت و اقبال دا جام پلان والا
محمد شفیع ایہو کامل پیر میرا، سینے عشق دی آگ مچان والا

.....

ت: تحت تے فوق تے عرض جوہر، ندی لا دی وچ ڈبو آیا
چنبھی مار کے بحر اثبات اندر، مظہر عین توحید دا ہو آیا
سالک راہ سلوک دا جان واقف، مکھ آب حیات وچ دھو آیا
محمد شفیع جناب دے مرتبے دا، ساڈی نظر اندر ناہیں کو آیا

فنائی الشیخ ہون توں بعد ہی صوفی تے حقیقت دے دروازے کھلے نیں۔
صوفی ہمیشہ اپنے ہادی تے مرشد نال روحانی رابطے وچ رہندا اے۔ فنائی الشیخ دی منزل
مرشدی مکمل اطاعت تے فرمانبرداری توں بعد ہی حاصل ہو سکدی اے:

ن: نفر غلام قدیم اُتے رکھ مہر دی نظر ضرور قبلہ
منگال دان تیری خوشنودیاں دا اللہ پاک تھیں شام حور قبلہ

تیرے عشق دی ملے برات مینوں ہووَن دلوں غیریتاں دُور قبلہ
محمد شفیع اَساڈڑی یاد اندر رہن یاد نہ غیر اُمور قبلہ

مرشد خانہ سالک دادو جا گھر ہوندا اے۔ اک سچے سالک دا وجود تے اپنی دنیا
تے گریہستی وچ مصروف ہوندا اے، لیکن دل وچ ہر ویلے مرشد خانے دے دروہام دا تصور
رہندا اے۔ میاں محمد شفیع وی اپنے مرشد خانے دیاں رونقیاں تے برکتاں توں غافل نہیں
سن:

ج: جا جلاپور شریف اندر، سایہ رحمتی ابر سحاب اوتھے
جس دے وچ تشریف شریف رکھدے، خواجہ ابوالبرکات جناب اوتھے
بیٹھے ہون گے مجلساں لا سوہنے، سنگت صوفیاں ہور احباب اوتھے
محمد شفیع حضور دے وچ جائیں، نال ادب نیاز آداب اوتھے

.....

د: دیر درنگ نہ کریں طالب، غالب شوق والے بھنے آوندے نی
قدم بوس ہو کے چشتی پیر سندے، خوشی عید تھیں ودھ مناوندے نی
عاشق ہون مخلوط ملفوظ سُن کے، جو حضور ارشاد فرماوندے نی
محمد شفیع مبارکاں پیر بھائیاں، جہڑے مجلساں ایسیاں پاوندے نی

تزکیہ نفس تصوف دی روح ہے۔ جب تک صوفی اندروں صاف نہ ہووے، اوہ
صوفی اکھوانِ داحق دار نہیں۔ صوفی نوں اپنی ”میں“ مار کے اپنا کبر تے غرور ختم کرنا پیندا
اے۔ ایس دے نال نال میاں محمد شفیع ہوریں امر بالمعروف تے نہی عن المنکر دادرسی وی
دیندے نیں:

غ: غیر نوں کڈھ وجود وچوں شیشہ کبر دا زنگ آلود تیرا
لے کے توبہ دا آب کر پاک اس نوں اُجے تیک پلیر وجود تیرا
حد، کبر، کینے، غصے، بغض، پنجاں کیتا خیر دا راہ مسدود تیرا
محمد شفیع جاں تک ہوئیں صاف ناہیں حاصل نہیں ہونا مقصود تیرا

.....

ف: فتح نہ ہوں ابوابِ دل دے جاں تک وچ سینے جھاتی پاوسیں نہ
ہوسن دُور کدورتاں دلوں ناہیں جاں تک دوئی نوں مار مکاوسیں نہ
جاں تک منسیں نہی تے امر ناہیں جانی یار تائیں کدے بھاوسیں نہ
محمد شفیع نہ مارسیں ”میں“ جاں تک کدی وصل دیاں لذتاں پاوسیں نہ

میاں محمد شفیع اک باشریعت صوفی سن۔ اوہناں دا تصوف شریعت دی پاسداری
دا حکم دیندا اے۔ اوہ شریعت تے طریقت نوں الگ نہیں سمجھدے۔ اوہناں دا تصوف
رہبانیت دے خلاف اے۔ میاں محمد شفیع دے مرشد سید فضل شاہؒ نے خود وی شریعت دی
پابندی کیتی، تے اپنے مریداں نوں وی شریعت تے عمل کرن دی تاکید کیتی اے۔ میاں محمد
شفیع وی دسدے نیں کہ اوہناں نوں شریعت تے عمل کرن دا درس مرشد ولوں ملایا اے:

س: ساکال دا رہبر پیر میرا، واقف کار اسرار عرفان دا اے
دسے گیان دے گُن گیانیاں نوں، سارے گُن گیان دے جاندا اے
ہادی پیشوا راہ ہدایتاں دا، عامل شرع شریف قرآن دا اے
محمد شفیع آج جن انسان اندر، اُچا مرتبہ اس جوان دا اے

.....

ش: شرع شریف دی پاسداری کامل غیر دی نہیں تقلید کردے
دیون بت خلاف اوہ حکم اُسدے کدے نفس دی نہیں تائید کردے
آکھے لگ شیطان دے گُن ناہیں، اسدے کہے دی بت تردید کردے
محمد شفیع ایمان بالغیب اُتے، ثابت نال دلیل توحید کردے

میاں محمد شفیع دا تعلق چونکہ چشتیہ سلسلہ طریقت نال سی، ایس لئی چشتیہ سلسلے نال
عقیدت اک فطری امر سی۔ اوہناں اپنے کلام وچ تھیں تھیں تے ایس عقیدت دا بیان کیتا

اے:

ب: باغ ساوا سدا چشتیاں دا، جس دے وچ خزاں دستور ناہیں
جس دیاں بوٹیاں نوں ملے آب کوثر، جس دا پھل تازہ بناں نور ناہیں
اس سلسلے دے جہڑے ہون طالب، شرف اوہناں دا کشف قبور ناہیں
محمد شفیع ایہ عشق دا بحر ڈونگھا، خواجہ پیر دے باجھ عبور ناہیں
ایس حوالے نال کجھ ہور مثالاں پیش نیں:

محمد شفیع بر آوج سا پوہتا، جہڑا چشتیاں دے در دی خاک ہويا

.....

محمد شفیع سنے کلی چشتیاں دا، ہووے خاتمہ نیک توحید اُتے

.....

محمد شفیع میاں نگہ چشتیاں دی، کردی دُور پل وچ پائمالیاں نوں

.....

فقر چشتیاں دا مشہور عالم بوبا اوہناں دا چھوڑ کے جا ناہیں

.....

چشت اہل بہشت دے تحت اُتے، کیتی آن نشست حسین قبلہ

.....

س: سخی جھگا سنیا چشتیاں دا ہر آن داتا پُن دان کردا

صوفیائے کرام لوکاں لئی بغیر کسے فرق دے رشد و ہدایت تے رہنمائی دا کارن
رہے نیں۔ ہندوستان وچ اسلام دی اشاعت دا فریضہ ہووے یا امن تے اخلاقیات دا
درس، صوفیائے کرام دیاں خدمتاں نظر انداز نہیں کیتیاں جاسکدیاں۔ اوہناں بزرگاں دا
تعلق بھائیس کسے وی سلسلے نال سی، اوہناں لوکاں نوں اپنے فیض نال نہال کرن دا سلسلہ
ہمیشہ جاری رکھیا۔ میاں محمد شفیع تمام صوفی بزرگاں نال خصوصی محبت رکھدے سن۔ اوہناں
دیاں سی حرفیاں وچ مختلف حوالیاں نال کئی جید تے صاحب حال بزرگاں دا ناں آندا اے:
محمد شفیع پنجاب دے بھاگ جاگے، معین الدین چشتی گویا آ رہیا

.....

شکر گنج جناب فرید وانگوں، لے کے جام توحید بدست آیا

.....

گویا خوجہ نظام الدین چشتی تنبو آن جلاپور مارا اے

.....

چشتی پیر پٹھان دا فیض قائم دائم اس عالی درجات تائیں

.....

نائب نبی دے خاص خزانیاں دے، حاصل آپ نوں قرب فرید والا

.....

محمد شفیع قاطع شرک بدعتاں دا، وانگوں شمس، فرید، معین قبلہ

.....

ش: شمس سیال دا فخر جہوا، اوس فخر دا نظر منظور ہیں تُوں

.....

میراں پیر بغداد دا واسطہ ای ڈھل پا نہ آ ترسانیاں او

.....

محمد شفیع مراد ارشاد میری، دیویں داد مخدوم جہانیاں او

تصوف اک علم اے تے ایس دیاں کئی اصطلاحاں تے مقامات نیں۔ مثلاً توبہ،

ورع، زہد، فقر، صبر، توکل، رضا، احوال، مراقبہ، قرب، محبت، خوف، رجاء، شوق، انس،

اطمینان، مشاہدہ تے یقین وغیرہ۔ میاں محمد شفیع دے کلام وچ تصوف دیاں کچھ اصطلاحاں

نوں مشاہدہ کیتا جاسکدا اے:

ت: توبہ میں غیر خیالوں، عشقوں باز نہ رہساں

.....

صاحب شرح تے ورع عبادتاں دا، بے مثال آیا بے نظیر آیا

.....

نظر باز مجاز تھیں کرن توبہ حرص آز کولوں انفصال ہوندے

.....

ز: زہد عبادتوں بہت اُچی منزل آکھدے عشق طیور دی اے

.....

د: دراڑی گڈی فقر والی، حاصل آپ نوں قرب کمال ہويا

.....

جس دے فقر غیور دی نظر اندر، قدر ککھ دی نہیں سلطان تائیں

.....

ص: صبر تے ثابت رہن اوکھی بناں ثابتی دے بیڑا پار ناہیں

.....

ص: صبر تسلیم رضا اندر میرے پیر جیہا ثابت قدم کوئی نہ

.....

محمد شفیع تاں قرب نصیب ہوندا پہلوں ڈھاہن مجاز حدود تائیں

.....

صاحب کشف مکشوف احوال مخفی جس نوں بخش اچ فیض خزانیاں دے

تصوف تے سلوک وچ ذکر اذکار، عبادتاں ریاضتاں تے مجاہدے نوں بڑی اہمیت حاصل اے۔ ذکر دیاں کئی قسماں نیں جیہناں وچ سب توں مشہور تے اہم ”نفی اثبات“ اے۔ نفی اثبات تصوف دی اصطلاح اے۔ خواجہ عبدالحکیم انصاری نفی اثبات دی تعریف اچ کردے نیں:

”لا الہ الا اللہ کے ذکر کو نفی اثبات کہتے ہیں۔ کیونکہ لا الہ کے معنی ہیں کوئی معبود نہیں ہے۔ یہ نفی ہوئی اور الا اللہ کے معنی ہیں ”لیکن اللہ“ یہ اثبات ہوا۔ طریق حکمت [تصوف] میں لا الہ کے معنی یہ لیے جاتے ہیں کہ کوئی موجود نہیں ہے“۔ (82)

میاں محمد شفیع دے کلام وچوں چند مثالیں دیتاں جا رہیاں نیں جیہناں وچ ذکر اذکار دے حوالے نال تصوف دیاں اصطلاحاں ورتیاں گئیاں نیں۔ ایہناں وچ توحید و بیان وی بڑے سوہنے انداز وچ ہويا اے:

لا: لاموں لا نفی دا کلمہ رائجے باجھ نہ کوئی
ثابت ذات رائجیے والی نفی اثباتوں ہوئی

رانجھا عشق توحید خزانہ شرکوں مول نہ ڈھوئی
آکھ شقیق میں کُج کھلوتی لاه شرم دی لوئی

.....

ن: نام تیرا بچاں جانیاں میں ما سوا تھیں قطع بُرید کیتی
تیرے حُسن دا دِلوں مرید ہويا جس روز دی جہنڈڑی وید کیتی
تیرا اسم وظیفرا جسم دا اے تیرے پیار دی پی تجدید کیتی
محمد شفیع میاں کشتہ عین دا میں غین غیر دی دِلوں تردید کیتی

.....

دے نفی اثبات دے بھید گجھے، واقف کار منزل خفی جلی دا اے

.....

لا: لا الہ الا اللہ اتھے غیر دی گل ہلا ناہیں

حضور نبی کریم صلی اللہ علیہ وسلم جدوں معراج دے سفر وچ اللہ دے حضور حاضر
ہوئے تاں ذات ازل دا مشاہدہ انج کیتا کہ نہ پلک جھپکی تے نہ ای نظر دا زاویہ ایدھر اُدھر
ہویا۔ صوفیاں نے ایس حوالے نال عین در عین تے عین و عین جیسے لفظ ورتے نیں۔ صوفی
شاعراں نے ایس نوں اک اصطلاح تے دور تے ورتیا اے۔ ”عین“ دا وی ”الف“ دی
طرح اک فلسفہ اے۔ میاں محمد شفیع نے وی اپنے کلام اندر ایس حوالے نال اشارے کیتے
نیں:

ع: عشق دے عین دا عین اصلی رمز عین دی پاوندا ہر کوئی نہ

.....

صوری معنوی عین در عین ہستی بالاتر از فہم انسان تیری

.....

تیرے وید وچ پیاریا عید میری تیرا ویکھنا ”عین“ معراج میرا

چشتیہ سلسلہ وحدت الوجود دے حوالے نال خاص شہرت رکھدا اے۔ میاں محمد شفیع

داسلسلہ طریقت چونکہ چشتیہ اے ایس لئی اوہناں تے وحدت الوجودی اثرات دا ہونا اک فطری گل اے۔ ایس گل وچ کوئی شک نہیں کہ میاں محمد شفیع نے اپنیاں سی حرفیاں وچ وحدت الوجود دا صاف لفظاں وچ بیان نہیں کیتا لیکن اوہناں دے کلام وچ وجودی ہون دیاں بہت ساریاں شہادتیں موجود نیں۔ میاں محمد شفیع دے وجودی ہون دی اک شہادت حضرت منصور حلاجؒ (244ھ-309ھ) نال خاص عقیدت دا ہونا وی اے۔ منصور حلاجؒ فارس دے شہر بیضا وچ پیدا ہوئے۔ آپ دا اصل نام ”حسین“ سی لیکن اپنے والد دے نام منصور حلاج نال مشہور ہوئے۔ ویہ سال دی عمر وچ جنید بغدادیؒ دے حلقہ ارادت وچ شامل ہوئے۔ آپ صوفیائے کرام دی طویل تاریخ دے سب توں زیادہ متنازع شخصیت نیں۔ سرعام ”انا الحق“ دا نعرہ لگان دا نتیجہ سی کہ بغداد دے عالماں دے فتوے موجب آپ نوں 18 ذیقعد 309ھ نوں قتل کر دتا گیا۔ آپ ادب دی دنیا وچ اک ثابت قدم تے جانباز عاشق دی حیثیت نال مشہور نیں۔ آپ دے اس وصف کارن شاعراں نے آپ داناں عشق، وحدت الوجود تے ملامت دے حوالے نال بطور تلمیح ورتیا اے۔ میاں محمد شفیع نے منصور حلاجؒ نال لگاؤ کارن اپنیاں سی حرفیاں اندر جگہ جگہ آپ داناں لیاندا اے۔ اک بند ملاحظہ ہووے جس وچ شاہ منصور نوں خراج عقیدت پیش کیتا گیا اے:

د: وار منصور منظور کیتی انا الحق دا قول و ساریا نہ
صادق صدق تے اپنے رہیا قائم حق سچ دے بول نوں ہاریا نہ
مٹھے کفر دا تِلک لگانیکے کے تے جنو عشق دا گلوں اُتاریا نہ
محمد شفیع گل اپنی توڑ چاہڑی کیتی ناقصاں دے اگے آریا نہ

میاں محمد شفیع دی دبستان منصور نال وابستگی دا مزید اظہار ایہناں مصرعیاں توں وی ہو جاندی اے:

سولی سار منظور منصور والی، کہو عشق دا حرف پکاوساں میں

محمد شفیع جو آپ دی نظر تر دے، پاندے مرتبہ شاہ منصور والا

.....

عاشق غیر امور تھیں دُور رہندے مشہور گل شاہ منصور دی اے

.....

خام طبع ایہ جام نہ نوش کردے، ثابت ہوش اتھے منصوریں دا

.....

پی کے موت دا جام چڑھ سولڑی تے ہو یا شاہ منصور منظور کوئی

.....

محمد شفیع منصور تھیں کچھ تکو مزے عشق دیاں ناز برداریاں دے

میاں محمد شفیع، منصور حلاج دی حوصلہ مندی تے ثابت قدمی دے معترف تے
ضرور نیں، لیکن اپنی باطنی کیفیت نوں لوکاں کولوں نہ لکاسکن تے اعتراض کردے وی نظر
آندے نیں:

منصور ورگے چڑھے سولیاں تے سکے رکھ نہ راز نہان اندر

.....

بھیت یار دا کھول خوار ہوئی مثل شاہ منصور چڑھی دار سیو

.....

سولی شاہ منصور منظور کیتی جوش عشق دا گیا نہ بھلیا سی

.....

منصور گیا چڑھ سولڑی تے اوکھا عشق دا راز چھپان سائیں

تصوف وچ منزل عشق حقیقی اے، ایس واسطے عشق مجازی دے راستے منزل تک
پہنچیا جاسکد اے۔ چونکہ انسان اللہ دے حسن تے جمال دا مظہر اے، ایس لئی اوہ حسن الہی
دیاں جلوہ سامانیاں نوں کس طرح نظر انداز کرسکد اے۔ انج تے سبھے صوفی بلا تفریق ایس
نظریے دے قائل نیں کہ عشق مجازی پوڑھی اے عشق حقیقی دی، لیکن وجودی صوفی بالخصوص
ایس نظریے دے پرچارک نظر آندے نیں:

الف: انسان نوں شرف ہو یا خلعت درد تے سوز گداز والا
ہوئے وچ سکوت ملکوت سارے تک حوصلہ اس شاہباز والا
سروں کمر غرور نوں دُور کر کے کیتا یاد اس سبق نیاز والا
محمد شفیع حقیتاں لہ لیاں پردہ پائیے عشق مجاز والا

صوفی اوہ عاشق ہوندا اے جس دی منزل حسن ازل اے۔ جس دے ویکھن لئی
اوہ ریاضتاں، مجاہدے تے عبادتاں کردا اے۔ اپنی ذات دی نفی کر دیندا اے۔ عاشق تے
بہت ہوندے نیں لیکن اپنا مقصود حقیقی سب نوں نصیب نہیں ہوندا۔ ایہ تے حسن ازل دی
مرضی اے اوہ جس نوں دل کرے وکھالی دے دیوے۔ تے جدوں ایہ گوہر نایاب دان ہو
جاندا اے تاں عاشق اپنے اندر دی خوشی دا اظہار کرن توں رُک نہیں سکدا۔ میاں محمد شفیع وی
جیسے خوش نصیبیاں دی صف وچ کھلو تے نظر آندے نیں:

ع: عین حقیتاں نظر آئیاں، جلوہ یار دا نظر نواز واہ وا
ہو یا واضح راز دقیق مشکل، گجھا درد تے سوز گداز واہ وا
کعبہ ویکھ کے دل دیاں نال اکھیں، لئی عشق دی نیت نماز واہ وا
محمد شفیع میاں یکجا ڈٹھا، گلی عشق وچ ناز نیاز واہ وا

4۔ میاں محمد شفیع دا نظریہ عشق:

عشق، ولی تے روحانی کیفیتاں دا ناں اے۔ ایہ نظریہ بہت وسعت رکھدا اے۔
ایس وچ کوئی شک نہیں کہ دنیا حسن و عشق پاروں وجود وچ آئی۔ انسان دی پیدائش دا سبب
وی عشق ای اے تے اس دی روحانی ترقی دا باعث وی عشق اے۔ عشق دی شروعات
ظاہری حسن دی تاثیر اے۔ عشق، حسن دیاں کرشمہ سازیاں دے عمل نال وجود وچ آندا
اے تے اس دا حصول اک مسلسل کوشش دا ناں اے۔ ایہ بہت قوی تے ارفع جذبہ اے جو
انسان دے دماغ توں ہر قسم دا ڈر تے تذبذب دُور کر دیندا اے۔ انسان جب تک رنگ و بو

نال محبت کردار ہوے گا، اس دے جذبات تے احساسات زندہ رہن گے تے اوہ حسن دا طلب گار رہوے گا۔ حسن دا کوئی انت نہیں۔ حسن دیاں بلندیاں لامحدود نیں۔ ہر انسان حُسن نوں حاصل کرن دے جذبے نال سرشار اے۔ حصول دا ایہ جذبہ عشق اکھواندا اے۔ ایہ کائنات عشق واسطے اک جولانگاہ دی حیثیت رکھدی اے جس کثرت دا جامہ پایا ہویا اے:

ح: حج احرام تے عید گویا مینوں یار جانی تیرا دید اتھے
تیرے دید دی جس شنید پائی ہویا تیج دے باجھ شبید اتھے
سونہ رب دی رہے نہ وچ گھائے تیرا عشق جس لیا خرید اتھے
محمد شفیع مراد نوں اوہ پوہتا ہویا حسن دا جہڑا مرید اتھے

تصوف تے عشق اک دوجے توں الگ نہیں۔ تصوف اگر اک درخت اے تاں عشق اُس دیاں جڑاں وچوں اک جڑ۔ صوفیاں دے نزدیک خدا حُسن دا کمال اے تے عشق دی منزل اے۔ ایہ حقیقی عشق اے لیکن مجازی دے مشابہ ہے۔ لہٰذا علامتی انداز وچ حقیقی عشق، مجازی دے مراحل چوں گزر دا اے۔ صوفیاں دے نزدیک عشق مذہب دا جوہر وی اے تے عبادت اس عشق دی اک صورت اے۔ ایس حساب نال ایہ تمثیل تن کرداراں تے مشتمل اے۔ اک عاشق، دوجا عشق تے تیجا حسن۔ اتھے عاشق اک صوفی تے سالک اے۔ دوجا کردار عشق دا اے جہڑا اک ذریعہ یا طاقت اے جس دے بغیر عاشق اپنی منزل یعنی حُسن تک نہیں پہنچ سکدا۔ ایہ حسن، حسنِ ازل اے۔ جس دی جھلک ویکھنا آسان نہیں۔ میاں محمد شفیع وی دوجے صوفیاں دی طرح ایہو جے نظریات دے قائل نیں۔ اوہناں دی نظر وچ صوفی یا سالک اک عاشق اے۔ اوہناں اپنے پیر بھائیاں نوں بڑے صاف لفظاں وچ عاشق آکھیا اے۔ میاں محمد شفیع اپنے مرشد نوں عاشقاں دا محور و مرکز سمجھدے نیں۔ ایہ سبھے عاشق حسنِ ازل دی چاہ وچ اپنے رہبر تے ہادی ول بھجھدے نیں:

ذ: دیر درنگ نہ کریں طالب، غالب شوق والے بجھے آوندے نی
قدم بوس ہو کے چشتی پیر سندے، خوشی عید تھیں ودھ مناوندے نی
عاشق ہون محفوظ ملفوظ سُن کے، جو حضور ارشاد فرماوندے نی
محمد شفیع مبارکاں پیر بھائیاں، جہڑے مجلساں ایساں پاوندے نی

.....

ذ: ذات لچال حضور دی اے برکت فیض دا انت حساب ناہیں
عالمگیر تاثیر اس پیر دی اے، اثر حصر کوئی خاص پنجاب ناہیں
کعبہ جان جلالپور جان عاشق، کون آکھدا حج ثواب ناہیں
محمد شفیع محمدی نور والی، روشن شمع ایہ وچ حجاب ناہیں

.....

ش: شرف حضور دی صحبتاں دا آساں عاصیاں حشر نجات دُٹھی
صورت آپ دی عین انعام ربی آساں عاشقاں طور دی جھات دُٹھی
سدا قال وچ قال رسول دی اے، یا فر قال قرآن آیات دُٹھی
محمد شفیع ایہ آب حیات چشتی، قسمت والیاں نیک برات دُٹھی

.....

ز: زیب تک خلق محمدی تھیں ملک فلک دے وکھ نہال ہوندے
شمع چھوڑ پروانڑے جان رکھے، عاشق وانگ بلال حلال ہوندے
نظر باز مجاز تھیں کرن توبہ حرص آز کولوں انفصال ہوندے
محمد شفیع کس چیز دی لوڑ مینوں دسو دوستو پیر جلال ہوندے

مرشد نال عشق دے حوالے نال میاں محمد شفیع تے بلھے شاہؒ وچکار کجھ سانجھ نظر
آندی اے۔ دوواں دا مرشد نال عشق، خدا نال عشق دے مفہوم وچ اے۔ دوواں نے
سندھ وادی دے عشق دی روایت دا اثر قبولیا اے۔ بلھے شاہؒ تے میاں محمد شفیع اپنے آپ
نوں عورت دے روپ وچ، تے مرشد نوں محبوب یا معشوق دے روپ وچ ظاہر کیتا اے،
تے مرشدی محبوب، شوہ، خاوند جیسے لفظ ور تے نیں۔ بابا بلھے شاہؒ دے کلام دا نمونہ پیش اے:

میں اُڑیاں کر رہی کدی آ کر پھیرا
میں جو تینوں آکھیا کوئی گھل سنبھرا
پشماں چھیچ وچھائیاں، دل کیٹا ویہڑا
لنگ چلیندا آندا شاہ عنایت میرا
(83)

نی کوٹچل میرا ناں
بُھا شوہ کیہ لائی مینوں
مَت کچھ لگے اوہی تینوں
تد کریں گا توں نیاں
(84)

ہُن میاں محمد شفیع دے کلام دے نمونے ملاحظہ ہوں:

الف: اسم تیرا مقصود میرا، جانے رب وَدود جو منگدی میں
ڈراں کراں نہ عرض حضور اندر، نکا مُونہہ وڈی گل سنگدی میں
لگی اَنگ تیرے، پالیں اَنگ سائیاں، رکھیں لاج نلاج ملنگ دی میں
محمد شفیع ہزارے دا چودھری توں، بندی ہیر مندی، گندی جھنگ دی میں

.....

ت: تک سائیاں میرے حال ولوں، سائیاں والیاں دا ایہ نہیں حال ہوندا
تدھ ہوندیاں خاوند ا دُکھ تکاں، صبر حوصلہ ضبط محال ہوندا
تیرے نام تھیں ملن انعام لوکاں، میرے لئی کیوں نہیں ہُن کال ہوندا
محمد شفیع تائیں سدے جگ تیری، میری طرف کیوں نہیں خیال ہوندا

اک عاشق اپنی ذات دی نفی کرن توں بعد ہی حسن ازل دے دیداردی خواہش
کر سکدا اے۔ عشق دیاں راہواں آسان نہیں۔ منزل تک پہنچن لئی کئی اوکڑاں ویکھیاں
پنیدیاں نیں۔ جذبہ سچا تے یقین محکم ہون دے نال نال ثابت قدمی وی بہت ضروری اے:
لا: لا ایہ نفی دی تیغ خونی، جھلی عاشقاں اپنی جان اُتے
پیش نظر محبوب دی پاک صورت، کوئی ہور نہیں غیر سامان اُتے

جہاں اپنی نفی منظور کیتی، ثابت صدق یقین ایمان اُتے
محمد شفیع جہڑا ثابت قدم عاشق، دھن رحمتاں اُس جوان اُتے
میاں محمد شفیع محبوب حقیق نال واصل ہون نوں عشق دی منزل سمجھدے
نیں۔ اوہناں دے عشق تے منصوری نظریات دا گوڑھا اثر اے۔ اتھے اپنی ذات دی نفی
وَل اشارہ اے:

ع: عقل تے علم شعور بنے جتھے عشق آوے اوٹھے رہن ناہیں
جانن قدر علما نہ عشق سندا تاہیں منبر تے بیٹھ کے کہن ناہیں
جانو اوہناں نوں خام عوام جہڑے طعنے بولیاں جان تے سہن ناہیں
محمد شفیع اوہ تاں تک نہیں مچتے تختے دار دے تے جاں تک بہن ناہیں

عاشق نوں لوکاں دے ہزاراں طعنے مہنے سہنے پیندے نیں۔ عاشق کدی وی صبر دا
پلا نہیں چھڈ دے۔ اوہ زمانے دیاں ملامتاں نوں کھلے دل نال قبول کر دے نیں:
ط: طعن تشنیع ملامتاں نوں سن کے پاؤن عاشق مچھے گھوڑیاں نہیں
ہویا خاص احسان انسان اُتے ملیا عشق دا دان ایہ نوریاں نہیں
کیہ فائدہ اکھیاں لاوے دا مقصود جے خاص حضوریاں نہیں
محمد شفیع پا واصل دا خیر مینوں منظور حضور ایہ دُوریاں نہیں
اپنے کیہ تے پرائے کیہ، ملامت دے پتھر ہر طرفوں عاشقاں اُتے برسائے
جان دے نیں۔ شاہ منصوری جدوں دار تے لڑکائے گئے تاں اوہناں تے سنگ باری کرن
والیاں وچ اوہناں دے اپنے سنگی ساتھی وی شامل سن:

ر: راولاں والڑی پا پھیری، عاشق یار دی گلی تھیں لگھ جان دے
عزت نگ ناموس حیا تائیں، عاشق کنڈیاں اُتے ٹنگ جان دے
سنگی مار دے سنگ ملامتاں دے، ہو اُنگ سنگ اُنگ جان دے
محمد شفیع عاشق جاں باز ہوندے، جتھے اپنے خون تھیں رنگ جان دے

میاں محمد شفیع، مولانا رومی تے علامہ اقبال توں بہت متاثر سن۔ اوہناں دے نظریات تے اوہناں دوواں ہستیاں دا پرتوہ وی مشاہدہ کیتا جاسکدا اے۔ رومی تے اقبال عقل نوں عشق دے مقابلے وچ کمزور سمجھدے نیں۔ صوفیاں نے ہمیشہ عقل نوں عرفان دے رستے دی رکاوٹ سمجھیا اے۔ ایس لئی رومی داروہ عقل دے بارے اقبال دی نسبت زیادہ سخت اے۔ میاں محمد شفیع نے عقل یا عشق دا براہ راست کوئی فلسفہ تے بیان نہیں کیتا لیکن اوہناں دے کلام وچ ایہ اشارے ضرور ملدے نیں کہ جتھے عقل دا انت اے، اُتھوں عشق دی ابتدا ہوندی اے:

ع: عقل دی نگہ کچھ ہور ہوندی نظر عشق دی فلک توں پار ہوندی
عقل مطرب دے ہتھ مضرب دے کے نظر عشق دی تار وچکار ہوندی
رنگ روپ نہ عشق دی غرض اصلی گل ہور جو وچ دیدار ہوندی
محمد شفیع وچ غمزیاں راز گچھے بُجھے سو جس عشق دی سار ہوندی

صوفیاں تے مذہبی عالماں دے درمیان تصوف یا عشق موجب کشمکش ہمیشہ توں جاری اے۔ ایس پیکوں میاں محمد شفیع دی سی حرفی چوں اک نمونہ پیش اے:

خ: خشک ملو انزے جاندے نہیں مسکے درد تے سوز گداز والے
پچھو آئی کے شاہ منصور کولوں جہوے بَینِ محرم اس راز والے
اوہ کیہ ناز نیاز نوں جاندے نی، جہڑے ہون بندے حرص آرز والے
محمد شفیع جس عشق نہ راس آوے اوہ نی ٹھیکرے بول براز والے

5۔ تقدیر تے تدبیر:

اللہ تعالیٰ نوں ہر چیز دا علم اے تے کائنات اندر ہون والی ہر تبدیلی اللہ تعالیٰ دے حکم نال ہوندی اے۔ اللہ دی ذات قادر مطلق اے۔ اوہ جو چاہندا اے کردا اے۔ قرآن پاک وچ فرمان اے:

”کیا آپ نہیں جانتے کہ اللہ تعالیٰ جو کچھ آسمانوں میں ہے یا زمین پر سب کو بخوبی جانتا ہے، اور یہ سب کچھ کتاب (لوح محفوظ) میں لکھا ہوا ہے، اور (ان سب کے بارے میں) علم رکھنا اللہ کیلئے بہت آسان ہے۔“ (الحج: 70)

”اور آپکا رب جو چاہتا اور پسند کرتا ہے وہی پیدا کر دیتا ہے۔“ (القصص: 68)

”اور اللہ تعالیٰ جو چاہتا ہے، وہی کرتا ہے۔“ (ابراہیم: 27)

خوشی غمی، دکھ سکھ، اکھ سوکھ سب اللہ سوہنے دی طرفوں اے۔ انسان دے وس وچ کچھ وی نہیں۔ لیکن تقدیر یا قسمت تے ایمان دا ایہ مطلب ہرگز نہیں کہ انسان اپنے اچھے برے قول تے عمل دا ذمہ دار وی اللہ یا تقدیر نوں قرار دیوے۔ میاں محمد شفیع وی تقدیر تے ایمان یقین رکھن دی تلقین کر دے نیں۔ کیونکہ تقدیر تے ایمان یقین رکھنا، اللہ دی قدرت تے حکمت تے ایمان رکھنا اے۔ میاں محمد شفیع اللہ دے قادر مطلق ہون دا اقرار انج کر دے نیں:

الف: اس جہان وچ سدائی صرف بادشاہی اللہ پاک دی اے
رب جی قیوم قدیم قادر اوہدے جتھ وچ ڈور افلاک دی اے
سورج چن تارے اوہدے امر اندر جتھے پہنچ نہ فکر چالاک دی اے
محمد شفیع واحد لا شریک اللہ، بندہ جان عاجز مشیت خاک دی اے

تقدیر بارے میاں محمد شفیع دے کچھ ہو روچار ملاحظہ ہوں :

چارہ کچھ تدبیر دا چلدا نہیں تقدیر پئی کانیاں کس دی اے

ج: جمع وچ کس تفریق پائی تقدیر دے نال نہ زور کوئی

غالب حکم تقدیر دا ہر گلوں اتھ کسے دی پیش نہ آوندی اے

تقدیر اگے تدبیر ناہیں زہر ہجر سینے گیا دھس سیتو
یعنی تقدیر اگے تدبیر دا زور نہیں چلدا۔ انسان اپنی طرفوں لکھ تدبیراں کردا
رہے، ہونا اوہوای اے جو رب دی رضا اے۔ لوح محفوظ تے جو لکھیا گیا اے اُس ہو
کے ای رہنا اے:

ھ: ہو رہسی ہیر نمائی چاک جو پاک اصل دا
لکھیا لوح قلم دا جہڑا اوہ کدی نہیں ٹلدا
تدبیراں دا تقدیراں سنگ چارہ مول نہ چلدا
آکھ شفیق پر عامان تائیں پتہ نہیں اس گل دا

.....

الف: اگ تقدیر دی ساڑ دیندی تدبیر دے کاغذی پھل رانجھا
ہوندی سار جے اس انجام دی میں کدی دل نہ لاندڑی بھل رانجھا
بھانڈا بھیا کدی نہ راس آوے کدی جوے نہ بھلوے ٹل رانجھا
محمد شفیع تقدیر دے باز مینوں کھڑیا وچ ہوا دے ال رانجھا

میاں محمد شفیع تقدیر دے کیے نوں ظلم آکھنا گناہ سمجھدے نیں۔ کیونکہ اوہ تقدیر
نوں اللہ دی رضا سمجھدے نیں۔ تقدیر زمین توں چک کے تخت تے بٹھا دیندی اے تے
تخت توں لاہ کے قید خانیاں دے انہیریاں وچ پادیندی اے۔ تقدیر اگے ساری دنیا بے
وس اے:

ظ: ظلم آکھاں گنہگار ہوواں چارہ چلدا نال تقدیر کوئی نہ
عقل ہوش میری فراموش ہوئی کارگر ہوئی تدبیر کوئی نہ
مظہر ولاں تے لوٹیاں پاڑیا میرے جیہا غمگین دگیر کوئی نہ
محمد شفیع میں سلیاں نال سولاں تے آ میرا سینہ چیر کوئی نہ

.....

ز: زور نہ نال تقدیر چلے قدرت اپنی کھیڈ دکھاوندی اے
بادشاہاں نوں پکڑ کے قید کردی پنن واڑے تخت بہاوندی اے

مَرے کونت تے بحر ویاہیاں دے سارے مان تران گواوندی اے
محمد شفیع عزیز: سلیم جیہاں سندا داغ کلیجیڑے لاوندی اے

6۔ دنیا دی بے ثباتی تے آخرت دی فکر:

اللہ تعالیٰ فرماندے نیں:

”ایہ دنیا دی زندگی عارضی اے تے آخرت تہاڈا مستقل ٹھکانہ

اے۔“ (المومن: ۳۹)

یا فیراک ہو رتھاں تے ارشاد ہویا:

”اگلی زندگی ہی اصل زندگی اے۔“ (العنکبوت: ۲۹-۶۳)

دنیا دی زندگی دا انجام فنا اے۔ انسان، جانور، چرند، پرند، پہاڑ، دریا،
درخت، الغرض ایس پوری کائنات دی ہر شے دا آخرت ہونا اے۔ ایہ دنیا فنا دے رستے
اُتے چل رہی اے۔ غور کیتا جائے تاں فنا دا سفر ساڈیاں اکھیاں دے سامنے جاری اے۔
کائنات دیاں موجودات نوں انسان اپنے ہتھیں ختم کر دیا اے۔ جنگلاں تے پہاڑاں
نوں ختم کر کے وڈیاں وڈیاں عمارتاں بنائیاں جا رہیاں نیں۔ زمین تے قابض ہون لئی
دریاواں دے رُخ موڑے جا رہے نیں۔ جنگل، پہاڑ، دریا تے ایہناں دے آسے جیون
والی مخلوق مُکدی جا رہی اے۔ دنیا دے عارضی پن تے آخرت دی فکر بارے سبھے شاعران
نیں اپنے اپنے انداز وچ وچاریاں کیتے نیں۔ بابا فریدؒ ہوراں فرمایا سی (85):

فریدا کوٹھے منڈپ ماڑیاں، اُسار بندے بھی گئے
گھوڑا سودا کر گئے، گوریں آئے پئے

صوفیاں دے وچاریاں کہ ایہ دنیا اک سراں اے، اک عارضی ٹھکانہ اے۔ اصل
زندگی تے آخرت دی زندگی اے۔ ایس دنیا تے جووی آیا، آخر اُس نے ایتھوں چلانا کر
جانا اے۔ ایہ دنیا فنا دا گھاٹ اے۔ ایس لئی موت نوں ہر ویلے یاد رکھنا چاہیدا اے۔ سنسار

دے لو بھ وچ رُجھ کے آخرت نوں دلوں و سارنا نہیں چاہیدا:

لا: لا فہا دے گھاٹ اُتے ڈیرا آن کے غافلا ماریا ای
گیوں رُجھ سنسار دے لو بھ اندر کیہا حرص دا جال کھلاریا ای
تیرے ساتھ دے ساتھ لدا گئے دلوں موت دا خوف اُتاریا ای
محمد شفیع ہٹ غفلتوں اکھیاں توں کاہنوں رب رسول و ساریا ای

کوئی جتنا وی طاقتور کیوں نہ ہووے، اس دا اُنت مٹی اے۔ ایس دنیا تے وڈے
وڈے سورے آئے جیہناں دیاں یادگاراں دنیا تے عبرت دا نشان نیں۔ کیونکہ اوہناں دی
دولت، شان و شوکت، محل تے قلعے سب ایس دنیا تے رہ گئے، اوہ نال کچھ وی نہیں لے جا
سکے:

الف: اس سرائ وچ آئی کے تے لکھاں خاک دے وچ سما گئے
اسفندیار جمشید تے کیخسرو اتھے اپنا حکم چلا گئے
باہر اپنی شان وکھا گیا شیر شاہ جیسے قلعے پوا گئے
محمد شفیع پر موت جاں پائی پھیری پُپ چاپ اتھوں ڈیرے چا گئے

.....

الف: اللہ اللہ دنیا جان کوڑی اتھے کوڑ دے محل اُسار ناہیں
گئیوں رُجھ اس بھرے بازار اندر دُنیا داریاں دے بنھ بھار ناہیں
اوڑک کوچ کر جاوناں اس دیسوں اس زندگی دا اعتبار ناہیں
محمد شفیع ہے فعل مختار بندہ اپہر موت اُتے اختیار ناہیں

7۔ نفس امارہ دی مذمت:

اللہ تعالیٰ نے انسان نوں صرف تخلیق ای نہیں کیہا بلکہ کئی طرح دے احساس وی
عطا کیتے نیں۔ جیویں کہ ہمزاد تے نفس وغیرہ۔ نفس ای اوہ طاقت اے جہڑی انسان نوں
اچھے برے عملاں تے مائل کردی اے۔ نفس دیاں تن قسماں نیں۔ نفس امارہ، نفس لواہ،

نفس مطمئنہ۔ ہر برائی واکارن نفس امارہ نوں سمجھیا جاندا اے۔ تمام رذیلہ اعمال تے گناہاں دا ذمہ دار نفس امارہ ای ہے۔ اک صوفی ساری حیاتی عبادتاں تے ریاضتاں کردار ہندا اے لیکن نفس امارہ دی زد و بچ آندیاں ای ساری محنت برباد ہو جاندی اے۔ اوہ سکھے قُرب حضوریاں توں دُرکار یا جاندا اے۔ میاں محمد شفیع ایس بارے کہندے نیں:

خ: خنزف ریزے نمل پیار یا او باراں سال جھڑیاں نکراں ماریاں میں
نی میں خام کولوں گل خام ہوئی کندھاں ریت دیاں آپ اُساریاں میں
وگی نفس امارے دی مار کبی گئیاں بھل ہوشاں سُر تاں ساریاں میں
محمد شفیع میاں دفتر عاشقاں تھیں ہوئی رد تے گئی دُرکاریاں میں

اک سالک لئی سلوک دیاں راہواں وچ سب توں وڈی اوکڑ نفس امارہ ای ہوندا اے۔ ایہو جے وقت وچ اُس نوں اپنے ہادی تے مرشد دے علاوہ کوئی مددگار نظر نہیں آندا:

د: دیکھ مرید دا حال مرشد، لیا نفس شیطان نے گھیر مینوں
خواہش نفس دی عقل تے ہوئی غالب، کیتا نفس خناس نے زیر مینوں
لُونہڑ بن کے نفس دا شیر ڈھکا، دے چار چوہیر اندھیر مینوں
محمد شفیع میاں نظر پھیر کے تے، کدی دیکھدیوں چاہک دیر مینوں

.....

ظ: ظلمتاں جہل نادانیاں دی، میری جان عزیز شکار ہوئی
کریں مہر او مہر انوار ربی، کالی رات ظلمات چودھار ہوئی
حاوی دے تے خواہشاں نفس دیاں، ماری بڈھ تے عقل فرار ہوئی
محمد شفیع اس حرص و ہوا ہتھوں، میری زندگی بسر خوار ہوئی

میاں محمد شفیع دے کلام چوں ایس موضوع بارے کجھ ہور مثالاں پیش نیں:
کوئی واہ تے راہ نہیں سنے دا ظالم نفس شیطان نے گھیر لیاں

.....

باراں سالاں دی بندگی روہڑ دتی آکھے لگ کے نفس مکار بندی

.....
ظالم نفس خصوصتوں چا بیٹھا، غوث الوقت ایہ وقت امداد دا اے

.....
رہی ہوش نہ جوش شباب اندر، کیتا نفس شیطان گمراہ قبلہ

8۔ وچھوڑے دادر دتے ملاپ دی تانگھ:

شاعری بھائیوں کسے وی زبان دی ہووے سب توں ودھ ہجرتے فراق دے
موضوعاں تے لکھیا گیا اے۔ پنجابی شاعری برھوں دے درد، ملاپ دی تانگھ تے ہجرتے دیاں
گر لاناں نال بھری پئی اے۔ ساڈے صوفی شاعراں دا کلام وی وچھوڑے دے درد نال
بھریا ہویا اے۔ اوہناں دے اشارے بھائیوں مجاز و لہجہ یا حقیقت و دل، وچھوڑے دادر
اوہناں دی شاعری وچ بڑا اگھڑواں اے۔ میاں محمد شفیع اختر ڈھاگر دی ہوراں دے کلام
وچ وچھوڑے دادر دتے ملاپ دی تانگھ تھاتھاتے دیکھی جاسکدی اے:

ع: عقل تے ہوش نے مار کھادی لبر لے گئیاں اوہ مستوار اکھیں
دیدے لہدے دے دیاں بستیاں نوں پاؤن لوٹیاں سر بازار اکھیں
خزاں ہجرتے جگرتے تہہ پایا کھڑی دے دی اُٹ بہار اکھیں
محمد شفیع کھاء ضرب شدید سینے اُٹھے پہر روون زار و زار اکھیں

.....
ض: ضرب کاری سینے یار ماری بیٹھی کراں زاری دن رین میں تاں
اُٹھے پہر روواں، نبھوں خون چوداں ناہیں سکھ سوواں ہاں بے چین میں تاں
وال وال بدھا غماں نال میرا جگروں جگر اندر پڑاں پین میں تاں
محمد شفیع جدو کرے نین لگے ڈٹھا نہیں مُر کے سکھ چین میں تاں

.....
ح: حال میرا نہ توں پچھ بلی میتھوں دُور پیا محرم حال میرا
ہوسی حال کیہ نال وچھوڑیاں دے کیتا اوس نہیں کجھ خیال میرا

اندروڑاں تے کھان مکان دُھکے دُکھاں نال دُکھے وال وال میرا
محمد شفیع میاں جانی وداع ہوئے کون کنسی غماں دا کال میرا

.....

ر: راہ محبوب دے ویکھدی میں صبح شام بیٹھی ہو رکم کوئی نہ
بنان یار دی یاد دلشاد باجھوں خالی جاوندا اے میرا دم کوئی نہ
کبو ہجر دے سول ملول کیتا میرا جگر مینوں ہو غم کوئی نہ
محمد شفیع محبوب مرغوب باجھوں بنیا ہمدردی میرا جم کوئی نہ

9۔ متفرق مضمون:

میاں محمد شفیع دیاں سی حرفیاں وچ اڈ و اڈ مضمون بیان ہوئے نیں۔ انسانی
نفیسات، اخلاقیات، معرفت حتیٰ کہ ہر طرح دا موضوع یا مضمون اوہناں دے کلام وچ
موجود اے۔ ایسے ای کجھ مزید اہم موضوعاں دے حوالے نال مثالاں پیش کیتیاں جا
رہیاں نیں:

☆ حقائق و معارف:

س: سچ دا رہیا نہ سچ کوئی پئے جھوٹ نوں سچ بنان بندے
ظالم ڈرن نہ رب دے تہر کولوں پئے جھوٹے قرآن سر چان بندے
کوئی گل نہ دغے فریب باجھوں سدھی ہک ناہیں تند پان بندے
محمد شفیع ایہ ہو روان گیا جتھے دین دھتیاں او تھوں کھان بندے

.....

محمد شفیع میں اوہناں توں جان واراں کیتے قول کر کے جہڑیاں بھجیاں نہ

.....

سچی نیت نوں کرے پلپیت جہڑا اوہ تاں دودھ وچ اک نوں گھولدا ای

.....

بھانڈا بھجیا کدی نہ راس آوے کدی جڑوے نہ پھلوے ٹل رانجھا

.....

محمد شفیع بنان بھٹی سوز والی اٹاں قلب دیاں کدے پکناں نہیں

شکرانِ نعمت:



الف: اس انسان تے رب سچے کیڈے کرم تے فضل احسان کیستے
روح پھوک کے خاک دے وچ پٹلے عقل علم تے فہم دے دان کیستے
نظر گوش عطا کر ہوش بخشی نفس ناطقہ قول زبان کیستے
محمد شفیع ہک موت نوں رکھ پاسے ہور مرحلے سب آسان کیستے
دوستی:



لا: لان سوکھلوی کہن اوّل اپر باجھ وفا بے آب یاری
طالب نفس دے ہوس پرست لوکاں کیتی جگ دے وچ خراب یاری
حسن یوسفی موسوی نظر ہووے پچھو سچ تاں عین ثواب یاری
محمد شفیع تحقیق تصدیق ہوئی باطل حق دے وچ حجاب یاری
کہناں لئی تجلوا عین ذاتی، کہناں لئی ظلمات دا آب یاری
کہناں لئی ایہ سلسبیل کوثر، کہناں لئی ایہ ریگ سراب یاری
کہناں قلب قلب دے باب کھلے، کہناں لئی ایہ ترا عذاب یاری
زینت زیب ایہ تخت تے تاج والے جیوکر وچ مسیت محراب یاری
کہناں لئی ایہ تار رباب دی اے، کہناں لئی ایہ صوتِ غراب یاری
کہناں لئی سنجاب کنجواب اطلس، کہناں لئی ایہ کرد قصاب یاری
یا جیویں کالڑی رات دے وچ جھکے نکل ابر تھیں عین ماہتاب یاری
بے کنار تے بحر ذخار ہے ایہ ناہیں چھڑی نہر تالاب یاری
کہناں لئی خطاب مروّتاں دا، کہناں لئی ایہ خاص عتاب یاری
کہناں دلاں تے اثر نہ کرے ماسہ، کہناں دلاں نوں کرے خراب یاری
جیوکر زندگی متن کتاب دا اے زینت اُس دی نال اعراب یاری
محمد شفیع منظور خلوص باجھوں ہوندی نہیں ہے وچ جناب یاری



[۳]

سی حرفیاں میاں محمد شفیع اختر ڈھانگروی: فنی مطالعہ

ادب وچ شاعر دا مقام تے مرتبہ کیہ اے، ایس گل دا فکھیر اکرن واسطے اُس دی شاعری دا فکری تے فنی جائزہ بہت ضروری ہوندا اے۔ فنی پہلو، زبان تے بیان دیاں اوہناں خوبیاں دا مجموعہ ہوندا اے جس پاروں کلام دے حُسن وچ نکھار آندا اے۔ عام تے سادہ گلاں نوں زبان تے بیان دیاں خوبیاں نال سجا کے بیان کرنا شاعر دا فنی کمال ہوندا اے۔ جس طرح وِن سونے گہنے دِلہن دے حُسن وچ وادھے دا کارن بندے نیں، بالکل اُسے طرح زبان تے بیان دیاں خوبیاں شعر نوں سجا دیندیاں نیں۔ سنگار بھاویں کسے وی چیز دا ہووے ویکھن والے نوں متاثر کردا اے۔ اُسے طرح شعر دا فنی حُسن سنن والے نوں متاثر کردا اے۔ تشبیہاں، استعارے، کنائے، تلمیحاں، صنعتاں، محاورے ایہ سب شاعری دا زیور نیں۔

میاں محمد شفیع اختر ڈھانگروی دیاں سی حرفیاں وچ دل کشی تے تاثیر دے نال نال زبان تے بیان دیاں خوبیاں وی موجود نیں۔ لفظاں دی جادوگری، زبان دی روانی تے تخیل دی اُڑان الگ الگ رنگاں وچ دکھائی دیندی اے۔ ہن میاں محمد شفیع دیاں سی حرفیاں دا فنی جائزہ پیش کیا جاندا اے۔

1۔ ہیئت:

کسے فن پارے دی ہنتر تے شکل صورت نوں ہیئت آکھیا جاندا اے۔ پروفیسر انور جمال موجب ہیئت دی تعریف اُنج اے:

”ہیئت سے مراد پیکر، صورت، شکل، ساخت، وضعیت یا وضع ہے اور یہ تنقیدی اصطلاح ہے۔ کسی فن پارے کی صورت اور ساخت و وضعیت کا نام ”ہیئت“ ہے۔ تخلیق کو ہیئت سے الگ نہیں کیتا جاسکتا۔ یوں کہیے کہ ہیئت (Form) کے بغیر تخلیق کوئی چیز نہیں۔ ہیئت دراصل واردات و تجربات کی اس وضع کا نام ہے جو لفظوں کے ذریعے قاری یا سامع کے سامنے پیش کی جاتی ہے۔“ (86)

ہیئت دے لحاظ نال دیکھیا جائے تاں سی حرفی مسمط اے۔ مسمط ایسی نظم نوں کہیا جاندا اے جہڑی مختلف بنداں نوں آپس وچ جوڑن نال بندی اے۔ ڈاکٹر سلیم اختر مسمط دی تعریف انج کردے نیں:

”مسمط کا مادہ ”تسمیط“ ہے جس کا لغوی مطلب موتی پرونا ہے۔ اصطلاحاً منتشر اجزاء کو باہم مربوط کرنا، مختلف بندوں پر مشتمل نظم۔ بندوں میں مصرعوں کی تعداد پر پابندی نہیں چنانچہ تین تا دس مصرعوں تک کا بند ہو سکتا ہے لیکن پہلے بند میں مصرعوں کی جو تعداد رکھی گئی، بعد کے تمام بندوں میں اسے برقرار رکھا جاتا ہے۔“ (87)

سی حرفی وچ تریبہ بند ہوندے نیں۔ ایہ حروف تہجی دی خاص ترتیب نال لکھی جاندی اے۔ ہر حرف نال نویں بند دا آغاز ہوندا اے۔ اس دے مصرعیاں دی کوئی مخصوص تعداد متعین نہیں۔ سی حرفی نگاراں نے کئی کئی مصرعیاں دے بند لکھے نیں۔ زیادہ تر شاعران چار چار مصرعیاں دے بندے لکھے لیکن ایس دا کوئی اصول متعین نہیں۔ شروع توں لے کے آخری بند تک مصرعیاں دی تعداد برابر رکھی جاندی اے۔ لیکن کدھرے کدھرے سی حرفی دے کسے اک بند دے مصرعیاں دی تعداد باقی بندوں توں ودھ وی جاندی اے۔ اک بند وچ مصرعیاں دی تعداد دے اعتبار نال مسمط دیاں اٹھ قسمیں نیں:

- (i) مثلث: تین تین مصرعیاں دے بند
(ii) مربع: چار چار مصرعیاں دے بند
(iii) مخمس: پنج پنج مصرعیاں دے بند
(iv) مسدس: چھ چھ مصرعیاں دے بند
(v) مسبع: ست ست مصرعیاں دے بند
(vi) مشمن: آٹھ آٹھ مصرعیاں دے بند
(vii) مسع: نو نو مصرعیاں دے بند
(viii) مشعر: دس دس مصرعیاں دے بند

ہیئت دے اعتبار نال میاں محمد شفیع دیاں ایس کتاب وچ شامل 26 سی حرفیاں وچوں 25 سی حرفیاں مربع نیں۔ مربع مسمط دی اوہ شکل اے جس وچ ہر بند چار چار مصرعیاں دا ہوند اے۔ پنجابی زبان وچ مربع نوں ”دو یا چھند، چومصرعہ تے چوہرگہ“ کہیا جاند اے۔ زیادہ تر شاعراں نے سی حرفیاں وچ چار چار مصرعیاں دے بند لکھے نیں۔ عام اصول ایہو ورتیا گیا کہ اک بند دے چاروں مصرعے ہم قافیہ لکھے گئے۔ لیکن ایس حوالے نال دی آڈو آڈو تجربات دیکھن وچ آندے نیں۔ میاں محمد شفیع دیاں مربع وچ لکھیاں گئیاں سی حرفیاں دے بند ہم قافیہ نیں۔ ہر بند وچ الگ قافیہ تے ردیف ورتیا گیا اے۔ میاں محمد شفیع دیاں مربع وچ لکھیاں سی حرفیاں دا نمونہ پیش اے:

ش: شمع تے جلن پتنگ آ کے، ایہ تاں مرن کولوں بلی سنگدے نہیں
مزہ چکھ کے جان جلاو نے دا، چچھاں ہندے نہیں، جیون منگدے نہیں
مرن جنگ وچ جائی کے سورے جیوں بناں خون تھہ مہندیوں رنگدے نہیں
محمد شفیع جس عشق دے جام پیئے، طلبگار اوہ تاں خمر بھنگ دے نہیں

ت: تاکھ تیری کوئی آج دی نہیں کنیں سال گذرے دکھ جال دی نوں
بیٹھی گال جوانیاں جانیاں میں تیرے عشق دی واگ سمہال دی نوں

آہی بال آج وال سفید ہوئے کھنوں عشق دا پئی اُچھال دی نوں
محمد شفیع میں کیتڑے قول پالے توڑے پایا نہ گھڑی وصال دی نوں

چونکہ سی حرفی دے بنداں تے مصرعیاں دی تعداد کوئی اصول متعین نہیں، میاں
محمد شفیع نے مربع وچ لکھیاں سی حرفیاں وچ کئی تھاواں تے ایس پابندی نوں کھ نہیں رکھیا۔
چار مصرعیاں دی تھاں کجھ بنداں دے مصرعیاں دی تعداد دس دس مصرعیاں توں وی تجاوز
کر جاندی اے۔

میاں محمد شفیع نے دوجی سی حرفی (سی حرفی درد فراق) ترکیب بند وچ لکھی اے۔
ترکیب بند اک شعری ہنر اے جس دے ہر بند دے شروع دے کجھ مصرعے ہم قافیہ
ہوندے نیں اخیر وچ ٹیپ دا شعریا مصرعہ ہوند اے جبرِ انظم دے ہر بند دے آخر وچ دُہرایا
جاند اے۔ ایس وچ نہ تے بنداں دی گنتی دی کوئی قید اے تے نہ ای مصرعیاں دی۔ زیادہ
تر پنجابی شاعراں نے ترکیب بند وچ سی حرفیاں مسدس دے اصولاں موجب لکھیاں
نیں۔ بابا بلھے شاہ دی ترکیب بند وچ لکھی سی حرفی دا اک بند ملاحظہ ہووے (88):

س: سائیں بن جاہ نہ کوئی
جت ول ویکھاں اوہی اوہی
ہور کہتے ول ملے نہ ڈھوئی

مرشد میرا پار لنگھاوے
لاگی رے لاگی بل بل جاوے
اس لاگی نوں کون بچھاوے

مسدس دے اصولاں تحت ترکیب بند وچ لکھی گئی میاں محمد شفیع دی سی حرفی دا

نمونہ:

الف: اللہ نوں حمد ہزاراں جی
کراں باجھ حساب شماراں جی
لکھ سجدے شکر گزاراں جی

اوس خالق رازق باری نوں
کدی خوابے مل بے چاری نوں
میں تتی درویش ماری نوں

میاں محمد شفیع نے ایس مقالے وچ شامل پہلی سی حرفی ”جدائی یار دل جانی نشانی
دوزخ دارد: معاذ اللہ غلط گفتہ کہ دوزخ زونشاں دارد“ دے سرناویں پٹھ لکھی اے۔ ایس
سی حرفی دے بند دس دس مصرعیاں تے لکھے گئے نیں۔ نمونہ پیش اے:

الف: اج وچھوڑیا یار کولوں پاک ذات ایزد متعال سیو
گھائی ہجر دی چا پدی بہت اوکھی ہوسی لنگھناں بہت محال سیو
آئی دکھاں دے منہ بھیڑی جند میری ہو یا خس میرا اختر فال سیو
لگن تیر جدائی دے وچ سینے ہو یا جگر غریب مال مثالی سیو
کھنڈی چھری دے نال گھٹھا ہجر مینوں مثل نیم بسمل ہو یا حال سیو
آکھاں کت ویلے رہا یار ملسی سستی وانگ کیتے کھلے وال سیو
لگی کرد فراق ہلاک ہونیاں کیتا درد نے سخت بے حال سیو
اک پلک نہ صبر قرار آوے مندی ہوئی غریب دے نال سیو
پئی ڈھاڑ از غیب تھیں تنٹڑی تے رہواں نت بیزار ملال سیو
ملے دان وصال کنگال تا میں محمد شفیع ایہ کرے سوال سیو

1.1 - سی حرفیاں دے منفرد سرناویں:

غزل توں اڈ شاعری دی بھاویں جھڑی وی صنف ہووے، اُس داسرناواں بہت
اہمیت رکھدا اے۔ کیونکہ سرناویں دا نظم یا سی حرفی دے موضوع یا مضمون نال بڑا گور ہا ربط
ہوند اے۔ ایس لئی شاعر اپنی کسے وی تخلیق داسرناواں بڑے گوہ و چارتوں بعد لکھدے نیں
سی حرفی دی روایت دا جائزہ لیا جاوے تاں زیادہ تر سرناویں چھوٹے تے مختصر لکھے ہوئے
میلدے نیں۔ مثلاً: سی حرفی بے وفا معشوقہ (نذر محمد)، سی حرفی پردیسی (غلام سرور

سرولوی)، سی حرفی مرشد (عبدالجبار قادری)، تحفہ درویش (محمد علی)، سی حرفی ڈھولاسی حرفی عشقیہ (مولوی جان محمد)، سی حرفی معرفت (ہاشم شاہ)، سی حرفی ہفت پیکر (خلیفہ قمر دین) وغیرہ۔ یافیر جہڑیاں سی حرفیاں داستاناں یا قصیاں بارے لکھیاں گئیاں اوہناں دے سرناویں کہانی دے مطابق لکھے گئے۔ مثلاً سی حرفی ہیر رانجھا وغیرہ۔

میاں محمد شفیع اختر ڈھانگری نے سی حرفیاں دے سرناویں روایت توں ہٹ کے لکھے نیں۔ اوہناں دیاں 06 سی حرفیاں دے سرناویں فارسی تے اُردو شعراں دی صورت وچ لکھے گئے نیں:

- ☆ جدائی یار دل جانی نشانی دوزخ دارد :::: معاذ اللہ غلط گفتم کہ دوزخ زونشاں دارد
- ☆ مدت ہوئی میں دید سے نامستفید ہوں :::: جس کو نہ کوئی سن سکے میں وہ پکارا ہوں
- ☆ دل ڈوب ڈوب جاتا ہے آتے ہو یا دجب :::: پر کیا کروں کہ موت پہ یاں دسترس نہیں
- ☆ نہ کسے طیب دلہانہ کسے شفیق دلہا :::: بجز ایں کہ در زخ تو ہمہ درد را درائے
- ☆ بیاساقی بمن کاس الکرامے :::: چرا ارزاں نہ پیغام و سلامے
- ☆ فرقت کے شید شعلوں میں آہ جل بجھا ہوں میں :::: بجھ جائے خود بخود جو سحر وہ دیا ہوں میں

2۔ زبان تے بیان:

ہرادیب یا شاعر دی ایہ فطری خواہش ہوندی اے کہ اوہ جو کچھ بولے یا لکھے، اوہ اتنا واضح، صاف تے اثر انگیز ہووے کہ سنن تے پڑھن والیاں دے دل وچ اتر جائے۔ اوہ اپنی تقریر یا تحریر نوں مدلل تے معقول بنان واسطے چجیوں تے موقع مناسبت دے مطابق لفظاں دا انتخاب کردا اے۔ دتھے ضرورت محسوس کردا اے اپنے بیان نوں مزید زوردار بنان لئی مختلف طریقے آزماںدا اے جیہناں دا تعلق زبان تے بیان نال اے۔ میاں محمد شفیع نے وی ایہناں طریقیاں نوں ورتیا اے۔ اوہناں دے کلام نوں کچھ رکھ کے مثالیں نال وضاحت کیتی جاندی اے۔

2.1 - لفظ، ترکیباں تے محاورے:

ادب دی ہر صنف لفظاں تے ترکیباں دی محتاج اے۔ شاعری وچ ایہناں دوواں دی اہمیت ہو روی و دھ جاندی اے۔ لفظ تے ترکیباں اگر مناسب طریقے نال ورتیاں جان تاں شاعری وچ نہ صرف چاشنی تے نعمیت دا موجب بندیاں نیں بلکہ اوہناں دے ذریعے اس دور دی (سیاسی، معاشی تے معاشرتی) لفظی مصوری وی ہوندی اے۔ اوہناں وچ مخصوص عہد دی تاریخ چٹھی ہوندی اے۔ ایہ شاعر دی ذہنی تے نفسیاتی صورت حال بارے آگاہی دیندے نیں۔ اوہناں نال زبان دیاں اظہاری وسعتاں وچ وی اضافہ ہوندا اے۔ لیکن اک گل دا خیال رکھنا ضروری اے کہ لفظاں دا استعمال صرف کلام وچ خوبصورتی پیدا کرن واسطے ای نہیں ہونا چاہیدا۔ بلکہ معنی تے مضمون دا اچھا ہونا وی ضروری اے۔ پنجابی شعری ادب وچ کئی ایسے شاعر نے جیہناں دوجیاں زباناں دے لفظاں تے ترکیباں نوں پنجابی دا حصہ بنان دی کوشش کیتی اے۔ ایہ حقیقت اے کہ اوہناں ادبی یا شعری ضرورتاں پاروں ہوراں زباناں دے لفظ ورتے، لیکن ایہ وی حقیقت اے کہ ایس طرح پنجابی دے وسیع لفظاں دے ذخیرے نوں ہو وسعت حاصل ہوئی۔

میاں محمد شفیع نے پنجابی توں علاوہ اردو تے فارسی زبان وچ وی شاعری کیتی اے۔ اوہ نہ صرف فارسی دے ماہر سن بلکہ اوہناں فارسی دے کلاسیکل ادب دا بڑا وسیع مطالعہ وی کر رکھیا سی۔ ایس طرح اوہناں دی پنجابی تے اردو شاعری اُتے فارسی دے اثرات دا ہونا لازمی امر سی۔ میاں محمد شفیع نے اپنی پنجابی شاعری وچ بغیر کسے جھجک دے فارسی تے عربی لفظاں تے ترکیباں ورتیاں نیں:

ک: کدوں قدم رنجہ فرمائی ہوئی دسو آپ دی میں مسکین دے گھر
کدوں ہوگ تشریف شریف تیری میں درویش دل ریش حزین دے گھر
شہر یار کد ہوگ تشریف آور میں دہقان تے خاک نشین دے گھر
محمد شفیع میں وچ اڈیک جس دی کدے آوناں بے تسکین دے گھر

ب: بدر منیر تے شمس رخشاں دونویں عکس اس ماہ جمال دے نی

صوری معنوی عین در عین ہستی بالاتر از فہم انسان تیری

ذرے فیض خورشید تھیں چمک اٹھے دیون وانگ ماہتاب تابانیاں او

سینہ عشق تھیں شق بے شک جہاں تہاں مرض تاں سوز احراق دا اے

نظر باز مجاز تھیں کرن توبہ حرص آرز کولوں انفصال ہوندے

سوہنی انگ پوشاک براق چٹی زینت زیب مضاعف جمال دی اے

ع: عین عرفان دا سرچشمہ، مخزن گنج ایہ جود سخا دا اے

محمد شفیع پاکرم دا خیر ٹھوٹھے تیرے ہجر تھیں گور کنار ہاں میں

خ: خزف ریزے ٹل پیاریاں باراں سال جھڑیاں ٹکراں ماریاں میں

ل: لاف گزاف دی بات ناہیں اوہدے نین جھیلوے مٹھیاں میں

مطرب رہ گیا سخت حیران جس دم تاراں کھڑکدیاں وچ زیرو بم رُک گئے

پاوے لوٹیاں ولاں تے خال جس دا سوہنی ذقن ڈونگھے غغب والا

میری لب فریاد خاموش ہوگئی میرے اشک وچ چشم پُر دم رُک گئے

ز: زلف شب گیر اسیر جہڑے اوہ تاں منگدے نہیں آزادیاں نوں

مرہم مہر پیار دی لایکے تے مندل اوہ زخم ناسور کر دے

میاں محمد شفیع اپنے شعراں وچ زیادہ تر فارسی ترکیباں نوں زیرِ اضافت ختم کر کے دَرتیا اے۔ اُتے دتیاں گیاں مثالاں توں اڈورتے گئے فارسی تے عربی لفظ تے ترکیباں ایہ نیں: ترقیم، لعل مذاب، واصف، فوق، اشک سامان، آب حیات، زلف سیاہ، بے نظیر، ملفوف، مثیل، باجمال، جمیل، ضو، مدوح، اجرام فلکی، مسجود، ملائک، بیت المعمور، ظاہر و باطن، اربع عناصر، ربّ علام، فاسق، دستارِ فضیلت، ایقان، عہدِ الست، ہفت اقلیم، تنغ، فہم ضعیف، قندبات، شعر، شش جہات، برق خاطف، غرقِ عرق، برق تاثیر، شیریں، زبیب، صدر نشین، دانش، فہم، ابرسحاب، ملفوظ، حصر، افلاک، نفر، حزیں، برق جمال، فیض مآب، ایام، جاہ جلال، ہدایت مآب، باج گذار، سخن، سخنور، غمز، علوم مروجہ، تصریحات، سقم، خانہ زاد، مطیع منقاد، ظفر نشان، سنگ چقماق، قاسم (بمعنی تقسیم کرن والا)، دلآرام، مقصود بالذات، فسق فجور، گردشِ فلکی، سطحی، بے مثل، طبع یوسفی، زنگ ظلمتاں، مظہر ذات، پاسداری، ایمان بالغیب، ثانی ماہ کنعان، لامکان، تاب تجلیاں، فائق، مافی الصدور، مخفی، تحصیل، دربارِ دربار، کج کلاہ، صدق اخلاص، آبدار، صاعقہ، غیور، فراموش، خیر کثیر وغیرہ۔

میاں محمد شفیع نے لفظاں نوں پنجابی دی رنگن بڑی خوبصورتی نال چاڑھی اے۔ شعراں وچ ایہ لفظ پنجابی زبان دے ای معلوم ہوندے نیں۔ اک بند بطور نمونہ پیش اے جس وچ قافیہ وچ ورتے گئے لفظاں نوں بڑی خوبصورتی نال پنجابی دے دی کوشش کیتی گئی اے:

ج: حج تے عید ہے دید تیرا، اساں عاشقاں درد رسیدیاں نوں
تیرے دید سعید توں ملے فرحت، فرقت زدہ عشاق دیاں دیدیاں نوں
بھلے کم تے کاج جہان والے، پڑھاں آپ دیاں مدحاں قصیدیاں نوں
محمد شفیع حضوریاں بخش بھاویں، سکھیں وسدیاں! عشق شوریدیاں نوں

2.2- تشبیہ:

کے اک چیز نوں دو جی وانگوں قرار دینا تشبیہ اکھواندا اے۔ تشبیہ وچ اک چیز نوں اک یا اک توں زیادہ مشترک صفتاں دی بنیاد تے دو جی جیہا قرار دتا جاندا اے۔ ایس طرح پہلی چیز دی اہمیت، صفت یا حالت زیادہ مؤثر بن کے سامنے آندی اے۔ میاں محمد شفیع نے فطری انداز وچ تشبیہاں ورتیاں نیں۔ مثالاں لئی اوہناں دیاں سی حرفیاں چوں چند مصرعے پیش نیں:

حجر الاسودوں سنگِ دہلیز تیرا، تیرا بیت جیوں بیت المعمور ہويا

الف: اسماں حضور دے اسم جیہی لذت قد نبات وچ نہیں ڈھکی

محمد شفیع حضور دے فیض کولوں میرا شعر جیوں دُرِ آبدار چمکے

محمد شفیع میں ہیرِ دلگیر وانگوں اجِ نثر وچ گلی بازار ہو گئی

وانگ و حشاں ملن اجاڑ جنگل عاشق دیوندے تچ آزادیاں نوں

گھڑی بھر دی حشر دی گھڑی ورگی سال سال وانگوں پل پل مائے

انگ وانگ کرنگ دے سُک گیا رنگ رتزا کاٹرا خال ہويا

درس درس والا جدوں بند ہويا سینہ چاک کیتا وانگ لیر مائے

کھ یار دا جاپدا خاص کعبہ ابرو یار دے وانگ محراب سیو

2.3۔ استعارہ:

استعارہ بنیادی طور پر تشبیہ نال تعلق رکھتا ہے۔ جدوں کسے لفظ نوں اوہدے اصل دی تھان مجازی معنیاں وچ ورتیا جائے کہ اوہدے حقیقی تے مجازی معنیاں وچ تشبیہ دا تعلق موجود ہووے، اُس نوں استعارہ آکھیا جاند اے۔ بلند خیالی، بلاغت، مٹھاس تے روانی اک لفظ وچ بند کرن دانال استعارہ اے۔ میاں محمد شفیع دے کلام چوں مثالیں پیش نیں:

ط: طبع اس مدح دے بحر اندر بیٹھی عقل دے روہڑ جہاز سارے

د: دلاں تے لوٹیاں حُسن تیرے پائیاں دلبرا ماہ کنعانیاں او

کعبے دلاں دے کرن آباد عاشق کر کے کبر دیاں بُناں نوں چور اتھے

بیٹھے غمز دے تیر نشانیاں تے گکیاں خطا نہ تیریاں کانیاں او

ص: صدف دیا موتیا چچا او تیرے حسن دی تاب نہ جائے جھلی

محمد شفیع میں کونج شکار ہوئی، جھنڈے حسن دے باز طرار دیاں

ز: زہر مثال ایام غم دے میری زندگی تلخ تمام ہوئی

محمد شفیع میاں تیرا دید آہا میرے کان دن عید تے جج والا

ٹھٹھاں ماردا فیض دا بحر ڈٹھا، نظر ہوئی نہ گم سراب اندر

2.4۔ کنایہ:

کنایہ دا مطلب لُکا کے یا اشارے نال گل کرنا اے۔ ایس طرح کہ لفظی مطلب کچھ ہووے تے اُس توں مراد کچھ لیا جائے۔ کنائے اندر مجازی دی تھان حقیقی معنی وی مراد

لئے جاسکدے ہیں۔ میاں محمد شفیع نے کنایہ بڑے چھوٹے انداز وچ ورتیا اے۔ اوہناں دیاں سی حرفیاں چوں کجھ مثالیں پیش ہیں:

داڑھی پرہیوں دے وچ مٹا بیٹھا لونبر جھنگ دا شینہ دی گج والا

بادشاہاں دے لنگ وچ ہتھ گتھے پردے والیاں دے بُرے باب کردا

بھانڈا بھجیا کدی نہ راس آوے کدی جڑے نہ پھلوے ٹل رانجھا

تھی نیت نوں کرے پلٹت جہڑا اوہ تاں دُدھ وچ اک نوں گھولدا ای

محمد شفیع پر تاساں بھی کنڈ وتی لکھی وچ تقدیر دے ہار سارے

کلی کھڑی گلاب دی باغ اندر سینے بلبلان دے وچ اگ بلی

چنگی بھلی میں ہسدی کھیڈدی ساں سیاں نال میں ترت بیمار ہوگئی

پردہ نگ ناموس دا چاک ہويا اوہلا رکھیا پت تے تک دا نہ

ر: راکھ مل خاک سیاہ مونہہ تے رانجھے اپنا آپ چھپایا ای

ذ: ذکر مذکور کیہ اکھیاں دا پھٹے اکھیاں دے پھر دے گلی گلی

3۔ صنائع بدائع (معنوی تے لفظی):

علم بیان کلام وچ شان، شوکت تے تقویت دا باعث ہوندا اے۔ جب کہ علم بدیع کلام نوں سنوار سجا کے خوبصورت تے دل کچھواں بنا دیندا اے۔ ہر لفظ انسانی خیالات دی نمائندگی کردا اے چنانچہ زبان تے بیان وچ نویں نویں لفظاں تے ترکیباں نوں انوکھے انداز وچ پیش کرن نال کلام پُر تاثیر بن جاندا اے۔ شعرا و ادب دا سب توں وڈا

مقصد انسان نوں خوشی تے مسرت دینا اے۔ جدوں لفظ تے تخیل اکٹھے ہوندے نیں تاں اک ایسا آہنگ پیدا ہو جاند اے جہڑا انسان دی خوشی دا کارن بند اے۔ ایس خوشی دا بنیادی تعلق ایسے لفظاں تے اوہناں دے معنیاں نال اے جیہناں نوں ہنرمندانہ طریقے نال ورتیا گیا ہووے۔ اگرچہ بعض دفعہ ایہناں صنائع لفظی نوں سمجھن لئی تھوڑا غور وی کرنا پیندا اے۔ پر اس وچ وی اک مزہ اے۔ قادر الکلام شاعر عام لفظاں نوں ایسے اچرچ ڈھنگ نال کلام دا حصہ بناندے نیں کہ اوہناں دے کلام وچ اک خاص شان پیدا ہو جاندی اے۔ میاں محمد شفیع نے وی صنائع بدائع توں بڑی خوبصورتی نال کم لیا اے۔

3.1۔ صنعت مراعات لفظیر:

اک لفظ دی نسبت نال ایسے مختلف لفظاں دی ورتوں جیہناں دا پہلے لفظ نال تضاد توں علاوہ کوئی تعلق ہووے۔ یعنی اکو مضمون نال تعلق رکھن والے مناسب لفظاں دے استعمال نوں صنعت مراعات لفظیر آکھیا جاند اے۔ میاں محمد شفیع دے کلام چوں چند مثالیں پیش نیں:

م: ماہ منیر تے شمس انور، بیشک حسن وچ بے نظیر دونویں
میرے پیر دی ویکھ تنویر احسن ہوئے گم جیوں نقش تصویر دونویں
سطھی روشنی شمس تے قمر والی، اجرام کد اہل ضمیر دونویں
محمد شفیع اوہ سرو آزاد سوہنا گردش فلکی وچ ایہ اسیر دونویں

.....

بھالاں انگ ننگ پتنگ وانگوں شمع حسن دی نور نظر اڑے تے

.....

کٹھے جان ایہ مرہم جبیر کارن زخمی نگہ دی تیز تلوار تیرے

.....

دین خار ببول دے ہار مینوں پھلاں نال ایہ بھرے گلزار سارے

.....

پاوے لوٹیاں دلاں تے خال جس واسوئی دُفن تے ڈونگھے غمغب والا

یا جنیوں کالڑی رات دے وچ جھکے نکل ابر تھیں عین ماہتاب یاری

3.2۔ صنعت تضاد:

ایسے لفظاں واسعمال جیہناں وامطلب اک دوجے دے الٹ ہووے۔ ادبی اعتبار نال تضاد کلام دایا سُن اے جو متضاد لفظاں دے استعمال نال پیدا ہوندا اے۔ ایس نال کدے سنجیدہ تے کدے غیر سنجیدہ صورتحال پیدا ہوندی اے جس دی وجہ نال کلام دی تاثیر تے تفہیم وچ اضافہ ہوندا اے۔ میاں محمد شفیع دیاں سی حرفیاں چوں صنعت تضاد دیاں کجھ مثالاں پیش نیں:

محمد شفیع تساڈی ذات اُتم، بچ گوت کمین تھیں بھنگنی میں

د: دُوریاں خواب خیال آہیاں مزے وصل دے جدوں نصیب ہوئے

ظ: ظاہر باطن مینوں رانجنن نظری آدے

دس اساں نوں کس نے یاد کرنا جیکر تاساں بھی منوں وساریا او

ن: نفعے نقصان نوں سوچدے نہیں عاشق نال ماہی اکھیں لان ولے

رکھیں پیر اڈول نہ ڈول جائیں سوچیں پیاریا خام خیالیاں نہ

ع: عشق دا نام نہ لئیں بھل کے آباں والیاں نوں ایہ بے آب کردا

الف: ازل تھیں ابد دے دال توڑیں مرکز میم محمدی جان اڑیا

3.3۔ صنعتِ مبالغہ:

صنعتِ مبالغہ دی تعریف سید عابد علی عابد موجب انج اے:
 ”یعنی کسی امر کو شدت و ضعف میں اس حد تک پہنچا دینا کہ اس حد
 تک اس کا پہنچنا محال ہو تا کہ سننے والے کو یہ گمان نہ رہے کہ اس
 وصف کا اب کوئی مرتبہ باقی ہے۔۔۔“۔ (89)

میاں محمد شفیع دے کلام وچ صنعتِ مبالغہ استعمال ملا حظہ ہووے:
 جہڑا بھار اسمان نہ چا سکے مشکلِ سدّی پَنڈ اٹھان سائیں

 ع عرشِ عظیم تھیں لگھ گئی مری دُور فریاد فریاد سائیں

 جائے ڈول ایہ زمیں اسمان توڑے میرا کدے نہ قول زبان ڈولے

 جہاں یار دے دید دی جھلک پائی خواہش اوہناں بہشت دی خور دی نہ

 برق بار اوہ اکھ دلداری تیری تنکھی تیز جیوں دھار تلوار دی اے

 محمد شفیع میاں جانی یار جیہا سوہنا نہیں کوئی وچ سنسار سارے

 تیرے پاک جمال دی جہاں اگے برق فلک نہ کسے حساب دے وچ

3.4۔ صنعتِ تلمیح:

کلام وچ ایسے لفظ یا ترکیب دے استعمال کرن دانناں تلمیح اے جس پاروں کوئی
 آیت، حدیث، تاریخی، مذہبی یا معاشرتی واقعہ یا کہانی ذہن وچ آجائے۔ صنعتِ تلمیح کلام
 وچ جامعیت تے اختصار دا باعث ہوندی اے۔ میاں محمد شفیع نے اپنے کلام وچ بے شمار
 تلمیحاں درتیاں نیں۔ کجھ مثالاں پیش نیں:

محمد شفیع اس شمس دا پرتوہ ایہ جیندا لقب سراجا منیر آیا

صفاء اُند دی سیف حیوں سیف اللہ تیویں اثر اُس دی تقریر والا

حاضر باش دلیز مخدوم دی تے محمود جیہے وانگ ایاز قبلہ

جلوے لیلۃ القدر دے بہوں چنگے اپر آپ دے حُسن دی جہات وکھری

محمد شفیع میاں صنعان وانگوں پھراں جنگلیں چاردا خوک ماہی

محمد شفیع ہزارے دا چودھری توں بندی ہیر مندی گندی جھنگ دی میں

ج: جام جمشید دی لوڑ ناہیں مگاں عشق دا جام انعام قبلہ

جہڑے ڈرن نہ دار تے رن کولوں عاشق وانگ منصور حلاج رکھدا

اثر فیض حضور دیاں مجلساں دا کالے چور ثانی بازید ہوندے

کرساں زاریاں وانگ یعقوب بیٹھی گنساں پی گھڑیاں پل پل پچ

الف: استوں پہلے دی میں رانجھن یار کوکیندڑی

رکھو کہف اصحاب دے وانگ مینوں بدھا اپنی زلف زنجیر تائیں

3.4.1۔ قرآنی آیات تے حدیثاں دی ورتوں:

بیان دی صداقت لئی یا تلخ دے طور تے قرآنی آیات یا حدیثاں نوں شعراں وچ

ورتن دی روایت بہت پرانی اے۔ پنجابی شاعراں آیات یا حدیثاں یا عربی عبارتوں نوں

اپنے کلام وچ بہت ورتیا اے۔ عربی عبارت نوں پنجابی شاعری وچ استعمال کرنا وی اک فن اے۔ پنجابی شاعراں نے ایس فن دا مظاہرہ بہت خوبی نال کیتا اے۔ میاں محمد شفیع نے وی بڑے چھوڑ انداز وچ عربی آیاتاں تیجبارتاں نوں مصرعیاں وچ ورتیا اے:

میرے واسطے لبناً سائغاً ہے تیری مٹھڑی وات تھیں بات تیری

لا: لا اله الا الله اتھے غیر دی گل ہلا ناہیں

ق: قاب قوسین او ادنی غرت اوہ شرف تے شان محمدی اے

لا تتحرك حکم اُس دے بن ککھ نہ کوئی بکے

ساقی بخش پیارڑا فیض والا، رنداں چاڑا ہنل من مزید آیا

انشاء الله کدی نہ ترسی میتھوں بے وفائی

پینکھی اُڈ دے وچ ہوا ویکھو اوہدا حکم فی جو السما چلے

فی احسن تقویم تخلیق تیری، جدی کرے تصدیق قرآن قبلہ

کُلُّ نَفْسٍ ذَائِقَةُ الْمَوْتِ والا پیالہ مونہہ میرے مظہر لایا اے

رَبِّ ارْزُقْنِي دے جوش وچ ہوش بھلی آکھے رہی ہن تاب نہ دُوریاں دی

جیندا اصل مدینتہ العلم نبی، علی باجھ جدا دُوجا باب ناہیں

3.5۔ صنعتِ تجنیس:

صنعتِ تجنیس توں مراد کلام وچ ایسے لفظاں دی ورتوں کرنا جیہناں دی املا تے

تلفظ تاں اک جیہا ہووے، لیکن معنیاں وچ فرق ہووے۔ ایس صنعت دیاں مزید کئی
قسمیں نیں۔ میاں محمد شفیع نے صنعت تجنیس نوں بڑے چھوے رنگ وچ ورتیا اے:
☆ تجنیس تام:

بندہ بندگی کرے تے بنے بندہ کرنی بندگی مرتبہ نوریاں دا

ش: شام پی ناہیں شام آیا میریاں اکھیاں طلب دیدار دی اے

غ: غم تیرا میرے دم اُتے دم دم ہے یاد سلیم تیری

منصور دے ہار اوہ دار اُتے جان اپنی جان چڑھا بیٹھے

ی: یاریاں نوں پالن یار سچے اوہ تاں عہد میثاق توں بھجدے نہیں

جہڑے لا بیٹھے یاری سچ والی اوہ تاں ہور کسے ول بھجدے نہیں

☆ تجنیس مرکب و مفرد:

خ: خام کولوں گل خام ہوئی بیٹھی خام خیال پکاوئی آں

س: سکھ دی نیند نصیب کتھوں دل آرام دے باجھ آرام ناہیں

جس کم بخت دے بخت کرخت کھوٹے ہووے غیر آباد آباد ہوندا

☆ تجنیس قلب:

پیراں عشق دیاں جان نہ نال پڑیاں ہتھوں نسخیوں ہون سولیاں او

☆ تجنیس محرف:

الف: اس دربار دُربار اُتے اساں سیس نواوندے شاہ ڈٹھے

☆ تجنیس خطی:

الف: آ پیارا لا چھاتی، جھاتی پا میں واسطے پا رہیاں

محمد شفیع اوہ تاں تک نہیں مٹتے تختے دار دے تے جاں تک بہن ناہیں

الف: الف دیاں الفتاں رہن باقی حرص خام کولوں خالی جام ہووے
تجنیس زائد و ناقص: ☆

جاسی دم سنگ غم محبتاں دے، کچھاں قدم نہ مول ہٹاوساں میں

شالا مٹے نہ پیار دی تہند کچی رہا رہے ایہ کچ دی ونگ ثابت

محمد شفیع تیں دید توں عید میری مہربان جاں رب دی ذات ہوئی

صاحب جود وجود باجود اکرم فیض کار خوددار غیور ہیں توں

ک: کلمہ ادراک تے عقل اقل ناقص فہم نالے معلومات کوئی نہ

3.6۔ صنعت ترصیع:

کلام وچ ہم قافیہ لفظاں دے تقرر انوں صنعت ترصیع آکھیا جاندا اے۔ ایس
حوالے نال نثر وچ مسجع تے مقفی جہیاں اصطلاحاں مشہور نیں۔ صنعت ترصیع وی کلام وچ
ترنم تے نغمیت دا کارن بندی اے۔ میاں محمد شفیع نے ایس صنعت دا استعمال بہت زیادہ کیتا
اے۔ اتھے صرف اوہ مصرعے مثال دے طور تے پیش کیتے جا رہے نیں جیہناں وچ کم توں
کم تن ہم قافیہ یا ہم آواز لفظ ورتے گئے نیں:

اٹھے پہر وواں بنجوں خون چوواں ناہیں سکھ سوواں ہاں بے چین میں تاں

گئی ہوش میری فراموش ساری کیتا نوش جس روز دا جام تیرا

سَد کول انجھول میں گھول گھنتی مٹھا بول غصہ فرما ناہیں

.....

تک حال کنگال بد حال سدا کج پال بے خیر نصیر ہیں توں

.....

صاحب جود وجود باجود اکرم فیض کار خوددار غیور ہیں توں

3.7- صنعت تحلیل قافیہ:

کلام وچ ایسے لفظ دا استعمال جس دی وجہ نال قافیہ تے ردیف مکمل طور تے یا اوہناں دا کجھ حصہ آپس وچ مدغم ہو جان، تحلیل قافیہ اکھواندا اے۔ میاں محمد شفیع نے تحلیل قافیہ دی صنعت بہت تھاواں تے بڑے چچویں انداز وچ ورتی اے:

ث: ثابتی قول تے دین پہرہ جہڑے ہون اکیل اوہ بھج دے نہیں
دیندے عمر دے ساتھ داسا تھ پکا مندے ہون ساتھی بڑے چچ دے نہیں
بڑی نیت دے ہون پلٹت جہڑے پردے اوہ تاں کسے دے کج دے نہیں
محمد شفیع میاں آکھن لوک دانے بدل اوہو و سن جہڑے گج دے نہیں

.....

ث: توہیں سرتاج تے کج میرا تیرے باجھ رانجھا کسے کم دی نہ
ہوندی سار بے اس دہارڑے دی شالا ماں مندی مینوں جمدی نہ
لوں پم ادھیڑ نہ سی کرساں دیواں قسم کب اپنے دم دی نہ
محمد شفیع ایہ رات برات والی شالا صبح اجو کڑی دھمدی نہ

4- قافیہ تے ردیف:

قافیہ شعر دا کُسن اے تے ردیف ایس کُسن وچ اضافے دا باعث ہندا اے۔ ہم آواز تے ہم وزن لفظاں موجب شاعری وچ موسیقی تے نغمیت پیدا ہوندی اے۔ ردیف دی تکرار نال ایس نغمیت وچ مزید اضافہ ہوندا اے۔ مناسب قافیہ تے ردیف دا استعمال اک فنی مہارت اے۔ پنجابی ادب وچ ایس حوالے نال وارث شاہ توں خاص مقام حاصل

اے۔ اوہناں اپنی ہیر وچ بڑے اچھوتے قافیے تے ردیفوں ورتیاں نیں۔ ہیر وارث شاہ چوں اک بند پیش اے (90):

نیں رب دے غضب تو لوک ڈردے متھے لیکھ دی رکھ ویہ گئی جے نی
جس دا چن پتر سواہ لا بیٹھا دتا رب دا مال سہ گئی جے نی
جس دے سوہنے یار دے کن پائے اوہ تاں نڈھڑی چوڑ ہو گئی جے نی
وارث شاہ پھرے دکھاں نال بھریا خلق مگر کیوں اوس دے پئی جے نی

میاں محمد شفیع نے وی وارث شاہ دی طرح ردیف ورتی اے جس نال عورتاں دی عام بول چال دی بہت سونی تصویر کشی ہوندی اے:

ی: یار جس تھیں جند جان میری قربان ناراض ہو گیا سی نی
رہی عرض میں کر بترتی اُس تاں مکھ میتھوں پھیر لیا سی نی
پائے واسطے رب رسول دے میں اوہ تاں بے نیاز ہو گیا سی نی
محمد شفیع مُد وصل دیاں دولتاں دا دامن دان غریب دے پیاسی نی

میاں محمد شفیع دے کلام تے فارسیت دا اثر زیادہ اے لیکن اوہناں دیسی تے سادہ لفظاں نوں بڑی خوبصورتی نال بطور قافیہ ورتیا اے:

الف: اس دربار نوں چھوڑ کے تے، دَسو جا کہڑی جتھے جاوساں میں
جاسی دَم سنگ غم محبتاں دے، پچھاں قدم نہ مول ہٹاوساں میں
سُولی سار منظور منصور والی، بکو عشق دا حرف پکاوساں میں
محمد شفیع میاں چشتی پیر تائیں قبلہ جان کے سیس نواوساں میں

.....

لا: لاج مرید دی پیر تائیں خوف قبر قیامتوں رکھنا کیہ
جہاں نوش پریم دے جام کیہتے مزہ موت دا اوہناں نے پکھنا کیہ
جہاں لذتاں عشق نصیب ہویاں، اوہناں ڈھونڈنا دودھ تے کھنا کیہ
محمد شفیع حضور تے عرض ایہو! خالی ٹورنا موڑ کے سکھناں کیہ

مردف شعراں وچ غیر مردف دی نسبت غنائیت زیادہ ہوندی اے لیکن میاں محمد شفیع دے غیر مردف کلام وچ وی نعمیت بھرپور انداز وچ محسوس کیتی جاسکدی اے۔ اوہناں ”سی حرفی تکرار ہیر بامادر“ آخری بندتوں علاوہ پوری دی پوری غیر مردف لکھی اے۔ نمونہ ملاحظہ ہووے:

ض: ضرورت دید مانی دی رنگ محل نہ منگاں
نوشہ نال سوہاگ سوہاوے لوڑ نہ چھکن ونگاں
اوہ کد سمھلے سُرَت نمناں پیتیاں جس ایہ بھنگاں
آکھ شفیق میں سوہے ساوے سالوں مول نہ رنگاں

5۔ کردار نگاری:

اچھائیاں یا بدائیاں نوں بیان کرن دانام کردار نگاری اے۔ ایہ اک فن اے جہڑا ہر شاعر نوں نصیب نہیں ہوندا۔ کردار نگاری لئی شاعر دامطالعہ وسیع ہونا ضروری اے۔ اُس نوں سماجی تے نفسیاتی روایاں بارے جانکاری ہونی چاہیدی اے۔ منقبت، مرثیہ تے قصیدہ، ایسیاں صنفیں جیہناں وچ شاعر کسے دے وصف، عاداتاں، اخلاق تے کردار دا بیان کردا اے۔ میاں محمد شفیع نے اپنیاں سی حرفیاں وچ کردار نگاری دے جوہر بڑے سوہنے انداز وچ دکھائے نیں:

ش: ثبت کیتا دل دی لوح اُتے تیرا نقش تصویر مبین سائیں
جہڑا صدق تے فقر دیاں خوبیاں دا نبی پاک دے وانگ امین سائیں
حق عدل انصاف دی شرح روشن جس تے فخر آج کرے زمین سائیں
محمد شفیع مریداں دا پیر کامل فاتح دلاں دا شیخ معین سائیں

ہ: ہفت اقلیم تکریم تہاں، تیری بندگی جہاں تسلیم کیتی
اچّا مرتبہ اس درویش دے، منزل آپ دی جس حریم کیتی

علمِ حلم تے خلقِ عظیم جتنے، شفقت آپ تے نبی کریمؐ کیتی
محمد شفیع تے مہر دی اکھ رکھیں، جس نے مدح تیری ترقیم کیتی

6۔ سراپا نگاری:

سراپا نگاری وچ سرتوں لے کے پیراں تک محبوب دے اعضاء دی تعریف کیتی
جان دی اے۔ یعنی ظاہری شکل صورت، نمین نقش تے قد کاٹھ بیان کرن نوں سراپا نگاری
کہندے نیں۔ ایہ فن جتنا عام اے، اتنا ہی مشکل وی اے۔ میاں محمد شفیع دے کلام وچ
سراپا نگاری دا نمونہ ملاحظہ ہووے:

س: سرو سوہنا توڑے باغ اندر تیرے قد جیہا پر اوہ کد سوہجے
تیرے سخن مٹھے لذت دار شیریں ہر بات وچ اپنی حد سوہجے
سوہنے دند جنیوں چنے دیاں ہوں کلیاں وچ سوہنیاں دے سوہنا قد سوہجے
محمد شفیع اوہ تہل رخسار اُتے جیوکر آیتاں دے وچ مد سوہجے

.....

ج: جھلی نہ جاوندی جھیل تیری سوہی ڈیل دُولی اللہ پاک تیری
سوہنا قد تے بو پڑا خد تیرا صورت خوب آہی سیرت پاک تیری
لکھت پیشانی اوڑک پیش آنی گل بات آہی ٹھیک ٹھاک تیری
گیا نکل وجود تھیں روح تیرا پئی ویکھنی خاک مفاک تیری

7۔ منظر نگاری:

میاں محمد شفیع اختر ڈھانگرو نے کردار نگاری تے سراپا نگاری دی طرح
منظر نگاری وی بڑے چچویں ڈھنگ وچ کیتی اے۔ اوہناں جس طرح دے لفظ ورتے
نیں، پڑھدیاں ہو یاں اوہ منظر اکھیاں دے سامنے آجان دے نیں:

ج: جا ویکھو تشریف رکھدا مسندِ حیدری تے میرا پیر سوہنا
سوہنا خنی تے شرم حضور سید صاحب عقل نالے باتدیر سوہنا

کہی با دستور دستار سوخی جبہ سو بھدا انگ حریر سوہنا
محمد شفیع میاں سوخی ٹور ٹردا ایسا ہوگ نہ کسے سریر سوہنا

.....

ج: حال کیہ پچھنا ایں ماسیاں دا ہکلی کوچ و انگوں گرلا رہیاں
بھیناں سکیاں تہنڈڑی امہڑی دیاں رو رو اپنا حال گما رہیاں
منجی پے سندا پنیاں پُمن متھا روون زار تے گھول گھما رہیاں
محمد شفیع کوئی وس نہ ماسیاں دے ہوکے بھر دیاں نیر و با رہیاں

8۔ تمثیلی رنگ:

پنجابی ادب ہووے یا اُردو تے فارسی، صوفیانہ شاعری اُتے مڈھ قدیم توں ای
تمثیلی رنگ چڑھیا ہویا اے۔ صوفیائے کرام اپنے مسائل نوں کشف سمجھدے سن۔ اوہناں
دے خیال موجب اوہناں دے مشاہدات باطنی علوم دا نتیجہ سن جیہڑے عام لوکاں دی سطح
توں اُچے تے سمجھ توں باہر نیں۔ اگر کوئی نازک مسئلہ عام لوکاں تک پہنچ جاندا اے تاں لوک
اس نوں جھن وچ غلطی کرن گے۔ ایس لئی ناخوشگوار مسلیاں توں بچن واسطے رمز تے
راز داری دی تحریک دا جنم ہویا۔ اشاریاں وچ صوفیانہ فکر تے مسائل نوں بیان کرن لئی
شاعری توں ودھ کوئی ذریعہ نہیں سی۔ ایقہوں ای شاعری اُتے تمثال نگاری دا آغاز ہویا۔

استعارے تے تمثیلاں جیہڑے شاعری دا زیور نیں، صوفیانہ واردات لئی
اوہناں دی بڑی اہمیت اے۔ صوفیانہ فکر دا بیان جس زبان وچ وی ہویا، اشاریاں تے
پردیاں وچ ہویا۔ صوفی شاعراں اپنی گل مجاز دے پردے وچ کیتی۔ میاں محمد شفیع نے وی
ایس روایت نوں اپنایا۔ دو جے صوفی شاعراں وانگوں اوہناں وی اشاریاں دی زبان ورتی
اے۔ اوہناں وی عشق حقیقی نوں مجاز دے پردے وچ لکا کے پیش کیتا اے۔ اوہ ایس گل
دا آپے اعتراف وی کردے نیں:

محمد شفیع حقیقتاں لہ لیاں پردہ پایکے عشق مجاز والا

میاں محمد شفیع نے ہیرا، بجھا، سکی پنوں، مرزا صاحبان، سوئی مہینوال جیسے رومانی قصیاں تے اوہناں دے کرداراں دا سہارا لے کے اپنی صوفیانہ فکر دا اظہار کیتا اے۔ اوہناں دا پورا کلام ایسیاں تمثیلاں نال بھریا ہویا اے۔

9۔ بحراں دی ورتوں:

شعری نظام دی بنیاد وزن تے بحراں اُتے ہے۔ دنیا دیاں سبھ وڈیاں زبانناں وچ شاعری دے معیار نوں جاچن دے پیمانے تے اصول مقرر نہیں۔ اُردو تے فارسی وچ شعر دی موزونیت نوں جاچن دے علم نوں ”علم عروض“ آکھیا جاندا اے جب کہ پنجابی ادب وچ ایس نوں ”چھندا بندی یا پنگل“ آکھدے نیں۔ وزن تے بحر اسے نظام دیاں اصطلاحاں نیں۔ فنی لحاظ نال شاعری دی پرکھ لئی بحراں دی ورتوں تے اوہناں دے اصولاں دی پابندی ضروری اے۔ سی حرفی لکھن دے چونکہ کوئی خاص اصول مقرر نہیں نیں، ایس واسطے سی حرفی لئی کوئی خاص بحر یا وزن وی مقرر نہیں۔ شاعراں نے اپنی من مرضی موجب سی حرفیاں لکھیاں نیں۔ سی حرفی لئی استعمال ہون والیاں بحراں نوں عام طور چھوٹی بحر، درمیانی بحر تے لمبی بحر آکھیا جاندا اے۔

چھوٹی بحر وچ میاں شفیع محمد نے اک ای سی حرفی ”درفراق معشوق“ لکھی اے۔

نمونہ پیش اے:

و: واہ مایا دلدارا جی
کدوں دیسیں پاک نظارا جی
دے جگ دے وچ اندھارا جی
کر دُور اندھیر غباری نوں

کدی خوابے مل بے چاری نوں
میں تقی در دیں ماری نوں

میاں محمد شفیع دی سی حرفی دانمونہ جہڑی درمیانی بحر وچ اے:

ر: روے دی ایہ گل ساری من وچ پڑیا رانجھا
سر میرے دا تاج سنہری درد میرے دا سانجھا
میں جس دی ہو رہیاں رہساں اُس دی ہو چھڈ جھانجھا
آکھ شفیق جگ مائی اُتم فر کس گل دا لہنجھا

شاعراں دی اکثریت نے سی حرفیاں لمبی بحر وچ لکھیاں نیں۔ لمبی بحر دی ورتوں
سب توں پہلے شاہ جہان مقل نے قصہ ہیر رانجھا وچ کیتی۔ اُس توں بعد اس بحر نوں ہیر
وارث شاہ دی وجہ توں ایسی شہرت نصیب ہوئی کہ شاعر مثنوی توں اڈی سی حرفیاں وی اسے بحر
وچ لکھن لگ پئے۔ اکثر لکھاریاں نے ایس بحر نوں ”وارث شاہی“ بحر داننا دتا اے۔
میاں محمد شفیع دیاں زیادہ تر سی حرفیاں اسے بحر وچ نیں۔ نمونہ پیش اے:

لا: لا لیاں اکھیں نال تیرے ہن ہور کوئی سودا تولنا نہیں
آن عشق دی رکھنی فرض آکھن توڑے جان جاوے دلون ڈولنا نہیں
پہرہ دیوساں تہنڈڑے پیار اُتے اساں دودھ وچ اک نوں گھولنا نہیں
محمد شفیق دل عشق دا راز رہی قبر تیک اس راز نوں کھولنا نہیں

میاں محمد شفیع اختر ڈھاگروی نے فنی حوالے نال کسے قسم دا کوئی نو یکلا تجربہ نہیں
کیتا۔ اوہناں اوہو ای بحر اں ورتیاں نیں جہڑیاں عام طور تے پنجابی شاعری وچ مروّج
نیں۔



[۴]

محاکمہ

میاں محمد شفیع اختر ڈھانگروی اک باعمل صوفی سن۔ اوہناں دے صوفیانہ طرز عمل دا اثر نہ صرف اوہناں دی زندگی بلکہ اوہناں دی شاعری اتے وی اگھڑواں اے۔ میاں محمد شفیع دا تصوف صرف شاعریتک ہی محدود نہیں رہیا۔ اوہناں دا کلام جس عشق الہی، عشق رسولؐ، توکل، تسلیم و رضاتے عجز و انکسار و اسبق و ید راے، اوہناں دی عملی زندگی وی ایہناں سبھے اوصاف نال متصف سی۔ ایہناں صفتاں موجب ای اوہ آخری دم تک ہر من بھاؤنی شخصیت رہے۔ اوہناں دا وڈا کمال ایہی سی کہ اک دُور دراز دیہاتی علاقے دا وسنیک ہون دے باوجود نہ صرف پنجابی، اردو تے فارسی وچ شاعری کیتی، بلکہ ساری حیاتی تصنیف و تالیف وچ مصروف رہے۔ اک دُور دراز گراں دی ڈھوک وچ رہندیاں ہویاں وی اپنے علاقے وچ علم تے ادب دی شمع روشن رکھی۔

اعلیٰ ادب اوہو ای ہوندا اے جہڑا نہ صرف روایت نال جڑیا ہووے بلکہ اُس وچ ہر پڑھن والے نوں اپنی من وارتا دکھالی دیوے۔ میاں محمد شفیع دے اکھراکھر وچ ہر فکر دے لوکاں دی من وارتا لگی ہوئی اے۔ اوہناں دی شاعری اندر ہر موضوع تے ہر مضمون موجود اے۔ مذہب توں لے کے سماجیات تک ہر پہلو اوہناں دے کلام وچ دکھالی دیندا اے۔ پنجابی شاعری اتے تصوف دارنگ مدھ قدیم توں ای چڑھیا ہو یا اے کیونکہ پنجابی زبان وچ شاعری دا آغاز ای صوفیانے کرام نے کیتا سی۔ میاں محمد شفیع دیاں سی حرفیاں وی اسے روایت دا حصہ نیں۔ اوہناں دا اک اک اکھراکھر تصوف وچ ڈُبیا ہو یا اے۔ لیکن کمال دی

گل ایہ دے کہ اوہناں رمزدی گل مجاز دے پردے وچ کھیتی اے۔ اوہناں دی شاعری اک مجازی عشق دے اسیر لئی وی اے تے حسن ازل دی تلاش وچ رُجھے ہوئے حقیقی عاشق لئی وی اے۔

میاں محمد شفیع دی شاعری اندر انسانی نفسیات دا بڑا گہرا شعور وکھالی دیندا اے۔ انسانی نفسیات دیاں گہرائیاں تک اوہناں دی نظر جاندی اے۔ اوہناں دا ایہو شعور اوہناں نوں انسانی پستی اُتے زور دار چوٹ کرن تے مجبور کر دے تاں اوہ لوکاں نوں آخرت دی یاد دلاندے نیں، لوکاں نوں دنیا دے لوبھ توں بچن دا مشورہ دیندے نیں۔ فنی حوالے نال ویکھیا جائے تاں اوہناں دی شاعری وچ اوہ سبھے صفتاں پائیاں جاندیاں نیں جہڑیاں پڑھن تے سنن والیاں نوں متاثر کرن۔ میاں محمد شفیع اختر ڈھانگرووی دے فکر تے فن نوں مکھ رکھیاں تاں اوہناں نوں پنجابی ادب دے وڈے شاعراں دی صف وچ کھڑا کیتا جاسکدا اے۔

اگے ددھن توں پہلے کلیم الدین احمد دا اک قول پیش اے:

”ادب کی تاریخ وہی کامیاب ہو سکتی ہے جس میں گمنام مصنفین اور کامیاب تصنیفوں کو منظر عام پر لایا جائے اور ان مرکزوں کو واضح کیا جائے جو پردہ گمنامی میں پڑے ہوئے ہیں۔“ (91)

کلیم الدین احمد دی ایہ گل بہت حد تک درست اے۔ دو جیاں علاقائی زبانان دی طرح پنجابی ادب دی تحقیق و تدوین دے معاملے وچ بہت چکھے اے۔ ادبی روایت دی تشکیل وچ کئی آوازاں شامل ہوندیاں نیں۔ لیکن پنجابی ادب دیاں بہت ساریاں آوازاں حالے وی زمانے دی دھوڑ مٹی تھلے دبیاں ہونیاں نیں یا پرانے بوسیدہ طاقتیاں چکھے قید نیں۔ ایہناں آوازاں نوں انتظار اے کہ کھوج کار داء، جہڑا اوہناں تے چڑھی دھوڑ چھنڈے تے ایہناں طاقتیاں چوں کڈھ کے ادب دی دنیا وچ اوہناں دی مونہہ وکھالی

کرائے۔ تاکہ اوہ ادب دی روایت دے دھارے وچ شامل ہو سکے۔ پنجابی زبان تے ادب نوں دو جیاں زبانیں دے مقابلے وچ کھلون واسطے ایہناں گننام آوازاں دی بڑی لوڑ اے۔ میاں محمد شفیع اختر ڈھاگرووی وی ایہناں گننام آوازاں وچوں اک آوازیں۔ ایس تحقیق پاروں پنجابی ادب وچ اک بڑی جاندار آواز دا اضافہ ہون دے نال نال سی حرفی جیہی کلاسیکل صنف دی ڈب دی ہوئی بیڑی نوں کجھ مزید سہارا دی نصیب ہووے گا، تے پنجابی ادب دے کھوج کاراں لئی تحقیق دیاں نویاں راہواں وی کھلن گئیاں۔

حواشی

- 1- راجا امجد منہاس، پروفیسر، پوٹھوہار نامہ، راولپنڈی، روئیل پبلی کیشنز، 2013ء، ص: 148-149
- 2- ایضاً، ص: 152
- 3- اختر ڈھاگرووی، میاں محمد شفیع، سازشکتہ (قلمی)، 1960ء، مملوکہ میاں عبدالرشید، بھیت (ڈھاگرووی مرزا) تحصیل سوہاؤہ، ضلع جہلم، ص: i
- 4- اختر ڈھاگرووی، میاں محمد شفیع، پنجابی غزلاں (قلمی)، 1956ء، مملوکہ میاں عبدالرشید، ص: 468
- 5- انٹرویو: میاں عبدالرشید (بیٹا)، ضلع جہلم، 17 اکتوبر 2015ء
- 6- اختر ڈھاگرووی، میاں محمد شفیع، ارمغانِ چشتی (قلمی)، 1961ء، مملوکہ میاں عبدالرشید، ص: A-60
- 7- ایضاً، ص: A-9
- 8- ایضاً، ص: A-30
- 9- ایضاً، ص: A-28
- 10- اختر ڈھاگرووی، میاں محمد شفیع، روزنامہ گنجینہ اسرار (قلمی)، جلد اول، 1937ء، مملوکہ

- میاں عبدالرشید، ص: 100
- 11- انٹرویو: میاں عبدالرشید (بیٹا)، 7 اکتوبر 2015ء
- 12- سازشکتہ (قلمی نسخہ)، ص: i
- 13- روزنامہ گنجینہ اسرار (قلمی)، جلد چہارم، 1940ء، ص: 115
- 14- روزنامہ گنجینہ اسرار (قلمی)، جلد پنجم، 1939ء، ص: 103
- 15- اختر ڈھانگروی، میاں محمد شفیع، قلمی نسخہ: حدیث غم، 1942ء، مملوکہ میاں عبدالرشید، ص: 266
- 16- روزنامہ گنجینہ اسرار (قلمی)، جلد اول، ص: 101
- 17- سازشکتہ (قلمی)، ص: ii
- 18- ایضاً، ص: iii-ii
- 19- ایضاً، ص: iii
- 20- انٹرویو: میاں عبدالرشید، 25 جولائی 2015
- 21- سازشکتہ (قلمی)، ص: iii
- 22- اختر ڈھانگروی، محمد شفیع، میاں، نقشِ آخریں (قلمی)، 1976ء، مملوکہ میاں عبدالرشید، ص: 99
- 23- ایضاً، ص: 98
- 24- اختر ڈھانگروی، میاں محمد شفیع، ارمغانِ اختر (قلمی)، 1960ء، مملوکہ میاں عبدالرشید، ص: 19
- 25- اختر ڈھانگروی، میاں محمد شفیع، انشائے اختر (قلمی)، 1987ء، مملوکہ میاں عبدالرشید، ص: 155
- 26- انٹرویو: میاں عبدالرشید، 25 جولائی 2015ء
- 27- صابری، صاحبزادہ مقصود احمد، تذکرہ اولیائے پوٹھوہار، راولپنڈی، ہاشمی پبلی کیشنز، سن، ص: 612
- 28- ایضاً، ص: 629
- 29- سازشکتہ (قلمی)، ص: i

- 30- تذکرہ اولیائے پوٹھوہار، ص 632
- 31- عبدالغنی، ڈاکٹر، امیر حزب اللہ، جہلم، ادارہ حزب اللہ جلاپور شریف، 1384ھ، ص: 392
- 32- ارمغانِ چشتی (قلمی)، ص: 122
- 33- انٹرویو: میاں عبدالرشید، 3 جنوری 2016ء
- 34- انشائے اختر (قلمی)، ص: 278-279
- 35- غلام سرور سرلووی، سرولہ موضع نھوٹ، ڈاکخانہ دیال ضلع جہلم دے وسنیک سن۔ اصل ناں راجا غلام سرور خان سی۔ پنجابی دے بڑے ودھیا شاعر سن۔ میاں محمد شفیع تے اوہناں دے دوست مولانا عبدالمجید خفقانی، راجا غلام سرور کول شاعری دی اصلاح واسطے گئے لیکن اوہناں کوئی سدھی تبد نہ پائی۔ ایس خط وچ اُسے حوالے نال گلے شکوے کہتے گئے نیں۔
- 36- انشائے اختر (قلمی)، ص: 115-117
- 37- مولانا الحافظ عبدالمجید، ابرنیساں، لاہور، سانجھ پبلی کیشنز، 2014ء، ص: 174
- 38- شاد فاروقی، حافظ نذر حسین، سوز و سازِ حیات، جہلم، دارالعلوم والحکمت خانقاہ کڑی شریف، 2016ء، ص: 145
- 39- سازِ شکستہ (قلمی)، ص: 161-162
- 40- حدیثِ غم (قلمی)، ص: 238
- 41- سازِ شکستہ (قلمی)، ص: ii
- 42- ارمغانِ چشتی (قلمی)، ص: 7
- 43- ایضاً، ص: 48
- 44- سازِ شکستہ (قلمی)، ص: iv
- 45- ایضاً
- 46- اختر ڈھاگرووی، میاں محمد شفیع، نعتیہ کلام (قلمی)، 1987ء، مملوکہ میاں عبدالرشید، ص: 25
- 47- انٹرویو: میاں عبدالرشید، 12 دسمبر 2015ء

- 48- ایضاً
- 49- انٹرویو: امینہ بیگم (نونہ)، بھیت (ڈھانگری مرزا)، تحصیل سوہاؤہ، ضلع جہلم، 7 اکتوبر 2015ء
- 50- انٹرویو: اظہر رشید (پوترا)، بھارا کہو اسلام آباد، 2 اپریل 2015ء
- 51- ایضاً
- 52- انٹرویو: میاں عبدالرشید، 12 دسمبر 2015ء
- 53- انٹرویو: فاروق احمد (میاں محمد شفیع اختر ڈھانگروی دے پڑوسی)، بھیت (ڈھانگری مرزا)، تحصیل سوہاؤہ، ضلع جہلم، 9 فروری 2016ء
- 54- انٹرویو: میاں مظہر جمیل (پوتا)، بھارا کہو، اسلام آباد، 21 مارچ 2016ء
- 55- انشائے اختر (قلمی نسخہ)، ص: 6
- 56- روزنامہ مچھ گنجینہ: اسرار (قلمی)، جلد اول
- 57- ارمغان اختر (قلمی)، ص: 11
- 58- روزنامہ مچھ گنجینہ: اسرار (قلمی)، جلد اول، اندرونی سرورق
- 59- ایضاً، ص: 67
- 60- ایضاً، ص: 70
- 61- ایضاً، ص: 73
- 62- انٹرویو: محمد اصغر (دوہترا)، زیر پوائنٹ، اسلام آباد، 23 جنوری 2016ء
- 63- فاروق احمد، انٹرویو: 9 فروری 2016ء
- 64- انٹرویو: مندرثر فاروق (پوترا)، بھارہ کہو اسلام آباد، 7 اکتوبر 2015ء
- 65- انٹرویو: مظہر جمیل (پوترا)، بھارہ کہو اسلام آباد، 7 اکتوبر 2015ء
- 66- ایضاً
- 67- انٹرویو: میاں عبدالرشید، 12 جنوری 2016ء
- 68- انٹرویو: فریدہ بیگم (بیٹی)، دوہیلی جہلم، 14 فروری 2016ء
- 69- انٹرویو: امینہ بیگم، 5 مئی 2015ء
- 70- انٹرویو: اظہر رشید، 5 مئی 2015ء

- 71- انٹرویو: محمد اصغر، 23 جنوری 2016ء
- 72- عاصمہ قادری، ڈاکٹر، پنجابی کلاسیکی شاعری داصنف ویرا (پہلا حصہ)، لاہور، کلیہ علوم شرقیہ، پنجاب یونیورسٹی، 2011ء، ص: 45-46
- 73- نور اللغات، جلد دوم، ص: 1660
- 74- انور جمال، پروفیسر، ادبی اصطلاحات، اسلام آباد، نیشنل بک فاؤنڈیشن 2014ء، ص: 168
- 75- سلیم اختر، ڈاکٹر، تنقیدی اصطلاحات، لاہور، سنگ میل پبلی کیشنز، 2011ء، ص: 250
- 76- انور جمال، پروفیسر، ادبی اصطلاحات، ص: 161
- 77- سلیم اختر، ڈاکٹر، تنقیدی اصطلاحات، ص: 240
- 78- خواجہ عبدالکیم انصاری، تعمیر ملت، لاہور، سلسلہ عالیہ توحید، 1994ء، ص: 114
- 79- ایضاً
- 80- سید صفی حیدر، پروفیسر، تصوف اور اردو شاعری، لاہور، سندھ ساگر اکادمی، 1948ء، ص: 37
- 81- علی عباس جلاپوری، وحدت الوجود تے پنجابی شاعری، دوجی وار، لاہور، پاکستان پنجابی ادبی بورڈ، 1986ء، ص: 177
- 82- خواجہ عبدالکیم انصاری، تعمیر ملت، لاہور، سلسلہ عالیہ توحید، 1994ء، ص: 138
- 83- بلھے شاہ، کلام بلھے شاہ، مرتب و مترجم: میاں ظفر مقبول، لاہور، مکتبہ دانیال، سن، ص: 306
- 84- ایضاً، ص: 340
- 85- بابا فرید، کلام بابا فرید، مرتب و مترجم: امجد علی بھٹی، راولپنڈی، زمیل پبلی کیشنز، 2007ء، ص: 50
- 86- انور جمال، پروفیسر، ادبی اصطلاحات، ص: 181
- 87- سلیم اختر، ڈاکٹر، تنقیدی اصطلاحات، ص: 246
- 88- بلھے شاہ، کلیات بلھے شاہ، مقدمہ از ڈاکٹر فقیر محمد فقیر، لاہور، الفیصل ناشران و تاجران

کتب، س ن، ص: 419

- 89۔ عابد علی عابد، سید، البدیع، لاہور، سنگ میل پبلی کیشنز، 2011ء، ص: 229
- 90۔ عبدالعزیز، شیخ، بار ایٹ لاء، مرتب: ہیر سید وارث شاہ، لاہور، الفیصل ناشران و تاجران کتب، 1999ء، ص: 272
- 91۔ کلیم الدین احمد، اردو تنقید پر ایک نظر، عظیم پبلشنگ ہاؤس، پٹنہ، س ن، ص: 232



حصہ دوم



سی حرفیاں میاں محمد شفیع اختر ڈھانگروی

(مدونہ متن)



[سی حرفی نمبر 01]

جدائی یار دل جانی نشانی دوزخ دارد
معاذ اللہ غلط گفتم کہ دوزخ زو نشان دارد



الف

آج وچھوڑیا یار کولوں، پاک ذات ایزد متعال سیو
گھائی ہجر دی جاپدی بہت اوکھی ہوسی لنگھناں بہت محال سیو
آئی دکھاں دے منہ بھیڑی جند میری ہویا نخس میرا اختر فال سیو
لگن تیر جدائی دے وچ سینے ہویا جگر غربال مثال سیو
کھنڈی چھری دے نال گٹھا ہجر مینوں، مثل نیم بسل ہویا حال سیو
آکھاں کت ویلے ربّا یار مجلسی سسی وانگ کیتے کھلے وال سیو
لگی کرد فراق ہلاک ہوئیاں، کیتا درد نے سخت بے حال سیو
اک پلک نہ صبر قرار آوے، مندی ہوئی غریب دے نال سیو
پئی دھاڑ از غیب تھیں تنزی تے، رہواں نت بیزار ملال سیو
ملے دان وصال کنگال تائیں محمد شفیع ایہ کرے سوال سیو

ب

بار برور بیلا کاہی گاہی، گیا یار نمائی نوں مار سیو
 طعنے دیوندا جگ جہان سارا اکھیوں نیر چلے زار و زار سیو
 سرو قد آزاد کمان ہويا لگا ہجر دا جدوں آزار سیو
 رہواں نت کرلانڈی کوچ وانگوں باجھوں ماہ کنعان بیزار سیو
 پھراں وانگ سودائیاں دے جنگلاں وچ تری صبر قرار دی تار سیو
 زلفاں وانگ پیراگناں گل پائیاں اٹھے پہر روواں ڈھائیں مار سیو
 رانجھے وانگ جدوں انگ سواہ ملی ہوئی گل مشہور چو دھار سیو
 جپاں نام ماہی مثل نام ہر دم کھڑیا لٹ کے دل دلدار سیو
 بھیت یار دا کھول خوار ہوئی مثل شاہ منصور چڑھی دار سیو
 گھر بار نوں اک لگا شفیق اٹھے پہر روواں ایہو کار سیو

ت

تنگ آئی کے چولی چاک کیتی کوکاں وانگ چٹھنی کلنگ سیو
 جھلاں طعنے جہان دے، وانگ پھلاں، ہويا زرد پیلا میرا رنگ سیو
 کیتا مار حریف نحیف مینوں، جدوں نیناں سندا ہويا جنگ سیو
 رگاں تار تے تن رباب ہويا ماہی باجھ رہندا دل تنگ سیو
 پردہ شرم حیا دا چاک کیتا، مائی باپ دا لاہیا لنگ سیو
 لگا داغ کلیجڑے ہجر والا بھاوے کسے دا مول نہ سنگ سیو
 اساں روندیاں نیر وہا دتے چت یار دا ڈاڈھرا سنگ سیو
 گیا یار جدو کنا سول سینے پائی سواہ سر وانگ ملنگ سیو
 اک پلک نہ پلک دے نال لاواں جا پے پلنگ دے وانگ پلھنگ سیو
 محمد شفیع فراق دے وچ کوکے گیا نانگ پریم دا ڈنگ سیو

ث

ثابتی صدق یقین سیتی، سوہنے یار دا پیار درکار سیو
 ملے شاہی جے ہفت اقلیم والی، دیواں یار دے ناز توں وار سیو
 لوک جگ بیتی پئے کرن گلاں، میری سر بیتی گفتار سیو
 نگھ جاوندی روندیاں رات ساری دے رہاں پھردی میلے بار سیو
 یار باجھ بے زار پھراں بار اندر ہویا جگر فگار فگار سیو
 ہائے نج جی گھر مایاں دے ماپے جمدیاں ہی دیندے مار سیو
 رنگ زرد و سار دے وانگ سیو گیا تتی نوں یار و سار سیو
 بلی رب میلے دکھ دُور ہوسن کھوسن باغ بہار گلزار سیو
 کیجے لگھ ہزار ہزار داروں ہویا دُور نہ مول آزار سیو
 ناہیں حاجت بہشت نہ خوف دوزخ چاہے یار دا شفیع دیدار سیو

ج

جان میری چلی باجھ جانی لوکھے نین میرے ڈابو لین سیو
 پائی سنگ اندر بھنگ دوتیاں نے دن رات ساری کراں وین سیو
 کسے ڈھنگ سب دے نال سیو کارن درس دے ترسدے نین سیو
 گئی رُل جہان دے وچ تتی گھروں کڈھ دتا والدین سیو
 ویکھاں راہ محبوب دا ہر طرفوں زار و زار روواں دن رین سیو
 میری جان اُتے کربلا آئی وانگ شاہ امام حسین سیو
 پائی چھاوئی دکھاں نے آن میں تے گئے سکھ میرے نالے چین سیو
 آئی لبائے اُتے جند تیزی دی رہواں یار دے باجھ بے چین سیو
 لگی ساگ وچھوڑے دی کار مینوں گئے چھوڑاکیلیاں سین سیو
 شفیع زلف محبوب دی قید ہو کے کراں وانگ زلیخا دے وین سیو

ح

حال بے حال ہجر نال ہو یا پچھاں رلی تے گھتاں فال سیو
میرا عرش دا کنگرہ ڈھ پیا دتا کوڑے دا نانواں گال سیو
پئی وچ کلیجڑے پیڑ میرے داروں ہٹیاں تے تھکی بھال سیو
کوئی گٹ نہ کرے دوا داروں باجھ یار دے عین وصال سیو
رہندا تاپ فراق دا نت چڑھیا باجھ گل گلاب گلال سیو
کدے رج نہ ویکھیا مکھ ماہی رہی روندڑی میں پورا سال سیو
اکو یار دی بھاوندی گل مینوں ناہیں ہور دی قیل مقال سیو
مینہ قرب وصال دا بند ہو یا پیا ہجر فراق دا کال سیو
اکھیں دید کارن انتظار ہر دم ہو یاں لعل دے باجھ بے حال سیو
دشمن جان سندی کل خلق ہوئی شفیق آسرا رب ذوالجلال سیو

خ

خوشی نے بسترے گول کیتے جدوں لگی فراق دی بھاہ سیو
دنیا دین دی ہوش نہ رہی مولے پیا ہجر سندا جدوں پھاہ سیو
عزواجہ ہو ریں ڈیرے چک گئے چاء یار ہوراں پائیاں چاہ سیو
زہر ہجر والا سینے دھا گیا اگے موت تھیں ہو یاں فناہ سیو
دلبر چت چایا اساں عاجزاں تھیں سارا دن بیٹھی تکاں راہ سیو
کھلے وال کر کے زلفاں گل پائیاں اک ساہ دا نہیں وساہ سیو
کراں رب اگے زاری رات ساری گل پا پلا مونہہ وچ گھاہ سیو
لاواں مرہم وصال جھب مول جاوون جہڑے کیتے وچھوڑے نے گھاہ سیو
گیا ماہ کنعان وچھوڑ مینوں پائی وانگ یعقوب سر سواہ سیو
کرے شفیق دعا بت رب اگے ہووے مردیاں تیک نبھاہ سیو

د

دیدڑے باجھ دیدار ماہی وانگ نہر دے رہن روان سیو
 پیواں ہجر دے زہر دے نت کاسے رھواں یار دے باجھ حیران سیو
 کینا لکھ تھیں لکھ چاء عشق ماہی ہویا باجھ دلدار زسیان سیو
 گئے بھل اُرداد وظیفو دے سبھ نالے فقہ حدیث قرآن سیو
 پیا بم فراق دا سر اُتے رہاں بولدا نت فغان سیو
 سجن سنگ آستین دے سڀ وانگن چپ کر کے ڈنگ چلان سیو
 کئی عشق ہوراں جُھگے گال دتے جہڑے شاہ سلطان سدان سیو
 شاہ قیس تے پُنوں بلوچ ہووے تختوں ڈگے سن شاہ سلیمان سیو
 میں بھی عشق سندی جدوں بھینٹ چڑھی رہی سُر ت نہ جگ جہان سیو
 وانگ ہاویے ہجر دی نار بھڑ کے شفیق دُکھاں کھاہدی میری جان سیو

ذ

زہر جے یار دی جہات پاواں کراں جان قربان فدا سیو
 جدوں عشق مجاز دی نار بھڑکی دتا شرم حیاء گنوا سیو
 ٹھے شان گمان ہووے دُم چا کے جدوں عشق ہووے پئے دھا سیو
 مجنوں وانگ میں لیلیٰ دا نام لے لے کراں صبح تا شام مسّا سیو
 ماہی باجھ حیاتری بھٹھ پئی بیٹھی ہوس حواس و نجا سیو
 لگی مرض گجھی ہجر یار والی باجھ وصل نہ ہوسی شفا سیو
 لگی والیاں نوں کدوں صبر آوے گئے عقل والے فرما سیو
 گئیاں بھل حکایتاں نظم وچوں جدوں نال ماہی بیٹھی لا سیو
 رنگ لال میرا لالہ زار ہویا جدوں یار تھیں ہوئی جُدا سیو
 شفیع نیونہ لایا، اندر وڑ کچھیں دتا عشق نے ڈھول و جا سیو

د
رَج نہ کیتیاں مُول گلاں پئی آن از غیب تھیں دھاڑ سیو
لگی اگ پھوہاڑے دے وانگ دِل نوں اگ ہجر والی گئی ساڑ سیو
ہائے نج جی میں دُکھاں تنی ڈٹھے ہجر دے سرتے پہاڑ سیو
اٹھی پیر کلیجڑے درد والی کیتی ہجر نے بہوں لتاڑ سیو
تیرے درد فراق نے چور کیتا کیتے ہجر جاں کالجے پاڑ سیو
گیا یار اجاڑ نمازری نوں ڈھونڈاں یار نوں بار اجاڑ سیو
ہویاں جل کولے ناہیں کول ماہی بھائیں تک لوؤ سینہ پھاڑ سیو
وانگ جھڑی برسات دے وہن ہنجوں گیا ہجر مینوں سُولی چاڑ سیو
گئی دین کلیجڑا دچھ میرا، یا تے ہور کوئی پئی اے دھاڑ سیو
سجے نین دن رین ڈابو لین شفیق دتے دوتیاں کم وگاڑ سیو

د
زاریاں رہاں دن رات کردی کیتا عشق نے سخت خراب سیو
دِل عاشقاں دے ناہیں صبر آوے جیویں وچ غربال دے آب سیو
عزت بیگ چھڈ شاہیاں مہینوال بنیا سوہنی رہڑی سی رودھ چناب سیو
سسی روندی سی تھلاں وچ تنسی، موئی یار مچھے دن آب سیو
اک سک دیدار دی نت رہندی، جھلاں ہجر جدائی نہیں تاب سیو
تن سک تیلہ ماسے ماس ہويا، سینہ جگر کباب کباب سیو
مکھ یار دا جاپدا خاص کعبہ، اُبرو یار دے وانگ محراب سیو
کراں سیس نوائی تے قدم بوسی، جدوں ملے سوہنا وچ خواب سیو
ہائے ہجر دی بدلی پیٹھ آیا، سندر شام چندر مہتاب سیو
میری جان ترسدی باجھ ماہی، شفیق لاؤ ملاؤ شتاب سیو

س

سکھی ساں وندی و سدی میں، ہجر ناگ کالا گیا دس سیو
تقدیر اگے تدبیر ناہیں، زہر ہجر سینے گیا دھس سیو
دوروں دیکھ مینوں متھے گھور پاوے، ہائے جیو ساڈا گیا کھس سیو
خنجر نیناں دا مار کلیجڑے جی، سینہ چاک کر کے گیا نس سیو
کہنوں دوس دیواں آپوں نیونہ لایا، پئی گرگ مریلیاں وس سیو
ہن چھٹن محال محال ہويا، ہجر تیر مارے کس کس سیو
اکو چاک نوں یار قبولیا میں، پاواں کھیڑیاں دے سر بھس سیو
ساڈی رکھے نہ چاہ بے پروا ماہی، گیا دشمنان دے کر وس سیو
ہور منکدی کجھ نہ مول میں تے صرف جام وصال دی تس سیو
شفیع عاجزی پئی قبول ناہیں گئیاں دندیاں ساڈیاں گھس سیو

ش

شور پکار کراں یار باجھوں، سینہ بھڑکدا مثل تنور سیو
گل پا اَلفی ہتھ پھڑ کاسہ، لایا مٹھڑے تنک سندور سیو
گیری نال رنگیا میں رخت سارا، سٹی لاہ سنجاب سمور سیو
دل چاہندا چھوڑ ایہ دیس جاواں، رہواں جائی کے کدھرے دور سیو
اساں لوڑ ہے یار دا اک جلوہ، ناہیں چاہندے عدن دی گور سیو
کالی رات فراق دی بہوں لتیں، ہڈ ہڈ کیتا ہجر چور سیو
گیا چھل مینوں ظالم نین والا، ماراں ڈھائیں میں شام سحور سیو
پردے ہجر دے چاک ہو جان سبھے، جدوں دیکھاں میں یار دا نور سیو
چڑھیا چرخ سرمہ پریم والا، کراں لیپ صندل کافور سیو
جھورا ہجر والا گھا مٹھڑی نوں شفیع ہوئی بے حال جھور جھور سیو

ص

صبر ہو رہی باجھڑ کھاٹھے، جدوں ہجر ہوراں مارے تیر مائے
 لایا شرم دا پلڑا مونہہ اُتوں، جدوں کھاہدی پریم دی کھیر مائے
 درس درس والا جدوں بند ہويا، سینہ چاک کیتا وانگ لیر مائے
 جیکر ماراں پہاڑ تے آہ دردوں، وگن گل پہاڑ وانگ نیر مائے
 کراں وین بے چین جانی باجھ ہو کے، مثل وہن چلے اکھیوں نیر مائے
 دتی دو تیاں کلاں جگا ستی، گیا وچھڑ ہائے رانجھا ہیر مائے
 پاواں اونسیاں کدن میل ہوسی پئی سوراں بغداد دا پیر مائے
 دن رات نہ سکھ دی نیند آندی مار کرد گیا سینہ چیر مائے
 ڈر دو تیاں تھیں جیکر مڑ ونجاں سڑاں ہادیے سقر سیر مائے
 دماں باجھ وکائیاں دست دلبر زاف یار دا شفیق اکسیر مائے

ض

ضبط رہیا ناہیں دل میرے پئی دھاڑ جاں ہجر فراق مائے
 میرا بھٹھ پوے جیون باجھ دلبر مینوں جھب میلیں سیمیں ساق مائے
 باراں بار نیلے بھالاں یار تائیں ڈھونڈاں روم تے شام عراق مائے
 میرا وید طبیب حکیم سوہنا مرض ہجر سندا تریاق مائے
 شالا دوزخاں اوہناں دی جا ہووے جنہاں جوڑ وچ پایا نفاق سیو
 کیوں کرن اجوڑ ایہ جوڑ جھڑا رب جوڑیا روز میثاق مائے
 کچھے یار دے مرن قبولساں گی متیں رکھ کھاں ٹھپ کے طاق مائے
 گہناں ذوق تے شوق دا گل پایا ناہیں بھاوندی ہس بلاق مائے
 لاؤ مول نہ فتویٰ کفر میں تے حُب یار نے کیترا عاق مائے
 شفیق عشق تے مشک نہ رہے چھپیا ہوئیاں خوار میں وچ آفاق مائے

ط

طلب کراں رانجھا رب کولوں رانجھا چاک میرا پکا ساک مائے
 سسی وانگ کیتے کھلے کیس تتی پاواں سہاہ سر وچ اتے خاک مائے
 گوپی چند وانگوں ہتھ پھڑ کاسہ گھر گھر دیکھاں پئی جھاک مائے
 طعنے دین سیّاں کیوں میں نیونہہ لایا کچھ چاک کرساں سینہ چاک مائے
 ظالم چرخ ہائے پٹھی چال چلے روگ ہجر نال کیتوس ہلاک مائے
 حضرت عشق دے جاں جا کے پیر پئے واگ عقل دی رہی نہ واک مائے
 مثل ماہ ساون اکیوں نیر چلے روون نین ناہیں رہی ٹھاک مائے
 کس سنگ پھولاں دکھ دے میں گئے نس میں تھیں سین ساک مائے
 کوئی سنے نہ مول فریاد میری باجھ رب رحیم اللہ پاک مائے
 چشماں وانگ چشمے روون نت جاری شفیق کیتا فراق ہلاک مائے

ظ

ظلم کردے دوتی نال میرے دھروں لکھے سن جیسے نصیب مائے
 سختی ٹلی نہ پھراں ولیاں تھیں جہڑے رب دے خاص حبیب مائے
 دکھ ہور تے داروں کجھ ہور دل دے کاہنوں لکھدا نئے طیب مائے
 گیا کتناں تمبنا بھل مینوں نالے کھیڈنے دی ترتیب مائے
 جدوں کراں فریاد تے خوش تھیوں میرا ویکھ کے حال رقیب مائے
 بنجے باغ دے وچ پھر دے زاغ دل دے پئے کوکدے وانگ عندلیب مائے
 جو کجھ لکھیا لوح محفوظ اُتے آیا پیش اوہ اس غریب مائے
 ویری جان دا چرخ بے مہر ہويا، راکھا رب دعوات مجیب مائے
 پڑھیا قاعدہ جدوں پریم والا بھلے ادب ادب ادیب مائے
 اس جیونے تھیں چنگی موت شفیق کرے اج ہی رب نصیب مائے

ع

عید آئی لوکاں عید کییتی گئی سر میرے غم دی ہاتھ مائے
لوکاں ونج مسیتی عید نیتی گئی بھل مینوں پوجا ہاتھ مائے
ہکلی وندی تے کرلا وندی میں گئیاں چھوڑ سہیلیاں ساٹھ مائے
کیتا ہجر نے چوڑ تے بھل گئے مینوں شان شوکت اتے ٹھاٹھ مائے
عشق ذات کذات نہ مول پچھے بھادیں ہو پوہڑا بھادیں راٹھ مائے
رہندی کسک دیدار دی روز شفق سک سک ہوئیاں مثل کاٹھ مائے

غ

غماں کھادی ہائے جان میری پیاں دھن فراق دے جل مائے
پئی یار دی مول نہ دس کدھرے کتھے گیا ہائے سانوں چھل مائے
کییتی طرف ٹلے رانجھے وانگ دھائی شہر تخت ہزار یوں چل مائے
سار یار دی لین گیا ڈھوک صوبے دسی مول نہ کسے نے گل مائے
لکھیا لیکھ تقدیر دا انج پیسی سدھے تکلے نوں پئے ول مائے
لیا سکھ دا قافلہ لٹ چوراں کوکاں صبر ناہیں اک پل مائے
سُجے ہٹ بازار تے چوک پئے کھاون ماڑیاں رنگ محل مائے
چڑھ کوہ پہاڑاں تے مار نعرہ آکھاں سڑ گئیاں سڑ بل مائے
آیا ہجر طوفان اندھیر ظالم گیا جھلی نوں سٹ کے جھل مائے
کراں نت دعا شفق رب اگے بیڑا دوٹیاں دا چڑھے تھل مائے

ف

فجر غم دی ہائے نج آندی ساری عمر دا پیا گل رون مائے
گیا ٹہلنا باغ دا بھل مینوں ہویا کم میرا جنگل بھون مائے

ڈونگھے وہن اندر چویں پوے کپرتیوں سول میرے جگر پون مائے
کالی رات وچھوڑے دے وانگ سولی ہوئی خواب خیال سکھ سون مائے
حدوں لنگھ کے ہجر نے ظلم کیتا، کیتا ظلم نہ ایڈ فرعون مائے
ازلوں لکھے سن لیکھ اس تیزی دے ایویں غم دے ہار پروں مائے
کیتا ہجر شکبہ جیوں گور کافر، شفیق رب باجھوں بلی کون مائے

ق

قول کپے کر کے نال مائی پہلے روز لائیاں میریا بابلا اوئے
ہجر مار نشتر کڈھی رت میری تده بند پایاں میریا بابلا اوئے
اک یار مٹھی دوجا عشق کٹھی تیجا ہجر تائیاں میریا بابلا اوئے
مثل ماہ کنعان لاڈیں لا بھائیاں ڈونگھے چاہ پایاں میریا بابلا اوئے
وال وال میرا مارے آہ دردوں سنجیاں ویکھ جائیاں میریا بابلا اوئے
لگی سانگ فراق دی کار سینے واگاں یار چائیاں میریا بابلا اوئے
جھب میل پیارڑا یار میرا آکھاں نت سائیاں میریا بابلا اوئے
کون لاہے فراق دا بھار ہر توں غماں پٹھ آئیاں میریا بابلا اوئے
میری سندی تسی خلق ساری سندے بھین بھائیاں میریا بابلا اوئے
شفیق ہويا میلا شیشہ دل سندا نالے پپیاں چھائیاں میریا بابلا اوئے

ک

کیہ کراں میرا جی ڈردا اُس لائیاں دیراں میریا بابلا اوئے
آوے جہاں راہیں جانی یار جھاڑو چشماں نال پھیراں میریا بابلا اوئے
میری کوک فریاد ہے رب اگے وچن ہجر بھیراں میریا بابلا اوئے
میرا رُکھ وجود رُکھ ہجر آرہ کیتا چیر میراں میریا بابلا اوئے

رُخ و یکھ محبوب گئیاں بھُل بھتاں شدّاں زبراں زیریاں میریا بابلا اوئے
سیاں کتدیاں بیٹھ بھنڈار پر میں ہنجو پئی کیراں میریا بابلا اوئے
طعنے شہرتاں جگ جہان دیاں جھلاں وانگ تیراں میریا بابلا اوئے
شفیع بھر دا تکلہ جان سلتے چرخہ وانگ ڈھیراں میریا بابلا اوئے

ل

لعل یا قوت دی لب باجھوں آئی لبّاں اُتے میری جان مائے
آوے مول آرام نہ اک ساعت کتھے جا بیٹھا تنبو تان مائے
رہن نین نہ ہوڑیاں مول میں تھیں رہندے وانگ چناب روان مائے
پاواں اونسیاں شگن وچاردی میں تھکی ڈھونڈ میں کل جہان مائے
زلف ناگ ایانے نے ڈنگ کیتا پئے ماندی سنگیاں لان مائے
لگا گھن کلیجڑے بھر والا دَسن وید گرمی یرقان مائے
سسی ہو تسی موئی تھل اندر پچھے یار جانی پُئن خان مائے
لوہے وانگ اول مارے گھت مینوں اُتوں ماریوس بھر ودان مائے
کنیں شہر گراں برباد ہوئے چڑھیا قہر فراق طوفان مائے
ہوسن تم نہ دکھ تے درد شفیع دتے آپ جو رب رحمن مائے

م

مرض کجھ ہور دی ہور مینوں کرے اثر دوا نہ مول سیو
کرو جھب علاج کجھی مرض جاوے نہیں تے پکڑ جاسی مرض طول سیو
جیکر ملے پھکی وصل یار والی میرا دور ہو جاسی سول سیو
جہاں عشق نہ مول خرید کیتا آکھن ہووندا کیہ حصول سیو

سانوں دید محبوب دا طور جلوہ ہوندے دوہیں جہان وصول سیو
 بیٹھا نین چھپا مونہہ پا برقعہ منگے چنگیاں ہور محصول سیو
 جہاں باگاں دے وچ رَل کھیڈے باجھوں یار اوہ خار بول سیو
 میری کلی امید دی کھول رہا میرا یار گلاب دا پھول سیو
 حشر تیک نہ چھڈساں عشق ماہی قسم رب گواہ رسول سیو
 شقیق ماہ رمضان شریف اندر کیتا نین محبوب مقتول سیو

ن

نت میں ویکھدی رہاں ماہی تیرا راہ چڑھ محل چوباریاں تھیں
 گلیاں چوک بازار میں مل بیٹھی بچھاں پتے راہ جانڈیاں ساریاں تھیں
 لگی کات فراق دی وچ سینے وگے خون جہیوں آب نواریاں تھیں
 رہوے تاپ فراق دن رات چڑھیا ہوئیاں سک تیل غماں بھاریاں تھیں
 دشمن آہے دشمن بجن ہوئے دشمن پائے دکھ بھارے بھائی چاریاں تھیں
 دن رات فریاد فریاد کوکاں گکیاں لنگھ کے عرش مناریاں تھیں
 مکھڑا بدر منیر دکھا آ کے ہووے چاندنی رات اندھاریاں تھیں
 جلدی جام وصال پلا ساقی چند نک آئی تیریاں لاریاں تھیں
 تڑنے وانگ مچھی وچ جبر تتی کدوں صبر آوے بے قراریاں تھیں
 میری کوک فریاد بے انت شقیق نکلے واز جہیوں چوٹ نقاریاں تھیں

و

وین کرینڈیاں دن جاوے راتیں نال گلاں کراں تاریاں دے
 ہويا کھاوناں زہر آلود میرا بھلے سیر مینوں گلزاریاں دے

میری ہوش حواس فراموش ہوئی یار وکھ چکار رخساریاں دے
کہناں چاٹھ سولی جھوٹے دیوس نی کہناں چیریوس نی نال آریاں دے
وانگ تیخ کہاب سینے لا پیرا کیتا نذر میں یار پیاریاں دے
ادہ وی مول قبول نہ یار کیتا ہائے لیکھ مندے کرماں ہاریاں دے
مویاں ہویاں نوں مار دے ہر کوئی نکے وڈے دشمن درداں ماریاں دے
کوئی مول نہ پرتدا پاس ساڈا ہوندے حال مندے دکھاریاں دے
ساوان ہار برن سنجے نین میرے ہوئے حال خوار پیزاریاں دے
رنگ گل انار ہو یا گل لالہ، شفیع پئی جاں وس ہتھیاریاں دے

۵

ہسناں کھیڈناں یاد ناہیں ہائے نار فراق نے ساڑیاں میں
نیونہ لا بیٹھی تتی نال راہیاں پیریں ماریاں آپ گہاڑیاں میں
سینے سول کلیجڑے درد میرے کنڈے عشق نے چاٹھے ہاڑیاں میں
گاواں سوہلے فراق تے غم والے غزلاں بولاں تے مار دی تاڑیاں میں
کدھرے چھپ جاواں کہڑے پاس نساں، حضرت عشق ظالم ہائے تاڑیاں میں
رنگیں محل میں وسدی رسدی ساں فوج ہجر نے آن اُجاڑیاں میں
ظالم عشق مریلوے شیر مینوں سولی وانگ منصور دے چاڑیاں میں
رو رو وانگ یعقوب دے نیر مکا، تتی ہجر فراق لتاڑیاں میں
کنڈے سول فراق دے جان سلن ڈھونڈاں یار نوں بار دیاں جھاڑیاں میں
کیتی بار قبول شفیع باجھ بلی چھڈ پیٹھکاں محل تے ماڑیاں میں

ل

لٹ لئی دلی دلاں والی تیرے حسن دی ناز ادائیاں وے
کر کے مہربانی میرے دل جانی دس مکھ نہ کر بے وفائیاں وے

غماں روپ میرا کل چوپ لیا پئی وُس میں ہتھ قصائیاں وے
 تیرا تاپ اس تتی نوں آلیوے اگے رب دے کراں دعائیاں وے
 ویکھ حال تیرا مندے حال ہوئیاں نعرے ڈاڈھڑے مار کر لائیاں وے
 کوئی واہ ناہیں پچھاں حال تیرا پائیاں دوتیاں سخت جدائیاں وے
 ربّا شام تائیں ہوندیاں شام تائیں دکھ دور کریں میریا سائیاں وے
 اگے ہجر نے مار مُکا وِتا تیل پانکے یار جلائیاں وے
 سانوں یاد تساڈڑی ہر ویلے تساں منوں چا کیوں بھلائییاں وے
 نام رب دے معاف چا کر ماہی ہوئیاں اساں تھیں جو خطائیاں وے
 جھب آئی کے مکھ وکھا مینوں تیرے ویکھنے دی سدھرائیاں وے
 گلی گلی الامڑے ملن مینوں ہائے دشمنان سخت اکائیاں وے
 کھلے وال کر کے پھراں وِچ گلیاں جھلی جگ دے وِچ سدائیاں وے
 وِچ جگ جہان بدنام ہوئیاں ہائے نِج مائی جس جائیاں وے
 طعنے دیندیاں سنگ سہیلیاں نی مارن بولیاں بھین بھرجائیاں وے
 وِن رین ساری بیٹھی کراں زاری شفیق سخت مصیبتاں پائیاں وے

الف

آئی کے بیلیا مل جاویں پائیاں سخت مصیبتاں بھاریاں میں
 آوے چین نہ مول اک پل مینوں رہاں ویکھدی کھول کے باریاں میں
 جیکر پر دیوے مینوں رب سوہنا آواں پاس تیں مار اڈاریاں میں
 مولیٰ کرن نصیبتاں پند مینوں سُندیاں سار ہی کل وساریاں میں

تیرے حسن دی شمع نے جال دتا گئیاں بھل گل تیز طراریاں میں
 رہاں کوکدی بلیاں وچ ماہی سرتے چا فراق دیاں کھاریاں میں
 ہائے دوس تتی کیندے سر دیوے ظالم ہجر زمین نگھاریاں میں
 کوئی آس امید نہ بچنے دی ہائے اس وچھوڑے دی ماریاں میں
 دماں باجھ قربان میں ہو چکی سوہنے یار اُتوں صدقے واریاں میں
 جدھر مکھ کراں دس دُکھ شفیق ہائے ہر طرفوں ہمتاں ہاریاں میں

ی

یاد پیارے دی ہر ویلے اک پل نہ مول وسارنی ہاں
 طعنے دیوندے مینوں لوک سارے قلعہ صبر دا پیٹھ اسارنی ہاں
 لیر لیر کیتی گڑتی چیر ساری متھا نال کندھاں پئی مارنی ہاں
 مار مار مٹکے چھاتی لال کیتی کراں وین تے باہاں الارنی ہاں
 خوف خار دا دلے توں دور کر کے بلبل یار دے حسن گلزارنی ہاں
 راتیں پاس نہ لاوندی پلنگ اُتے سارا دن دلیلاں وچارنی ہاں
 ہوو منگدی مول کجھ تیں تھیں طالب صرف تیرے دیدار نی ہاں
 وانگ کونج کر لاوندی باجھ بلی آپیں ڈھائیں میں مار پُکارنی ہاں
 مٹاں پاندھیاں پنڈتاں جوگیاں تھیں رملی نال میں نت چترانی ہاں
 چڑھی عشق دی مست خمار سرتے سیس یار نوں نذر اتارنی ہاں
 ہائے یار میں تے کدی مہر کرے اللہ پاک اگے منت وارنی ہاں
 ناہیں ول مینوں شعر کرن سندا ایویں کوکدی میں دکھیارنی ہاں
 میرے عیب اُتے پردہ پا رہا گنہگار وڈی بدکارنی ہاں

لہمیں واٹ ہے عشق مریدوے دی دید یار دی میں بھکھیارنی ہاں
 موہرا کھان سوکھا نیونہ لان اوکھا میں قید زلف کندل وارنی ہاں
 رہا توڑ چاڑھیں میرا عشق ثابت عاشق مکھ محبوب دلدار نی ہاں
 میرا نال دلدار کریں گور تختہ تنقیع نت میں عرض گزارنی ہاں
 لا اِلهَ اِلاَّ اللہ محمد رسول اللہ



☆ ”فریاد عاشق (قلمی)“۔ صفحہ 56 تا 82۔

☆ حاشیہ از شاعر:

”آج مورخہ 3 ذیقعد 1344ھ (1926) بوقت

چاشت موضع بنگلیال تحریر شد“

.....

[سی حرفی نمبر 02]

درفراق معشوق



الف

جی	ہزاراں	حمد	نوں	اللہ
جی	شماراں	حساب	باجھ	کراں
جی	گزاراں	شکر	سجدے	لگھ
نوں	باری	رازق	خالق	اُس
نوں	چاری	مِل بے	خوابے	کدی
نوں	ماری	دردیں	تتی	میں

ب

جی	ہزاراں	صلوٰۃ	بھیج
جی	ابراراں	شاہ	اُتے
جی	یاراں	اصحاباں	سنے
نوں	غفاری	رسول	پاک
نوں	چاری	مِل بے	خوابے
نوں	ماری	دردیں	تتی

ت

تنگ پئی چند و چاری جی
تیرے در تے عرض گزاری جی
مینوں بنی مصیبت بھاری جی
کدی مل کھاں او گنہاری نوں
کدی خوابے مل بے چاری نوں
میں تتی در دیں ماری نوں

ٹ

ثمر چاہواں اس رُکھ دا جی
میں کاہلاں ہاں بہوں بھکھ دا جی
میں عاشق ہاں تیرے مکھ دا جی
اک جلوہ دس نکاری نوں
کدی خوابے مل بے چاری نوں
میں تتی در دیں ماری نوں

ج

جگ وچ دُھماں پپیاں جی
خبریں افلاک تے گئیاں جی
طعنے دیوں سنگت ستیاں جی
پوندے لتر کرماں ماری نوں
کدی خوابے مل بے چاری نوں
میں تتی در دیں ماری نوں

ح

حد حدود نہ کائی جی
 جھڑی ہوئی وچ جدائی جی
 ہوئی دشمن کل خدائی جی
 سد کول ماہی بدکاری نوں
 کدی خوابے مل بے چاری نوں
 میں تتی درویش ماری نوں

خ

خوشیاں عیشاں گئیاں جی
 وچ ڈونگھے کھوے پیاں جی
 چند دتی اتھے کئیاں جی
 کڈھیں باہر میں دکھاری نوں
 کدی خوابے مل بے چاری نوں
 میں تتی درویش ماری نوں

د

درد تیرے نے ماہی جی
 پائی گل میرے وچ پھائی جی
 صدقہ پاک رسول الہی جی
 کریں دل دی دُور بیماری نوں
 کدی خوابے مل بے چاری نوں
 میں تتی درویش ماری نوں

ذ

ذکر تیرا مینوں بھاوے جی
 جھڑا گلاں تیریاں باوے جی
 شالا وچ بہشناں جاوے جی
 رکھے دُور اللہ اُس ناری نوں
 کدی خوابے مل بے چاری نوں
 میں تتی دروے ماری نوں

ر

روواں دن تے راتی جی
 لگی بھر ماہی دی کاتی جی
 چند وچ غماں دے پھاتی جی
 ماہی سن لے میری زاری نوں
 کدی خوابے مل بے چاری نوں
 میں تتی دروے ماری نوں

ذ

زور نہیں کوئی میرا جی
 مینوں دردوں پایا گھیرا جی
 کدی کرناں میں ول پھیرا جی
 لا نال گلے دکھاری نوں
 کدی خوابے مل بے چاری نوں
 میں تتی دروے ماری نوں

س

سُر گئی جند نمائی جی
وچ ہجر تیرے دل جانی جی
ہوئیاں مجنوں وانگن فانی جی
کھ دسناں اوگنہاری نوں
کدی خوابے مل بے چاری نوں
میں تتی درویں ماری نوں

ش

شور سکارا گھتاں جی
ہائے ہجر مریندا لٹاں جی
وچ جنگل بیلایاں وِتاں جی
ہائے پکڑی جند وگاری نوں
کدی خوابے مل بے چاری نوں
میں تتی درویں ماری نوں

ص

صبر ماہی بہوں کیتا جی
بھر زہر پیلاڑا پیتا جی
سینہ غم دیاں سوئیاں سیتا جی
مونہ دھریا طرفے باری نوں
کدی خوابے مل بے چاری نوں
میں تتی درویں ماری نوں

ض

ضرب فراق نے ماری جی
 سینے لگی ہجر کٹاری جی
 چائی غم دی سر تے کھاری جی
 لگی آتش دل بے زاری نوں
 کدی خوابے مل بے چاری نوں
 میں تتی دردیں ماری نوں

ط

طلب دیدار دی رہندی اے
 تتی گھر وچ مول نہ بہندی اے
 دکھ درد قصبے سہندی اے
 مکھ دسناں چوہڑ چماری نوں
 کدی خوابے مل بے چاری نوں
 میں تتی دردیں ماری نوں

ع

عشق تیرے دی کاتی جی
 لگی ماہی اندر چھاتی جی
 نٹھے یار پرانے ساتھی جی
 وچ غم دے جان ٹھاری نوں
 کدی خوابے مل بے چاری نوں
 میں تتی دردیں ماری نوں

غ

غیراں خبر نہ کائی جی
جند دکھاں دے مونہہ آئی جی
ہوئے دشمن باپ تے بھائی جی
نہیں سندا کوئی مری زاری نوں
کدی خوابے مل بے چاری نوں
میں تتی دردیں ماری نوں

ف

فالان نت پواواں جی
پئی تتر مور اڈاواں جی
گٹ چوری کاواں پاواں جی
جا آکھو اس پیاری نوں
کدی خوابے مل بے چاری نوں
میں تتی دردیں ماری نوں

ق

قسم خدا دی تینوں جی
جے آن ملیں نہ مینوں جی
دساں دل دا حال میں کہنوں جی
آ ویکھیں حال خواری نوں
کدی خوابے مل بے چاری نوں
میں تتی دردیں ماری نوں

ک

کلی ہوئیاں ماہیا وے
 کبھی سانگ کلیجے لایا وے
 آویں اسے راہیں او راہیا وے
 سن حال حقیقت ساری نوں
 کدی خوابے مل بے چاری نوں
 میں تتی درویش ماری نوں

ل

لہاں گل وچ پائیاں جی
 میں رو رو دیواں دُہائیاں جی
 ہائے رب دیاں بے پروائیاں جی
 تک بھاء ہجر دی ساڑی نوں
 کدی خوابے مل بے چاری نوں
 میں تتی درویش ماری نوں

م

موت آوے گھن جاوے جی
 میری جند خلاصی پاوے جی
 گلوں دھندا ایہ لیہ جاوے جی
 میں سکدیاں عمر گزاری جی
 کدی خوابے مل بے چاری نوں
 میں تتی درویش ماری نوں

ن

نوری مکھڑا دس کھاں جی
اک وار میرے نال ہس کھاں جی
کدی گھر ساڈے آ وس کھاں جی
لگی ساڈی روز شماری نوں
کدی خوابے مل بے چاری نوں
میں تتی درویں ماری نوں

و

واہ ماہیا دلدارا جی
کدوں دیسیں پاک نظارا جی
دے جگ دے وچ اندھارا جی
کر دور اندھیر غباری نوں
کدی خوابے مل بے چاری نوں
میں تتی درویں ماری نوں

ہ

ہار سنگار نہ بھاوے جی
اُچا رنگ محل ڈراوے جی
تتی اُچی کوک سناوے جی
ٹھگ ملیا ٹھگ بازاری نوں
کدی خوابے مل بے چاری نوں
میں تتی درویں ماری نوں

لا

لے لے نام میں دیواں جی
 جام عشق تیرے دا پیواں جی
 میں جھلی تیری سدیواں جی
 ویکھاں کوٹھے چڑھ اسواری نوں
 کدی خوابے مل بے چاری نوں
 میں تتی دردیں ماری نوں

الف

اس ہجر نے میرا جی
 نال تیخ دے لایا ہیرا جی
 ماہی کجھ نہ جاوے تیرا جی
 مکھ دس کھاں اوگہاری نوں
 کدی خوابے مل بے چاری نوں
 میں تتی دردیں ماری نوں

ی

یاد نہیں اُس دی بھلدی جی
 پئی ہجر ہنیری بھلدی جی
 چند سولاں گنڈے ثلدی جی
 کیہ آکھاں عشق خواری نوں
 کدی خوابے مل بے چاری نوں
 میں تتی دردیں ماری نوں

ی
یار تھیں پئی جدائی جی
ہوئیاں مجنوں وانگ سودائی جی
اس عشقے بہوں روائی جی
کدِ ملسیں آ دکھیاں نوں
کدی خوابے مل بے چاری نوں
میں تتی درویں ماری نوں



☆ ”فریاد عاشق (قلمی)“۔ صفحہ 93 تا 98۔

☆ حاشیہ از شاعر:

”بقلم خود میاں محمد شفیع، 9 محرم الحرام، 1345ھ بمطابق
جولائی 1926ء“

.....

[سی حرفی نمبر 03]

”نیا زنامہ“

بپاسخا طریار غار برادر طریقت محمد عبدالجید خفقیانی نھوٹوی دام الطافہ



الف

آ او یار مجید ماہی دستخط کر دے راضی نامیاں تے
جیکر بھل کے کوئی قصور ہو یا مالک دین معافیاں کامیاں تے
دولت والڑے ہون گے گھر اپنے میری نظر کوئی نہیں عمامیاں تے
محمد شفیع میاں راہی کوچ کرسن وجی سٹ جاں اجل دامامیاں تے

الف

آ پیاریا جانیاں او میرے دکھاں دا کون طبیب ہوئی
تدہ سار ناہیں میرے حال سندی تیرے باجھ دس کون حبیب ہوئی
پیا دور جو قرب کرامتاں تھیں منظور کد وانگ رقیب ہوئی
محمد شفیع میاں مشکل نظر آوے کول تھنڈڑے بہن نصیب ہوئی

الف

آکھاں یار مجید ماہی سینے کانیاں گس کے نس ناہیں
آپوں وس رہیوں کھیڈ ہس رہیوں مینوں غماں والی گلی دس ناہیں
مینوں قسم اُس ذات دی سچ آکھاں اکھیں ندیاں مھنڈڑے وس ناہیں
محمد شفیع ایہ حق نہیں دوستی دا دکھیں دیکھ مینوں کھلا ہس ناہیں

ب

باغ بہار گلزار سیو جانی یار باجھوں چھن خار ہو کے
پھلاں نال نہ بھلدا جیو میرا اُلے سَلن سینہ سولی سار ہو کے
دیکھ سرو آزاد فریاد گلوکاں دے وانگ جلاد تلوار ہو کے
محمد شفیع اوہ یار مجید میرا کدے مل جاندا وفادار ہو کے

ٹ

ثابتی دا شیشہ چور ہویا تاہیں آ حضور پُکار کیتی
کرسی مہر مجید امید آہی ایہو دے وِچ سوچ وچار کیتی
بھاویں لکھ قصور کر لکھ جانی اگوں لئی توبہ استغفار کیتی
محمد شفیع میاں بُرا بیجیا میں تیری طبع شریف بیزار کیتی

ج

جا نھوٹ دے پنڈ وَلے تینوں قاصدا واسطے پاوئی آں
پیر کندھ دا چیر کے پندھ جاویں سدھا تیر تینوں رستہ لاوئی آں
لنیں پُچھ مکان پیارڑے دا جیندی نفر قدیم سداوئی آں
محمد شفیع معافیاں منگ رہیاں کیتی اپنی نوں پچھتاوئی آں

ح

حال جہڑا تیرے ہجر کولوں جانے جگر میرا جانی پیاریا او
میری جان تے غماں دی فوج آ کے کھلی پا گھیرا جانی پیاریا او
صدقہ واریاں میں کسے وار بھاویں کریں چا پھیرا جانی پیاریا او
محمد شفیع میاں مکمل جان آئی جیویں تیخ میرا جانی پیاریا او

خ

خام کولوں گل خام ہوئی بیٹھی خام خیال پکاؤنی آں
رڈی شام دی نوں سدے کون کوئی بدھے ہتھ میں عرض سناؤنی آں
متے شاہ میرا اس راہ آوے بیٹھی راہ اُتے گھت چھاؤنی آں
محمد شفیع آکھو راضی یار ہووے عاجز حال غریب سداؤنی آں

د

دل پیا وچ غوطیاں دے اٹھے پہر آرام نہ پاؤندی میں
چھی بحر دی بڑتے ترف رہیاں بوند آب حیات دی چاہوںدی میں
بن کے خضر چا بخش مراد مینوں دندے لا بیڑا رُہڑدی جاؤندی میں
محمد شفیع جا کہو مجید تائیں راضی نامیوں عرض رکھاؤندی میں

ذ

ذوق تساڈڑے وچ ہاں میں بھائیں دن ہووے یا کہ رات ہووے
ایہو نت درگاہ تھیں چاہ مینوں فوری دید مجید برات ہووے
اوہو راز نیاز دیاں ہون گلاں بھائیں وچ جھلاں ملاقات ہووے
محمد شفیع محبوب دا ملن منگاں منظور جے رب دی ذات ہووے

ر

رنگ میرا کالا دھوں ہویا تپ ہجر نے ساڑ دکھائیاں او
بھساں سمجھ نہ پیاں طیب تائیں دیوے ہور دیاں ہور دوائیاں او
پیڑاں عشق دیاں جان نہ نال پڑیاں ہتھوں نخیوں ہون سوائیاں او
محمد شفیع میاں ایہ بھی کر ویکھو متے وصل تھیں ملن شفاءیاں او

ذ

زندگی وِچ رَل بہن والی جیکر ختم کدے ساڈی بات ہوئی
خوشیاں ہون گیاں گھر ویریاں دے جیکر جیوندیاں نہ ملاقات ہوئی
میں تے آ خدا دا واسطہ ای میرے بھاگ جگ تے کالی رات ہوئی
محمد شفیع تیں دید توں عید میری مہربان جاں رب دی ذات ہوئی

س

سکھ دی نیند نصیب کتھوں دل آرام دے باجھ آرام ناہیں
بٹھی مل کے راہ سویر دی میں ہوئی شام اُتوں آیا شام ناہیں
اودا فیض جد عام عوام اُتے خاصاں واسطے کیوں انعام ناہیں
محمد شفیع ناکام دے کام اندر ڈھل پادنی مرد دا کام ناہیں

ش

شاد تے سدا آباد اوہو جہڑیاں سوہنیاں تے منظور ہوئیاں
پیون جام طہور پیالڑے او پھرن شام سحور مخمور ہوئیاں
اوہناں جیڈ نہ بد نصیب کوئی جہڑیاں یار دے قرب تھیں دُور ہوئیاں
محمد شفیع میاں اوہناں جیون موہرا اوہ جو نہیں حضور حضور ہوئیاں

ص

صبر اس درد دا نہیں داروں رون دھون تھیں کجھ کھلوت ہوندی
منڈی حسن دی دلاں دے ہون سودے اتھے پچھ نہ ذات تے گوت ہوندی
چڑھیا عشق دے ہتھ جو بھل کوئی اُسدی جگ تے موت کموت ہوندی
محمد شفیع جے کسی نہ نیونہ لاندی پچھے ہوت دے تھلیں نہ فوت ہوندی

ض

ضرب جدائی دی کار کھا کے ہمت ہار دتی جانی پیاریا او
کدی آن دلدار دیدار دیویں سوہنیا ساریا یار سوہاریا او
دس اساں نوں کس نے یاد کرنا جیکر تاساں بھی مَنوں وساریا او
محمد شفیع تساڈڑی پیت اندر اے تیک ثابت ناہیں ہاریا او

ط

طلب ناہیں زر دولتاں دی تیرے مکھ دی بھکھ قبول مینوں
دولت سو جو قرب پیاریاں دا کتھوں وچ پردیس حصول مینوں
شاہی عاشقاں واسطے زری پھائی یاد عشق دے ہن اصول مینوں
محمد شفیع جنجال ایہ دولتاں دے پاوے کدی نہ رب رسول مینوں

ظ

ظلم جو ورتدا نال میرے کسے غیر نوں دَساں فائدہ کیہ
اساں اپنی جان تے جھل لیناں کسے ہور نو پاواناں واندہ کیہ
پڑھیا عشق دیاں پٹیاں وچ ناہیں اتھے ہوویدا حرف ہے زائدہ کیہ
محمد شفیع بے مہریاں ورت ناہیں نال عاجزاں ظلم دا قاعدہ کیہ

ع

عقل تے علم شعور جتے جتھے عشق آوے او تھے رہن ناہیں
جانن قدر علما نہ عشق سندا تاہیں منبر تے بیٹھ کے کہن ناہیں
جانو اوہناں نوں خام عوام جھڑے طعنے بولیاں جان تے سہن ناہیں
محمد شفیع اوہ تاں تک نہیں پختے پختے دار دے تے جاں تک بہن ناہیں

غ

غم ایہو میری جان تائیں جانی آوناں سی سیو آیا نہ
کئی ہفتیوں رہی اڈیک مینوں میرے پاس تشریف لیا یا نہ
نہ تے آپ آیا نہ ہی خط پایا جس نوں اساں نے کدی بھلایا نہ
محمد شفیع کیہ فائدہ دوستی دا جبکہ جیوندیاں دید نوں پایا نہ

ف

فکر مینوں ایہو کھائی جاندا جانی یار چا متے بیزار ہووے
جیندی خفگیوں عیش حرام میں تے متے حشر مقام وچ نار ہووے
میاں آکھدے عرش عظیم کنبے سوہنڑاں دلوں ناراض جے یار ہووے
محمد شفیع کوئی یار مجید اُتے میری طرف تھیں عرضگزار ہووے

ق

قہر پوے میری جان اُتے جبکہ حق تیرے بُری نیت آہی
رہی جوش وچ ہوش نہ لکھ مینوں اوہ جو تہنڈڑے نال پریت آہی
چشتی پیر دی لڑی دے دوئے موتی اکو رسم ساڈی اکو ریت آہی
محمد شفیع میں واریاں ہاریاں او تیری جیت آہی تیری جیت آہی

ق

قول ایہ پیر امیر سندا یار غار ہے یار مجید میرا
پیر بھائیوں جس اضافتاں میں نیک طبع شریف سعید میرا
تیں توں کٹ کے جوڑساں نال غیراں ایسا نہیں خیال پلید میرا
محمد شفیع عزیز جہان وچوں جانی یار مجید رشید میرا

ک

کرم کمال نوازشاں تھیں مینوں دے معافیاں پیاریا او
بھائیں کیتیاں یا نہ کیتیاں میں ترے حق گزافیاں پیاریا او
تیرے درد فراق دے وچ بولاں ایات تے کافیاں پیاریا او
محمد شفیع کدورتاں صاف سینہ وانگوں صوفیاں صافیاں پیاریا او

ل

لوہھ ناہیں کوئی ہور مینوں تیرے کول ہوواں اٹھے پہر جانی
میرے بھاء دا اُجڑیا نظر آوے رنگیں وسدا رسدا شہر جانی
چایا چت جدو کنناں تساں میتھوں گیا ورت میرے سر قہر جانی
محمد شفیع نہ سجدہ کجھ مینوں کھان پین ڈھکا ہو کے زہر جانی

م

مرن دا کرن وپار پہلوں جہڑے نال ماہی اکھیں لا بہندے
صرفہ اوہناں نوں کوئی نہ زندگی دا جہڑے عشق والا موہرا کھا بہندے
پردہ ننگ ناموس دا چاک کر کے دھوپیں کول ملنگاں دے جا بہندے
محمد شفیع اوہ پاوندے یار تائیں جہڑے یار توں جان وکا بہندے

ن

ناز انداز ایاز والے منظور تمام محمود تائیں
نکتہ چینیاں کم نہ عاشقاں دا سوبھن گلاں ایہ بُرے حسود تائیں
عاشق رہن سدا وچ عاجزی دے کرن نیست نابود وجود تائیں
محمد شفیع تاں قرب نصیب ہوندا پہلوں ڈھانہن مجاز حدود تائیں

و

دیکھ پیاریا حال آ کے دکھاں نال جیوکر میرا حال ہويا
انگ وانگ کرنگ دے سک گیا رنگ رتڑا کالڑا خال ہويا
اٹھے مُب کلیجیوں غماں والی سکھ سووناں انت محال ہويا
محمد شفیع مجید نوں خبر کریو پائمال ہويا پائمال ہويا

۵

ہس کے تہنڈڑے ملن والا جدوں یاد آوے ویلا جانیاں او
جاون سدھیاں تیر دوپار ہو کے میرے کالجے وچ جدوں کانیاں او
کتھے ویلوے مہر محبتاں دے گل چھیاں جانیاں پانیاں او
محمد شفیع اج یار مجید ولوں گل کرن نوں پئی ترسانیاں او

لا

لکدا لکدا آ ویہڑے میریا جانیاں یار گمانیاں او
سٹ گھنڈیاں دلوں مجید ماہی پئی رب دے واسطے پانیاں او
میراں پیر بغداد دا واسطہ ای ڈھل پا نہ آ ترسانیاں او
محمد شفیع نتھوٹ دیا واسیا اوئے تیری اوٹ مینوں میریا ہانیاں او

الف

آ اکوار میں وار گھتی تتی رب دے واسطے پا رہی آ
ڈھل پا ناہیں مل آ مینوں میری جان لباں اُتے آ گئی آ
چنگا یار دلدار غمخوار ہو کے جانی پیاریا او میری سار لئی آ
محمد شفیع آ مونہہ چوا پانی سسی ہار تسی گھبرا پئی آ

ی

یار میرا وفادار ہو کے بھل گئی دی بھل معاف کرسی
جیکر دے وچ کجھ غبار اُسدے پڑھدے سار ایہ خط اوہ صاف کرسی
میری جان غریب نمازی تے اوہو سابقہ مہر الطاف کرسی
محمد شفیع دے عیب قصور سارے سوہنا یار مجید غلاف کرسی

ی

یار جانی ڈھڈیاں اندر میرا جیو ڈاڈھا ڈانواں ڈول ہويا
منظر ویکھ کے اس مقام سندا طاری جان اُتے سخت ہول ہويا
اُٹھی غماں دی لہر وجود وچوں تاہیں درد آلود ہر بول ہويا
محمد شفیع میاں دھن بھاگ اُس دے کلمہ نبی سندا جس دے کول ہويا



☆ ”ارمغان اختر (قلمی)“ - صفحہ 403 تا 417۔

☆ حاشیہ از شاعر:

”بتاریخ 16 مئی 1940ء، 7 ربیع الثانی 1359ھ، 4 جیلھ

1997 بکرمی، بروز پنجشنبہ بوقت چاشت برائے یار غار برادر

طریقت محمد عبد المجید حقانی درڈھڈیاں تحصیل چکوال تحریر شد“

.....

[سی حرفی نمبر 04]

سوال و جواب ہیرا رانجھا



الف

آ خدا دا واسطہ ای تک رانجھنا میریاں زاریاں نوں
 مہنا تہنڈڑے عشق دا جھلیا میں بدر عشق دی موت کواریاں نوں
 سر اکھیاں تے تینوں رکھیا میں رہی ہتھ بدھے خدمت داریاں نوں
 محمد شفیع ایہ قول نہ عاشقاں دا نس جاوناں لائیکے یاریاں نوں

ب

برس باراں کاماں رکھو نیں آخر چھڈیو نیں گھروں کڈھ ہیرے
 تیرے باپ دی نیت دے کھیت وچوں قسمت لئی اج اپنی وڈھ ہیرے
 دیندا دم دلاسرے غم کھاندا ہوندا کدے جے اپنا ہڈ ہیرے
 محمد شفیع اج جان دے وطن مینوں نام رب دا ای پلا چھڈ ہیرے

ت

توہیں سرتاج تے کج میرا تیرے باجھ رانجھا کسے کم دی نہ
 ہوندی سار جے اس دہارڑے دی شالا ماں مندی مینوں جمدی نہ
 لویں چم ادھیڑ نہ سی کرساں دیواں قسم ہک اپنے دم دی نہ
 محمد شفیع ایہ رات برات والی شالا صبح اجوکڑی دھمدی نہ

ٹ

ثابتی قول نوں تَج بیٹھا ہیرے باپ تیرا وڈا لُج والا
داڑھی پرہیوں دے وِچ مَنا بیٹھا لونبر جھنگ دا شینہ دی گج والا
اساں تکیا ٹھوک وجائی کے تے بھانڈا چوچکے دا مندے جج والا
محمد شفیع میاں تیرا دید آہا میرے کان دن عید تے جج والا

ج

جان ایہ ہیر امان تیری کرسی کدے نہ غیر قبول رانجھا
بھادیس لکھ سرتے آون چڑھ فوجاں ہوساں کدی نہ عشق عدول رانجھا
اج باپ برادری گھول بیٹھا اس گلوں ہاں سخت ملول رانجھا
محمد شفیع سن پک پکائیاں میں شاہد رکھ کے رب رسول رانجھا

ح

حق انصاف نہ عدل اتھے کسے رب رسول نوں یاد ناہیں
دے کے ساک مڑ قول تے خاک پاون سُنے چاک دی کوئی فریاد ناہیں
جالے پوہ پالے اندر بیلایاں دے تساں جیڈ کوئی ہور صیاد ناہیں
محمد شفیع ہیرے میرا چھوڑ کھیڑا وس کھیڑیاں دے رانجھا شاد ناہیں

خ

خدمتاں تیریاں چائیاں میں بدھے ہتھ میں رہی غلام رانجھا
جھلے قبر نہ دوزخیں ملے ڈھوئی کیتی کدے جے غیر کلام رانجھا
تیرے عشق دی نیت نماز بیٹھی تینوں جان کے بیت الحرام رانجھا
محمد شفیع میں وِچ حضور تیرے پڑھاں نیت درود سلام رانجھا

ذ

ذرہ توں ہول نہ رانجھیا او بدھے ہتھ غلام اے ہیر تیری
میرے باپ دی گل تے جاء ناہیں بندی ہیر زہیر فقیر تیری
کھیڑے آن جو کھڑن ویاہ مینوں ہوئی ہیر تشہیر لوکیر تیری
محمد شفیع پسند نہ مول مینوں اتھوں جاوے دی تقریر تیری

د

رہ، نہ بہوں بنا گلاں باراں سال گزرے اوہناں لاریاں دے
تک کھیڑیاں دا رَج بچ گئے قولوں چودھری جھنگ دیاں واریاں دے
پچھوں اسیں بھی گھٹ نہ کسے کولوں وڈے خان ہاں تخت ہزاریاں دے
محمد شفیع تقدیر نے گھیر آندا مالک ملک زمین چوباریاں دے

ذ

زور میں اپنا لاوساں جی دیاں باپ نوں صاف جواب رانجھا
تیرے باجھ ہے جیون حرام میرا لاہ سٹاں گی اج حجاب رانجھا
نال کھیڑیاں ہتھ نہ جوڑ باہل میرا خصم ہے خان نواب رانجھا
محمد شفیع جیکر مُڑاں سڑاں دوزخ مینوں قسم قران کتاب رانجھا

س

سکھ سواد دی بات اتھے مینوں نظر نہیں آوندی کوئی ہیرے
اوڑک ماپیاں دی تساں لُج مکنی اگے وچ دنیا ایویں ہوئی ہیرے
گل گُوڑ بے عشق میدان اندر لُتھی عورتاں دے مونہوں لوئی ہیرے
محمد شفیع چڑھ بہندیاں ڈولیاں تے لا کے ہتھ قران تے سوئی ہیرے

ش

شرم حیا دی گل اُڈی گڈی عشق دی چڑھ اسمان گئی
گل جائی کے بیلوے ملن والی کھلر رانجھناں وچ جہان گئی
میرے عشق دا تساں ثبوت ناہیں کہڑی بات ایہ تساں دھیان گئی
محمد شفیع جدو کنی کھیڑیاں دی پئی کن میرے، میری جان گئی

ص

صبر دلیریاں دے ناہیں کراں کیہ مرے کجھ اختیار ناہیں
اگے ستھری مہنڈڑے نال ہوئی اوہناں وعدیاں تے اعتبار ناہیں
گھر بار تمام نیلام کیتا کوئی ساک برادری یار ناہیں
محمد شفیع ہیرے تیریاں پیکیاں دا رہیا پرہیوں دے وچ وقار ناہیں

ض

ضرب ایہ مہنڈڑی جان اُتے میریاں مایاں دا گیا لکھ ناہیں
تیرے دماں دی منگدی خیر بندی رانجھا ہیر دا سیر کوئی دکھ ناہیں
تیری گلی دے کترے کھیڑیاں تھیں چنگے کھیڑے کوئی نامے لکھ ناہیں
محمد شفیع پر رانجھیا مایاں نوں حاصل ہیر نمائی دا اکھ ناہیں

ط

طلب تیری جانی پیاریا او بیٹھا غیر خیال وسار سارے
تیرے پیار پیاریا بنھ پایا آیا چھوڑ پچھے رشتہ دار سارے
رہی ذات صفات نہ یاد اپنی اتھے سدیا چاک سنسار سارے
محمد شفیع پر تساں بھی کنڈ دتی لکھی وچ تقدیر دے ہار سارے

ط

طلب تہاڑی رکھ ہیرے ڈیرا جھنگ سیال وچ لا بیٹھا
تیرے باپ دے دم دلاسرے تے سٹ سنگ تے ساک پروار بیٹھا
موہو چودھری دا ہو کے صاحبزادہ نانواں کامیاں وچ لوا بیٹھا
محمد شفیع میاں باراں سال پچھوں ہیرے تہنڈی سانجھ مکا بیٹھا

ظ

ظاہری باطنی اج توڑی رہی ہیر تیری وفادار رانجھا
کیتے پاساں قول اوہ بنگلے دے لا کے سینے دا زور دلدار رانجھا
کھیرے کھڑن جے کدے ویاہ مینوں مرساں کھائی کے تیز کٹار رانجھا
محمد شفیع میاں ترسی عشق میرا سچا تہنڈے نال پیار رانجھا

ع

عشق دی گل اج ختم ہوئی ہیرے باپ تیرے فنی کوئی ناہیں
دھیاں سٹ کے ٹرن نہ مایاں نوں اگے ملک ساڈے ایسی ہوئی ناہیں
سیاں وچ نہ رہیں گی بہن جوگی ملسی حشر عدالتیں ڈھوئی ناہیں
محمد شفیع کر کالا نہ مایاں دا مونہوں شرم والی لایں لوئی ناہیں

غ

غیر جے کراں قبول رانجھا مراں جگ اُتوں بے ایمان ہو کے
کھیرے کھڑن مینوں ڈولی چاہڑ بھاویں رہساں تہنڈی امن امان ہو کے
اکھ چاء نہ دیکھساں سونہ تیری سوہنے ہون جے حور غلام ہو کے
محمد شفیع پر رانجھنا ہیر تیری آئی جگ تے تہنڈی دان ہو کے

ف

فاتحہ خیر دعا آکھو اتھے رہن دی رہی صلاح ہیرے
چلیا اج میں تھنڈرے شہر وچوں بیڑی روہڑ کے جیوں صلاح ہیرے
دے کے دھیاں دے ساک جو مگر جاون پاون کدی نہ حشر فلاح ہیرے
محمد شفیع میاں گھر کھیڑیاں دے ہوناں تھنڈا کاج نکاح ہیرے

ق

قہر نازل نہ کر رانجھا اج ہیر نمائی دے شہر اُتے
میرے روح دا پیا جہاز ڈولے تیرے عشق دے بحر دی لہر اُتے
موج میلڑے والڑے گئے ویلے سنگ پیاریاں غدی تے نہر اُتے
محمد شفیع زوال دی فال پئی جیوکر سورج نوں وقت دوپہر اُتے

ک

کراں کیہ جراں میں کداں توڑیں حدوں ودھ کے ہوئی تاں بولیا میں
دھکے مار کے دروں کھڈی دتا تیرے باپ جاں مونہوں پچولیا میں
اوہناں تڑاں وچ مول نہیں تیل ہیرے ہتھیں جاچیا تکیا تولیا میں
محمد شفیع میں کنیاں جھاڑ ٹُریا کجھ تساں دا ساتھ نہ جولیا میں

ل

لبھساں کس دیاں ڈیریاں تے کتھے کراں گی رانجھنا بھال تیری
اوتر باپ جس تھنڈرے نال کیتی قسم رب دی ہیر ہے مال تیری
تیرے حسن دا رہے ایہ باغ کھڑیا طبع نکاں نہ کدی ملال تیری
محمد شفیع نہ جھنگ توں پیر کڈھیں مدد کرے اوہ ذات متعال تیری

م

مڑ مڑ ہتھ نہ ہتھ میرے اتھے رہن دا کوئی سواد ناہیں
جتھے قاضی بھی رشوتاں کھان لگے او تھے عدل انصاف تے داد ناہیں
اج ڈاڈھیاں دے ہتھ سب گلاں کوئی لے دی سنے فریاد ناہیں
محمد شفیع اج ہوئے بے عدل حاکم گھڑی موت دی کسے نوں یاد ناہیں

ن

نام تیرا میرا نام کنٹھا تیرے اسم توں جسم تے جان صدقے
تیری چال اتوں سارے سیال وارے ساک سین سارا خاندان صدقے
تیرے بوپڑے کھ وچ سکھ میرا کراں اُس توں کون مکان صدقے
محمد شفیع میاں بھوری والیا او سارا ہیر دا ساز سامان صدقے

و

واسطہ رب دا سُن ہیرے رکھ بنھ نہ اس غریب تائیں
منگ کھاوساں وانگ مسافراں دے پیا رووساں بیٹھ نصیب تائیں
میری مرض دا تھنڈڑے پاس داروں دیواں دوس میں کیوں طبیب تائیں
محمد شفیع میں تکلناں نہیں منگدا اوہناں اکھیاں نال رقیب تائیں

ہ

ہیر جاگیر ہے رانجھے دی اتھے غیر دا دخل دخل ناہیں
کھیڑے مارے پین تھنڈڑے کھوسڑے توں چلے غیر دی کوئی سبیل ناہیں
اُچا تھنڈڑے نسب تھیں کون دوجا کوئی کھیڑیاں جیڈ رزیل ناہیں
محمد شفیع میں فعل مختار بالغ ناقص عقل تے سمجھ قلیل ناہیں

لا

لاکھ بھائیں پئی آکھ ہیرے تیرے عذر نوں کس قبول کرنا
تساں جا بہناں گھر کھیڑیاں دے قصہ کاسنوں طول فضول کرنا
قسمت اپنی اساں نوں نظر آئی اساں زندگی دا مندا رول کرنا
محمد شفیع میاں جوگی ہوئی کے تے اساں یاد ہن رب رسول کرنا

الف

اگ تقدیر دی ساڑ دیندی تدبیر دے کاغذی پھل رانجھا
ہوندی سار جے اس انجام دی میں کدی دل نہ لاندڑی بھل رانجھا
بھانڈا بھجیا کدی نہ راس آوے کدی جُوے نہ پھلڑے ٹل رانجھا
محمد شفیع تقدیر دے باز مینوں کھڑیا وِچ ہوا دے اُل رانجھا

ی

یاری تساڈڑی وِچ کامل ہوندے ساس نہ دیوساں کنڈ ہیرے
میری جان غریب ہی جاندی ہے ہوئی اج جو مہنڈڑی ونڈ ہیرے
سینے سول ڈنڈول ببول پیڑاں اکھیں سکھ نہ کالجے ٹھنڈ ہیرے
محمد شفیع میاں تیرے عشق والی پئی وِچ جہان دے ڈنڈ ہیرے

ی

یار تینوں مونہوں سدیا میں یاری پال دکھاوساں رانجھنا او
ہوکا دیوساں تہنڈڑے عشق والا کھاری سرے تے چاوساں رانجھنا او
بھائیں لکھ کوئی پیا کرے گلاں ناہیں دے تے لاوساں رانجھنا او
محمد شفیع میاں توہیں خصم میرا تیری جگ سداوساں رانجھنا او

ی

یاریاں لان محول ناہیں یاری لاوندے نی نیکوکار بندے
 اج یاریاں جگت خواریاں نے یاری پالدے نیں وفادار بندے
 یاری لائی کے رہن وِچ گھاٹیاں دے جہڑے ہون ہیرے دنیا دار بندے
 محمد شفیع میاں سچی پریت والے کوئی لکھ وِچ ہون دو چار بندے



☆ ”ارمغان اختر (قلمی)“ - صفحہ 269 تا 276۔

☆ حاشیہ از شاعر:

”تاریخ تصنیف کردہ 17 فروری 1943ء (بھون)

یادگار لکھی کارن دوستاں دے پی کے عشق دے مٹ تھیں جام واہ وا
 شکر الحمد حضور تھیں بخش ہويا فیض شعر تھیں عجب کلام واہ وا
 عام فہم پنجابی دے وِچ سدا سمجھ لین گے خاص تے عام واہ وا
 غرض درد آہا اظہار کرنا رکھ کے ہیر تے رانجھے دا نام واہ وا
 میں بھی عشق خدنگ تھی ہاں زخمی ابے تیک ہاں خام ناکام واہ وا
 گئے گزر جدائی نوں جال دیاں میں نو سال گندے ایام واہ وا
 رب کرے تے عشق خزانیاں تھیں پاواں دولتاں دان انعام واہ وا
 محمد شفیع سوال جواب اندر کیتی سی حرفی ارقام واہ وا“

.....

[سی حرفی نمبر 05]

بجھور لامع النور دامت فیوضکم الی یوم الدین



الف

آ پیاریا لا چھاتی چھاتی پا میں واسطے پا رہیاں
تیرے عشق پیار دی بدر مینوں کہڑیاں ویلیاں دی ترسا رہیاں
ترے مکھ محراب وچ وانگ زاہد صبح شام میں سیس نوا رہیاں
محمد شفیع میں نک نکیر کڈھاں تقصیر معاف شرما رہیاں

الف

آ پیاریا واریاں میں تیری یاد تھیں جان آباد رکھدی
دل سوختہ ہجر جدائیاں تھیں جھگا خوشی دا نت برباد رکھدی
اکھیں نیر تے تپ سریر میرے سینے دھکھ تے مکھ فریاد رکھدی
محمد شفیع میاں جگ توں جاں اوتر جے میں نیت دے وچ فساد رکھدی

الف

اسیں اس عشق دی تیغ گٹھے مٹھے پیاریا جھنڈی ناز دے ہاں
سسی ہار آغاز شباب اندر ہدف حُسن دے تیر انداز دے ہاں
گئے بھُل ارکان اسلام والے گیت گاؤندی حُسن مجاز دے ہاں
محمد شفیع میاں وک وک اُتے مسئلے پچھدے نہیں جواز دے ہاں

ب

بھسم کیتا جسم وانگ چاندی پے کے عشق کٹھیا لڑی پیاریا او
سڈی گئی میں تھنڈی جگ عاشق پی کے شوق پیالڑی پیاریا او
پھراں بانوری وانگ سودائیاں دے ہو کے مست متوالڑی پیاریا او
محمد شفیع جے پیت دی ریت ہاراں سدے جگ مونہہ کالڑی پیاریا او

ب

باجھ تیرے جانی یار میرے سجا کھان آگن مینوں دھاوندا اے
پاواں خاک سر وانگ سودائیاں دے مینوں ہار سنگار نہ بھاوندا اے
یاراں نال بہار سوہاوندی اے سنگاں باجھ نہ رنگ سوہاوندا اے
محمد شفیع دیوانڑی ہو رہیاں جانی یار ناہیں انگ لاوندا اے

ت

تاہنگ تیری کوئی اج دی نہیں کنیں سال گذرے دکھ جالیدی نوں
بیٹھی گال جوانیاں جانیاں میں تیرے عشق دی واگ سمہالیدی نوں
آہی بال اج وال سفید ہوئے کھنوں عشق دا پئی اُچھالیدی نوں
محمد شفیع میں کیتڑے قول پالے توڑے پایا نہ گھڑی وصال دی نوں

ت

تار خدا دا واسطہ ای ڈونگھے بوڑ نہ شوہ گرداب مینوں
جے میں جان کے کجھ قصور کیتا مارے کر کے رب خراب مینوں
نظر آوندا وچ جہان سارے ناہیں تھ جیہا خان نواب مینوں
محمد شفیع میاں حج مکے دا اے تیرا ویکھنا عین ثواب مینوں

ث

ثبت میری تختی دل دی تے جانی پیاریا آپ دا نام سوہنا
میوے سادگی تھیں شکر شیر کولوں لذت دار تن سکھ کلام سوہنا
جانی پیاریا او اٹھے پہر میں تاں تیرے نام والا پیواں جام سوہنا
محمد شفیع ہنیریوں کو ہوندی سارے جگوں نراٹرا شام سوہنا

ج

جوڑ کھلی بنھ کے ہتھ تتی رتی مہر دی پیاریا منگنی میں
تیرے باجھ ناہیں پاسہ ہور کوئی تیرے دھوہیں دی خاص ملنگنی میں
جے میں بُری ہاں فر بھی ہاں تیری کالک داس چوہری کتی زنگی میں
محمد شفیع تساڈی ذات اُتم بچ گوت کین تھیں بھنگنی میں

ح

حج احرام تے عید گویا مینوں یار جانی تیرا دید اتھ
تیرے دید دی جس شنید پائی ہویا تیغ دے باجھ شہید اتھ
قسم رب دی رہے نہ وچ گھائے تیرا عشق جس لیا خرید اتھ
محمد شفیع مراد نوں اوہ پوہتا ہویا حسن دا جہڑا مرید اتھ

خ

خزف ریزے مل پیاریا او باراں سال جہڑیاں ٹکراں ماریاں میں
نی میں خام کولوں گل خام ہوئی کندھاں ریت دیاں آپ اُساریاں میں
وگی نفس امارے دی مار کھی گھیاں بھل ہوشاں سُر تاں ساریاں میں
محمد شفیع میاں دفتر عاشقاں تھیں ہوئی رد تے گئی دُر کاریاں میں

د

دُوریاں خواب خیال آہیاں مزے وصل دے جدوں نصیب آہے
چنگے لگدے ساں جانی یار تائیں جہڑے اج مندے کل حبیب آہے
ساڈا ویکھ کے شوق پیار تازہ سڑدے دلاں دے وِچ رقیب آہے
محمد شفیع تقدیر دی بات ہوئی رڈے گئے جو ایڈ قریب آہے

ذ

ذکر مذکور معافیاں دا مُرد مُرد پیاریا عرض رکھاوندی میں
دامن لکیاں دی سائیاں لُج پالیں گیاں میلیاں نوں بچھوتاوندی میں
پھراں زار اج نکھر قطار وچوں ہکلی کونج وانگوں کرلاوندی میں
محمد شفیع اوہ چین دی رین کتھے بیٹھی وین دجھاپ الاوندی میں

د

رو نہ پیاریا سد مینوں جے میں لگھ مندی فر بھی تیریاں میں
سائیں جا نہ پاس وَلَا میتھوں مُرد مُرد گلی تیری پاواں پھیریاں میں
تیرے دوار دی منگتی کتڑی ہاں ہور ڈھاہ بیٹھی سبھو ڈھیریاں میں
محمد شفیع کوئی مان تے زور ناہیں بیٹھی تیریاں رکھ دلیریاں میں

ذ

ذَر ضرور منظور ناہیں مینوں بخش حضوریاں سوہنیا او
تیری خادمی دا دستور لوڑاں ہوون دُور ایہ دُوریاں سوہنیا او
”الانسان“ خطا نسیان اندر نہیں خطا وِچ نوریاں سوہنیا او
محمد شفیع میاں میرے عمل کالے جیوکر کالیاں بھوریاں سوہنیاں او

س

سوچ نہ کیتڑی بھل گئیاں بھلنہار انسان نادان مڈھوں
کوئی آج دا نواں ایہ چچ ناہیں جے ظلوم جہول انسان مڈھوں
دانہ گندم دا کھائی کے حضرت آدم کیتے جنتوں باہر مکان مڈھوں
محمد شفیع مختار کس کار اندر اساں ڈٹھا مجبور انسان مڈھوں

س

سو گناہ خدا بخشے میرا معاف توں اک قصور کر دے
دلوں گل دَروں دور کرن والی نام رب دے پیاریا دور کر دے
مرہم مہر پیار دی لائی کے تے مندمل اوہ زخم ناسور کر دے
محمد شفیع دا عشق سفارشی ہے دل دی کوٹھڑی مری پر نور کر دے

س

سکھ جے ہووندا وچ قسمت تاں کیوں نال دکھاں پاندی پیار تتی
راتیں سکھ دے بیندرے سووندی میں ہووندی کاسنوں شب بیدار تتی
جہاں پھلاں بساکھ وچ جھونس جاناں اوہناں واسطے باد بہار تتی
محمد شفیع میاں سڑے لیکھ سسی رُل موئی ہوئی تھل مزار تتی

ش

شاد تے سدا آباد اوہو جہڑیاں یار دی نظر منظور ہوئیاں
نی میں کچڑی کیتڑی گل کچی ونگاں کچ دیاں ٹھوہکروں چور ہوئیاں
لڑ لگیاں دی لُج پالنی آ بھاویں چج کے بھری قصور ہوئیاں
محمد شفیع کوئی اوہناں دا جین ناہیں جہڑیاں رڈیاں گئیاں تے دُور ہوئیاں

ص

صبر تے ثابتی رہن اوکھی بناں ثابتی دے بیڑا پار ناہیں
جس دا پار ناہیں بیڑا شہوہ وچوں کوئی اُس جیہا ہور خوار ناہیں
ہویا خوار جہڑا سنسار اندر اُس تے کسے دا فر اعتبار ناہیں
محمد شفیع جس تے اعتبار ناہیں اُسدا بھرم تے کوئی وقار ناہیں

ض

ضامنی چاؤنی کس میری جد یار جانی اکھیں پھیر لئیاں
کوئی واہ تے راہ نہیں نُسے دا ظالم نفس شیطان نے گھیر لئیاں
ہکو حرف تھیں ہوئی بیگانگی میں ہائے ویریاں نے کر زیر لئیاں
محمد شفیع میاں توڑے سال باراں رہیا آؤندا باراں تے چیر لئیاں

ط

طرف تہاڑیوں شرف مینوں ہور تک بیٹھی چنے چوک ماہی
لگا فیر دو نالیوں وچ چھاتی ماری اکھ دی رکھ بندوق ماہی
کیٹی کتری کھوہ دے وچ گھتی کیتا ظلم تتی ماراں گُوک ماہی
محمد شفیع میاں صنعان وانگوں پھراں جنگلیں چاردا ٹوک ماہی

ط

طرف تیرے ت شرف مینوں تیرے عشق دا حرف پکایا میں
ہور قاعدے رہے نہ یاد مینوں نقطہ غین دا دِلوں اٹھایا میں
عین عین تہاڑا عشق ماہی ڈاڈھی غور کر کے دِل تے لایا میں
محمد شفیع میاں تیریاں وچ سکاں روگی روح قلمبوت بنایا میں

ظ

ظاہر باطن میرا آپ اُتے بھاویں چنگیاں تے بھاویں مندیاں میں
توہیں کج تے سرے دا تاج میرا تیری نفر کامی گولی بندیاں میں
پائیاں گل منصور دے ہار ہتھیں تیرے عشق پیار دیاں تندیاں میں
محمد شفیع کر عیب غلاف میرے منتاں کیتیاں اڈ کے دندیاں میں

ع

عیب جہان دے وچ میرے تاہیں تھنڈی آن پناہ منگی
عزت جاہ تے مرتبے نہیں چاہے اللہ پاک کولوں تیری چاہ منگی
گھڑی سکھ دی عاشقاں واسطے نہیں گویا ازل تھیں لبہاں تے آہ منگی
محمد شفیع میاں تدھ یار کولوں تیرے پیار دی ہک نگاہ منگی

غ

غم اس گل دا بہوں مینوں چڑھیا ہائے بھریا میرا توڑ ناہیں
بخش دے جے عیب قصور میرا تیرے وچ خزانیاں تھوڑ ناہیں
تیرے مکھ دی چس پئی دس دی اے گویا رہی تینوں میری لوڑ ناہیں
محمد شفیع میاں تدھ ہک باجھوں مینوں بھاؤندا لکھ کروڑ ناہیں

ف

فضل دی سدا امید مینوں توڑ فرد گندی عملاں والڑی اے
میرا خالڑی نیکیوں ہتھ پلا عمر عیب کریندیاں گالڑی اے
سدا سیاں دے وچ وچار رہندی اس نار دی چال نالڑی اے
محمد شفیع پر تھنڈے عشق ولوں سدا سادی پریم دی ڈالڑی اے

ق

قدم تساڈڑے پکڑ ادبوں رہی پیاریا عرض گزار بندی
اکے مار ہتھیں موہرا دے مینوں اکے بخش قصور دلدار بندی
باراں سالاں دی بندگی روہڑ دتی آکھے لگ کے نفس مکار بندی
محمد شفیع توبہ استغفار میری فضلاں باجھ کتھوں بیڑا پار بندی

ک

کدن تیرے مونہہ ساں لگن جوگی مندی کوچھڑی ذات کمینیاں میں
ہوئی مدت مدید بعید آ کے تیرے وچ پیار مرینیاں میں
تیرے شوق مانوق دا ڈاہ چرخہ کی تند پریم کتیاں میں
محمد شفیع میاں جانے جان میری جہڑی جان تے پئی کتیاں میں

ل

لوک آکھے توڑے لکھ مندا میں تاں تھنڈڑی جگ سدائیاں او
تیری ہوئی کے ہور دی ہو رہواں ایہ کوئی قول دیاں نہیں صفائیاں او
یاری سچ دی تھنڈڑی نال میری اتے سچ نوں نہیں لواں میں
محمد شفیع میاں شاہد ذات ربی میں ہاں تیریاں، نہیں پرایاں میں

م

مہر دی موڑ مہار ماہیا نہ جا میریاں عیب خطائیاں تے
لج رکھنی پوے کریم تائیں رکھ تھہ شفقت در تے آئیاں تے
وڈے حوصلے ہوندڑے وڈیاں دے کر بخششاں برے سودائیاں تے
محمد شفیع تک اپنی ذات ولوں نہ جا میریاں کسب کمائیاں تے

ن

نس جاواں ہن دس کتھے تیری زلف والی پھاہی پھس کے تے
میرے وس تھیں گل بے وس ہوئی دل کھس لیا تاں ہس ہس کے تے
ساری عمر دا رووناں پیش پایا تھوڑی جیہی مسکڑی دس کے تے
محمد شفیع میاں دل دے باغ اُتے بدل رحمتاں دا جاویں وس کے تے

و

ورہے چھ ماہی دی بات ناہیں اتھے گزر گئے باراں سال کوئی
بیٹھا گھن قلوب دے وچ رہیا تیرا پیاریا پاک خیال کوئی
محکم رہیا عقیدتوں اج توڑیں ثابت قدم جیوں ہون جبال کوئی
محمد شفیع پر ہوئی نوں کون ٹالے بھاویں ولی تے غوث ابدال کوئی

و

واسطے رب دے پا اکھاں میرا بخش گناہ پیاریا او
سارے جگ نالوں مینوں آپ دی اے وڈی حب تے چاہ پیاریا او
میرے عیب ڈھک رکھ وچ پردیاں دے کر کے قفل نگاہ پیاریا او
محمد شفیع بھریا جس دا توڑ چڑھیا میں تے رہی ادھ راہ پیاریا او

ہ

ہو رہیاں تیری پیاریا او مراں کراں نہ غیر قبول صدقہ
تیرا عشق نبھاوساں نال دندے شاہد حال دا رب رسول صدقہ
دھن بھاگ بے درد ملنگنی نوں ہووے تہنڈا وصل وصول صدقہ
محمد شفیع پیاریا ٹھار چھاتی ہور طول کلام فضول صدقہ

لا

لایاں دی لُج پالنی توں دس کون تیں بن میرا ساک اتھے
 رانجھے ہار پروار وسار سدا ہويا جھنگ دی ہیر دا چاک اتھے
 جیکر پیاریا نظر پلٹ میری تیری مہر پاسوں ہوساں پاک اتھے
 محمد شفیع میاں رہساں عمر ساری تیریاں قداماں وِچ ہوئی کے خاک اتھے

الف

آ پیاریا ٹھار چھاتی چھاتی پا خدا دا واسطہ ای
 ہوياں مدتاں درد جھلیندڑی نوں گلے لا خدا دا واسطہ ای
 میں وک رہیاں ہک تدھ کچھے تیرا چاہ خدا دا واسطہ ای
 محمد شفیع میاں پنڈ ہجر والی نہ پچواء خدا دا واسطہ ای

الف

اج ہويا مہربان میں تے جانی یار میرا اُچے شان والا
 لہیوس عاجزی کر منظور میری نال عاجزاں لطف کمان والا
 سوئے ابرو قوس کمان وِچوں جھڑا گجھڑے تیر چلان والا
 محمد شفیع محبوب دے قدم چم کے پاوے مرتبہ زمیں آسمان والا

ی

یار جس تھیں جند جان میری قربان ناراض ہو گیا سی نی
 رہی عرض میں کر بتیرتی اُس تاں مکھ میتھوں پھیر لیا سی نی
 پائے واسطے رب رسول دے میں اوہ تاں بے نیاز ہو گیا سی نی
 محمد شفیع مُرُ وصل دیاں دولتاں دا دامن دان غریب دی پیا سی نی

ی

یوم تاریخ تصنیف سندا ذرا وچ تحریر لیاویے جی
بدھوار دا روز تے چاشت ویلا چھبی فروری یاد رکھاویے جی
سن عیسوی اُئی سو سنتالی، ہجری تیراں سو چھیاٹھ سناویے جی
محمد شفیع میاں پھکن پندرہویں سی جدوں پوٹھیوں گھر پئے آویے جی
لا اِلَہَ اِلَّا اللہ محمد رسول اللہ



☆ ”ارمغان اختر (قلمی)“ - صفحہ 275 تا 285۔

☆ حاشیہ از شاعر:

”از قلم بندہ محمد شفیع اختر ڈھانگروی 11 اپریل 1947ء“

.....

[سی حرفی نمبر 06]

فراقیہ در احوال خویش می گوید



الف

اس پریم دی رس پی کے، دسو کون وستی خوش حال ہو کے
شیریں جان شیریں دتی یار چکھے، فرہاد سندی پرتی پال ہو کے
ماری چھال آن جھاک دریا سوئی، مہینوال چکھے پائمال ہو کے
محمد شفیع پتنگ ننگ موئے، پٹھری عشق دے نال حلال ہو کے

الف

اگ فراق دی لگ اٹھی، دھواں دھکھدا تاں نظر آوندا نہیں
جس یار دے نال پریت میری، اُس دی خبر کوئی آن بتاوندا نہیں
سیو خبر لیو اس جوگڑی دی، کیا ایہ دلاں دے روگ گواندا نہیں
محمد شفیع میاں اوگن گیا جو بن، ماہی مست مینوں گل لاوندا نہیں

الف

اس فراق دی نار یارو، رخت صبر قرار دے ساڑ دتے
میں، تُوں تاں کس شمار اندر، منصور ورگے سولی چاڑ دتے
اس درد فراق دی دھاڑ لوکو، جھگے وسدے کھیں اُجاڑ دتے
محمد شفیع اس ہجر نے جگر میرے، اُتے غماں دے سٹ پہاڑ دتے

ب

بری فراق جیہی مرض کہڑی، اس مرض دی نہیں دوا کدھرے
نسخہ ہجر دا کوئی قانون اندر، بو علی نہیں گیا فرما کدھرے
اس مرض دا کوئی مریض اج تک، پاندا ڈٹھا نہیں آساں شفا کدھرے
محمد شفیع خدا دے واسطے دا، جاویں سوہنیاں مکھ وکھا کدھرے

ت

ترس پوے ربا سوہنیاں نوں، آون کول مریض طیب آپوں
ہتھیں اپنے دین بنا پڑیاں، بن کے خاص شفیق حبیب آپوں
کے ٹھار پیاریا لا چھاتی، یا فر دے کے جاویں صلیب آپوں
محمد شفیع جاں رب دی مہر پوسی، لیسن سد محبوب قریب آپوں

ث

ثابتی رہے نہ مول اوتھے، جتھے درد فراق دا زور ہووے
اوتھے پیش تدبیر دی نہیں جاندی، جتھے ہتھ تقدیر دے ڈور ہووے
رہے سدا اوہ بے سواد شوہدا، جسدے جگر وچ ہجر دا چور ہووے
محمد شفیع دل نوں کیئتے صاف باجھوں، کدی چانناں وچ نہ گور ہووے

ج

جرن جدائی دا دھرن ہوندا، سر پیٹھ ودان دی سٹ میاں
عاشق سولیاں تے چڑھ کے لین جھوٹے، ہیرا تلی دھر کے لیندے چٹ میاں
مارن چھال چناب دے آب اندر، عاشق موت کولوں ڈردے گھٹ میاں
محمد شفیع پر عشق بیمار اُتے، کرن کٹ تعویذ نہ گٹ میاں

ح

حرف پریت دی ریت والے، آساں وچ مسیت دے یاد کیتے
دل دی لوح تے اوہ محفوظ کیتے، جہڑے عشق ایہ سخن ارشاد کیتے
غین غیر دے نال نہ سیر رکھی، عین نال ماہی اعتقاد کیتے
محمد شفیع میاں دل دے وچ گوشے، جُھکے عشق نے آن آباد کیتے

خ

خبر پتے پُنن خان سندے، پُچھاں پابندیاں جاندیاں راہیاں تھیں
سُنا بغل تھیں یار کھڑا بیٹھی، ہو کے مست شراب صراحیاں تھیں
جاؤ جاؤ سیو کر پو ترس میں تے، لیاؤ موڑ پنوں ہمراہیاں تھیں
محمد شفیع ہوسی حشر کے لیکھا، کالا عمل نامہ گمراہیاں تھیں

د

درس محبوب نوں ترس رہیاں، میراں اکھیاں تھیں رُس خواب گئی
آوے نظر نہ یار پیار والا، میری زندگی ہو خراب گئی
روؤن نال ہمیش وپار میرا، ہو جان عزیز کباب گئی
محمد شفیع جدایاں پیش آئیاں، میری طبع ہو وانگ سیماں گئی

ذ

ذوق تے شوق دے نوش کیتے، جہاں جام اوہ تاں مستوار ہوئیاں
جہاں دلاں دے ونج وپار کیتے، مشہور ہر شہر بازار ہوئیاں
گئے تیر فراق دے چیر چھاتی، جدوں نال ماہی اکھیں چار ہوئیاں
محمد شفیع دسو کدوں آوس گے، جہاں کان اکھیں انتظار ہوئیاں

د

راہ ویکھاں کھلی پیاریاں دے، متے آؤندا شاہ اسوار ہووے
نظر مہر دی بھالدا متے میں تے، میرا سوہنیاں دا سردار ہووے
ہوئی جان ہلاک فراق ہتھوں، جانی باجھ کھڑا غمگسار ہووے
محمد شفیع میاں اوہو جاندا اے، جسدا ہجر تھیں جگر فگار ہووے

د

راولا راہیا ماہیا او، نام رب دا ای میری فال تکیں
سٹ زانچہ ویکھ ستاریاں نوں، راس کر کے میرا حال تکیں
وال وال بدھا غماں نال میرا، میری فال تاں نال خیال تکیں
محمد شفیع مہورتاں ویکھ کے تے، میرے یار دے نین غزال تکیں

ذ

زَر زبور درکار ناہیں، رکھ پیاریا او خدمتگار کر کے
لگ ہنھ رہساں حاضر باش دائم، سروں کبر دی دُور دستار کر کے
دروں دُور نہ کریں غریب تائیں، رکھ کامیاں وچ شمار کر کے
محمد شفیع میاں دل دی غرض جہڑی، کیتی عرض سائیاں اظہار کر کے

س

سٹ بیٹھا ساکاں چاریاں نوں، تیرا خاص درویش فقیر بن کے
چلبے عشق دے گھت ہشناکیاں نوں، بیٹھا غماں دے وچ ظہیر بن کے
تیرے حُسن دا جگ ملنگ جانے، جاندا خون دل دا اکیہوں پیر بن کے
محمد شفیع جہڑے عاشق ہون صادق، چمکن فلک تے بدر منیر بن کے

س

سل فراق دا وچ سینے، کر کے یار جانی پرت آیا نہ
ویہڑے درد فراق رسیدیاں دے، سوہنے قدم رنجہ فرمایا نہ
ہوش کھڑی تے صبر قرار لئی، سمجھ پیاریا اُساں پرایا نہ
محمد شفیع میں روندیاں عمر گزری، ساہ سَکھ سواد دا آیا نہ

ش

شور جہان دیاں غوغیاں دی، ہوندی عاشقاں نوں پرواہ ناہیں
یاری لائیکے توڑنے جیہا کوئی، ہور جگ دے وچ گناہ ناہیں
موئے عشق دے مرن نہ موت کولوں، سدا جین ایہ ہون فناہ ناہیں
محمد شفیع میاں دن زار کریے، کوئی اوہناں کولوں عالی جاہ ناہیں

ص

صبر اوتھوں بھاڑ کھا نھئے، جتھے فوج فراق دی دھا پوندی
پچھو ہجر معاملے سسڑی تھیں، جہڑی چھوڑ سیجاں تھلاں وچ بھوندی
جہڑی لا بیٹھی تتی اکھیاں نوں اوہ تاں عمر ساری نہیں سَکھ سوندی
محمد شفیع میاں میرے وانگ اوہ تاں، خون ہنجواں دے بیٹھی مت چوندی

ص

صبر ناہیں اکھیں روندیاں نوں، میریا سوہنیا یار گمانیاں او
سَکھ ڈسڑی ہوش کھڑا بیٹھی، نکھر کونج ڈاروں کرلاناں او
سُولی سار پُر خار ہے بچ مینوں، راتیں اکھیاں وچ لنگھانیاں او
محمد شفیع دن رین بے چین رہناں، پیراں جاگیاں آن پُرانیاں او

ض

ضرب فراق دی کار کھا کے، ڈانواں ڈول پھردی دل جانیاں او
لگے چت نہ چیت بہار چنگی، پھراں وحشاں ہار دیوانیاں او
طعنے دین سہیلیاں سنگ دیاں ہویاں سکیاں آن بیگانیاں او
محمد شفیع جیکر بھلے بھاگ ہوندے، میتھوں ہونڈیاں کیوں نادانیاں او

ط

طرف تہاڈیوں شرف ہوسی، کدوں پیاریا حرف حضوریاں دا
میرے دلے دیا حاکماں حکم کدوں، جاری ہوگ دسو منظوریوں دا
کیٹی مار ہلاک فراق تیرے، ہوسی دور کدوں دُکھ دُوریاں دا
محمد شفیع اس عشق دے ملک اندر، جاری قاعدہ بے دستوریاں دا

ظ

ظلم ہوندے نال عاشقاں دے، دیکھن واہ واہ بے پرواہ پئے
بھاویں سولیاں تے چڑھ کے لین جھوٹے، یوسف وانگ توڑے وچ چاہ پئے
چٹھی کھل لہندی شمس وانگ توڑے، مہینوال وانگوں لمیں واہ پئے
محمد شفیع ناہیں ترس سونہیاں نوں، تے مرن توڑے بے گناہ پئے

ع

عرض میری اُتے غور کریو، غرض عاشقاں پاک دیدار دی اے
منگاں دان ناہیں دنیا داریاں دا، پک نظر درکار سرکار دی اے
تیرے مکھ کولوں دل دی بھکھ لہندی، مینوں لکھ جیہی اکھ پیار دی اے
محمد شفیع میں رانجھیا ہیر تیری، کھیرے کھرن مینوں گل عار دی اے

ع

عمر گئی وِچ جھوریاں دے، رہیا زور نہ وِچ وجود باقی
نار ہجر دی ساڑ جلائیاں میں، دُھکھدا ہڈاں دا رہ گیا دود باقی
گیا سُکھ سواد برباد ہوئیاں، رہیاں اکھیاں اشک آلود باقی
محمد شفیع میاں جانی وداع ہوئے، رہے جان آزار حسود باقی

غ

غم تیرا میرے دَم اُتے، جاں تک دَم نہ ہارساں دَم سائیں
ہمہ دَم بندی ہدم تیری، تیرے قدم اُتے لکے دَم سائیں
تیرے عشق وجود دی بود کولوں، ہوئی ہوش نابود عدم سائیں
محمد شفیع میاں سدیاں کون توہیں، غم خوار جانی ہدم سائیں

ف

فکر تے چنتیاں وِچ جاندی، میری رین خدا دا واسطہ ای
سُکھ سون کولوں دُکھی جان میری، ناہیں چین خدا دا واسطہ ای
ڈابو لین دن رین ایہ نین میرے کراں وین خدا دا واسطہ ای
محمد شفیع میاں گئے چھوڑ مینوں، سکے سین خدا دا واسطہ ای

ق

قدر تیرا کہدا دُوتیاں نوں، جانے جان میری جھڑی چیز ہیں توں
سوہنا حُسن تے خُلق پیار وُلوں، باشعور ہیں توں باتمیز ہیں توں
دلی دِلے دی لُٹ کے گیوں میری، میرا مصر دا خاص عزیز ہیں توں
محمد شفیع فراق دی مرض سندا، نسخہ خاص الخاص تجویز ہیں توں

ک

کون جانے میری مرض تائیں، میرے دکھ دی اے دسو سار کس نوں
آوے نظر نہ کوئی طبیب دل دا، دسے جائی کے نبض بیمار کس نوں
میری طبع بے زار دین یار دسو، بھاوے باغ بہار گلزار کس نوں
محمد شفیع جاں ورت تقدیر گئی، دیسو آئی کے فیر دیدار کس نوں

ل

لوک دشمن ویہڑا جان دوتی، سکھ چھوڑ گئے سریر میرا
سکے ساک مارن دھکے پیاریا او، ویری جان سندا ہویا ویر میرا
جھلے تیری جدائی دے تیر چھاتی، گئی گرد غم دی سینہ چیر میرا
محمد شفیع میاں دکھاں گھیر لئیاں، سکھاں واسطے نہیں خمیر میرا

م

مہر دی واگ ولا میں تے، کدی آ خدا دا واسطہ ای
ساڑ سٹیاں درد جدائیاں میں، ناہیں تا خدا دا واسطہ ای
ساک سین تے بھین بھرا گئے، چت چا خدا دا واسطہ ای
محمد شفیع نہ گنڈ ولا میتھوں، گلے لا خدا دا واسطہ ای

ن

نام تیرا جپاں نام وانگوں، تیری ہوئی کے ہور دا ہون مشکل
پا کے پیار، پریم دی رس پی کے، راتیں ہووندا سکھ تھیں سون مشکل
جھڑے پھٹ کلیجڑے وچ ہوئے، مرہماں نال اوہدا ول ہون مشکل
محمد شفیع میاں درداں باجھ بے شک، ہوندے ہنجوں دے ہار پروں مشکل

ن

ناز نیاز تے مَناں مَناں، نالے کراں مَناں ترلے زاریاں میں
گھر بار تمام نثار تیتھوں، جانی پیاریا او صدقے ساریاں میں
واگ صبر قرار دی چھٹ گئی آ، آئیاں پیش مصیبتاں بھاریاں میں
محمد شفیع میاں سر چان پیاں، سکھ و سدی نوں دُکھ کھاریاں میں

و

واسطے رب دے پا آکھاں، میں تے آ جانی میں آ جانی
گھنبر درد فراق نے گھیر لیاں، لہو لتھڑی نوں بے لا جانی
تیتھوں وک سدائیاں تیریاں میں، لاہی غیر دی حرص و ہوا جانی
محمد شفیع بیمار فراق ہتھوں، بخش وصل دی خاص دوا جانی

و

واہ فراق دی تیز کاتی، گئی چیر چھاتی فریاد اللہ
ہوئیاں مدتاں یار پیارڑے نے، نہیں پائی جھاتی فریاد اللہ
رہندا ورد زبان ہر آن میری، جیوکر اسم ذاتی فریاد اللہ
محمد شفیع میاں بالاں خانقاہیں، دیے جمعراتی، فریاد اللہ

ہ

ہسڑ کے آکھدا روح میرا، شاید یار جانی چت چا بیٹھا
جسدے نال سی دلے دی پریت میری، اوہ تاں ہووے کتے دل لا بیٹھا
رہا آدسی چیت بہار کدوں، میں تاں ہجر تھیں جگر جلا بیٹھا
محمد شفیع میاں ملے یار جانی، ایہو کراں میں نت دعا بیٹھا

لا

لا اکھیں پچھتاوے تھیں، بہتر ایہو جے اکھیاں لاویے نہ
ہووے جان جے سیر نہ جان جوگی، مناں بھار بھارا سرتے چاویے نہ
ہووے خوف جے جان دے جانے دا، چھاتی ڈاہ میدان وچ چاویے نہ
محمد شفیع بن موت قبول کیتے، موتوا قبل دی رمز نوں پاویے نہ

الف

اس پریم دے اوہو لیندے، مزے جان جہاں جاتی جان ناہیں
جہاں جان نوں رکھیا جان کر کے، چھاتی ڈاہ میدان وچ جان ناہیں
پاون مزے پتنگ نہ وصل والے، جاں تک اپنی جان جلاں ناہیں
محمد شفیع میاں گل وصل والی، پناں سیس دتے ہوندى دان ناہیں

ي

یار میرا وفادار سیو، دکھیار تے کرم کمان والا
سکھ تیاگ وراگ دے راگ گاوے، یاری سچ دی پال وکھان والا
ٹلے بال گندائی دا ناتھ رانجھا، میرے واسطے مُندراں پان والا
محمد شفیع ہزارے دا چودھری سی، آج جھنگ وچ چاک سدان والا

ي

یار تائیں لُج یاریاں دی، وفادار وچ جگ سدان والے
تروٹے کھان تے یاری دی لُج پالن، صاحب صدق تے نیک گمان والے
آج کل زمانے دے یار ہوئے، دغا مکر فریب کمان والے
محمد شفیع برکت کلمے پاک سندى، آسین تراں گے حشر میدان والے

ی

یارِ اس عشق مجاز اندر، قدم رکھنا سوکھڑی کار ناہیں
 کچھو رانجھنے تھیں کیوں ورتدی اے، اتھے چاک سدان تھیں عار ناہیں
 مرزا بلخ بخارے دا شاہزادہ، گوہے چُن کولون شرمسار ناہیں
 محمد شفیع ہوئیاں اگم ذاتِ بناں، سوہنے یار دا ملے دیدار ناہیں

ی

یارِ اس عشق مجاز والا، رستا گھائیاں تے دُشواریاں دا
 منزل دُور نہ کوئی ہمراہ ساتھی، وڈا خطرہ چور چکاریاں دا
 آون نظر ناہیں جہاں چین لُٹے، مندا روگ ایہ عشق بیماریاں دا
 محمد شفیع میاں گھنبر گھیر پیاں، تے میں جاندی نہ ول تاریاں دا



☆ ”مجموعہ سی حرفی ہائے پنجابی (قلمی)“۔ صفحہ 1 تا 13۔

☆ حاشیہ از شاعر:

”سی حرفی ہذا بتاریخ 26 ماہ دسمبر 1956ء با اختتام رسید۔ العبد
 ابوالرشید محمد شفیع اختر ڈھانگری۔ دوبارہ تحریر 19 مئی 1957ء
 بمقام اختر منزل۔“

.....

[سی حرفی نمبر 07]

دربابِ عشق



الف

آ پیاریا واسطہ ای، کریں روح ناشاد دا شاد آ کے
تیرے درد فراق ہلاک کیتی، کریں اجڑی جھوک آباد آ کے
آئے ہم ہما کے دکھ میں تے، سکھ لئی دی سُن فریاد آ کے
محمد شفیع میں ہور نہ کچھ منگدی، مٹھے مونہوں کر سخن ارشاد آ کے

الف

آ خدا دا واسطہ ای، تیرے دید سعید دی لوڑ مینوں
سکے ساک تے اُنک سلنگ سارے، جانی پیاریا او گئے چھوڑ مینوں
بھیڑ پی بوہڑیا کوئی بجن، گیا دوستاں دا لہجہ اوڑ مینوں
محمد شفیع میاں تیری نظر باجھوں کسے چیز دی ہور نہ لوڑ مینوں

الف

اسمِ اعظم اسمِ پیارڑے دا، صبح شام ہے ورد زبان میرا
اس اسم توں جسم تے جان واراں، اسے اسم دے وچ دھیان میرا
اسے اسم تے میں صدق دھار بیٹھی، ایہو اسم ہے دین ایمان میرا
محمد شفیع میاں ایہو اسم ذاتی، ساتھی ہووسی حشر میدان میرا

الف

اَساں اسلام تے کفر اندر، وحدت عشق والی یک جا ڈٹھی
اوہو شمس دا پرتوہ وچ ڈرے، جہڑی چمک بر فوق سما ڈٹھی
جلوہ دیکھ کے نظر فریب اُسد، ہوندی فرض نماز قضا ڈٹھی
محمد شفیع میاں اتھے داناں دی، ہوندی ہوش حواس خطا ڈٹھی

الف

اَساں اِس عشق دی تار وچوں، پائی رمز دی راز نیارڑی اے
ڈراں کراں نہ ظاہرا راز مخفی، منصور اُگے بازی ہارڑی اے
رکھے قدم نہ اِس میدان اندر، جسوں اپنی جان پیارڑی اے
محمد شفیع اِس عشق مجاز وچوں، اَساں حق دی بات نثارڑی اے

الف

آؤ آؤ دُور نہ جاؤ دیکھو، شاہرگ تھیں یار نزدیک وسدا
جھاتی پا پک مَن دے وچ مندر، دسے غلط تینوں جہڑا بَن وسدا
دُور جاووناں کوئی ضرور ناہیں، ساہویں بیٹھ ترنجاناں وچ ہسدا
محمد شفیع ڈھونڈے اوہ تاں آپ تینوں، تے توں آپ اُسدے کولوں دُور اُسدا

الف

اَسیں بھلے تیرے نال لا کے، بھلی وار پریت پیاریا او
اَساں لیا آزما جے نہیں ہوندے، جوگی کسے دے میت پیاریا او
ٹساں غمز دے مار کے بان لٹے، رن دلاں دے جیت پیاریا او
محمد شفیع وچھوڑیاں تیریاں دے، ہتھوں گاؤندا گیت پیاریا او

ب

بحرِ غم دے غوطے کھان کارن، میں تاں نال ماہی اُکھیں لا بیٹھی
جہڑے بھار پہاڑ نہ چا سکے، عاجز جان اُتے اوہ چا بیٹھی
ہوئی حُسن دیاں دُور حویلیاں توں، بلی باجھ وچ بلیاں جا بیٹھی
محمد شفیع میاں جان بُجھ کے میں، موہرہ کھا بیٹھی موہرہ کھا بیٹھی

ت

توڑ تھیں ایہ تقدیر پسی، تدبیر دی گئی نہ پیش میاں
سُنی پند نہ وعظ نے اثر کیتا، رہے ہوڑ توڑے سکے خویش میاں
ہووے کسے دے کہے تھیں زبر ناہیں، نال قاعدے دے جتھے پیش میاں
محمد شفیع میں تاں مشہور ہوئی، دلریش زخمی درویش میاں

ث

ثابتی عقل دی رہے کتھے، جتھے عشق ہووے پھیرا پا جانڈے
مالک ملک تے فوج خزانیاں دے، چت تخت تے تاج تھیں چا جانڈے
پھلاں وانگ جانن بدنامیاں نوں، تج لُج تے شرم حیا جانڈے
محمد شفیع جو یار دے ہو جانڈے، چھوڑ اوہناں نوں بھین بھرا جانڈے

ج

جاگدیاں جاوندی رین ساری، تارے گندیاں ساس مریندیاں او
اوہدیاں سابقہ لطف مروتاں نوں، رکھ سامنے یاد کریندیاں او
مرا جگر ضعیف خفیف ہويا، تیرے ہجر دا درد جریندیاں او
محمد شفیع میاں عمر بیت جاسی، اُلھے عشق دا گھاہ بھریندیاں او

ح

حکم ڈاڈھا حضرت عشق سندا، اتھے کون جو نہ فرمان مئے
منتظر حاکم جسدے حکم سندے، اُسدا حکم زمیں آسمان مئے
جسدے بخت اوڑے ہون اوہو، کہیا عشق دا نہ بے سامان مئے
محمد شفیع جسدے طالع ہون چنگے، حرف عشق دے وانگ قرآن مئے

خ

خودی غرور نہ رہے اتھے جتھے عشق ہووے تشریف رکھدے
منصور وانگوں چڑھن سولیاں تے، جہڑے عشق پریم دی رس چکھدے
شمس بازغ وانگ پچھان لیے، توڑے ہون بیٹھے سوہنے وچ لکھ دے
محمد شفیع محبوب دے نام باجھوں، اوہ تاں نہیں پلے کجھ لکھ رکھدے

د

دار اُتے منصور ہووے، گل حق دی صاف سنا دتی
فاتح خیبر دے لاڈلے حق چکھے، وچ کر بل جان کوہا دتی
یکی رکھ دتا گاٹا پیٹھ چھری، دوجے گائے تے چھری چلا دتی
محمد شفیع رضا تے ہو راضی، بازی عاشقان جان دی لا دتی

ذ

ذکر کراں سچیاں جہڑے، جنہاں توڑ نبھائیاں یاریاں نی
صدق دھار تلوار دی دھار اُتے، جاناں جنہاں نے پیش گزاریاں نی
رتی لگا نہ داغ خلیل تائیں، کھڑے پھل ہو گئیاں انگاریاں نی
محمد شفیع ایوب نوں پئے کیڑے، رہیاں فر بھی شکر گزاریاں نی

ر
رکھ کے صدق یقین کامل، عاشق عشق دیاں منزلاں طے کردے
پاندے اوہو نے رمز محبوب والی، جہڑے اپنی جان نوں بچ کردے
پاندے اوہو نے رمز محبوب دی نوں، جہڑے نہیں اپنی اتھے رے کردے
محمد شفیع محبوب دے دید باجھوں، طلب ہوو ناہیں عاشق شے کردے

ز
زار تے خوار بیمار کیرے، عاشق نہیں ہوندے دنیا دار لوکو
سکھاں نال نہ لگدی عاشقاں دی، تاہیں رہن سدا دکھیار لوکو
نقد جان نوں تلی تے رکھ ٹردے، پلے پنھنہ درہم دینار لوکو
محمد شفیع پر عشق دے راہ اندر، ٹرنا نہیں کوئی سوکھڑی کار لوکو

س
سل فراق دا جھل سینے، سستی پھرے تسی فریاد اللہ
قیدی کچج دے زلف دے پیچ اندر، چھوڑ بیچ نسی فریاد اللہ
ماری عشق دے جھل نے تھل بھالے، اوہدے نہیں دسی فریاد اللہ
محمد شفیع جو عشق دی چھری گٹھی، اوہ کد سکھ وستی فریاد اللہ

ش
شورشاں جگ دیاں غوغیاں تھیں، عاشق ہٹ کے رہن ہمیش میاں
توڑے ہون سلطان زمانیاں دے، کرن گزر جیوکر درویش میاں
اٹھے پھر دلدار دی پاک صورت، کعبہ جان کے رکھدے پیش میاں
محمد شفیع محبوب دیاں کتیاں دے، قدم پھمن عشاق داکیش میاں

ص

صابری ہون ایہ لوگ جہڑے، اُکھیں نال وِلدار دے لا بہندے
ہووے جان خفیف نحیف توڑے، سر تے بھار پہاڑاں دے چاہندے
جتھے جان شبیر دلیر ضیغم، اوتھے جا ایہ جھگیاں پا بہندے
محمد شفیع میاں جانی یار چکھے، عاشق جان سندی بازی لا بہندے

ض

ضرب نگاہ محبوب دی تھیں، مضروب ایہ پاک ضمیر ہوندے
منزل صدق والی اوہو طے کردے، جہڑے اصل تھیں نیک خمیر ہوندے
بناں دسیاں آپنا آپ دسن، جہڑے عطر پھلیل عبیر ہوندے
محمد شفیع خلوص دی لوڑ اتھے، چاپلوس نہیں لوک فقیر ہوندے

ط

طبع آزمیش دے کان ناہیں، کم لکھنا شعر فقیر دا اے
لگا روگ بجوگ دا وِج سینے، دل پھلّیا جگر دے تیر دا اے
مرہم پھٹ تے چوہیں سکھاوندی اے، ایویں شعر نسخہ اکسیر دا اے
محمد شفیع ناشاد آزاد ظاہر، قیدی یار دی زلف زنجیر دا اے

ظ

ظلماتاں ہون کافور اوتھوں، جتھوں چانناں عشق دے نور دا اے
نخن اقرب تھیں دسدا یار نیڑے، سانوں دسدے نیں پینڈا دُور دا اے
تیرے وِج وجود دے طور مخفی، اتھے فرق ناظر منظور دا اے
محمد شفیع کر ظاہرا راز مخفی، ہونا خوار کم اُس بے شعور دا اے

ع

عرب تے عجم دے وچ سارے، حضرت عشق ہوراں دُھاں پائیاں نیں
دُھئی خلق ساری زمیں بوس ہوندی، جہڑی طرف شاہاں واگاں چائیاں نیں
قیصر روم فغفور وچ خادماں دے، شاہیاں شان وچ یاد نہ آئیاں نیں
محمد شفیع جانے ابراہیم ادھم، لذتاں عشق ہتھوں جہڑیاں پائیاں نیں

غ

غماں وچ کھاوندی جان غوطے، گیا نس قرار وجود وچوں
پایا باجھ زیان نہ سود کسے، نفع ملے نہ کسے بارود کولوں
سکھ لٹ لے جان انجان بن کے، غمزے حُسن دے دل محمود کولوں
محمد شفیع ریاضتاں وچ گالی، جان کچھ جا شیخ مسعود کولوں

غ

غم اندوہ تھیں عاشقاں دا، زنگ کبر غرور دا دُور ہوندا
وحدت یار دی مادی عین چمکاں، جتھے دوئی دا نہیں دستور ہوندا
جیکر عشق دا جام نہ نوش کردا، مشہور نہ شاہ منصور ہوندا
محمد شفیع ایہ عشق دا شوہ ڈوگھا، باجھ صدق دے نہیں عبور ہوندا

ف

فائدے عشق دے اوہو جانن، جہاں عاشقاں جام ایہ نوش کیتے
جوش عشق تھیں رہے نہ ہوش قائم، دھن مرد جس سر سرپوش کیتے
رَبّ آرئی دی جہاں پکار کیتی، اُپر طور پہاڑ بے ہوش کیتے
محمد شفیع ہک عرش مجید اُتے، سد فرش تھیں ہم آغوش کیتے

ق

قدمِ اسِ راہ تے اوہ دھردے، صرفہ جان دا نہیں منظور جہاں
یا فرِ عشق دے ناگ نوں اوہ چھیڑن، نہیں عقل، دماغ، شعور جہاں
ڈیہوں عشق دا اوہ لڑان ناہیں، درد جھلن دا نہیں مقدور جہاں
محمد شفیع میں اپنی کے دساں، آون نظر نہ کیتا مسور جہاں

ک

کرم مڈھوں جسدے ہون چنگے، نگر عشق دے اوہ پیر پاوندا نہ
رکھے دے نوں وچ حفاظتاں دے، لعل قیمتی کتے کھڑاوندا نہ
سیو اوہ سکھیا رڑا جگ اُتے، جہڑا بھل کے دل کتے لاوندا نہ
محمد شفیع میاں میرے وانگ اوہ تاں، ساری عمر دا روگ مناوندا نہ

ل

لاڈ لڈان کجھ ہور دسدے، موہرا عشق دا کھان کجھ ہور ہوندا
چڑھ سولیاں تے منصور وانگوں، انا الحق کہان کجھ ہور ہوندا
اکھیں لان تے سوکھیاں ہون پہلوں، اپیر گن پڑان کجھ ہور ہوندا
محمد شفیع میاں عزت بیگ وانگوں، مہینوال سدان کجھ ہور ہوندا

م

مرد اوہو جہاں درد جھلے، مکھ زرد فقیراں دے حال پھردے
جی طلب والے جہڑے ہون طالب، مطلوب کارن پائمال پھردے
نہ اوہ کرن سوال نہ جھول اڈن، بکّل مار جنوب شمال پھردے
محمد شفیع میاں خضر عشق دے ایہ، کارن آب حیات زلال پھردے

ن

نخس تے سعد دی بحث کہی، کرو گل محبوب رنکیلوے دی
جسدے غمز دی رمز ہے تیغ خونی، کرو گل کوئی اُس رسیلوے دی
اُسدے حُسن دے نین غزل قاتل، میں بھی گُٹھیاں اُس سجیلوے دی
محمد شفیع میں اُسدی جگ سَدی، مینوں رہی نہ لوڑ قبیلوے دی

ن

نانگ ایہ عشق دا دَنگ کردا، پھرے راہ پردیاں جانیاں نوں
کسے نال ایہ ترس نہ کرے ظالم، نہ ایہ چھڈا ایساں ماندیاں نوں
سستی اسے دے غم تھیں موئی تسی، کوئی اُپڑیا نہ ہاڑے پاندیاں نوں
محمد شفیع دتی شیریں جان شیریں، بنے لائے نہ غوطے کھاندیاں نوں

و

واہ اس عشق دے راہ نیارے، کتے قیس دے وِچ لباس وِسدا
کتے دھوبیاں دے دے گھاٹ اُتے، کتے سستی دی وِچ پیاس وِسدا
کتے جٹ تھیں چٹ صفا جوگی، کتے ہیر دے وِچ ہراس وِسدا
محمد شفیع میاں کتے وِچ ڈرے، کتے ہو خورشید اکاس وِسدا

و

وِچ تقدیر قدیر دے سی، دُکھ جالناں درد جدائیاں دا
دے بچن دا رول نہ مُول کوئی، جنگل بھون معمول سودائیاں دا
کیسا عشق محبوب دے نشر مینون، جگ مار کے ڈھول بھرائیاں دا
محمد شفیع خریدیا آپ ہتھیں، مہنا ہیر دے ہار خدائیاں دا

۵

ہٹیاں تے اِس عشقِ سندی، مِلدی نہیں دوا ہے کا مائے
افلاطون خاموش بقراط ساکت، آکھن مرضِ ایہ لا دوا مائے
بوعلی سینا لقمانِ رازی، تیتے گئے نہ کجھ فرما مائے
محمد شفیع مریض میں عشقِ دی ہاں، میرے حقِ منگ نیک دعا مائے

۵

ہو غیریتاں دُور جاوَن، جتھے عشقِ تشریف شریف لیاوے
پون پرتوے عشقِ دے جس جائی، ظلمتِ دوئی سندی اوٹھوں اڈ جاوے
پاکِ عشقِ تے سُن داساکِ مُڈھوں، ناکس کون جہنوں نہ ایہ جوڑ بھاوے
محمد شفیع پر دلاں دے ملک اندر، عقلِ خام نہ کسے دی گانج آوے

لا

لکھ ادراک تے عقلِ والے، دانے عشقِ دی کنہ نوں پاوندے نہ
جھنڈے عشقِ دے جس مقامِ چھلن، اوٹھے عقلِ ہو ریں دُردے جاوندے نہ
تر کے ندی فناہ دی جان اوکھی، عاقلِ جان سندی بازی لاوندے نہ
محمد شفیع میاں عاشقِ مردِ غازی، موئے باجھ بہشت نوں پاوندے نہ

الف

اِس میدانِ وچ آن کے تے، لگھاں شاہِ اُسوار ہر بھار ڈُگدے
والی ملک دے شاہِ ولایتاں دے، تختوں خاک اُتے شہریار ڈُگدے
”میں، تُوں“ دس کون کہان والے، ڈٹھے اُساں اتھے تاجدار ڈُگدے
محمد شفیع جہڑے ثابت قدم عاشق، اتھے اوہناں دے نہیں راہوار ڈُگدے

ی

یار مجاز دی آز اندر، کہڑا فائدہ جان گنواونے دا
صدق صدق یقین تھیں پا موتی، ایہو فائدہ زُہد کماونے دا
کامل پیر دی نظر اکسیر کولوں، سکھ دل سونا بن جاونے دا
محمد شفیع پر اوہو مراد پاوں، جہاں سکھیا آپ گنواونے دا

ی

یَم ایہ غم محبتاں دا، جس وچ لان سچے عاشق تاریاں نی
اٹھے پہر سر قہر دلریش عاجز، کردے درد فراق تھیں زاریاں نی
خوشی سوگ تھیں ہو الگ بیٹھے، رہیاں یاد ناہیں دنیا داریاں نی
محمد شفیع میاں انہاں عاشقاں نوں، اللہ پاک ولوں برخورداریاں نی



☆ ”مجموعہ سی حرفی ہائے پنجابی (قلمی)“ - صفحہ 27 تا 38۔

☆ حاشیہ از شاعر:

”از بندہ میاں محمد شفیع اختر ڈھانگروی چشتی حیدری۔ بتاریخ

8 ستمبر 1957ء۔“

[سی حرفی نمبر 08]

فراقیہ بہ درد و سوزِ عاشقانہ



الف

اوہ ہوئی میرے نال یارو، جہڑی کسے دے نال ہوئی ہوئی
میرے جیہی نہ کسے دی اکھ یارو، وچ درد فراق دے روئی ہوئی
دُکھ بھوگ سینسار وچ ہوگ شاید، جہڑی سُنکھ متی تے زروئی ہوئی
محمد شفیع دے سُنکھی جگ سارا، میرے وانگ دُکھی کوئی کوئی ہوئی

ب

بری جدائی دے تیر ظالم، ہون کسے دے سینوں پار نہ ایہ
شالا درد فراق دے زخم اُلھے، کرے کسے دے جگر تلوار نہ ایہ
منصور جے راز مستور رکھدا، ہوندا کدے یارو سر دار نہ ایہ
محمد شفیع سنبھل سنبھل پیر رکھیں، خارزار ای ایہ، لالہ زار نہ ایہ

ب

باغ بہار گلزار اندر، کردی ناز پھردی مستوار بلبل
پھلاں نال پریت امیت جوگی، جانے خزاں دے نہیں اَسرار بلبل
کسے وقت ایہ رخت لٹا بیسی، جہڑا حُسن دا گرم بازار بلبل
محمد شفیع بھُل جان گے ایہ نغمے، جدوں بجی فراق دی تار بلبل

ت

تغ فراق دی تیز خونی لخت لخت یک لخت سریر کردی
جہاں عاشقاں دے ہوندے بخت کھوٹے، مُوندھے اوہناں دے تخت سریر کردی
کردی جگر دے وِچ شگاف ڈونگھے، نہ تدبیر ایہ مرہم جبر کردی
محمد شفیع تقدیرِ قدیر والی، ناہیں فرق وِچ شمر شبیر کردی

ث

ثابتی صبر دی بات گُوڑی، کراں وین میں گلی بازار پھردی
دُکھی زار بیمار لاچار عاجز، باجھ یار جانی دل فگار پھردی
کھلے وال پیراگناں ہار میرے، خاک بیز جامہ تار تار پھردی
محمد شفیع وراگ دے راگ گاندی، میں تاں صبر لٹی ٹرٹی تار پھردی

ج

جال جدائی دے ڈال مینوں، کھڑے پاس گیا جانی یار دسو
جسدے درد فراق ظہیر کیتی، اس پیارڑے دی خبر سار دسو
کدن تیک رکھاں انتظار اُسدی، کدوں ہوگ سوہنا آونہار دسو
محمد شفیع میں ہاں تابعدار جسدی، سیوا دار جسدی اوہ دربار دسو

ح

حال دوبایاں وِچ جاندی، میری غماں دی رین فریاد اللہ
میریاں دیدیاں درد رسیدیاں نوں، کدوں ملے گا چین فریاد اللہ
میری جان تے غماں دی دھاڑ ترٹھی، ڈابو لین ایہ نین فریاد اللہ
محمد شفیع جدایاں خوب ناہیں، فی مابین اخوین فریاد اللہ

خ

خون جگر پیندے ہجر اندر، یارو عجب خوراک ہے عاشقاں دی
اشک ریز تے خون آمیز سدا، رہندی اکھ نمناک ہے عاشقاں دی
سادے سدا میثاق دے روز کولوں، ناہیں عقل چالاک ہے عاشقاں دی
محمد شفیع اس بحر عمیق اندر، ہوندی جان ہلاک ہے عاشقاں دی

د

درد ہتھوں ہوئی زرد دیہی، میریاں لبیاں تے سرد اوساس رہندے
جہڑے لا بہندے اکھیں نال ماہی، میرے وانگ اوہ نت اُداس رہندے
رہندی کاسدی پیاس بے آس تائیں، جیکر یار جانی میرے پاس رہندے
محمد شفیع چھڈ کام کرودھ بیٹھے، جہدے نام تیرا تیرے داس رہندے

ذ

ذکر تیرا صبح شام مینوں، جپاں نام وانگوں نت نام تیرا
ہر آن ایہ جان غلام حاضر، خدمتگار غریب مدام تیرا
دُکھاں نال توڑے رہیا جال آپوں، مینوں لوڑ ہے نت آرام تیرا
محمد شفیع کد تک تشنہ کام رہساں، کرنا کام ناکام دا کام تیرا

ر

رَب غریب نواز سائیاں، مستجاب کیوں نہیں ہے دعا میری
بخش اپنے فضل تے کرم کولوں، کر کے خاص عطا خطا میری
یا غفور کر معاف قصور میرا، تے منظور کر لے التجا میری
محمد شفیع سپدھار چودھار اندر، تیرے باجھ دربار نہ جا میری

ذ

زِر پلے ناہیں زور باہیں، کچھ پاس ناہیں بناں زاریاں دے
آہیں درد فراق تھیں مادی میں، مندے روگ ایہ عشق بیماریاں دے
متے کتے پیارڑا نظر آوے، بوہے کھول بہندی نت باریاں دے
محمد شفیع رہی ساری عمر سادی، آئے ڈھنگ ناہیں دنیا داریاں دے

س

سُود زِر دا مقصود ناہیں، تیرے دید دی عید موجود منگاں
ہوئے سکھ مفقود وجود وچوں، رستہ درد والا مسدود منگاں
ہجر طول تھیں جان ملول میری، تیرا وصل وصول محمود منگاں
محمد شفیع میاں دنیا لوڑ ناہیں، جنت عشق دے وچ خلود منگاں

س

سکھ سواد جہان والے، کھڑے جانیاں لٹ فراق تیرے
شفقت خاص کر پاس بلا مینوں، روندے پھرن درویش مشتاق تیرے
تیرا چھوڑ دروازہ جان کتھے، سینہ چاک غمناک عشاق تیرے
محمد شفیع لٹ دے دیاں دولتاں نوں، کھڑیا ظالماں حسن قزاق تیرے

ش

شاد کد طبع ناشاد ہوسی، دُکھی رون اکھیں دن رین پٹیاں
آکھو جا رنگیلوے یار تائیں، تیر باجھ دُکھیار بے چین پٹیاں
ٹھلے رہن نہ نین نمازنی دے، ہنجوں خون جھلارے وہن پٹیاں
محمد شفیع میاں ساک سین سیتاں، مینوں چھوڑ گئیاں کردی وین پٹیاں

ص

صبر صبوریاں دُور ہوئیاں، دسو صبر کتھوں وِچ دُوریاں دے
بھڑ کے اگ فراق دی وِچ سینے، جھلکے پئے جنیوں وِچ تندوریاں دے
جتھے عشق شریف تشریف لیائے، ڈیرے دُور اوتھوں مغوریاں دے
محمد شفیع کد ہوگ مہجور یارو، حاضر یار دیاں وِچ حضوریاں دے

ض

ضرب کھادی جہاں عشق والی، اوہ تاں نہیں آرام دی نیند سوندے
راخجے ہار وِلدار دی بھال اندر، جنگل بار بیلے نت رہن بھوندے
بیلی باجھ حویلی کھان ڈھکی، نیناں وچدوں جگر دا خون چونڈے
محمد شفیع تسکین نہ عاشقاں نوں، بے دل ہوئی کے دِن رین روندے

ط

طور زمانے دا ہور ہويا، کردے غور ناہیں جانی پیار والے
صبح ہور تے شام کجھ ہور ہوندے، برق پاش اکھیں شعلے نار والے
وفاداریاں خواب خیال ہوئیاں، پنجن خار ہو پھل بہار والے
محمد شفیع آج اکھیاں پھیر بیٹھے، جہڑے یار آہے اعتبار والے

ط

طرف پیارے دیوں شرف مینوں، بکو حرف میں ہور توں ہور ناہیں
جے کر وچلی گل دی لوڑ کریے، تاں فر سادھ سارے کوئی چور ناہیں
گڈی اڈدی وِچ ہوا دے کیا، وِچ ہتھ کھڈا رواں ڈور ناہیں
محمد شفیع سوہنے بے نیاز ہوندے، نال ڈاڈھیاں دے چلے زور ناہیں

ط

طلب تیری کولوں ہارساں نہ، جاں تک وِچ وجود دے جان باقی
تیرا عشق موجود وجود اندر، جاں تک ہین زمیں اُسمان باقی
میری قلم تھیں تہنڈڑے عشق ہتھوں، رہسی کاغذاں وِچ بیان باقی
محمد شفیع میاں زندہ عاشقاں دا، رہسی وِچ آفاق نشان باقی

ظ

ظلم معشوق دا سہن عاشق، ڈردے سی نہ کرن خاموش رہندے
سرتے چلن آرے فر بھی کہن آرے، بارے جوش اندر ثابت ہوش رہندے
منڈی عشق دی سراں دے ٹلن سودے، عاشق وصل کارن سرفروش رہندے
محمد شفیع چناب وِچ لان تاری، دُکے عاشقاں دے نہیں جوش رہندے

ظ

ظلم کردے ظالم نین تیرے، مارن اکھ وِچ رکھ بندوق اوہ تاں
سُنن گُوک فریاد نہ عاجزاں دی، ہوئے جگ معروف معشوق اوہ تاں
جہاں سمجھ لئی رمز غمز والی، رکھن عشق دا راز صندوق اوہ تاں
محمد شفیع عشاق مملوک عاجز، تے مانوق نوری مخلوق اوہ تاں

ع

عرب تے عجم عراق اندر، پی اس فراق دی ڈنڈ یارو
جانے جان حزن غمگین میری، کیتی ہجر جہزی میرے ونڈ یارو
اکھیں خون تے حال زبون مند، گئی روندیاں دی عمر ہنڈ یارو
محمد شفیع میاں ہوندے وس میں تاں، کرساں یار ولوں ناہیں کنڈ یارو

ع

عشق دا اوہ مقام بالا، جتھے کفر اسلام دی جا ناہیں
عین شین تے قاف توحید کامل، جتھے غیر سکے جھاتی پا ناہیں
اُچے مرتبے عاشقاں صداقتاں دے، وچ غیر دلیل دوڑا ناہیں
محمد شفیع ڈر کفر دیاں فٹوایاں تھیں، اس راہ تھیں قدم ہٹا ناہیں

غ

غم محبوب دے وچ رہناں، دم دھاریے پیت نوں ہاریے نہ
جند نظر گزارے سونیاں دی، سروں پریت دا بھار اُتاریے نہ
حاصل ہوناں عشق دا راز مشکل، جاں تک مَن نوں اپنے ماریے نہ
محمد شفیع میاں صنعان وانگوں، حُک ساہنیاں دے جاں تک چاریے نہ

ف

فکر چنتے دل تے ہوئے غالب، سُنکھی سون والی گل دُور دے
عاجز جان ناتان کمزور میری، مشکل آب چناب عبور دے
بھاویں کرو خطاب عتاب کر کے، میرے وچ جے کچھ قصور دے
محمد شفیع مریض جدائیاں دا، جان کہاں تے درو رنجور دے

ق

قال دی قال دا فائدہ کیہ، گلی حال والی جھاتی ڈال میاں
وحدت والڑے پیالڑے مست ہو کے، ہور چھوڑ دے غیر خیال میاں
بُرمہ پیوناں کیہ دنیا داریاں دا، عزت جاہ تے چاہ نہ مال میاں
محمد شفیع وچ قلب دی کوٹھڑی دے، دیوا شوق پریم دا بال میاں

ق

قفل زنجیر اسیر کیتی، رہی بے تدبیر تدبیر میری
زندہ باد محبوب دی زلف کالی، قیدی ہوناں سی تقدیر میری
بخشی جائے خدا دے واسطے چا، نین جوڑنے دی تقصیر میری
محمد شفیع میاں سچے عشق اُتے، جائے لگ براند اخیر میری

ک

کون ایسا ہمدرد میرا، جہڑا یار دی خبر لیا دے
کہڑے حال تے پیارڑا جا کہڑی، کرے کے پتا پورا مینوں آ دے
وَر تے خُلق محمدی نال میرے، مینوں نال لے جا اوہ جا دے
محمد شفیع اوہ رُٹھرا ڈھول میرا، گلاں نال ولا لیا دے

ک

کبر ہنکار غرور سارے، حضرت عشق ہوراں بھن پُور کیتے
حرص لو بھ تے کام کرودھ کینہ، سینے عاشقاں دے وچوں دُور کیتے
پیا شمس دا پرتوہ قمر اُتے، چٹے چاننے چکن دے نُر کیتے
محمد شفیع میاں پیاں جگ دُھماں، پیالے شوق دے نوش منصور کیتے

ل

لبھدی بھراں انوار تیرے، کتھے جائی کے پٹھکاں پائیاں فی
تیرے دَرس دیدار نوں ترس رہیاں، کریں ترس ایہ کیہ دل تے لائیاں فی
سَد کول تیتھوں صدقے گھول گھتی، کاہنوں دَس خصومتاں چائیاں فی
محمد شفیع تیرا قدم بوس عاشق، پائیاں جس دے نال جدائیاں فی

م

ملک املاک تے مال مایہ، حاضر جان اُگوں بھاویں جان نہ توں
تابعداریاں وِچ لنگھ عمر گئی، فر بھی سوہنیاں کریں دھیان نہ توں
رکھ اپنی وِچ غلامیاں دے، بھاویں نظر اپنی تلے آن نہ توں
محمد شفیع صدقہ بندہ پروری دا، میرے دے دا کریں زیان نہ توں

م

مَنگ رہی اللہ پاک کولوں، تیرا پاک دیدار دلدار ہر دم
عاجز جان ظہیر فقیر دی اے، مَنگاں آپ دی مہر سرکار ہر دم
رہی دُور میں بت حضوریاں تھیں، مجبوریاں وِچ لاچار ہر دم
محمد شفیع دُکھ پیش دلریش تائیں، تیری خیر دا خیر درکار ہر دم

ن

نظر ناہیں آوے یار جانی، جس دے نال ہے دلوں پیار میرا
دسو کتھے اوہ ماہ انوار سوہنا، جس نے لُٹیا صبر قرار میرا
کہڑے دیس جا کے تنبو لا بیٹھا، جس دے باجھ ہے روح بے زار میرا
محمد شفیع میں روگ جدائیاں دے، عامان نہیں معلوم آزار میرا

و

واگ وِلاوتاں واسطہ ای میں تے ماریاں یار وِراگ تیرے
دَنگن دھاوندے جان غریب دی نوں، کالے درد فراق دے ناگ تیرے
گانواں راگ وِراگ دے دے راتیں، لیاندی کہاں تے جان وِراگ تیرے
محمد شفیع جدائیاں پوندیاں نہ، ہوندے ازل تھیں جے چنگے بھاگ تیرے

و
وچ فراق محبوب تیرے، بیٹھی گنج لٹا تسکین دے میں
پردے چاک ہو وچ ہوا اُڈدے، عزت نگ ناموس تمکین دے میں
گوش ہوش تے کراں قبول کیونکر، ناصح حرف تیری تلقین دے میں
محمد شفیع اس ماہ جبین ہوندے، جلوے لوڑ نہ ماہ مبین دے میں

۵
ہک پس خوردیوں بخش جُرمے، جس نوں آکھدے وصل دا جام ساقی
آئی لباں تے جان سکندیاں دی، تشنہ کام تے کرو اکرام ساقی
ایسا بخش دو آتشہ جام مینوں، رہاں مست بے ہوش مدام ساقی
محمد شفیع میاں جاری نزع ویلے، ہووے لباں تے تھنڈا نام ساقی

لا
لاونے تے پچھتاوے تھیں، بہتر ایہ جے اکھیاں لاویے نہ
بھارا عشق دا بھار پہاڑ جیڈا، بادر اپنا ویکھ کے چاویے نہ
نال صبر دے بھٹ گزار لیے، گلی سونیاں دی پھیرا پاویے نہ
محمد شفیع رکھ دے دی سانجھ دولت، ظالم نیناں دے ہتھ مہاویے نہ

الف

اس بازار وچ آئی کے تے، سودے دلاں دے سیراں دے نال ٹلدے
سمرقند بخارے دے نال یارو، گل عارض محبوب دے خال ٹلدے
نافہ ختن تے سنگ کستوریاں دے، اودھی زلف دے کالڑے وال ٹلدے
محمد شفیع اس حُسن دی وچ منڈی، ڈٹھے مشتری سنگ دلال ٹلدے

ی

یاد محبوب دی عاشقاں نوں، ہوندی خاص الخاص غذا میاں
غافل یار دی یاد ہوونے نوں، جانن فرض نماز قضا میاں
دید یار دا عید ہے عاشقاں دی، دُکھی دلاں دے لئی شفا میاں
محمد شفیع توحید دی گل کیتی، پردہ عشق مجاز دا پا میاں

ی

یار جس نال پیار میرا، جس توں جان قربان نثار میری
آیا پیار دے نال اوہ پیش میرے، کیتی عرض اس گوش گزار میری
مٹھے مونہوں ایہ سخن ارشاد کیتے، شالا ٹٹے نہ پریم دی تار میری
محمد شفیع سائیں تیرے باجھ ناہیں، کسے ہوو دے نال گفتار میری

ی

یار اوہ مٹھڑے سخن جس دے، شیر شہد تے قند نبات کولوں
جیں دے دید دی عید برات یارو، منگاں رب مجید دی ذات کولوں
جیں دا دید ہے عین حیات میری، جس دا ہجر نہ گھٹ ممات کولوں
محمد شفیع کونین دے نفعے حاصل، میں غریب نوں جس دی ذات کولوں



☆ ”مجموعہ سی حرفی ہائے پنجابی (قلمی)“ - صفحہ 46 تا 59

☆ حاشیہ از شاعر:

”از بندہ احقر العباد میاں محمد شفیع اختر ڈھاگرو دی حال کیش

اوور سیر دو مئی - 24-09-1957“ -

[سی حرفی نمبر 09]

بہ مناقب و فراقیہ جناب قبلہ والد ماجد میاں محمد عظیمؒ

خلف اکبر میاں سید محمد چشتی حیدری مرحوم و مغفور



الف

آج اوہ آوندے نظر ناہیں، جہڑے دِلوں آہے درد خواہ میرے
جیکر سچ کچھو میرے دِلے کولوں، سچ مچ دے سَن بادشاہ میرے
میری کس نوں آج اڈیک ہوسی، گئی ویکھدے سَن جہڑے راہ میرے
محمد شفیع اوہ خیر دا خیر میرا، آہے منگدے شام پگاہ میرے

الف

آہے یارو قبلہ گاہ میرے، اللہ والڑے خوب خصال والے
دائِم قائم بالیل والنہار صائم، دُور مال کولوں صاحب حال والے
سینے عشق دی بھڑکدی نار آہی، گُٹھے حیدری تنغ جمال والے
محمد شفیع جلالپور شریف اندر، حضرت صاحب جو با اقبال والے

الف

اللہ اللہ سبحان اللہ، کیسا آپ تے کرم کمال ہویا
جہڑا پیر دا یوم وصال ہے سی، اوہو آپ دا یوم وصال ہویا
اس نوں آکھدے خوب براند لگی، کیہا نیک سعید مال ہویا
محمد شفیع ”چھیویں، چھیویں پُچن“،⁽¹⁾ دی سی، ”تیراں سوٹھہتر“،⁽²⁾ ہجری سال ہویا

الف

اس جہان دا نام مڈھوں، رکھن والڑے دارِ فناہ رکھیا
 باجھوں رت دی ذات دے کون کوئی، جس نے موت والا ناہیں جام چکھیا
 آوے موت دی واٹ درپیش اُس دے، مَنگے بھیک یا اُس سرتے تاج رکھیا
 محمد شفیع کر روح پرواز جاندی، ملک الموت نوں کسے نہ روک رکھیا

ب

برگ ساوے پیلے ہو ڈھٹھے، جھلی موت دی خزاں گلزار اندر
 آون نظر نہ پھل گلاب تازے، گئے رُل اوہ خاک مزار اندر
 ڈھنگر خشک جیوکر رکھے رُکھ دِن، پتہ پتاں دا ملے نہ خار اندر
 محمد شفیع میاں قبلہ گاہ باجھوں، آوے جی نہ مَول قرار اندر

ت

تُساں کولوں اُجی جی⁽³⁾ میں تاں، لے اجازتاں گھروں سدھایا نہ
 مَتے تُساں نوں کجھ تکلیف ہووے، جاندی وار میں تُساں جگایا نہ
 بے نصیب دے نال اخیر ویلے، سخن تُساں ارشاد فرمایا نہ
 محمد شفیع تساڈڑا دست شفقت، چُم اُکھیاں نال لگایا نہ

ث

ثابتی صبر دے وِچ پورے، آئے پا سروپا منظوریاں دے
 حضرت صاحب دے خاص درویش آہے، ٹوپی پوش بانے جیوں نوریاں دے
 رہیا فخر تھیں دُور فقیر چشتی، کیتے جام نہ نوش مغروریاں دے
 محمد شفیع مسکین محمدی نوں، ملن حشر وِچ پاس حضوریاں دے

ج

جان اُس حیدری شمع اُتے، کیتی وانگ پتنگ نثار آہی
حیدر پیر دے گل گلزار اُتے، عندلیب ایہ تاں نغمہ بار آہی
صاحب ہوش خاموش سر پوش مخفی، کیتی عشق دی گوش گفتار آہی
محمد شفیع میاں سچے عشق والی، سدا کھڑکدی دے دی تار آہی

ح

حیدری حُسن دی تیغ یارو، موتوا قبل دا جام پلایا سی
پردہ غیر دقیق رفیق دل دے، پہلے روز ہی دُور کرایا سی
نال زاریاں کم آزاریاں دا، حضرت عشق نے سبق پڑھایا سی
محمد شفیع ”محمد عظیم نوری“ ہاتھ غیب تھیں بول سنایا سی

خ

خواجہ غریب نواز چشتی، حیدر غوث دے خاص مرید آہے
اس پردے دست رشید ہتھوں، کیتے جام توحید نوشید آہے
کھا کے عشق دی ضرب شدید سینے، کردے ذوق مافوق تجدید آہے
محمد شفیع میاں والد صاحب قبلہ، عین عشق دی خاص تمہید آہے

د

دُکھ فراق دے جانے نوں، چکھے رہ گئی جان ظہیر میری
رہے ٹھلیا نیر نہ اکھیاں دا، جاندی پیش نہ کوئی تدبیر میری
صورت حال دی دسنے نہیں جوگی، چھاتی چیر گھتی غم دے تیر میری
محمد شفیع میاں رتی نہیں چھڈی، رتن ہجر نے وچ سریر میری

ذ

ذکر تے فکر دی وِچ منزل، دیوا شوق پریم دا بال آئے
ضرباں مار کے نفی اثبات دیاں، کھید عشق دی خوب دھال آئے
صاحب درد تے سوز گداز والے، پا حیدری رمز کمال آئے
محمد شفیع اوہ اپنے وقت اندر، وِچ جگ دے بے مثال آئے

ر

رہے سدا وِچ صابری دے، ضبط نفس تے مرد فقیر آہے
کم گو خاموش درویش پورے، نالے شرم دی پاک تصویر آہے
دنیا داریاں دلوں و ساریاں سُن، بدھے عشق دی زلف زنجیر آہے
محمد شفیع میاں قبلہ گاہ میرے، بے نظیر آہے بے نظیر آہے

ز

زید تے بکر دی بحث اندر، گنگ آپ دی پاک زبان آہی
پیا پرتوہ عشق دا قلب اُتے، اتھے عقل دی کس پچھان آہی
جس روز دی حیدری چمک دُٹھی، مویٰ وانگ اوہ اکھ حیران آہی
محمد شفیع اس پاک وجود اندر، گکھی عشق دی تیج تھیں جان آہی

س

سدا زبان تے ذکر جاری، حیدر پیر کامل بے نظیر دا سی
گُٹھے نیم بسمل وانگوں ترفندے سن، مزا چکھیا واہ تکبیر دا سی
واہ وا مرد فقیر سریر جس دا، ہدف پیر دی نظر دے تیر دا سی
محمد شفیع میاں اللہ پاک کولوں، طلب گار اوہ خیر کثیر دا سی

ش

شینہ دلوں فریفتہ سن، خولجہ پیر دے پاک جمال اُتے
واہ وا قلب جو دلوں وکایا سی، اُس دی باکڑی چشم غزال اُتے
نظر باز مجاز دی آز کولوں، رہے بچ کے پاک خیال اُتے
محمد شفیع اوہ غوث زماں آہے، لا مثال جنوب شمال اُتے

ص

صبر ناہیں نیٹیاں روندیاں نوں، قبلہ گاہ دے باجھ حیران اوہ تاں
نوری شکل آج آوندی نظر ناہیں، کر گئے خوشی دا باغ ویران اوہ تاں
اُٹھاں والیاں دی کوئی خبر دسو، کس پاس گئے پڑھ پلان اوہ تاں
محمد شفیع میں شور فغاں گھٹاں، کر کے دے گئے زیان اوہ تاں

ض

ضرب شدید اس موت دی تھیں، میرے ہار لگھاں مضروب ڈٹھے
پردے چاک دے وچ روپوش ہوندے، نازنین حسین محبوب ڈٹھے
کھڑے پھل مالی باغوں تروڑ ڈالی، خالی درد فراق منسوب ڈٹھے
محمد شفیع آہ خاک دا خاک ہوندے، یوسف جیسے حسین محبوب ڈٹھے

ط

طبع شریف عزیز اشرف، صاحب خیر اکرام تے جود آہی
دل فریب رفتار گفتار شیریں، خوبی آپ دی ہر محمود آہی
قفص ہوں تھیں سدا آزاد رہے، الفت پیر دی وچ وجود آہی
محمد شفیع میاں خنی ہمتہ کھلا، ہر اک آپ تھیں جان خوشنود آہی

ظ

ظاہری دستِ دعا کولوں، میری جان حزیں محروم ہوئی
میرے واسطے فیض دی کان آہے، اَنج کھان ڈُھکی مرزبوم ہوئی
شادکام میں صبح تے شام پیساں، میری جان اَنج جان مغموم ہوئی
محمد شفیع اودہ خاک سپرد ہتھیں، ٹوپی والڑی ذات مخدوم ہوئی

ع

عین اودہ فیض دا آہے چشمہ، عام خاص دی کوئی تخصیص ناہی
اللہ والیاں والڑے چالڑے سن، پیدا ولے وِچ غیر تحریص ناہی
حامد رب دے شکر گزار صابر، اخذ طبع وِچ غیر تلخیص ناہی
محمد شفیع میاں تسبیح خوان صوفی، خیر غیر دی بحث تمحیص ناہی

ف

فقر سندا جتھے قدم آوے، اوتھے فخر دے جھنڈے نہیں جھلدے
تاجوراں دے تاج سرو بادشاہی، ڈٹھے گلی پریم دی وِچ رُلدے
جہڑے عشق دے جام آشام اودہ تاں، شربت روح افزا تے نہیں بھلدے
محمد شفیع میاں منڈی عشق والی، کون آکھدا جے سیس نہیں ٹلدے

ق

قفل زنجیر جدایاں دے، کیتی جان ظہیر اَسیر میری
چلی نال تقدیر نہ پیش کوئی، پی کھوہ کھٹے تدبیر میری
باز اجل دے کونج شکار کیتی، گل گئی اودہ گل اخیر میری
محمد شفیع خورشید غروب ہویا، دردوں شام دی عین تصویر میری

ک

کراں ایصالِ ثواب صدقہ، ہر دم فاتحہ خیر دعا قبلہ
ٹھنڈی گورتے حشر دے شور اندر، جتھے رہے نہ ہوش بجا قبلہ
صدقہ پیر دیاں خاص غلاماں دا، ملے آپ نوں خاص سروپا قبلہ
محمد شفیع رسول دے پٹھ جھنڈے، آؤ سبز پوشاکیاں پا قبلہ

ک

کراں کی جرن جدائیاں دا، میری جان بے تاب تھیں نہیں ہوندا
طاری جان تے ہول فراق ہتھوں، صبر ضبط سیماب تھیں نہیں ہوندا
باجھ زاریاں درد لاچاریاں دے، تیرے ہجر خراب تھیں نہیں ہوندا
محمد شفیع وچھوڑیاں ماریاں دا، حصہ مٹھری خواب تھیں نہیں ہوندا

ل

لہدی پھراں انوار تیرے، قبلہ گاہ جنوب شمال اوہ تاں
سرِ قہر و بال دا ڈال گئے، گلی جان اُتے فی الحال اوہ تاں
دے باغ بہار گلزار خونی، پُر پُر جان سلکن پتر ڈال اوہ تاں
محمد شفیع ادھین فراق ہتھوں، ہويا کمر خمید ہلال اوہ تاں

م

مہر وفا دے توڑ رشتے، دسو کیتیاں کدھر تیاہیاں نیں
آجی جی اپنے فرزند دیاں، حرصاں کاسنوں دلوں و ساریاں نیں
رہے دُور سدا دینا داریاں تھیں، خاکساریاں وچ گزاریاں نیں
محمد شفیع زبان تے ذکر جاری، ضرباں الا اللہ دیاں ماریاں نیں

م
محمد عظیم درویش کامل، عظمت عشق دے نال کمال ہويا
خواجہ پیر سیال دے لال سندا، حاصل جس نوں پاک جمال ہويا
رکھی قلب وچ حیدری طلب کہو، ناہیں غیر دے نال خیال ہويا
محمد شفیع چھیویں چھیویں چن دی نوں، حاصل پیر دا یوم وصال ہويا

ن
نظر منظور حضور دے سن، وگی پیر دے نام توں جان آہی
سونہ ربّ دی درد دے وچ حجرے، روشن عشق والی شمع دان آہی
تسبیح خوان صوفی ذاکر شوق والے، قلب صاف تے پاک زبان آہی
محمد شفیع جناب دے جسم اندر، جان ذوق تے شوق سامان آہی

و
ورہے چھپاسی سی عمر ساری، جہڑی سوز گداز دے وچ گزری
کچھ ذکر اذکار دے وچ گزری، کچھ نفل نماز دے وچ گزری
دنیا داریاں وچ ناہیں پیر پایا، پچی حرص تے آز دے وچ گزری
محمد شفیع میاں عاشق مرد آہے، واہ وا درد نیاز دے وچ گزری

ہ
ہو حق دے وچ مے خانے، جلی ماردا مرد فقیر آہا
دنگیر زمانے دے غوث اعظم، حیدر پیر سندا دامن گیر آہا
ماسوا تھیں قلب آزاد اُس دا، زلف حیدری وچ اُسیر آہا
محمد شفیع میاں ٹوپی پوش سونہا، وچ پیر بھائیاں با توقیر آہا

لا

لا دی نفی منظور ناہیں، جاں تک نال اثبات دے جوڑسیں نہ
تینوں اپنا کسے بناوناں نہیں، جاں تک غیر دے نال تروڑسیں نہ
منزل اوکھڑی سخت توحید والی، جاں تک نفس دی واگ نوں موڑسیں نہ
محمد شفیع رضا دے باغ وچوں، پھل صبر تسلیم دے توڑسیں نہ

الف

آساں نوں وچ اعراف سٹ کے، آپوں جا فردوس مکین ہوئے
بے دل باجھ محبوب دے جان میری، دیدے رون ڈاڈھے بے تسکین ہوئے
دادا جان رشید⁽⁴⁾ دے وچ جت، سیدن⁽⁵⁾ باپ دے جا قرین ہوئے
محمد شفیع جتھے حیدر پیر چشتی، جت ماویٰ وچ صدر نشین ہوئے

ی

یاد بچی سچے رب دی اے، غافل بدی دا گلوڑ پیار چھڈ دے
گلوڑے دم دینار انبار دولت، عاشق واسطے نے ایہ زناں چھڈ دے
ملک الموت جاں گوکسی آن برتے، کہسی گلوڑ دے سب پسار چھڈ دے
محمد شفیع میاں کلمے پاک باجھوں، ہور غیر تمام گفتار چھڈ دے

ی

یاد وچ خیر دعا سانوں، کرسی ٹساں دین کون ہر آن قبلہ
کرسی کون وچ یاد وظیفیاں دے، مہربان ہو کے مہربان قبلہ
والدین دی ذات اولاد جوگی، ہوندی بھود احسان دی کان قبلہ
محمد شفیع فقیر دے واسطے سی، تیرا ویکھناں حج عنوان قبلہ

ی

یا جی یا قیوم قادر، رکھے گئے اوہ ہتھ دعا والے
کیئے جس فقیر درویش ناہے، سجدے نام نمود ریا والے
سینہ صاف صفا سی کینیاں تھیں، دائم مست وچ یاد خدا والے
محمد شفیع فردوس مکین ہوئے، پی کے جام توحید رضا والے



☆ ”مجموعہ سی حرفی پائے پنجابی (قلمی)“۔ صفحہ 150 تا 162۔

☆ حاشیہ از شاعر:

”از بندہ احقر العباد و اضعف الناس منشی محمد شفیع اختر
ڈھاگروی، ڈھوک محمود داغلی ڈھاگروی مرزا، متصل ملہ
جو گیاں۔ بہ ماہ مارچ 1959ء در تحریر آورد۔

تاریخ وفات قبلہ والد ماجد رحمۃ اللہ علیہ بتاریخ 6 جمادی
الثانی 1378ھ بہ مطابق 18 دسمبر 1958ء، 4 پوہ
2015 بکری بروز پنج شنبہ بوقت قبل از دوپہر رحلت
یافت۔ مرقداً بجانب برخانقاہ فاضل شاہ بخاری واقع شد۔

.....

مادہ تاریخ وفات از حضرت مولانا محمد عبدالجید کڑی شریف

”محمد عظیم نوری“

1378ھ

1- چھٹے اسلامی مہینے (جمادی الثانی) کی چھ تاریخ۔

2- 1378ھ

3- میاں محمد شفیع اپنے والد صاحب کو ”آبی جی“ کہہ کر پکارتے تھے۔

4- میاں محمد شفیع کے صاحبزادے میاں عبدالرشید۔

5- میاں سید محمد چشتی، میاں محمد شفیع کے دادا۔

.....

[سی حرفی نمبر 10]

تکرار ہیرا مادر



سوال مادر

الف: افسوساں تلیاں پھاٹاں پیوں آن کورا ہے
چاکاں نال کریں اثنائی ساؤ ایہ نہ چاہے
پردے ستر شرم حیا دے تھدھ مونہیں توں لاہے
آکھ شقیج ہو کج کنواری جا کے نیلے گاہے

جواب ہیر

الف: استوں پہلے دی میں رانجن یار کوکینڈی
ایہ تقدیر قدیر ازل دی توں کیوں پئی ہلکینڈی
ایہ برہوں دی گل بے وسی لکھی کون مٹینڈی
آکھ شقیج دس کس گل پاروں مینوں پئی جھڑکینڈی

سوال مادر

ب: برہوں دے میں سُنیا تُوں سودے لگی تولاون
ایہ کم اشرافاں دا کیوں موہرہ لگی ایں کھاؤن
عشق کریندا نشر جہانیں بھادیں کوئی سداؤن
آکھ شقیج رکھ شرم پیو دا مندا جگ ہساؤن

جواب ہیر

ب: برہوں دیاں جس تن وُ رہیاں چٹھریاں اوہ تن جانے
میں نہیں زور دھگانے لائیاں نہ کر زور دھگانے
ایہ گل پیار محبتاں والی جہیوں شمع پروانے
آکھ شفیق ایہ حسن ازل دے مُٹھے پھرن دیوانے

سوال مادر

ت: توبہ کر بُرے خیالوں یاری زری خواری
پرہیوں دا سرپنچ اکابر باپ تیرے سرداری
چاکے نال اشنائی کر کے نہ چا غم دی کھاری
آکھ شفیق سچ آکھاں تینوں برہوں بُری بیماری

جواب ہیر

ت: توبہ میں غیر خیالوں، عشقوں باز نہ رہساں
جے دیسیں توں طعنے مہنے جان اپنی تے سہساں
تیرے آکھے لگ کدی میں کلمہ کفر نہ کہساں
آکھ شفیق لکھ ہوڑن ہٹکن ہو اگیرے بہساں

سوال مادر

ث: ثبوت جہاں دا پردہ کون اوہناں توں اعلیٰ
اوہناں کولوں دوہیں جہانیں رُتبہ کس دا بالا
جگ دیاں طعنیاں مہنیاں سندا نہیں اوہناں نوں پالا
آکھ شفیق اوہ بھاگن ہوئیاں نیک جہاں دا چالا

جواب ہیر

ث: ثابت میں صدق رانجن تے پے گیا ازلوں پلے
لا تترك حکم اُس دے بن ککھ نہ کوئی پلے
دل دیاں واگاں ہتھ اُس دے وچ جتول چاہے وے
آکھ شقیع گھر کھیریاں و سناں برچھی سینہ سَلے

سوال مادر

ج: جہڑی دل تیرے بیٹھی اوہ میں ہوں نہ دیاں
جتھے میری مرضی ہوی اوتھے تدھ پر نیساں
جے توں کرسیں زور دھگانے سولی اُتے ٹنگیساں
آکھ شقیع پئی یاد کرسیں تیں سنگ اوہ کریاں

جواب ہیر

ج: جدن دی ایہ سن پائی تیں دل ہور دلیلاں
لا پریتاں ہارن نیتاں ایہ نہیں کم اصیلاں
رانجن نال اساں دل رلیا نہ کر ہور سبھیلاں
آکھ شقیع منظور رانجھیا نہ کر لمیاں قیلاں

سوال مادر

ج: حقیقت حال ترے دی میتھوں نہیں پوشیدہ
پلے پلے دیاں خبراں مینوں جتھے تڈھ عقیدہ
کامیاں نال نہ پالیں یاری ہو کے ایڈ فہمیدہ
آکھ شقیع گھن بھوچھن چھاویں بہہ کے کڈھ کشیدہ

جواب ہیر

ح: حروفِ محبت والے دل دی لوح لکھائے
لوڑی غیر ارادت ناہیں عشقوں قول پکائے
جٹول یار اُتول سجدہ مسلے حق چکھائے
آکھ شفیق توحید وچالے شرک نہ مول سماے

سوال مادر

خ: خدا دا خوف نہ تیرے من وچ دے رتی
ایہ چالے تک تیرے کہسن تینوں لوک کہتی
گل میری تے کن نہ رکھیں لائیوں کس کمتی
آکھ شفیق کر خوف قبر دا جتھے تیل نہ بتی

جواب ہیر

خ: خبراں اخباروں لکھیاں عشق نہ چھوڑے آباں
اگ عشق دی سب کجھ ساڑے لکھیا وچ کتاباں
ادب تیرا ملحوظ اُسانوں بند زبان جواباں
آکھ شفیق نہیں تنگناں منگدی تیریاں خان نواباں

سوال مادر

د: دسیں کیوں نغری بن کے ایہ چنگے نہیں چالے
بیٹھ ستر ہو نشر نہ جگ وچ مار حویلی تالے
فرض نماز گھسا نہ منزل جیوں کم نیکاں والے
آکھ شفیق وچ صبر حیا دے اپنا من رُجھالے

جواب ہیر

ذ: دلاور ضیغ غازی عشقوں کنڈ نہ دیندے نی
 کہو تاہنگ پیارے والی دل دے وچ رکھیندے نی
 عاشق کل جنال علاقے دلبر کان سٹیندے نی
 آکھ شقیق ہو رہندے اس دے جس دے جگ سدیندے نی

سوال مادر

ذ: ذاتوں اوہ نیچ رنجھیا کاماں ساڈا گھر دا
 جگ وچ اُچی پکدی ساڈی تے اوہ ساڈا بردا
 ہر کوئی تیرے لچھن جانے لاہ سٹیا ٹدھ پردا
 آکھ شقیق نیچ جمیوں چوچک آئی باجھ نہ مردا

جواب ہیر

ذ: ذاتاں تے دل دے سودے آج تک کدی نہ ہوئے
 رانجن پک مقصود اساڈا راہ وچ کھٹ نہ ٹوئے
 سدا جانی اوہناں جہڑے اس رستے وچ موئے
 آکھ شقیق وچ ہکے دھاگے رانجن ہیر پروئے

سوال مادر

ذ: رہ جا، آ باز اس گلوں نہ کر اپنے من دی
 مت میری ٹدھ مندی لگدی نیچ میں تینوں جن دی
 کھیریاں دے گھر لوڑ نہ رہی تینوں دولت دھن دی
 آکھ شقیق منگ رات نہ کالی چھڈ کے چانی چن دی

جواب ہیر

ر: روئے دی ایہ گل ساری من وچ پُویا رانجھا
سر میرے دا تاج سنہری درد میرے دا سانجھا
میں جس دی ہو رہیاں رہساں اُس دی ہو چھڈ جھانجھا
آکھ شفیق جگ ماہی اُتم فر کس گل دا لانجھا

سوال مادر

ر: رذیلاں نال شریفیاں ہتھ کدے نہیں جوڑے
دولت مایہ دلوں توڑے ہون ادہناں تھیں دوہڑے
رانجھے دے دس کیہ تہدھ ڈٹھے پُوڑے بیڑے گھوڑے
آکھ شفیق نہیں تہدھ جئے ڈٹھے جگ دے وچ اَنموڑے

جواب ہیر

ر: رفعنا لک ذکرک ثابت جس دا شان قرانوں
کعبیوں مکھ بھنوا نہ میرا نہ کڈھ دین ایمانوں
ذکر تصور ہر دم جس دا لہے نہ کدی دھیانوں
آکھ شفیق حق کملی والے صفتاں بول زبانوں

سوال مادر

ر: زر زیور گہنے لتے کھیڑیاں دے گھر پاسیں
رانجھا چاک کینہ اُس دے گھر جا کے کیہ کھاسیں
مَت میری لت لگدی ہو تہدھ سینے کل پچھتاسیں
آکھ شفیق لہہ تختوں گلیاں دے وچ دھکے کھاسیں

جواب ہیر

ز: زر زیور کھڑیاں سندا نہ دس مینوں گھولی
 رانجھا میرے سر دا سائیں تے میں اُس دی گولی
 نشتر خن زبان تیری دے کدے نہ بھلسن بھولی
 آکھ شفیق میں رانجھن باجھوں مرساں کھا کے گولی

سوال مادر

س: سُنیں مَت مَول نہ میری کناں تھیں کڈھ دیویں
 رانجھا رانجھا رانجھا جیوکر ذاتی اسم پکیویں
 کافر ہو مرسیں توں جس نوں بُناں وانگن سیویں
 آکھ شفیق میں کدی نہ منساں تیرے ایہ رُسیویں

جواب ہیر

س: سعادت اُزلی آہی میریاں وِچ تقدیراں
 عشقے دے گھر راس نہ آون عقل فکر تدبیراں
 دل میرے تے پے گئیاں ازلوں اوہدیاں زُلف زنجیراں
 آکھ شفیق میں ہیر نمائی رانجھے دیاں تاثیراں

سوال مادر

ش: شراب محبت والی پی کے مُست ہوئیوں توں
 مشکل رہن سلامت اُس دا کول اُگی دے جیوں رُوں
 جیوں جیوں منع کراں میں تینوں تیوں تہوں ودھدی اُگول
 آکھ شفیق ایہ زہر عشق دی دھس گئی مڈھ لُوں لُوں

جواب ہیر

ش: شراب محبتاں والی پیدا نہیں ہر کوئی
جس پیتا گھٹ عشق شرابوں عقلوں گیا ستھوئی
رانجھن لٹ لئی میں لوکا خوب عدالت ہوئی
آکھ شقیج جس عشق پیا پڑ سکھ دی نیند نہ سوئی

سوال مادر

ص: صبر کر عشق مای وچ خوب نہیں بے صبری
بیلی باجھوں نہ وت بیلے ہوئی کے برڑ بے خبری
آن بن ان بن اُن بن چھڈ دے یاد نہ کر دو زہری
آکھ شقیج رہ عاجز بن کے چنگی نہیں متکبری

جواب ہیر

ص: صبری بہت ضروری اس گھر نہیں مغروری
ریشم تے کھوابوں بہتر میں رانجھن دی بھوری
دید مای دا ساڈے بھانے جیوکر جام طہوری
آکھ شقیج دھن بھاگ نکری جیکر ملے حضوری

سوال مادر

ض: ضدوں کیوں باز نہ آویں لاہے کیوں تڈھ جھاکے
رانجھن چاک ایلی دے سنگ بیلے کھیڈن جا کے
کر کھیڑا منظور اکابر دساں تڈھ سمجھا کے
آکھ شقیج رکھ پت اساڈی کھیڑے نہیں گسا کے

جواب ہیر

ض: ضرورت دید ماہی دی رنگ محل نہ مَنگاں
نوشہ نال سوہاگ سوہاوے لوڑ نہ چھنکن وَنگاں
اوہ کد سمھلے سُرَت نماں پیتیاں جس ایہ بھنگاں
آکھ شفیق میں سوہے ساوے سالوں مول نہ رَنگاں

سوال مادر

ط: طور طریقے تیرے چنگے نظر نہ آوں
شَرماں والیاں دھیاں گھر تھیں باہر مُول نہ جاوں
تیرے وانگوں بیلے جا کے پینگھاں مُول نہ پاوں
آکھ شفیق ایہ مَتیں میریاں تینوں مُول نہ بھاوں

جواب ہیر

ط: طواف ماہی دے گھر دا کعبہ جان کراں میں
ادبوں خاک پُچاں اس دَر دی سیس زمین دھراں میں
جس دم نظر نہ آوے ماہی ٹھنڈے ساس بھراں میں
آکھ شفیق لکھ پاپن توڑے رانجھن نال تراں میں

سوال مادر

ظ: ظاہر اوہ چاک مہیں دا جس نوں کعبہ جانیں
جس دے وِچ مقابل کھیڑا خان نواب نہ آئیں
ہوسیں انت خوار کوں لکھیے مندے بندے تانیں
آکھ شفیق دَر رَت دے خونوں نہ کر زور دھگانیں

جواب ہیر

ظ: ظاہر باطن مینوں رانجھن نظری آوے
ہر گھٹ جلوہ روپ گھنے دا اپنا آپ دکھاوے
مومن ہو کے عشق ماہی دی کافر کون سداوے
آکھ شفیق میں رانجھن باجھوں جھنگ وچ کجھ نہ بھاوے

سوال مادر

ع: عقل دی گھاٹ تیرے وچ اوڑک تلیاں ملسیں
جاں اس عشق دی آتش اندر سر پیراں تک جھلسیں
نچھی وانگن جان اپنی نوں پئی کڑاہی تلسیں
آکھ شفیق مت نہیں جوانی ایہ دکھ کد تک جھلسیں

جواب ہیر

ع: عشق میں رب تھیں منگیا کر کر ترلے ہاڑے
عقل فکر کد اس گھر ڈھوئی عشق پوے جس کھاڑے
جس عاشق اکھوایا وڑیا نہیں عقل دے واڑے
آکھ شفیق منصور جیہاں ایہ بھڑ کے سولی چاڑے

سوال مادر

غ: غیراں سنگ کرن نہ رشتے جو اشرف سمدیندے
اُچے جہڑے گھرانے چاکاں نوں کد دھیاں دیندے
بمدے تھدھ بے غیرت جیہیاں ڈونگھے ویہن روہڑیندے
آکھ شفیق سی اس تھیں بہتر جو پئے آج تکلیندے

جواب ہیر

غ: غماں تھیں ہک سہ مینوں فرصت دا نہیں ملدا
کس تے پھول سناواں ہائے جو کچھ حالا دل دا
عشق نکرماں سل جگر دا فرق نہیں ہک تل دا
آکھ شقیق جے رانجھن ملدا کھڑدا غنچہ دل دا

سوال مادر

ف: فقیراں وانگوں لیراں بدن دوالے لئیاں
بھلیا مونہہ سر دھوون تینوں جواں سر وچ پیاں
جھلی ہو وتیں وچ جھلاں عقلاں سمجھاں گئیاں
آکھ شقیق کر ہوش کمتی نہ لگ آکھن سنیاں

جواب ہیر

ف: فضول توں دے نہ متیں سدھا راہ نہ چھوڑاں
رانجھن نال پریت ازل دی لگدے وس نہ تروڑاں
رانجھے دا ککھ لکھ کر جاتا لوڑ نہ لکھ کروڑاں
آکھ شقیق جے رانجھن پاواں دس فر ہور کیہ لوڑاں

سوال مادر

ق: قرآن حدیث فقہ تھیں عشق ثبوت نہ ملدا
تے ناجائز آپ موبارا سودا کرناں دل دا
شرم حیا دی لے سر چادر صبروں ہی کچھ ملدا
آکھ شقیق دُب شوہ وچ مری جو من تارو ٹھلدا

جواب ہیر

ق: قبول کیتی میں صدقوں رانجن دی اشنائی
 انشاء اللہ کدی نہ ترسی میتھوں بے وفائی
 جاں تک جان سلامت تن وچ تابعدار سداۓ
 آکھ شفیق میں ہیر چکیٹی رانجن وچ سمانی

سوال مادر

ک: کدوں مونہہ کدھن جوگی چھڈیائی وچ شریکاں
 چاکاں نال اشنائی لا کے لائیوئی گل نوں لیکاں
 میں چاہواں توں کھیڑیاں وِسیں تینوں ہور اڈیکاں
 آکھ شفیق دس دل دی سچی نہ پئی دے تریکاں

جواب ہیر

ک: کدی جے غیر قبولاں دوزخ ملن سزائیں
 میں قربان بجن توں جس دیاں مولا کرے ثنائیں
 توں کیہ جانے قدر ماہی دا ماہی سر دا سائیں
 آکھ شفیق میں آکھ رہی تیں غیر نہ ذکر ہلائیں

سوال مادر

ل: لدھا میں تیرے کارن خان نواب چنگیرا
 کھیڑا ذات اشراف سداوے عادی جم بھلیرا
 عزت شان وہاہت نامہیں کسے گلوں کسیرا
 آکھ شفیق میں سُر کے بولی مندا چالا تیرا

جواب ہیر

ل: لگھاں وِچ کملی والا ماہی شان اکابر
جس دے عشقِ محبت والا پیتا میں بھر ساغر
میں واری لگھ واری اُس توں ہوواں کدی نہ ناہر
آکھ شفیق کیوں کافر تھیواں رانجھے دے ول کنڈ کر

سوال مادر

م: میری ہک مَت نصیحت آئی نہ تھہ کاری
اوڑک ہک دن تھہ پچھتانا نہ وِت آپ مہاری
عشقِ محبت والی چائی ہر تے تھہ پینڈ بھاری
آکھ شفیق نہیں عشقِ مجازوں حاصل باجھ خواری

جواب ہیر

م: میرے دل تاہنگ پیا دی بھلے کم جہانی
گلیاں دے وِچ بھوندی بھردی ہو کے مست دیوانی
ہکلی کونج وانگوں کرلاندی رانجھن ذکرِ زبانی
آکھ شفیق میں چاک ماہی دی عمراں بھرساں پانی

سوال مادر

ن: نالائق تیرے ورگی ڈٹھی ہور نہ کوئی
چاک قبول کریں چھڈ کھیڑا لاہ شرم دی لوئی
بے فرمان مونہہ کالیاں تائیں جگ وِچ ملے نہ ڈھوئی
آکھ شفیق چھڈ ضد نکمی کیڈ چتر آ ہوئی

جواب ہیر

ن: نہ لائق تیرے تائیں عشق ماہی دیوں موڑیں
اوہ گل کدی نہ بھاوے مینوں توں جہڑی گل لوڑیں
کھیرے کون رذیل جہاں توں رانجھن یار وچھوڑیں
آکھ شفیق کیوں جائی کارن چنگی جا نہ لوڑیں

سوال مادر

و: ورتوں کھیرا کر فی رانجھے تھیں کیہ لوڑیں
اپنے ہتھیں زہر پھکیں کیوں ڈونگے بیڑی بوڑیں
میری مَت نہ مٹیں کائی مرضی اپنی لوڑیں
آکھ شفیق کیوں جان اپنی تے رانجھا جن چوڑیں

جواب ہیر

و: وکالت تیری ہرگز اتھے کم نہ آوے
کھیریاں دی تک دولت مایہ کیوں ایمان کھڑاوے
چاکوں اُچا ساک نہ کوئی کون تینوں بھھاوے
آکھ شفیق اوہ کملی والا شالا سدا سوہاوے

سوال مادر

و: ہیرے توں بہوں پچھتاسیں یاد رکھیں گل میری
چاکاں نال آشنائی تیری ایہ گل بہوں مندیری
اُتم ذات سیالاں دے اے رانجھے شودھیری
محمد شفیق توں چوچک کارن جھول نہ ایڈ ہنیری

جواب ہیر

ہ: ہو رہی ہیر نمائی چاک جو پاک اصل دا
لکھیا لوح قلم دا جہڑا اوہ کدی نہیں ٹلدا
تدبیراں دا تقدیراں سنگ چارہ مول نہ چلدا
آکھ شفیق پر عامال تائیں پتہ نہیں اس گل دا

سوال مادر

لا: لاموں لا سنگ رانجھے دے کیہ کھٹی تہدھ کھٹی
جڑھ جاوے جس عشق ماہی دی تہدھ پڑھائی پٹی
ماپیاں ولوں کھٹی ہوئیوں کیتوئی پچوڑ تڑٹی
آکھ شفیق انموڑ نہ جتی تہدھ جیہی اگے جتی

جواب ہیر

لا: لاموں لا نفی دا کلمہ رانجھے باجھ نہ کوئی
ثابت ذات رانجھیے والی نفی اثباتوں ہوئی
رانجھا عشق توحید خزانہ شرکوں مول نہ ڈھوئی
آکھ شفیق میں نچ کھلوتی لاه شرم دی لوئی

سوال مادر

الف: آسانوں جے اس گل دیاں ہوندیاں پہلوں ساراں
جددیاں تہدھ جہیاں ڈاراں تائیں کیوں نہ گل گھٹ ماراں
اپر اے تقدیر ربانی پیدل کرے سواراں
آکھ شفیق میں کون کہاواں جے اچا دم ماراں

جواب ہیر

الف: الہی ملیا ماہی تخت ہزار یوں لیا کے
جس دیاں زلف زنجیراں اندر قیدی ہوئیاں آ کے
جس ماہی دا راج سلامت بیٹھی دل کھڑا کے
آکھ شفیق میں جُتیاں اُس دیاں رکھاں تاج بنا کے

سوال مادر

ی: یاری دی لُج اُکھیری پیر توں سام ٹکائیں
عدلوں دُر منگ فضل رہاناں نیویاں ہو کے جائیں
خودیوں کر غوروں ہر دَم اپنا آپ بچائیں
آکھ شفیق میں ماریں اوّل تاں ماہی گل لائیں

جواب ہیر

ی: یاری دا پالن اوکھا یاری نہیں سکھاری
کُنج کنواری چا لئی سر تے قدروں بھاری کھاری
دھن خوش قسمت جیکر سائیں سن لئے میری زاری
آکھ شفیق پڑھ کلمہ طیب جہڑا آوے کاری

ی: یاراں دلداراں تائیں ہتھ بنھ عرض گزاراں میں
قسم خدا دی درد اپنے دیاں لکھ دسیاں گفتاراں میں
بائی ماہ رمضان چھہتر ہجری سُن شماراں میں
آکھ شفیق دل ہیر آزرده رانجھے نال بہاراں میں

ڈھانگری ڈھوک محمود وچالے عاجز درس رکھیندا اے
کول ٹلے دے پربت پاسے درووں ساس مریندا اے
درد نصیب غریب چروکا ہجرال ہوکا دیندا اے
آکھ شفیق ایہ وسدے جھکے عشق ایہ ساڑ دکھیندا اے



☆ ”مجموعہ سی حرفی ہائے پنجابی (قلمی)“ - صفحہ 64 تا 75۔

☆ حاشیہ از شاعر:

”بتاریخ 26 مارچ 1959ء

عرض متعلقہ سی حرفی ہذا

باعث اس تصنیف مری دا یارو درد جگر دا سی
درد جھلیندیاں سال وہائے نہ جیوندا نہ مردا سی
دسی لکھ کیفیت اپنی ہیرے دا وچ پردا سی
آکھ شفیق دل طالب دنیا دا نہ دولت زر دا سی“

.....

[سی حرفی نمبر 11]

ہدیہٴ حُسنِ دل پذیر و رشکِ بدرِ منیر



الف

آئی کے حُسن دے نگر اندر، دولتِ دلے دی اَسیں لُٹا بیٹھے
اَکھیں نالِ محبوب دے چار ہوئیاں، گھر بار ولوں چت چا بیٹھے
کھڑیا حُسن دا باغ بہار تازہ، باس لَین کارن بھونرے آ بیٹھے
عاشق یارِ منیر دی شمع اُتے، اَنگ وانگ پتنگ جلا بیٹھے

الف

آئی کے تھنڈی گلی اندر، دولتِ دلے دی اَسیں لُٹا چلے
تیری اَکھیاں دے گجھے زخمِ تازے، اَسیں وچ کلچرے کھا چلے
تیرے پیار دی پیاریا مُرتی نوں، اَسیں ادب تھیں سِیس نوا چلے
آتشِ عشق دے وچ منیر تیرے، اَسیں جگر تے جان جلا چلے

ب

باغِ بہارِ شبابِ تازہ، بلبلِ گاوندی گیتِ گلِ لالیاں دے
ساقی حُسن دا پیا ورتا وندا اے، پیالے، بھاگ جاگے پیون والیاں دے
جھلی جائے نہ جھالِ جمالِ سَدی، قربانِ میںِ نینِ غزالیاں دے
لُٹے مُست ادا منیر تیری، رہی دلے نوں دے سمہالیاں دے

ت

تک رہیاں رستے یار تیرے، اُکھیں تھک پیاں کدوں آدناں توں
میری اُجڑی جھوک وِساوے نوں، دس کدوں تشریف لیاوناں توں
سڑی بکی میں وِچ فراق تیرے، پانی وِصل دا پا بجھاوناں توں
بُریا جائے نہ ہجر منیر تیرا، کدوں کرم کمال فرماوناں توں

ت

تک تیری صورت سانوری نوں، پھراں بانوری ہوئی کے جانیاں او
تیری پاک تصویر اُسیر کیتی، سسی ہار دِگیر دیوانیاں او
نیںدر بھکھ آرام حرام ہویا، راتیں جاگدیاں لنگھ سدھانیاں او
کھر مہر منیر فقیر اُتے، تیرے دید کارن ترسانیاں او

ٹ

ثابتی نال تحقیق ڈٹھا، پاویں دلاں تے لوٹیاں جانیاں توں
تیری حُسن دی دھمک نہ جائے جھلی، اُج سونہیاں وِچ لاٹانیاں توں
میرے سکھ سواد برباد کر کے، مینوں بخشیاں وِرد سامانیاں توں
میرے دِلے تے بدر منیر بن کے، کریں سونہیاں ضو افشانیاں توں

ج

جانیاں ناز گمانیاں او، اُج حُسن دا گرم بازار تیرا
تینوں لوڑ نہ چوڑیاں پاوے دی، تیرا حُسن ہے زیب سنگار تیرا
تیریاں پیراں دی پُمدے خاک عاشق، لیندے نام اوہ نال پیار تیرا
تیرا دید سعید منیر احسن، اُج سونہیاں وِچ وقار تیرا

ح

حرف جمال تساڈڑے تے، رکھن کیہ مجال ہے عاشقاں دی
صورت دیکھ محبوب مرغوب تیری، ہوندی طبع نہال ہے عاشقاں دی
بردبار حلیم زمانیاں دے، ایہو سدا تھیں چال ہے عاشقاں دی
رہندے دُور منیر غرور کولوں، ایہو گل کمال ہے عاشقاں دی

خ

خواب خیال دے وچ ناہا، تیرا تھاؤ مکان قربان جاواں
نہ میں جاندا ساں تئیں کون ہوندے، کیہ نام نشان قربان جاواں
لٹی پیاریا تہنڈڑے بول مٹھے، میری جان نادان قربان جاواں
تیری زُلف منیر اُسیر کر کے، پایا وچ زندان قربان جاواں

د

دیکھ عزیز تصویر تیری، سسی ہار میں ہوش بھلا بیٹھی
تیرے پیار دے پیاریا نقش پیارے، دلوں پیاریا پک پکا بیٹھی
وانگ جوگیاں سوگیاں روگیاں دے، دھوآں گلی تیری وچ لا بیٹھی
میری زُلف منیر اُسیر کیتی، تیرے نام توں گھول گھما بیٹھی

ذ

ذوق دے پیالڑے جہاں پیتے، رہی اوہناں نوں سار جہان دی نہ
ہوئے مُست محبوب دے حُسن اُتے، رہی سُرَت گھر بار مکان دی نہ
جھلے یار دے دُکھ ہزار جھلن، رہی ہوش پوشاک ہنڈان دی نہ
سودے دِلاں دے جہاں منیر کیے، اوہناں سار کوئی سُد زِیان دی نہ

ر

راگ سوہنا ایسا ہور کتھے، تیرا رنگ گلاب دے رنگ جیہا
تیری دیہی نزاکتاں نال گدھی، اُنگ اُنگ تیرا کچ ونگ جیہا
زہری ناگ دا ہوگ نہ ڈنگ ایسا، تیری زُلف پُر چچ دے ڈنگ جیہا
لئی لٹ تہدھ جان منیر میری، نہ کوئی سنگ پڑگا تیرے سنگ جیہا

ز

زیب سنگار سروپ دا نہیں، زیور زیب جمال جمال دا اے
دولت حُسن دی جس نوں بخش ہوندی، گویا فضل اُس تے ذوالجلال دا اے
اوتھے دُھین پتنگ ننگ ہو کے، جہڑا حُسن والے دیوے بالدا اے
کتی جان منیر دی حُسن گھائل، شعلہ شوخ اُس چشم غزال دا اے

س

سُرد اوساس اُداس رہندی، طبع عاشقاں دَر دَر رسیدیاں دی
انتظار وِچ لیل نہار گزرے، مشکل حل ہوئی کدوں دیدیاں دی
اوکھی جال جہان دے وِچ ہوندی، ہتھیں اپنے عشق خریدیاں دی
میں تے موڑ مُہار منیر ماہی، پختہ کار میں عشق عقیدیاں دی

ش

شوخی مزاج نگاہ تیری، کردی دلاں دے یار شکار ڈُٹھی
تیری نگہ دی تیزی تلوار قاتل، ہوندی جگر کلیجیوں پار ڈُٹھی
ہرنی بار دی پا انداز ہو کے، چمندی پُر تیرے کردی پیار ڈُٹھی
میرے وِچ فراق منیر اتھے، اُساں ٹرندی صبر دی تار ڈُٹھی

ص

صرف بہک تہنڈڑے دید سندی، سانوں لوڑ ہے یار گمانیاں او
تیرا دید تاں عید ہے عاشقاں دی، ہور طول فضول کہانیاں او
زگس ہار میں دیکھ دیدار تیرا، لہیاں مِل خرید حیرانیاں او
واگاں چکھاں نوں موڑ منیر ماہی، ماہی آب دے باجھ مرجانیاں او

ض

ضرب شدید ایہ عشق والی، جھگے وسدے پٹ اُجاڑ دی اے
یوٹے صبر تے ہوش سلامتی دے، وا عشق دی جڑھوں اُکھاڑ دی اے
ملکہ اُج توں حُسن دے ملک اندر، عزت تہنڈڑے نال پہاڑ دی اے
رَشک بدر منیر توں جان صدقے، آتش ہجر دی جگر نوں ساڑ دی اے

ط

طرف محبوب دیوں شرف مینوں، کدوں وصال دا جام انعام ہوئی
عاجز جان غریب ناکام سندی، کہڑے روز آہ کار فرجام ہوئی
اَساں تئیاں درد رسیدیاں تے، کدوں وچ گردش ساقی جام ہوئی
کدوں یار منیر دلگیر سندی، صبح وصال دی، ہجر دی شام ہوئی

ظ

ظالماں تہنڈڑے نین ظالم، راہ جانڈیاں تے کردے فیر پئے
کریں اوہناں دے نال توں ظلم ظالم، جہڑے منکن تیری بت خیر پئے
اوہناں جیہا کوئی نیک نصیب کتھوں، جہاں وصال دے تہنڈڑے خیر پئے
آوے ہتھ منیر اوہ گھڑی ناہیں، جدوں گلی تیری ساڈے پیر پئے

ع

عجب جمال جمال تیرا، کارن عاشقاں دے عجب پری ہیں توں
جس توں جن انسان قربان ہوندے، ودھ کور کولوں نازاں بھری ہیں توں
سُندر شام محبوب اندام نازک، چاندی کھری ہیں توں چاندی کھری ہیں توں
مکھن مکھ منیر مرغوب تیرا، گویا دُدھ اُتے بدھی تھری ہیں توں

غ

غشاں تے پوندیاں غشاں مینوں، تیرے وچ فراق دے جانیاں او
تیرے عشق دے بحر عمیق اندر، غوطے کھانیاں او غوطے کھانیاں او
میں تے کرم فرما تے موڑ واگاں، تینوں رُب دے واسطے پانیاں او
صدقہ پیر بغداد دا رکھ میں تے، اکھ یار منیر دل جانیاں او

ف

فرح دیا ملکہ پہلوی تھیں، تیری شکل زیبا سجان اللہ
تبیح صوفیاں دی جاندی ٹُٹ اتھے، جلوہ دیکھ تیرا سجان اللہ
لعل گودڑی دا اِس نوں آکھدے نیں، دُرّ بے بہا سجان اللہ
فلکی بدر منیر، منیر تینوں، رہیا ویکھ شرما سجان اللہ

ق

قلعے قلوب دے فتح کردی، تیری اکھ بجلیوی سوہنے نی
لُٹے دالاں دے قافلے راہ جاندے، تیری ٹور رگیلوی سوہنے نی
پتھری باجھ کردی ذبح عاشقاں نوں، تیری گل رسیلوی سوہنے نی
کیٹی درد فراق منیر تیرے، رنگت دیہی دی پیڑی سوہنے نی

ق

قسم مینوں تیرے حُسن دی اے، ثانی کون اَج تیرے شباب دا اے
تیری چشم غزال دے مَسْت جھڑے، اوتھ ذکر حرام شراب دا اے
ترے مُکھ دی جانے نہ تاب جھلی، چہرہ چُن مثال ماہتاب دا اے
پُوجا حُسن دی جان منیر واجب، مسئلہ ٹھیک ایہ عشق کتاب دا اے

ک

کدوں ہوسن میلے دوستاں دے، رہی کچھ تاریخ تے وار بیل
پاواں اونسیاں تے چوگاں پا دندی، میں رہی کوٹھیوں کا نگ اُڈار بیل
بیٹھ دوستی نال پردیسیاں دے، پنوں ہار ہو جان فرار بیل
مرہم ملے منیر نہ کسے پاسوں، ہو یا ہجر تھیں جگر فگار بیل

ل

لکھ رہی جانی کھوج تیرے، رہی کچھ گلاب رَویل کولوں
پاؤ دس کوئی عطر معنبری دی، رہی کچھ میں عطر پھلیل کولوں
تیرے وِج فراق دے بادشاہی، سونہ رُب دی گھٹ نہ جیل کولوں
بُدھا تھنڈڑے عشق منیر مینوں، جیوکر اٹھ قطار نکیل کولوں

م

ماہ انوار جمال تیرا، بھلے درد میں بھلیاں ویکھ ماہی
تدبیر رہی تدبیر کردی، مارے کون تقدیر وِج میکھ ماہی
دسیں یار نجومیاں لیکھ میرے، میرے ہتھ دی ویکھ کے رکھ ماہی
ہائے نچ منیر گھر مایاں دے، جُچی میں بد بخت کو لیکھ ماہی

ن

نام تساڑے دا جام پیندے، صبح و شام اتھے بادہ خوار تیرے
کدے قدم رنجہ فرما ہوو، مَتے پان شفا بیمار تیرے
بخشو بار سرکار دربار اندر، کتھے جان ایہ جان نثار تیرے
پاؤ خیر منیر فقیر تائیں، کھلا بوہے تے کان دیدار تیرے

و

واسطہ رُب دی ذات دا ای، جانی جادناں سُن دُکھیار دی گل
بن کے خاص طبیب شفیق مخلص، کریں گوش گزار بیمار دی گل
رکھ پاس یا پاس ولا جائیں، اُگول ایہ تیرے اختیار دی گل
بے نظیر منیر عشاق تیرے، کردے مِت تکرار دیدار دی گل

ہ

ہو رہی بانوری بھور وانگوں، میریا سونہیاں پھل گلاب دیا او
میریا چنے دیا ٹوٹیا لکھ واری، واری تھدھ توں مُست شباب دیا او
کیٹی زُلف اَسیر ایہ ہیر تیری، میریا رانجھیا ندی چناب دیا او
چُٹاں نال پیار منیر تینوں، میریا ورقیا پاک کتاب دیا او

الف

اَج ایہ زُلف اَسیر تیرا، ٹُریا چھوڑ ایہ حُسن ٹکانیاں نوں
لا کے ہجر دا جگر تے داغ کالا، ٹُریا پھڑھ پردیس پلانیان نوں
سدا رُب سلامتی نال رکھے، ٹساں سونہیاں روپ یگانیاں نوں
پائیاں گنڈیاں حُسن منیر تیرے، تیری یاد دا کار دیوانیاں نوں

ی

یار محبوب مطلوب میرے، شالا حُسن دی موج بہار مانیں
میرے دلے دے پھلے دیا بلبل اے، شالا سدا بہار گلزار مانیں
دل جانیاں موج جوانیاں دی، صبح شام تے لیل نہار مانیں
میرے دلے تھیں ایہو منیر نکلے، زندہ باد تاں روز شمار مانیں



☆ ”مجموعہ سی حرفی ہائے پنجابی (قلمی)“ - صفحہ 78 تا 88۔

☆ حاشیہ از شاعر:

”بمقام کوٹلی آزاد کشمیر۔ تحریر کردہ منشی محمد شفیع اختر

ڈھانگروی، کیش اوورسیئر - 30 مارچ 1960ء۔

و: واہ تقدیرِ قدیرِ والی، اچن چیت ایتھوں تنبو پٹ لئے
جلوے رہے نہ وچ نصیب میرے، واہ وارو نے عمر دے کھٹ لئے
لئے مل خرید آزار ہتھیں، ہیرے تلی تے رکھ کے پُٹ لئے
محمد شفیع میں سود و نجائی کے تے، گھالے اس سودے وچوں وٹ لئے

.....

اُلٹا روگ لگائی کے جان اُتے، تیرے حُسن دیارنوں چھوڑ ٹُریا
قسمت یا نصیب منیر میلا، حال سال اُمید تاں تروڑ ٹُریا“

.....

[سی حرفی نمبر 12]

بہ مناقب شیخ المشائخ حاجی الحرمین الشریفین حضرت قبلہ عالم و عالمیاں
سجادہ نشین ابوالبرکات سید محمد فضل شاہ دام اللہ برکاتہم
مسند آرائے جلالپور شریف



الف

اک اوہ لاشریک صاحب جس دی نہیں نظیر مثال کوئی
صاحب امر دا خود مختار حاکم، جس دا حکم نہ سکدا ٹال کوئی
مالک ملک حدوث قدیم دا اوہ، جس ذات نوں نہیں زوال کوئی
محمد شفیع توحید دی کنہ پاوے، ناقص عقل دی نہیں مجال کوئی

الف

ازل تھیں ابد دے دال توڑیں، مرکز میم محمدی جان اڑیا
کارن پیارے ایڈ پسار کیتے، عرش فرش زمین اسمان اڑیا
ساڈا قدر کیہ نعت سنانے دا، واصف جہاں دا آپ رحمن اڑیا
محمد شفیع جبریل امین کولوں، پچھو پاک رسول دی شان اڑیا

الف

ازل تے ابد دی حد اندر، مرکز میم محمود محمدی اے
لوح قلم حضور غیاب جو کجھ، عرش فرش مقصود محمدی اے
اتھے جن انسان حیران سارے، واصف آپ معبود محمدی اے
محمد شفیع مطلوب مرغوب خاطر، ارفع ذات وجود محمدی اے

الف

اس دے اسم توں جان واراں، جیہڑا فوق فضیلتاں لے آیا
لے کے ضو محمدی وِچ ورثے، ڈیرا شہر جلالپور آن لایا
اوہدے فیض درجات دی بات کیہ اے، جیندی ذات تھیں شرف سادات پایا
محمد شفیع ایہ شاہ ولایتاں دا، جس دے پائے دا کسے نہ اوڑ پایا

ب

بدر منیر تے شمس رخشاں دونویں عکس اوس ماہ جمال دے نی
قیمت ہشت بہشت نہ ہون سانویں، جیندے زلف سندے ترٹے وال دے نی
حوراں سنے غلمان حیران سارے، طلبگار بیمار وصال دے نی
محمد شفیع میاں مدح خوان ہاں میں، اوہ جو لاڈلے غوث کمال دے نی

ت

تحت تے فوق تے عرض جوہر، ندی لا دی وِچ ڈبو آیا
چنبھی مار کے بحر اثبات اندر، مظہر عین توحید دا ہو آیا
سالک راہ سلوک دا جان واقف، مکھ آب حیات وِچ دھو آیا
محمد شفیع جناب دے مرتبے دا، ساڈی نظر اندر ناہیں کو آیا

ث

ثبت کینا دل دی لوح اُتے، نقش پیر والا نستعلیق کر کے
آیا نظر پیارا نور و نور سارا، ڈٹھا پا جھاتی جاں تحقیق کر کے
قدم پاک جناب دے چُم اکھیں، رکھے واگ صدیق تصدیق کر کے
محمد شفیع بدخواہ جو شاہ جی دے، مارے اوہناں نوں رب، زندیق کر کے

ج

جا دیکھو میرے پیر تائیں جھلی جائے نہ جھال جمال دی اے
سوہنا یوسفی مکھ تک بھکھ لہندی، فکر فاقیوں خبر نہ کال دی اے
سوہنا صورتوں سیرتوں انت سوہنا، اتھے قدر کی بدر ہلال دی اے
محمد شفیع اج حیدری باغ اندر گل اوہو جو پیر سیال دی اے

ح

حسن جمال دا تاج ملیا، میرے شاہ نوں خاص درگاہ وچوں
لکھاں ہون تجلیاں عاشقاں تے، حیدری رمز دی غمز نگاہ وچوں
شعلے طور دے نور دے دیہن چمکاں، اُپر دلاں دے زلف سیاہ وچوں
محمد شفیع ہر خوبیوں خوب احسن، ملیا بھلیاں نوں خضر راہ وچوں

خ

خاص توحید دے جام ساقی، وچ مجلساں عام ورتا رہیا
آہے جہاں دے بخت کرخت کھوٹے، سستے طالع آن جگا رہیا
جہڑے زنگ آلود قلوب آہے، اوٹھے پرتوے نور دے پا رہیا
محمد شفیع پنجاب دے بھاگ جاگے، معین الدین چشتی گویا آ رہیا

د

دراڑی گڈی فقر والی، حاصل آپ نوں قرب کمال ہويا
چن چمکیا فیض دا جگ اُتے، روشن شرق جنوب شمال ہويا
لکھاں قیس اولیں شنید اُتے، کارن دید شہید جمال ہويا
محمد شفیع کنگال غریب مفلس، دولت عشق ہتھوں مالامال ہويا

ذ

ذکر مذکور ملکوت اندر، چرچا عام ایہ وچ افلاک ہويا
آکھن سالک سادات تھیں پیر چشتی، بے نظیر سچا سید پاک ہويا
حامی دین متین دا وچ عالم، شان جہاں دے حرف لولاک ہويا
محمد شفیع بر اوج سما پوہتا، جہڑا چشتیاں دے در دی خاک ہويا

د

راز توحید دا گنج مخفی، قبلہ آپ تے گل مکشوف ڈٹھا
پیش نظر جناب دے عین ظاہر، بھانویں پیچ در پیچ ملفوف ڈٹھا
کرنا قصص بیان ہے لایعنی توڑے ہوگ اوہ غیر معروف ڈٹھا
محمد شفیع کمال حضور سدا، ناہیں کشف تے کجھ موقوف ڈٹھا

ذ

زندگی عمر دوام تنہاں، حاصل سدا جہاں ملاقات تیری
منگاں نت درگاہ تھیں چاہ کر کے، ہوواں وچ خدمت دن رات تیری
میرے واسطے لبناً سائغاً ہے، تیری مٹھری دات تھیں بات تیری
محمد شفیع ایہو کرامات وڈی، قبلہ جگ وچوں اپی ذات تیری

س

سمک تھیں لے سماء توڑیں، موجودات قبلہ مدح خوان تیری
بری بحری ہوائی مخلوق ساری، مملوک تے زیر فرمان تیری
صوری معنوی عین در عین ہستی بالاتر از فہم انسان تیری
محمد شفیع ممدوح دی مدح اندر قاصر پیچ کے قلم زبان تیری

ش

شمس توحید دا نور ذاتی، کرے دلاں اُتے لمعائیاں او
ذَرّے فیض خورشید تھیں چمک اٹھے، دیون وانگ ماہتاب تابانیاں او
ظلمت کفر دی ہو معدوم گئی، ہویاں نور ایمان ارزانیاں او
محمد شفیع مراد ارشاد میری، دیویں داد مخدوم جہانیاں او

ش

شرف ایہ تج غریب تائیں، دامن گیر جہڑا کامل ولی دا اے
چشتی پیر جیویں بدرمیر فلکی، جگر بند ایہ تاں حیدر علیٰ دا اے
دسے نفی اثبات دے بھید گجھے، واقف کار منزل خفی جلی دا اے
محمد شفیع میاں دولت مند اوہو، ٹکڑ منگ جہڑا اُسدی گلی دا اے

ص

صورتوں سیرتوں اج دسو، میرے پیر دا کون مثیل ہے جی
جہڑا کرے برابری پیش ہو کے دعویٰ اس دا بے دلیل ہے جی
لوڑ بھال ڈٹھا اس لال جیہا با جمال نہ کوئی جمیل ہے جی
محمد شفیع ایہ نور محمدی تھیں، روشن وِچ پنجاب قندیل ہے جی

ض

ضو تے روشنی برق خاطف، تیری مدح دے گل عنوان قبلہ
سورج چن تے ہوو اجرام فلکی، گُرسی عرش زمین اسمان قبلہ
فی احسن تقویم تخلیق تیری، جسدی کرے تصدیق قرآن قبلہ
محمد شفیع مسعود ملاکاں دا نال اِذن رَحْمٰن انسان قبلہ

ط

طوفِ تساؤزی گلی اندر، اساں عاشقاں دا دستور ہویا
جہرا لاسودوں سنگِ دلیر تیرا، تیرا بیت جنیوں بیتِ المعمور ہویا
دارالفیض جلالپور چشتیاں دا، دور دور توڑیں مشہور ہویا
محمد شفیع مقامِ عرفات گویاں، اساں عاشقاں شرفِ حضور ہویا

ظ

ظاہری باطنی پیر میرے، باہر حد بیان تھیں شان پایا
ہو کے اربعِ عناصروں جگ اندر، ایسا مرتبہ کس انسان پایا
بحرِ علم دا کان سخاوتاں دی، لقبِ غوث تے قطبِ زمان پایا
محمد شفیع اوہ بھاگ سوکھنی ہے، جس کسے ایہ فیض رسان پایا

ع

علمِ لدنیوں ہے شرفِ حاصل، سینہ کھولیا ربِ عَلام تیرا
نالِ عقلِ شعورِ معمور کر کے، مشہور کیتا جگ نام تیرا
خضرِ پیر جیسے درس گیر تیرے دستگیر بلند مقام تیرا
محمد شفیع جناب دی ذاتِ چمکھے، ہوسی خاتمہ خیر انجام تیرا

غ

غنی جہان دے لکھ داتے، تیری گلی دے اساں گدا ڈٹھے
والی روم تے شامِ ولایتاں دے، کردے سانکلاں وچ صدا ڈٹھے
تیری نظر اکسیر تھیں پیر میرے، فاسق چور ہوندے اولیا ڈٹھے
محمد شفیع سخاوتاں نام تیرے، جگ آکھدا واہ ازما ڈٹھے

ف

فضل فیاض دا فیض دائم، صبح شام ایہ عام دستور ہويا
گھلا حیدریٰ باب نوازشاں دا، اج ساکلاں دا دُکھ دُور ہويا
پاون فیض مراد تے شاد ہوں، دامن دولتیاں نال بھرپور ہويا
محمد شفیع دی آس نہ پاس جاوے، کر کے آس حضور، حضور ہويا

ق

قسمتاں ساڈیاں جاگ پیاں، جاگ لان والا سوہنا پیر آیا
سر تے رکھ دستار فضیلتاں دی، چشتی فقر اندر بے نظیر آیا
نال خلق محمدی پیش آوے، کعبے دلاں دے کرن تعمیر آیا
محمد شفیع اس شمس دا پرتوا ایہہ، جیندا لقب سراجا منیر آیا

ل

لکھ در لکھ تھیں لکھیا میں ہادی حق دا راہ وکھان والا
سدھی سڑک محمدی صاف رستہ، رہبر ہو کے نال لے جان والا
اتھے رزق طامات دی بات ناہیں، پاوے فیض برات ایقان والا
محمد شفیع مشائخ حیران سارے، تک حوصلہ اس جوان والا

م

ملک پنجاب وچ پیر چشتی، تازہ کرن فر عہد الست آیا
شکر گنج جناب فرید وانگوں، لے کے جام توحید بدست آیا
متھے نور محمدی چمک تارے، کرن کفر دے زور نوں پست آیا
محمد شفیع اس پیر دے مرتبے تھیں، دسو کون جہڑا بالا دست آیا

ن

نظر آیا رہبر پیر کامل، صاحب حسن جمال جلال والا
وڈی خوشی اج پیر پٹھان تائیں، کردا فخر جس تے پیر سیال والا
نقشبند تے قادری سہوردی، کہندے پیر پریشان کمال والا
محمد شفیع میاں شامل حال جیندے، فضل رب ایزد متعال والا

و

وچ دربار دُربار تیرے، پاون پار مسکین غریب شاہا
کرن گوش گزار گزارشاں نوں، تیرے لطف تھیں دُھک قریب شاہا
پاون فیض برکات نوازشاں دے، جہاں ازل تھیں نیک نصیب شاہا
محمد شفیع ہوی تاس جیڈ کہڑا، لُج پال اصل نجیب شاہا

ہ

ہفت اقلیم تکریم تنہاں، تیری بندگی جہاں تسلیم کیتی
اُچا مرتبہ اس درویش دا اے، منزل آپ دی جس حریم کیتی
علم حلم تے خلق عظیم تئے، شفقت آپ تے نبی کریم کیتی
محمد شفیع تے مہر دی اکھ رکھیں، جس نے مدح تیری ترقیم کیتی

لا

لا دی لے ہتھ تیغ ننگی، چڑھیا مار نعرہ تکبیر والا
ضیغم حیدری جس دیاں رگاں اندر، جوش ماردا خون شبیر والا
صفاں اُکدی سیف جیوں سیف اللہ، تیویں اثر اُس دی تقریر والا
محمد شفیع میدان قرطاس اندر، لیندے قلم کولوں کم تیر والا

الف

اساں غریباں دا ہور کھڑا پاسہ لوڑ تیری ہر حال قبلہ
اؤل نزع دی گھڑی درپیش اوکھی، دوجا قبر دا سخت احوال قبلہ
تریجا پُل صراط تے ساتھ منگاں، چوتھا وقت میزان اعمال قبلہ
محمد شفیع اوکھی گھاٹی حشر والی، نال و نال رکھیں نال و نال قبلہ

ی

یار حضور دی مدح اندر، لکھے چند حروف تعریف والے
جو کجھ لکھیا، لکھیا شوق پاروں، ناقص عقل تے فہم ضعیف والے
پاسن لذتاں درد نصیب جہڑے، طبع نیک مزاج لطیف والے
محمد شفیع ممدوح مخدوم میرے، حضرت صاحب جلالپور شریف والے

ی

یاراں تے دوستاں پیر بھائیاں، کراں عرض اے سنے مجید اُتے
کیتا شعر ایہ جگر دا خون کر کے کارن دوستاں اس امید اُتے
کرن عرض حضور دے وچ جا کے، رکھن مہر دی نظر مُرید اُتے
محمد شفیع سنے کلی چشتیاں دا، ہووے خاتمہ نیک توحید اُتے

☆ ”ارمغان چشتی (قلمی)“۔ صفحہ 9 تا 21۔

☆ حاشیہ از شاعر:

”تاریخ تصنیف اؤل: 27 اپریل، 1936ء در حلقہ پدھری۔

دوبارہ تصحیح کردہ تحریر بتاریخ 2 جولائی، 1961ء بمقام ڈومیلی۔“

[سی حرفی نمبر 13]

بہ مدح شرافت پناہ قبلہ گاہ جناب صاحبزادہ والا جاہ
سید محمد فضل شاہ صاحب مسند آرائے جلالپور شریف
 دام اللہ تعالیٰ برکاتہم



الف

اللہ اللہ سبحان اللہ قلم کنبدی مدح دے نام کولوں
 کاغذ ہیتوں صاف سفید ہويا، شرموں مس کالی اس کام کولوں
 رہیا جیو ڈولاوندا مدتاں تھیں، اوکھی کار دے مدح خام کولوں
 محمد شفیع اس کم نوں تھہ پایا، ہمت گھن حضور دے نام کولوں

الف

اسم حضور پر نور سندا عاشق اپنا درد زبان رکھدے
 اس ذکر تھیں رہن مسرور دائم، ایہو فکر تے ایہو دھیان رکھدے
 ایہو عاشقاں دولتاں دان ہونیاں، نہ کوئی غیر اسباب سامان رکھدے
 محمد شفیع اوہ نیک نصیب جھڑے، نہیں حاضری وچ نقصان رکھدے

الف

اس چراغ محمدی تے، جان وانگ پتنگ شہید ہوئی
 اکھ چا نہ تکیا غیر ولے، جس روز دی آپ دی دید ہوئی
 وصل آپ دا اصل مراد میری، ملی دید تاں عید سعید ہوئی
 محمد شفیع تے کرم دی نظر پاؤ، کیوں دیر وچ کار مرید ہوئی

الف

اسم شریف حضور دے تھیں، مٹھا منہ جیوں قند نبات ہوندی
پاواں جہات جاں نور آیات دی میں، گویا طور دی رات برات ہوندی
اُچا شان سادات دا وِچ عالم، جہاں نت صلوت سوغات ہوندی
محمد شفیع اوہ ویکھنا سوہنیا دا، اسے وِچ حصول نجات ہوندی

الف

اساں حضور دے اسم جیہی، لذت قند نبات وِچ نہیں ڈٹھی
جہڑی گل حضور دی گل اندر، اساں آب حیات وِچ نہیں ڈٹھی
جامع خوبیاں دی ایسی ذات اشرف، اساں شش جہات وِچ نہیں ڈٹھی
محمد شفیع میاں دسو کھڑی خوبی، جہڑی ابوالبرکات وِچ نہیں ڈٹھی

ب

برق خاٹف غرقِ عرق ہوئی، میرے پیر دا ویکھ جمال سوہنا
بدر کہے جناب دا قدر بالا، ہويا ادب تھیں گھٹ ہلال سوہنا
شمس بازغہ ہور اجرام جتنے، تھر تھر کنبدے ویکھ جلال سوہنا
محمد شفیع جناب دا حسن تک کے، لیا سوہنیاں کھ تے خال سوہنا

ب

بخش کرامتاں ازل وچوں ہوئیاں شان وڈی میرے پیر دی اے
حیدر شاہ دے لال دی فال روشن، جیوکر چاننی بدر منیر دی اے
فخر سیداں دا عزت چشتیاں دی، وڈی گل اج فضل امیر دی اے
محمد شفیع پر مدح وِچ شعر تیرا، نہیں رکھدا قدر شعیر دی اے

ت

تاج حضوری دا پہن کے تے سوہنا وِچ درگاہ منظور سُیا
آون لوک زیارتاں لین دُوروں شیشہ دِلاں دا عشق تھیں چُور سُیا
لنگر فیض جاری آوے خلق ساری دامن سائلاں دا بھرپور سُیا
محمد شفیع جلالپور کیلناں دا، سارے جگ ”شریف“ مشہور سُیا

ث

ثبت کیتا دل دی لوح اُتے، حضرت آپ دا اسم تکریم کر کے
ف، ض تے ل نوں ادب سیتی، پڑھاں بسم اللہ سو تعظیم کر کے
ف فضل ربی سبحان اللہ، پایا شرف ایہ حرف ترقیم کر کے
محمد شفیع میں ہوئی تسکین قلبی خواجہ آپ نوں پیر تسلیم کر کے

ج

جا دیکھو چشتی پیر میرا، جس دے حُسن توں عین شباب صدقہ
جس دی غمز دی رمز تے قلب زخمی، جس دے حُسن توں لعل مذاہب صدقہ
جس دی برق تاثیر تصویر اُتوں حُسن یوسفی وِچ حجاب صدقہ
محمد شفیع اوہ مست مجذوب کردا، کہو نظر تھیں باجھ شراب صدقہ

ج

جا جلالپور شریف اندر، سایہ رحمتی ابر سحاب اوتھ
جس دے وِچ تشریف شریف رکھدے، خواجہ ابوالبرکات جناب اوتھ
بیٹھے ہون گے مجلساں لا سوہنے، سنگت صوفیاں ہور احباب اوتھ
محمد شفیع حضور دے وِچ جائیں، نال ادب نیاز آداب اوتھ

ح

حسن تے خلق وچ فرد سوہنا دور دور تک نہیں مثال جس دی
جیندے سخن لذیذ جہیوں شہد شیریں، مٹھی وانگ زبیب دے قال جس دی
قائد قوم دا صدر نشین مجلس، دُہم پئی جنوب شمال جس دی
محمد شفیع میاں کارن فاسقاں دے، ذکر وعظ ہے تیغ ہلال جس دی

خ

خوب ہر خوبیوں بڑی خوبی، میرے پیر نوں آپ خدا دتی
اوّل خلق محمدی بڑی خوبی، زینت جس دی نال حیا دتی
دانش فہم تے عقل تے علم تے، ذہن تیز تے طبع رسا دتی
محمد شفیع سونی صورت یوسفی نے، گنڈی وچ کلیجیاں پا دتی

د

دیر درنگ نہ کریں طالب، غالب شوق والے بھنے آوندے نی
قدم بوس ہو کے چشتی پیر سندے، خوشی عید تھیں ودھ مناوندے نی
عاشق ہوں محفوظ ملفوظ سُن کے، جو حضور ارشاد فرماوندے نی
محمد شفیع مبارکاں پیر بھائیاں، جہڑے مجلساں ایسیاں پاوندے نی

ذ

ذکر حضور دیاں خوبیاں دا، میری قلم دا نہیں مقدور لکھے
نسبت خاک دی نال افلاک کتھوں، طبع کند تے ذہن رنجور لکھے
عالی قدر سجادہ نشین چشتی، ثانی نہیں جس دا دُور دُور لکھے
محمد شفیع ممدوح دا شان بالا، الثا مدح نوں شرف حضور لکھے

ذ

ذکر بیان حضور دے جیہی چنگی چیز کوئی وچ جہان ناہیں
جس نوں یاد حبیب نصیب ہوگئی، کامل اس جیہا کسے ایمان ناہیں
جہاں دلاں تے غفلتوں پئے پردے، اوہناں جیہا کوئی وچ نقصان ناہیں
محمد شفیع پر رب دی مہر باجھوں، عام خام ایہ دولتاں پان ناہیں

ذ

ذات لچال حضور دی اے برکت فیض دا انت حساب ناہیں
عالمگیر تاثیر اس پیر دی اے، اثر حصر کوئی خاص پنجاب ناہیں
کعبہ جان جلالپور جان عاشق، کون آکھدا حج ثواب ناہیں
محمد شفیع محمدی نور والی، روشن شمع ایہ وچ حجاب ناہیں

د

رنگ تے روپ نہ شکل کوئی، جاناں گل نہ ادب آداب دی میں
گھاٹ علم تے عقل دی تھوڑ نالے، واقف کار نہ شعر نصاب دی میں
لکھاں حرف میں شرف تے شان والے، اندر مدح شریف جناب دی میں
محمد شفیع اس مدح دے بحر اندر، طبع زار مثال حباب دی میں

س

سج تے دھج پیارڑے دی بادشاہاں دی شان نوں مات کردی
شاہنشاہ اوہ آپ زمانیاں دا، خلقت خدمتاں دن تے رات کردی
نکا نبی دی آل دا لال سچا، جس تے فخر ساری موجودات کردی
محمد شفیع میاں نگہ پاک جس دی، دُور دلاں دے زنگ ظلمات کردی

ش

شرف حضور دی صحبتاں دا اساں عاصیاں حشر نجات ڈٹھی
صورت آپ دی عین انعام ربی اساں عاشقاں طور دی جہات ڈٹھی
سدا قال وچ قال رسول دی اے، یا فر قال قرآن آیات ڈٹھی
محمد شفیع ایہ آب حیات چشتی، قسمت والیاں نیک برات ڈٹھی

ص

صرف میں عرض گزار اتنی میرے عیب قصور معاف کر دے
مضغہ قلب دا زنگ آلود میرا، اس نوں نال نگاہ دے صاف کر دے
میریاں غلطیاں تے پردہ پائیاں، میرے جرم وچ عفو غلاف کر دے
محمد شفیع ایہ نت دعا میری، قسمت عین تے شین تے قاف کر دے

ض

ضرب نگاہ دی ہک کافی، طلبگار مرید مراد دا اے
ظالم نفس خصومتاں چا بیٹھا، غوث الوقت ایہ وقت امداد دا اے
جرعہ خام نوں بخش انعام ساقی، ہویا دیر کیوں لفظ ارشاد دا اے
محمد شفیع سنوارنا کم تیرا میرے جیسے تاں کم سواد دا اے

ض

ضرب سکہ جاری دلاں اُتے خطبہ وچ ایوان افلاک تیرا
چشتی پیر مخدوم جہانیاں دا سارے جگ دسے کاماں چاک تیرا
حاسد سڑن پئے حسد دی اگ اندر، عالی قدر کیتا اللہ پاک تیرا
محمد شفیع میاں ہویا سخت عاجز اتھے مدح وچ فکر چالاک تیرا

ط

طرف اکناف اطراف چارے ڈٹھا نہیں کوئی آپ دے شان والا
جیندے خد دے حسن دی حد ناہیں سوہنا قد ایہ چن آسمان والا
حوراں تکن جھروکیوں پا جھاتی، آکھن خوب ایہ روپ انسان والا
محمد شفیع حضور دی ویکھ صورت توبہ کوئی نہیں جان بچان والا

ظ

ظرف خالی اُتے باب عالی، کیتی صدا سائل عاجز حال ہاں میں
پاو خیر گولی کھلی آڈ جھولی بخشو دان داتا جے کنگال ہاں میں
عالی قدر دربار دربار تیرا، درد مند دُکھی پائمال ہاں میں
محمد شفیع حشر ہووے نال تیرے، بیٹھا رکھ ایہ کب سوال ہاں میں

ظ

ظرف عالی میرے پیر دا اے صبر حوصلہ ضبط کمال ڈٹھا
دائم رب دی وچ رضا راضی، ہر حال اندر خوش حال ڈٹھا
نال عاجزاں خلق پیار ورتن کدی طبع وچ نہیں ملال ڈٹھا
محمد شفیع اس قحط الرجال اندر، ڈٹھا پیر پر بے مثال ڈٹھا

ع

عام انعام نوازشاں دا لنگر فیض جاری صبح شام ہويا
روم شام توڑیں دھوم دھام جس دی، درتے خلقتاں دا اژدھام ہويا
آون خام جاون پختہ کام ہو کئے، گویا ہر ناکام دا کام ہويا
محمد شفیع سمندروں بخش قطرہ، خالی شوق شراب تھیں جام ہويا

غ

غوث تے قطب زمانیاں دا، خولجہ پیر چشتی دستگیر آیا
صاحب شرح تے ورع عبادتاں دا، بے مثال آیا بے نظیر آیا
دیوے درس تنظیم دا وچ ملکاں، وحدت ملی دا فخر امیر آیا
محمد شفیع میاں دکھ دُور ہوئے، بن کے زخم دی مرہم جبریر آیا

ف

فضل ربی سبحان اللہ، میرے پیر تے فضل کمال ہويا
صورت بدرمیر تے وچ سیرت بے نظیر تے بے مثال ہويا
دولت علم عرفان دا گنج مخفی، مشہور جنوب شمال ہويا
محمد شفیع میاں دنیا دین ولوں، فرخ فال بلند اقبال ہويا

ف

فضل فیاض نے فیض روجی سارے جگ دے وچ کھلاریا اے
گویا خولجہ نظام الدین چشتی تنبو آن جلالپور ماریا اے
دستگیر کرامتاں بخش ہوئیاں ڈبیاں بیڑیاں نوں خولجہ تاریا اے
محمد شفیع مجبور مجبور تائیں دسو کیوں حضور وساریا اے

ق

قرب حضوریاں جمدیاں ہی، ہوئیاں بخش سید عالی ذات تائیں
چشتی پیر پٹھان دا فیض قائم دائم اس عالی درجات تائیں
ہوئے بخش سرُوپے منظوریاں دے سید پیر ابوالبرکات تائیں
محمد شفیع دی دیو مراد قبلہ مگے آپ تھیں خیر صدقات تائیں

ک

کرے کریمیاں عاجزاں تے طبع نیک مزاج سلیم والا
کرے رنج نہ کسے محتاج تائیں، نبی پاک دے خُلق عظیم والا
دل دا نرم سرگرم سخاوتاں وِچ بحر کرم اوہ فیض عیمیم والا
محمد شفیع اِس پیر دا ذکر دل نوں کرے نرم جہیوں اثر نسیم والا

ک

کالماں دا کامل پیر میرا جس دی نظر تاثیر اکسیر رکھدی
جس دے قلب دا رنگ نہ صقل ہووے، میرے پیر دی نظر تاثیر رکھدی
شقی ازل دے ہون سعید ڈٹھے، کرامات ایہ وعظ تقریر رکھدی
محمد شفیع دعا درگاہ اندر، اوہدی ہدف مراد تے تیر رکھدی

ل

لعل ہیرا موتی صدف سچا، صدقے نبی کریم دی آل اُتوں
خاندان سادات دا فخر بیشک، صدقے جان اس حیدری لال اُتوں
خلقت واردی جان پتنگ وانگوں سید پاک دے حسن جمال اُتوں
محمد شفیع گھر بار نثار صدقے، سید فضل شاہ پیر کمال اُتوں

ل

لگ لاہور پشور توڑیں میرے پیر جیہا نہیں کوئی ہور سوہنا
سوہنی قال کلام زبیب مٹھی، رُدا کبک والی سوہنی ٹور سوہنا
سوہنا سوہدا مجلساں وِچ جیونکر، پاوے پانکلاں باغ وِچ مور سوہنا
محمد شفیع میاں آپے عدل عادل، آپے دلاں نوں لُدا چور سوہنا

م

محی الدین دا لقب عالی میراں پیر بغداد ارشاد کیتا
حیدر پیر دی نظر اکسیر کولوں، حاصل فیض ولی مادر زاد کیتا
خلعت فقر دستار فضیلتاں دی، دے کے مرتبہ ہوو ایزاد کیتا
محمد شفیع پنجاب دے بھاگ جاگے، آ کے دلاں دا ملک آباد کیتا

ن

نام دا کرو انعام مرشد توڑے سخت گندہ بدنام ہاں میں
پھراں خوار ہر گلی بازار اندر جانے جگ تیں نفر غلام ہاں میں
تیری نظر تاثیر اکسیر سونا، لوہا زنگ آلود تے خام ہاں میں
محمد شفیع کریم سن ذات تیری، در تے آن کھلا لے کے جام ہاں میں

و

وچ جلالپور شریف دیکھو، چشتی تحت اُتے کامل مرد ڈٹھا
صاحب درد تے سوز محبتاں دا، خنی مرد جواد اج فرد ڈٹھا
اپنے وقت دا فرد فرید وانگوں، عاشق رہدا صاحب درد ڈٹھا
محمد شفیع اج گرم بازار چشتی اپر حاسداں دا چہرہ زرد ڈٹھا

ہ

ہر پاسے ہر طرف اندر شرف شان ماہی بے انداز سُنیا
صاحب خیر ”برکات“ ”حسنات“ دا ایہ تے ”شفقات“ غریب نواز سُنیا⁽¹⁾
بر و بحر تے شہر دیہات اندر، فکر خیر وچ ریل جہاز سُنیا
محمد شفیع حضور دیاں خوبیاں دا جتھوں تیک سُنیا نیک آواز سُنیا

لا

لاج مرید دی پیر تائیں خوف قبر قیامتوں رکھنا کہیہ
جہاں نوش پریم دے جام کیے مزہ موت دا اوہناں نے چکھنا کہیہ
جہاں لذتاں عشق نصیب ہوياں، اوہناں ڈھونڈنا دودھ تے مکھنا کہیہ
محمد شفیع حضور تے عرض ایہو! خالی ٹورنا موڑ کے سکھناں کہیہ

الف

اس دربار نوں چھوڑ کے تے، دسو جا کھڑی جتھے جادوساں میں
جاسی دم سنگ غم محبتاں دے، پچھاں قدم نہ مول ہٹاوساں میں
سولی سار منظور منصور والی، کھو عشق دا حرف پکاوساں میں
محمد شفیع میاں چشتی پیر تائیں، قبلہ جان کے سیس نواوساں میں

ی

یمن حضور دا فیض برکت، سینہ عشق دے نال آباد ہووے
مردی وار زبان تے پھرے کلمہ، نزع سوکھڑی قبر کشاد ہووے
جھنڈے نبی دے پیٹھ تے آب کوثر قاسم نبی دا پاک داماد ہووے
محمد شفیع ایہ دولتاں بھاگ اُس دے، چشتی پیر دی جس امداد ہووے

☆ ”ارمغان چشتی (قلمی)“۔ صفحہ 23 تا 37۔

☆ حاشیہ از شاعر:

”10 اگست، 1942ء بمطابق 1361ھ بمقام بھون

تصنیف کی گئی (تصنیف اول)۔ تحریر ہذا بمقام دو میلی 4

جولائی، 1961ء بروز چہار شنبہ بوقت ظہر کی گئی۔“

1۔ صاحبزادگان سید محمد فضل شاہ رحمۃ اللہ علیہ۔

[سی حرفی نمبر 14]

بہ مدح حضرت خواجہ غریب نواز سید محمد فضل شاہ صاحب

سجادہ نشین جلالپور شریف دام اللہ برکاتہم



الف

اُتھوں سیاہیاں چان ڈیرے جتھے حُسن دا بلے چراغ تیرا
میریاں اکھیاں نت دعا ممکن، کھڑیا حُسن دا رہے ایہ باغ تیرا
بلبل بھور مشتاق عشاق لاکھاں، گل لالڑے دے سینے داغ تیرا
محمد شفیع اِس سخی کریم ہوندے، خالی رہے فیر کیوں ایاغ تیرا

ب

برق جمال دی جھال جھلن میریاں دیدیاں وچ ناہیں تاب اتنی
اللہ پاک دے فضل تے کرم کولوں، صورت کسے نہیں فیض مآب اتنی
اج تک وچ پنجاب دے پائی ناہیں شہرت کسے نے آپ جناب اتنی
محمد شفیع ممدوح موصوف سندی، آوے صفت نہ وچ حساب اتنی

ت

تاج ملیا تینوں خویاں دا جس دیکھیا ”خوب“ پکاریا او
تیرے حسن جمال توں جان صدقے، سارے جگ وچوں مینوں پیاریا او
تیری مٹھری وات دی بات مٹھی، کھنڈ مصری تے قد پاریا او
محمد شفیع اوہ چمدا جگ جائیں، جائیں لنگھ جتھوں جگوں نیاریا او

ٹ

ثابتی صدق دے نال ڈٹھا چٹھا کھول دتا اللہ پاک میرا
میری جان حزیں تسکین پاوے، تیرا ذکر ہے وانگ خوراک میرا
بھادیں سنگ تے انگ انگ ہوئے، ودھ تساں کولوں کون ساک میرا
محمد شفیع میری خوش قسمتی ایہ تیرے عشق کولوں سینہ چاک میرا

ج

جان دا جان انعام جہڑا کراں اُس توں جان قربان صدقے
میرا مال متاع گھر بار جو کجھ میرا دھرم تے دین ایمان صدقے
جس دے حسن دی شمع کافور اُتے ہوندے وانگ پتنگ انسان صدقے
محمد شفیع اس ماہ انوار اُتوں، حسن یوسفی دی داستان صدقے

ح

حل کر میریاں مشکلاں نوں خضر پیر میرا دنگیر ہیں توں
میری گٹ زنجیر اسیر ہاں میں سخی سخی دا خیر کثیر ہیں توں
عالی قدر مقام بلند تیرا پاکباز تے پاک خمیر ہیں توں
محمد شفیع اج آکھدا جگ سارا ہندالولی تے پیراں دا پیر ہیں توں

خ

خدمتاں تیریاں جگ کردا بدھے ہتھ غریب نواز قبلہ
حاضر باش دلیہر مخدوم دی تے، محمود جئے وانگ ایاز قبلہ
واصل وصل وصول وصال اصلی، خاص الخالص ہوویوں محرم راز قبلہ
محمد شفیع حضوریاں بخش مینوں، ہوئی ہجر تھیں جان گداز قبلہ

د

دولتاں گنج خزانیاں دے، تینوں بخش کیتے اللہ پاک مرشد
بختیار سرکار نے یار تیرے، تیریاں دوتیاں دے سر خاک مرشد
جد پاک حضور دی پاک ورثہ جینوں شرف ہے حرف لولاک مرشد
محمد شفیع میں مدح کی لکھن جوگا، ناقص عقل تے گند ادراک مرشد

ذ

ذره ہاں بے مقدار توڑے ناقص کم قیمت کسے کم دا نہ؟
تیرے مہر دی چمک تھیں چمک ماری، توڑے جام لائق تھہ جم دا نہ؟
تسیں نیک تے پاک آفاق اندر، کیا میں قطرہ تہنڈڑے یم دا نہ؟
محمد شفیع عنایتاں ہورناں تے، کیا میں دلوں عاشق تیرے دم دا نہ؟

د

راج ریاستاں بخش ہوئیاں ملیا فقر دا تاج حضور وچوں
جس دے نور تھیں کل ظہور ہویا پایا شرف تاں اس دے نور وچوں
اوہو نور حضور دے وچ متھے، جہڑا ہمکلیا نور سی طور وچوں
محمد شفیع ایہ عشق دا فیض سارا میرا شعر نہیں عقل شعور وچوں

ذ

زیب تک خلق محمدی تھیں ملک فلک دے دیکھ نہال ہوندے
شمع چھوڑ پروانڑے جان کتھے، عاشق وانگ بلال حلال ہوندے
نظر باز مجاز تھیں کرن توبہ حرص آز کولوں انفصال ہوندے
محمد شفیع کس چیز دی لوڑ مینوں دسو دوستو پیر جلال ہوندے

س

سوہنیاں صورتاں لگھ بھاویں ایپر تہنڈڑا حسن جمال وکھرا
توڑے سے معشوقاں دے ناز نخرے ایپر تہنڈڑی زلف دا وال وکھرا
بادشاہاں دی ہے بھاویں عجب چڑھتل ایپر تہنڈڑا جاہ جلال وکھرا
محمد شفیع توڑے سخی جگ سارا ایپر پیر مرا لچپال وکھرا

س

سرود سوہنا توڑے باغ اندر تیرے قد جیہا پر اوہ کد سوہی
تیرے سخی مٹھے لذت دار شیریں ہر بات وچ اپنی حد سوہی
سوہنے دند جیوں چنے دیاں ہون کلیاں وچ سوہنیاں دے سوہنا قد سوہی
محمد شفیع اوہ تل رخسار اُتے جیوکر آئیناں دے وچ مد سوہی

ش

شمس ہدایت مآب آ کے کیتیاں کفر دیاں دور سیاہیاں نیں
مالی باغ دی آن سمھال کیتی کلیاں کلیموں بھرن گواہیاں نیں
برکت یمن اس پیر دا فاسقاں نے، پھڑیا راہ، چھڈیاں گراہیاں نیں
محمد شفیع گلیاں عاشق مل بیٹھے پایاں پیر دے عشق نے پھاہیاں نیں

ص

صوفیاں دے مقصود تسیں، کامل آپ تھیں آن تکمیل کردے
بدھے تہہ نے جن انسان حاضر، تیرے حکم دی ملک تعمیل کردے
عاشق بیٹھ کے وچ مراقبہ دے، ذکر فکر وچ جان تحلیل کردے
محمد شفیع میاں سالک آپ کولوں، آ کے فیض توحید تحصیل کردے

ض

ضرب تساڑی نگہ والی، کوٹ صبر قرار دے ڈھاہ دیندی
اس اکھ دے قہر تھیں رب رکھے، راہ جانڈیاں نوں جھڑی پھاہ دیندی
ہیت حُسن دی نال اشاریاں دے، بادشاہاں نوں تخت توں لاہ دیندی
محمد شفیع ادنیٰ کرامات تیری، ساری عمر دے بخش گناہ دیندی

ط

طرح تساڑے حسن والی اس طرح تے گرہ لگان مشکل
سونہ رب دی اس جہان اندر، مدح جیہا نہیں ہوو عنوان مشکل
میرا عقل محدود، شعور ناقص، ہوندی مدح دی کہن زبان مشکل
محمد شفیع اس مدح شریف والی، رب کرے تے ہووے آسان مشکل

ظ

ظفر مندی تیرے حسن دی اے، اج دلاں دے ملک تے راج تیرا
تیری ہفت اقلیم وچ بادشاہی، ڈٹھا باج گزار ہر تاج تیرا
تیریاں رفعتاں نوں پاوے کون کوئی، جھڑا جگ دا کل اوہ آج تیرا
محمد شفیع ایہ نت دعا میری، سدا رہے ایہ بحر مواج تیرا

ع

عقل شعور دستور دیگر اپر ذوق تے شوق دی بات وکھری
جلوے لیلۃ القدر دے بہوں چنگے اپر آپ دے حسن دی جہات وکھری
سوہنے خن توڑے سخنوراں سندے، اوہدا سخن وکھرا اوہدی بات وکھری
محمد شفیع بندوق دے زخم کولوں، میرے پیر دے غمز دی کات وکھری

ع

علم علوم مروجہ تھیں، بالخصوص نہیں رہیا محروم سوہنا
مخزن علم توحید دا گنج مخفی، لقب آپ دا بحر العلوم سوہنا
پڑاثر تقریر دلپذیر احسن، تے دیر اعلیٰ ایہ مخدوم سوہنا
محمد شفیع سوہنا وچ سوہنیاں دے، لگدا چن جنیوں وچ نجوم سوہنا

غ

غم رُبا ہے عاشقاں دی، تیرے پاک جمال دی جہاں قبلہ
جہاں درد فراق سنگ جال آہی، اوہناں جیہا نہ کوئی پائمال قبلہ
سد کول تے مٹھرا بول مونہوں، بخش جام زلال وصال قبلہ
محمد شفیع جدائیاں پیش آئیاں، دکھ درد فراق دے ٹال قبلہ

غ

غیر کیوں کرن قبول اکھیں، تیرے حسن دیاں سیوادر ہو کے
بھالاں بھور دے طور نہ ہوو کوئی، تیری شمع دا جان نثار ہو کے
بنے غیر دی ہدف کیوں جان میری، تیری غمز دی اصل فگار ہو کے
محمد شفیع جے مڑاں حضور ولوں، سڑاں ہادیے حشر خوار ہو کے

غ

غم کیہ اُس غلام تائیں، جس تے پیر دی خاص نگاہ ہووے
صحت فیض حسیض گناہ وچوں، کڈھے عمر دا جو گمراہ ہووے
جیندی نظر اکسیر تھیں بنے سونا، ناقص مس جس اصل سیاہ ہووے
محمد شفیع گویا جاگے بھاگ اُس دے، جس دا پیر سید فضل شاہ ہووے

ف

فضل اودہ رب متعال والہ گنج فیض انعام اکرام دا اے
عام خاص دی نہیں تخصیص کوئی، ہوندا کام ہر خام ناکام دا اے
صرف صرف حضور دے اسم والا، شرف حج تے عید احرام دا اے
محمد شفیع میاں طلبگار در تے، درد سوز گداز دے جام دا اے

ق

قلعے قلوب تسخیر کیتے، میرے پیر بن تیغ شمشیر یارو
جیندی زلف زنجیر دے ہوئے قیدی، عقلمند دانے با تدبیر یارو
جیندے خلق دی خلق اسیر ہوئی، واہ وا پیر سید بے نظیر یارو
محمد شفیع اس پیر دے وصف و اصف، کردے مت تقریر تحریر یارو

ک

کون ہوواں لکھاں مدح تیری، ڈراں عقل تے علم محدود کولوں
سنگاں، علم دا نہیں نصاب پکے، منگاں مدح دا زور و دود کولوں
میرے دلے دا کون آزار جانے، طبع تنگ ہے ہجر حسود کولوں
محمد شفیع تے فضل تے مہر ہووے، منگاں کرم احسان محمود کولوں

ک

کند ادراک تے عقل اقل، ناقص فہم نالے معلومات کوئی نہ
نالے علم عروض تھیں ناواقف، جاناں شعر سندی تصریحات کوئی نہ
میم مدح تھیں جان تے ہول طاری، جاناں نقص تے سقم نکات کوئی نہ
محمد شفیع نظر حضور دے تھیں، ہو سکے نہ حل، ایسی بات کوئی نہ

م

مہر دی کرو نگاہ جس تے، درد مند دُکھی دلشاد ہوندا
جس دے حق وِچ خیر دعا منگو، بامراد ہوندا بامراد ہوندا
جس کمبخت دے بخت کرخت کھوٹے، ہووے غیر آباد آباد ہوندا
محمد شفیع درویش دل ریش عاجز، کاہنوں پھرے در در خانہ زاد ہوندا

م

مہر دی کرو نگاہ قبلہ، سن کے آیا سخاوتاں دُور تھیں میں
دنیا دین دا دان درکار ناہیں، رتی عشق دی منگاں حضور تھیں میں
عاجز حال مسکین غریب شوہدا، ناقص ناکس تے دُور شعور تھیں میں
محمد شفیع گناہ دے چاہ وچوں، کدھو شاہ جی باہر ضرور تھیں میں

ن

نال نزاکتاں قدم چاون، گویا طبع نسیم دے نال دی اے
سوہنی انگ پوشاک بُراق چٹی، زینت زیب مضاعف جمال دی اے
عاشق وانگ پتنگ ننگ آون، طلب جہاں نوں صرف وصال دی اے
محمد شفیع حضور فریاد پونچو، گھڑی دماں تے سخت وبال دی اے

و

دیکھ حضور دا رُخ انور گیا بھل لوکاں ماہ کنعان والا
اندر دشت توحید دے ہرن ہیرا، غمزیوں دلاں نوں ہدف بنان والا
سید پیر امیر زمانے دا، جس تھیں فیض سارا جگ پان والا
محمد شفیع سید فضل شاہ حاجی، دُکھی دلاں دے روگ وِجان والا

۵

ہد ہد میہنڈڑے شوق والا، دست آموز تده شاہ سلیمان دا اے
تساں حسن دا تخت تے راج حاصل، ہور حکم زمین آسمان دا اے
سینہ وانگ آئینے دے صاف روشن، جس وچ پرتوہ خاص رُٹمن دا اے
محمد شفیع اج دُور حضور وچوں بخت نافرجام نادان دا اے

لا

لا مرید تے پیرِ اِلا، نفی اپنی کراں، اثبات تیرا
میرا جان وجود نابود مطلق، جاری حکم اندر موجودات تیرا
میری نفی تھیں عین مقصود ثابت، اثبات حضور بالذات تیرا
محمد شفیع بقا دی وچ منزل، رتبہ عین مجیب الدعوات تیرا

الف

ابوالبرکات دا اسم اقدس، قُدسی اپنا ورد زبان رکھدے
اس اسم شریف لطیف اندر، عاشق اپنی غرض نہان رکھدے
منگاں فضل نہیں عمل دی راس پکے، عاصی اسم ایہ نت دھیان رکھدے
محمد شفیع میاں فضل پیر والا، عاشق آسرا وچ جہان رکھدے

الف

اسم تیرا مقصود میرا، جانے رب وَدود جو ملگدی میں
ڈراں، کراں نہ عرض حضور اندر، نکا مُونہہ وڈی گل، سنگدی میں
لگی انگ تیرے، پالیں انگ سائیاں، رکھیں لاج نلاج ملگدی میں
محمد شفیع ہزارے دا چودھری توں، بندی ہیر مندی، گندی جھنگ دی میں

ی

یا مرشد! پیاں بحر ڈونگھے، آ باہوڑیں کڈھ گراب وچوں
صدقہ شاہ اجیر نہ دیر لاؤ، کرو جان آزاد عذاب وچوں
مانن سکھ حریف، میں دُکھ جالاں، کرو دُور حجاب شتاب وچوں
محمد شفیع توحید دی دوستی تھیں، پاواں حشر نجات عذاب وچوں



☆ ”ارمغان چشتی (قلمی)“۔ صفحہ 39 تا 51۔

☆ حاشیہ از شاعر:

”رجب 1362ھ، 11 اگست، 1943ء بمقام میرا، بھون تحریر
اول کردہ شد۔ تصنیف دوم: 7 جولائی، 1961ء بمقام دو میلی،
بروز جمعہ بوقت غروب آفتاب۔“

.....

[سی حرفی نمبر 15]

درتو صیف و تعریف حضرت سجادہ نشین جلاپور شریف مدظلہ



الف

اعظم ایہ پیراں دا پیر میرا، کشتی چشتیاں دی بنے لان والا
وحدت عشق دا سبق پڑھان والا، دُور گیاں نوں کول بُلان والا
سبق نفی اثبات سمجھان والا، موت و اقبال دا جام پلان والا
محمد شفیع ایہو کامل پیر میرا، سینے عشق دی اگ مچان والا

ب

بال توحید دی شمع نوری، آیا فیض مآب پنجاب اندر
ٹھاٹھاں ماردا فیض دا بحر ڈٹھا، نظر ہوئی نہ گم سراب اندر
پیاں نور تجلیاں طور اُتے، گل رہی نہ کجھ حجاب اندر
محمد شفیع مبارکاں عاشقاں نوں، عکس شمس دا ویکھ ماہتاب اندر

ت

تاج سرتے حسن یوسفی دا، آیا رکھ سوہنا دل رُبا سید
دل لُندا صوفیاں سالکاں دے، جدوں ویکھدا اکھ بھنوا سید
قبلہ گاہ غریب نواز آقا، مخدوم عالی، مقتدا سید
محمد شفیع اجمیر شریف توڑیں، آکھن پیر سارے، مرجبا سید

ٹ

ثانی وچ حسن دے کون جانی، مانی دیکھ کے نقش دیوار ہويا
ناقص نقش نقش منقوش چینی، تک رنگ ارژنگ فرار ہويا
جھلن جھال مجال کی سوہنیاں دی، جلوہ شمس مثال انوار ہويا
محمد شفیع اس نور مجسمے تے، سارا جگ سنسار نثار ہويا

ج

جاندا جگ جہان سارا، حیدر پیر اس غوث زمان تائیں
اس پیر دا نظر منظور سید، جس دا غلغلہ عرش مکان تائیں
جس دے فقر غیور دی نظر اندر، قدر گلہ دی نہیں سلطان تائیں
محمد شفیع نہیں تاب زبان اندر، لکھاں پیر دی مدح تے شان تائیں

ح

جج تے عید ہے دید تیرا، اساں عاشقاں درد رسیدیاں نوں
تیرے دید سعید توں ملے فرحت، فرقت زدہ عشاق دیاں دیدیاں نوں
بھلے کم تے کاج جہان والے، پڑھاں آپ دیاں مدحاں قصیدیاں نوں
محمد شفیع حضورییاں بخش بھاویں، سکھیں وسدیا! عشق شوریدیاں نوں

خ

خاک اقدام دی پاک اشرف، عاشق پُمدے نال آداب صدقہ
اوہناں قاب قوسین بھروٹیاں توں، کراں کیوں نہ گول محراب صدقہ
اس قامت قیامت نشان اُتوں، کراں سرو صنوبر دی آب صدقہ
محمد شفیع اس نور دی جہات اُتوں، کراں طور دا ذکر ثواب صدقہ

د

دید حضور دی شمع اُتے عاشق وانگ پتنگ شہید ہوندے
فاسق عمر دے آپ دی نظر کولوں تائب آن مُرید ہوندے
اثر فیض حضور دیاں مجلساں دا، کالے چور، ثانی بایزید ہوندے
محمد شفیع میاں حضرت صاحب کولوں، ناقص فرد، وِچ بحر توحید ہوندے

ذ

ذبح حضور دے غمز والی، کردی کرد سائیاں، راہیاں جانڈیاں نوں
دلو آب دیدار دا آپ ہتھیں، اوہناں عاشقاں ہجر دیاں ماندیاں نوں
کرو کرم سرگرم اڈیک اندر، ہوئی دیر بتیر گرلانڈیاں نوں
محمد شفیع کوئی ہرج حضور ناہیں، تشریف شریف فرمانڈیاں نوں

ذ

ذات سادات دی مہا اُتم، عزت شان دا کوئی حساب ناہیں
جیندا اصل مدینۃ العلم نبی، علیٰ باجھ جس دا دُوجھا باب ناہیں
دسو کون حسنین دے مرتبے دا، جیندا وِچ کونین جواب ناہیں
محمد شفیع تطہیر دیاں پردیاں دا، رازدار کوئی باجھ وہاب ناہیں

ر

رحم رافت وِچ طبع عالی، بردبار حلیم مزاج رکھدا
خدمتگار مخلوق مملوک عالم، سرتے یوسفی حسن دا تاج رکھدا
جہڑے ڈرن نہ دار تے رَسن کولوں، عاشق وانگ منصور حلاج رکھدا
محمد شفیع مطیع منتقاد خلقت، سوہنا دلاں دے ملک تے راج رکھدا

ذ

زیب زینت سبحان اللہ، لائقِ قدر مکین مکان ڈٹھا
سید ظفر نشان زمانیاں دا، مقصود ہر جن انسان ڈٹھا
بے نیاز اوہ تخت تے تاج کولوں، صاحب تاج غلام سلطان ڈٹھا
محمد شفیع ایہ خلق محمدی تے، نالے شرم حیا دی کان ڈٹھا

س

سنگ مثال میں سخت ناقص، تسلیں سنگ پارس، کامل پیر سائیں
تیری نظر اکسیر تھیں بنے سونا، توڑے ہوگ اوہ مس حقیر سائیں
بادشاہاں دے پُت فقیر ہوندے، چھڈ تاج تے تخت سریر سائیں
محمد شفیع نوں عشق دے رنگ اندر، رنگن چاہڑنا نال تدبیر سائیں

ش

شش اطراف دے وِچ آج کل، میرے شاہ جی دے نہیں کوئی شان والا
حاوی علم معقول منقول اُتے، ماہر فقہ حدیث قرآن والا
صاحب کشف قلوب محبوب سوہنا، واقف کار ایہ سر نہان والا
محمد شفیع ایہ قطب مدار سید، جس دے تھہ نظام جہان والا

ص

صوفی تے صاحب صفائیاں دا، ایسا ہوگ نہ وِچ زمانیاں دے
صاحب کشف مکشوف احوال مخفی جس نوں بخش ہوئے فیض خزانیاں دے
سدا ورت جاری جانے دھرت ساری قاسم کرن تقسیم پیمانیاں دے
محمد شفیع میاں آج بھاگ کھلے میرے جیسے مسکین نماںیاں دے

ص

صبر تسلیم رضا اندر میرے پیر جیہا ثابت قدم کوئی نہ
ایسا جاہ جلال جمال ہوندے، باکمال ہو کے دل دا نرم کوئی نہ
علم حلم تے خلق حیا ولوں، کسے وصف وچوں سوہنا کم کوئی نہ
محمد شفیع وچ فیض معاملے دے، میرے پیر جیہا ساقی جم کوئی نہ

ص

صاحباً صرف دیدار تیرا، مقصود بالذات عشاق دا اے
سینہ عشق تھیں شق بیشک جہاں تہاں مرض تاں سوز احراق دا اے
تیرے عشق دی آگ لکا رکھی سینے وچ جیوں سنگ چقماق دا اے
محمد شفیع ارج دُور حضور وچوں، اوہ تاں ماریا درد فراق دا اے

ض

ضرب نگاہ دے نال کردا، کفر کافراں دا بھن پُور سید
میری نظر عقیدتوں کوئی تکے، سونہ رب دی اے سوہنا نور سید
جیندی ذات تے ملک صلوات پڑھدے، جلوہ گاہ مثال کوہ طور سید
محمد شفیع میاں ٹھنڈک اکھیاں دی، جس نوں ویکھ ہووے دُکھ دُور سید

ط

طرف حضور دیوں کدوں ہوسی، دسو دوستو شرف حضوریں دا
اصل خاک خمیر ہے آدمی دا، دم عشق کولوں مارے نوریاں دا
خام طبع ایہ جام نہ نوش کردے، ثابت ہوش اتھے منصوریاں دا
محمد شفیع میاں اتھے عاجزی تھیں، پاندے یار قرار منظوریاں دا

ط

طلب میری آکھن لوک کچی، سچی طلب والے پاندے پیاریاں نوں
گنیاں گذر مدتاں انتظار اندر، میری سِکدی جند نظاریاں نوں
اکھیں روندیاں درد فراق اندر، پورا کرے آج کون خساریاں نوں
محمد شفیع خدا دا واسطہ ای، سد سیدا ہجر دیاں ماریاں نوں

ط

طرف تِساڈیوں کدوں ہوسی مینوں شرف پیغام حضوریاں دا
سُسی ہار بلوچ دے ہجر اندر روڑا کٹناں پے گیا دُوریاں دا
اُوہدی زلف دی مست خوشبو ہوندے نافہ سُنکھنا نہیں کستوریاں دا
محمد شفیع کہی ہجر دی بھاہ بھڑکی جگر سوز ایہ سیک تندوریاں دا

ظ

ظاہری باطنی، ہر گلوں، اچا جگ وچ حیدری بام دے
مولا آپ سنواردا کم جس دے، بدخواہ ہر گام ناکام دے
مورد رب دے فضل دی ذات تیری، سدا فضل اکرام انعام دے
محمد شفیع جلالپور شہر اندر، عین عشق دا وردا جام دے

ع

عارفاں دے سر تاج قبلہ مند فقر دے زیب سنگار آئے
چشمہ فیض توحید دا آن کیتا جاری وچ پنجاب سرکار آئے
سید پیر بخاری نوں جگ جانے جہڑے کرن دُبے بیڑے پار آئے
محمد شفیع میاں ریتی نظر دی تھیں، دُور دِلے دے کرن زنگار آئے

غ

غوث بغداد دے پیر اعظم، رویا صادقہ وچ فرمان کیتا
محمی الدین ثانی تیرا لقب عالی، تینوں جاہ آج قطب زمان کیتا
کرو نبی دے دین تبلیغ لوکاں جھنڈا آپ دا سبز نشان کیتا
محمد شفیع آج زیر نگین جس دے، شرق غرب تمام جہان کیتا

ف

فیض فیاض دا بحر جاری، ملے دان ہر آن سوالیاں نوں
فضل شاہی دربار دا باب گھلا، دیو خیر جا کے دامن خالیاں نوں
صبح شام مخدوم زمانیاں دا، کئے سائلاں دیاں بدفالیاں نوں
محمد شفیع میاں نگہ چشتیاں دی، کردی دُور پل وچ پائمالیاں نوں

ق

قسم مینوں اللہ پاک دی اے، جس دے وچ قبضے قدرت جان میری
میتھیں مدح حضور مقدور ناہیں، ناقص طبع تے گند زبان میری
نکا مونہہ تے گل آسمان جیڈی ہوئی آن کے عقل حیران میری
محمد شفیع میاں ہوں حل عقدے، مدد کرے جاں پیر سلطان میری

ک

کلاماں دا کامل پیر میرا دستگیر صاحب کرامات لوگو
ہر بات دلیل آیات جس دی ثابت نال حدیث آیات لوگو
قسمت والیاں جام ہدایتاں دے ہوندے جہاں دی نیک برات لوگو
محمد شفیع میان دسن طالباں نوں گجھے ہر اسرار دی بات لوگو

ل

لا گیوں سینے سانگ کاری کرسی کون کاری گیوں دس کچھ نہ
ماری نظر زمین آسمان توڑیں نہ کچھ نظر آیا مرے دس کچھ نہ
تیرے دید سعید مجید باجھوں میرے دے اندر ہور تَس کوئی نہ
محمد شفیع اس زلف زنجیر اندر دل کر سکدا مڑ کے پھس کچھ نہ

م

ماہ منیر تے شمس انور، بیشک حسن وِچ بے نظیر دونویں
میرے پیر دی دیکھ تئویر احسن ہوئے گم جیوں نقش تصویر دونویں
سطحی روشنی شمس تے قمر والی، اجرام کد اہل ضمیر دونویں
محمد شفیع اوہ سرو آزاد سوہنا گردش فلکی وِچ ایہ اسیر دونویں

ن

نشر نہ حشر دے روز ہوں میرے عیب قصور گناہ قبلہ
جان بُجھ کے فسق فجور اندر، کیتی اپنی جان تباہ قبلہ
رہی ہوش نہ جوش شباب اندر، کیتا نفس شیطان گمراہ قبلہ
محمد شفیع امید نجات دی اے، تساں ہوندیاں پشت پناہ قبلہ

و

ولی والی سلطان عالی در تے کھلے سائل خالی جان ناہیں
ثانی تساں دا کون آفاق اندر اُچا تساں کولوں کوئی خان ناہیں
جہڑا لگے نہ ہدف مراد اُتے ایسا تیر تدھ وِچ کمان ناہیں
محمد شفیع میاں تیری مہر پاروں مشکل کون جو ہوگ آسان ناہیں

۵

ہک پس خوردیوں جام بخشو، ناقص طبع جس تھیں پختہ کار ہووے
باقی رہے نہ ہوش وجود اندر، دلوں صبر قرار قرار ہووے
گاواں راگ وراگ جدائیاں دے، سینے عشق دی جس بیدار ہووے
محمد شفیع ایہ نت دعا میری، گلی پیر دی وچ مزار ہووے

لا

لا الہ الا اللہ، اتھے غیر دی گل بُلا ناہیں
جس دا ٹھیک یقین تاکید محکم، اوہدے لئی ججیم روا ناہیں
نقر چشتیاں دا مشہور عالم بوہا اوہناں دا چھوڑ کے جا ناہیں
محمد شفیع سید فضل شاہ جیہا، کوئی آج کامل پیشوا ناہیں

الف

آؤ جلاپور شہر اندر کعبہ جان کے کراں نیاز صدقہ
جیندے وچ تشریف شریف رکھدے قبلہ عالم غریب نواز صدقہ
ملے شرف جے کفش برداریاں دا ہوواں خادماں وچ ممتاز صدقہ
محمد شفیع حضور دے اسم تائیں کراں ورد سدا وضو ساز صدقہ

ی

یاد حضور پر نور سندی جیندے تذکرے نت زبان کردی
صفتاں والیاں دیاں کردا جگ صفتاں بلبل مدح اندر بوستان کردی
سوہنی صورت بے مثل دا کیہ آکھاں طبع یوسفی ویکھ میلان کردی
محمد شفیع میں ہک کوئی وکیا نہ خلقت جند تے جان قربان کردی

ی

یارو اس پیر دے ذکر باجھوں خالی جاندنا نہیں ہمراہ کوئی
آج دُور حضور حضور کولوں محرم دلاں دا نہیں ہمراہ کوئی
لگی عشق دی اگ وجود اندر میرے حال تھیں نہیں آگاہ کوئی
محمد شفیع میاں چشتی پیر ہوندے کسے چیز دی نہیں پرواہ کوئی



☆ ”ارمغان چشتی (قلمی)“ - صفحہ 53 تا 64 -

☆ حاشیہ از شاعر:

”اکتوبر، 1943ء بمقام بھون (تصنیف اول)۔ دوبارہ بہ تصحیح

کردہ بمقام دو میلی بتاریخ 22 جولائی، 1961ء بوقت طلوع

آفتاب بہ اختتام رسید محمد شفیع اختر ڈھاگرووی بقلم خود“۔

.....

[سی حرفی نمبر 16]

در مدح شریف جناب قبلہ عالم خواجہ غریب نواز
سید محمد فضل شاہ صاحب دام اللہ برکاتہم



الف

الف دیاں الفتاں رہن باقی، حرص خام کولوں خالی جام ہووے
ذاتی اسم ہووے نقش قلب اُتے، غیر سلسلہ قطع تمام ہووے
ذکر ذوق تے شوق مافوق اندر، میری صبح ہووے میری شام ہووے
محمد شفیع مقصود ایہ زندگی دا، دھن بھاگ جے عشق انعام ہووے

ب

بخش خدا دا واسطہ ای ہادی سونیا جام توحید والا
نائب نبی دے خاص خزانیاں دے، حاصل آپ نوں قرب فرید والا
ڈٹھا کالڑی رات دے وِچ روشن، چشتی پیر چراغ اُمید والا
محمد شفیع حضور دیاں نسبتاں تھیں، ملے شقی نوں نام سعید والا

ت

تک سائیاں میرے حال ولوں، سائیاں والیاں دا ایہ نہیں حال ہوندا
تدہ ہوندیاں خاوند دُکھ تکاں، صبر حوصلہ ضبط محال ہوندا
تیرے نام تھیں ملن انعام لوکاں، میرے واسطے کیوں پُن کال ہوندا
محمد شفیع تائیں سدے جگ تیری، میری طرف کیوں نہیں خیال ہوندا

ٹ

ثبت جناب دا اسم دل تے، ہور خام خیال وسار دتے
تیرے نام دا گل تعویذ میرے، بچو غیر دے، گلوں اتار دتے
انگ پالساں پیر دی دوستی دا، دلوں دُور کر سب اغیار دتے
محمد شفیع حضور دے عشق مرے، زنگ دِلے توں سب اُتار دتے

ج

جام جمشیدی لوڑ ناہیں، منگاں عشق دا جام انعام قبلہ
تیرے عکس پیالیوں دُور تھیندے، زنگ ظلمتاں نقص تمام قبلہ
تیری نظر دے اثر تھیں خام جہڑے، پختہ کار ہوندے شاد کام قبلہ
محمد شفیع ایہ آب حیات چشمہ، مینوں بخش حیات دوام قبلہ

ح

حرف حضور یوں شرف بخشو خالی ظرف کریم قبول کردے
میری عرض حضور منظور کرنی، عادی جان قدیم دے اسیں بردے
شہرہ دُور سخاوتاں تیریاں دا، حاتم جیسے ڈٹھے منگت اس در دے
محمد شفیع مرید مراد چاہے، اسیں نہیں قبلہ طلبگار زر دے

خ

خاص الخاص نگاہ تیری، دیندی دِلے دے زنگ اُتار قبلہ
ڈٹھے میر شکار، شکار ہوندے، تیری غمز دی کھائیکے مار قبلہ
ڈٹھے دین اندر پختہ کار کامل، تیرے فیض کولوں دنیا دار قبلہ
محمد شفیع گناہ دے راہ ولوں، میرے دِلے نوں کرو بے زار قبلہ

د

دیکھ مرید دا حال مرشد، لیا نفس شیطان نے گھیر مینوں
خواہش نفس دی عقل تے ہوئی غالب، کیتا نفس خناس نے زیر مینوں
لُونبر بن کے نفس دا شیر ڈھکا، دے چار چوہیر اندھیر مینوں
محمد شفیع میاں نظر پھیر کے تے، کدی ویکھدیوں چاہک دیر مینوں

د

دولتاں مال خزانیاں دے، تیری گلی دیاں منتیاں دان ہوندے
جہڑے آپ دے بُوہے دی خاک چمن، ڈٹھے اوہ درویش سلطان ہوندے
کاسے جہاں دے نظر دا خیر پوندا، اوہ مسکین تاں قطب زمان ہوندے
محمد شفیع میاں جھنڈے چشتیاں دے، اُون نظر جھلڈے لامکان ہوندے

ذ

ذریوں چاہچکا سورج، میرے قلب تے پرتوہ ڈال شاہا
میرے قلب دی ارض سیاہ اُتے، چمکے چن بن کے کالڑا خال شاہا
دُوئی دے نہ جانڈی مول وچوں، وحدت والڑا دس جمال شاہا
محمد شفیع دے قلب دی کوٹھڑی وچ، دیوا اپنے عشق دا بال شاہا

ر

رکھیا لکھ نہ وچ اوہلا، مظہر ذات میں پیر دی ذات ڈٹھی
اوہو عین عنوان تجلیاں دے، اوہو ظاہر طور دی جہات ڈٹھا
جاری بحر محمدی فیض والا، فیضیاب جس تھیں مخلوقات ڈٹھی
محمد شفیع میاں لکھاں خوبیاں دی، جامع ذات میں ابوالبرکات ڈٹھی

ذ

زور تک کشف کرامتاں دا، منکر کہن پئے آفرین قبلہ
محی الدین ہے آپ دا لقب عالی، زندہ آپ تھیں نبی دا دین قبلہ
فخر آپ ہو چشتیاں صاحبان دے، قائم قطب زمان زمین قبلہ
محمد شفیع تفصیل مقصود ناہیں، واجب آپ دی مدح تحسین قبلہ

س

ساکلاں دا رہبر پیر میرا، واقف کار اسرار عرفان دا اے
دے گیان دے گن گیانیاں نوں، سارے گن گیان دے جاندا اے
ہادی پیشوا راہ ہدایتاں دا، عامل شرع شریف قرآن دا اے
محمد شفیع آج جن انسان اندر، اُچا مرتبہ اس جوان دا اے

ش

شرع شریف دی پاسداری کامل غیر دی نہیں تقلید کردے
دیون نت خلاف اوہ حکم اُسدے کدے نفس دی نہیں تائید کردے
آکھے لگ شیطان دے ٹرن ناہیں، اسدے کہے دی نت تردید کردے
محمد شفیع ایمان بالغیب اُتے، ثابت نال دلیل توحید کردے

ش

شمس سیال دا فخر جہڑا، اوس فخر دا نظر منظور ہیں تُوں
عالی قدر تے اچڑے شان والا، آج وچ آفاق مشہور ہیں تُوں
صاحب جود وجود باہود اکرم، فیض کار خوددار غیور ہیں تُوں
محمد شفیع غمناک عشاق سندا، ٹھنڈک دے دی اکھیں دا نور ہیں تُوں

ص

صوری تے معنوی دوہاں گلوں، میرے پیر دے شان دا کون دسو
تارے چن دا کرن مقابلہ کیہ، ہور اس عنوان دا کون دسو
جس دا دید سعید ہے عید ساڈی، ثانی ماہ کنعان دا کون دسو
محمد شفیع اس بدر منیر جیہا، سوہنا اس جہان دا کون دسو

ض

ضرب نگاہ دے نال سائیاں، کر پور ایہ کوٹ غرور والا
شوکت شان دا رہے نہ مان ماسہ، کوڑا فخر ایہ عقل شعور والا
جائے خیر تھیں غیر دا پیر وچوں، لیاوے عشق تشریف حضور والا
محمد شفیع جو آپ دی نظر تردے، پاندے مرتبہ شاہ منصور والا

ط

طور اُتے جلوے نور والے، موئی جیہاں نوں تاب دیدار دی نہیں
اتھے کس نوں تاب تجلیاں دی، مخفی راز کوئی گل اسرار دی نہیں
جھوٹے دار تے لئے منصور جیہاں، سچ پچھ تاں گل انکار دی نہیں
محمد شفیع جس عشق دے جام پیتے، مرے وانگ اوہ تاں لافاں ماردی نہیں

ط

طالع مند اوہ لوک جہڑے، قبلہ عالم دے نال پیار رکھدے
گھر بار وِسار دربار حاضر، دائم حاضری وِچ دربار رکھدے
میرے جیسے معذور مجبور دائم، ایہو دِلے دے وِچ وچار رکھدے
محمد شفیع اوہ عشق دی پان دولت، جہڑے ازل تھیں بخت بیدار رکھدے

ظ

ظلماتِ جہل نادانیاں دی، میری جان عزیز شکار ہوئی
کریں مہر او مہر انوار ربی، کالی رات ظلمات چودھار ہوئی
حاوی دلے تے خواہشاں نفس دیاں، ماری بڈھ تے عقل فرار ہوئی
محمد شفیع اس حرص و ہوا ہتھوں، میری زندگی بسر خوار ہوئی

ع

عین عرفان دا سرچشمہ، مخزن گنج ایہ جود سخا دا اے
مخفی راز تمام معلوم جس نوں، واقف کار طریق صفا دا اے
ساری خلق مملوک مخدوم جس دی فضل پیر تاں فضل خدا دا اے
محمد شفیع ایہ شرم حضور سید، دنیا جاندی ظل ہما دا اے

غ

غیر اس خیر کثیر اندر، شفقت آپ دی تھیں حصہ دار ڈٹھے
فیض عام عوام تے خاص اُتے، دیندار ڈٹھے، دُنیادار ڈٹھے
وڈے وڈے امیر رئیس زادے، گلی پیر دی وچ خوار ڈٹھے
محمد شفیع کنیں میں مسکین جیسے، پیش پیش اوہ وچ سرکار ڈٹھے

ف

فضل دی سدا اُمید مینوں، اوگہار ہاں بد کردار، سائیں
برکت پیر چشتی بیڑا پار ہووے، استغفار اللہ استغفار سائیں
ضائع فسق فجور وچ عمر کیتی، دُھندوکار اندھیر غبار سائیں
محمد شفیع آہ نیک کمایاں تھیں، پلے نہیں میرے دم چار سائیں

ف

فرض آبا مدح عرض کرنی، گڈی پیر دُور آسمان ڈٹھی
نال مال اولاد دے شاد سید، غرت وچ سارے خاندان ڈٹھی
خلقت مندی حکم جہیوں حاکماں دا، دنیا دین وچ ہک میزان ڈٹھی
محمد شفیع جہیوں بدر منیر فلکی، حضرت صاحب دی وکھری شان ڈٹھی

ق

قطب زمانے دا غوث اعظم، جس دا نام لیاں بیڑا پار ہوندا
جس دے مکھ نوں ویکھ کے بھکھ لہندی، جیندی دید تھیں دُور آزار ہوندا
جیندی نظر دے اثر تھیں کافراں دا، دل کفر تھیں تڑت بیزار ہوندا
محمد شفیع جہیوں باد نسیم ہتھوں، بھریا رونقاں نال گلزار ہوندا

ک

کد حضور وچ سد کے تے، منظور کرسو ناقص کام تائیں
کرو بخش مراد ارشاد سائیاں، آیا دُور سُن فیض عام تائیں
رنگن چاہڑ محمدی عشق والی، بھر دے مستیوں خاڑی جام تائیں
محمد شفیع کر خاک شفا چُماں، ادبوں خاک اُس زیر اقدام تائیں

ل

لا لچال دے نال اکھیں، پھراں خوار کیوں اج جہان اندر
ٹساں ہوندیاں پشت پناہ قبلہ، خوف ویریاں دا نہیں جان اندر
مشفق درد رنجائیاں عاصیاں دا، ایسا ہوگ نہ زمیں آسمان اندر
محمد شفیع میاں جامع خوبیاں دا، لکھاں ہور کی آپ دی شان اندر

م

میرے حضور دی دُور منزل، حاوی جس تے عقل شعور ناہیں
حاصل و دھ کے قرب کڑوبیاں تھیں، فائق آپ تھیں کوئی حضور ناہیں
باطن وِج معاملہ نال مولاء، مخفی آپ توں ما فی الصدور ناہیں
محمد شفیع پر دل دیاں انھیاں نوں، آوے نظر اوہ چمکدا نور ناہیں

ن

نور آیات مبین وانگوں، روشن آپ دی ذات امین قبلہ
فرخ فال بلند اقبال سید، اندر شش جہات مبین قبلہ
چشت اہل بہشت دے تحت اُتے، کیتی آں نشست حسین قبلہ
محمد شفیع قاطع شرک بدعتاں دا، وانگوں شمس، فرید، معین قبلہ

و

وکیا میں کوئی ہک ناہیں، اس پیر دی پاک تصویر اُتوں
لکھاں جان قربان نثار کردے، شمس حیدری دی تنویر اُتوں
کرے کون قبول آزادیاں نوں، اوہدی زلف دی قید زنجیر اُتوں
محمد شفیع کنیں پیر زمانیاں دے، صدقے ہون اس پیراں دے پیر اُتوں

ہ

ہو امین ہدایتاں دا، میرا پیر ایہ گنج سمھال آیا
شہرہ جس دیاں فیض سخاوتاں دا، شرق غرب جنوب شمال آیا
عاشق وانگ پتنگ ننگ آون، سوہنا حُسن دی بال مثال آیا
محمد شفیع جلالپور شریف اندر، ظاہر فقر دا کرن کمال آیا

لا

لا ایہ نفی دی تیج خونی، جھلی عاشقاں اپنی جان اُتے
پیش نظر محبوب دی پاک صورت، کوئی ہور نہیں غیر سامان اُتے
جہاں اپنی نفی منظور کیتی، ثابت صدق یقین ایمان اُتے
محمد شفیع جہڑا ثابت قدم عاشق، دھن رحمتاں اُس جوان اُتے

الف

آب تالاب دے کندھڑے تے مچھی تڑندی پئی بے تاب ہو کے
تیرے باجھ پیاریا جانا او ڈھکی زندگی موت عذاب ہو کے
سستی تڑی تڑی ریت اُتے دتی جان کے جان خراب ہو کے
محمد شفیع میں جھٹ گزار رہیا اس دہر وچ نقش برآب ہو کے

ی

یار اُس پیر دے مرتبے دا، نظر آوندا نہیں جہان اُتے
حامل شرح شریف محمدی دا، عامل فقہ حدیث قرآن اُتے
نکتہ چین چالاک حیران ہویا، حرف گیر یوں اس انسان اُتے
محمد شفیع خزاں دا کوئی جھولا، شالا جھلے نہ اس بُستان اُتے

ی

یار آہے انتظار اندر، شکر الحمد اودہ وقت سعید آیا
واہ واہ مدح شریف سناونے نوں، خدمت پیر دی وچ مرید آیا
ساقی بخش پیالڑا فیض والا، رنداں چالڑا ہل من مزید آیا
محمد شفیع ایہ فرد فرید وانگوں میرا پیر وچ بحر توحید آیا

ی
یارو حضور دی مدح اندر، پنج گنج دی آج تکمیل ہوئی
درد سوز تے شوق مانوق سندی، ارشاد دی آج تکمیل ہوئی
مختصر لکھیا اختصار کر کے، ناہیں قافیہ نظم طویل ہوئی
محمد شفیع محرموں دسویں سی، جدوں دلی مراد تحصیل ہوئی



☆ 'ارمغان چشتی (قلمی)' - صفحہ 65 تا 78۔

☆ حاشیہ از شاعر:

”تصنیف اوّل: 10 محرم الحرام 1363ھ بمقام بھون
(تصنیف اوّل)۔ دوبارہ تحریر کردہ بتاریخ 23 جولائی، 1961ء
مطابق 9 صفر 1381ھ (دومیلی) از محمد شفیع اختر ڈھاگرووی۔

برخاتمہ ارمغان چشتی گوید

ق: قدر کی قدر قضا دا اے میرے پیر دا شان بیان لکھے
واصف آصف نواب نظام جس دے اس مدح دا کون عنوان لکھے
مدح آپ دی بہت بلند بالا دسو کتنا کوئی آسان لکھے
محمد شفیع اس نور تجلّوے نوں دسو اتھے کی عقل حیران لکھے

گر کنی تو ذاتِ مرشد را قبول :::: ہم خدا در ذاتِ آمد ہم رسول
(مولانا روم)

.....

[سی حرفی نمبر 17]

بہ تشریف شریف نسبت روحانی بہ آں ذات گرامی قدر
حضرت قبلہ عالم و عالمیاں ابوالبرکات سید محمد فضل شاہ
سجادہ نشین جلالپور شریف دام اللہ برکاتہم



الف

اس دربار دُر بار اُتے، اساں سیس نواوندے شاہ ڈٹھے
بنھ کے ہتھ حضور وِچ رہن قائم، تاجدار ڈٹھے کج کلاہ ڈٹھے
جس نوں ملے نہ وِچ جہان ڈھوئی، پناہ گیر وِچ اس درگاہ ڈٹھے
محمد شفیع مخدوم زمانیاں دے، حضرت سید محمد فضل شاہ ڈٹھے

ب

باغ ساوا سدا چشتیاں دا، جس دے وِچ خزاں دستور ناہیں
جس دیاں بوٹیاں نوں ملے آب کوثر جس دا پھل تازہ بناں نور ناہیں
اس سلسلے دے جہڑے ہون طالب، شرف اوہناں دا کشف قبور ناہیں
محمد شفیع ایہ عشق دا بحر ڈونگھا، خولجہ پیر دے باجھ عبور ناہیں

ت

تابع خدمتاں وِچ حاضر، وڈے خان رئیس نواب سائیں
تھر تھر کنبدے شاہ زمانیاں دے، جس دی اکھ دا ویکھ عتاب سائیں
خاک بوس حضور دیاں وِچ قدماں ڈٹھے اہل القاب خطاب سائیں
محمد شفیع اوہ سدا دلشاد ڈٹھے جہڑے آپدے خاک تراب سائیں

ٹ

ثبت کیٹا دل دی لوح اُتے تیرا نقش تصویر مبین سائیں
جہڑا صدق تے فقر دیاں خوبیاں دا نبی پاک دے وانگ امین سائیں
حق عدل انصاف دی شرح روشن جس تے فخر آج کرے زمین سائیں
محمد شفیع مریداں دا پیر کامل فاتح دلاں دا شیخ معین سائیں

ج

جا ویکھو تشریف رکھدا مسند حیدری تے میرا پیر سوہنا
سوہنا سخی تے شرم حضور سید صاحب عقل نالے با تدبیر سوہنا
کہی با دستور دستار سوہنی جہ سو بھدا انگ حریر سوہنا
محمد شفیع میاں سوہنی ٹور ٹردا ایسا ہوگ نہ کسے سریر سوہنا

ح

حرف ارادیوں شرف ازلی میرے پیر دے جہڑے مرید ہوئے
اوہ تاں نت پئے حج تے عید کردے جہاں نت ارزانیاں دید ہوئے
جہاں قرب پیارے دا انت حاصل واصل اوہ تاں انت مجید ہوئے
محمد شفیع ایہ ملے مقام اوہناں، ازلوں جہاں دے بخت سعید ہوئے

خ

خام عوام کیہ خبر رکھن میرے پیر دے قرب کمال سندھی
ظاہر حال جھل سکدے جہال ناہیں میرے پیر دے پاک جمال سندھی
پئی دُھم جنوب شمال تیکر میرے پیر دے اوج اقبال سندھی
محمد شفیع میاں میں بھی رکھ بیٹھا طمع خام امید وصال سندھی

د

دریتم ایہ پیر کامل گوہر صدق اخلاص دی کان دا اے
اسدی دلاں دے ملک تے بادشاہی ایہ تاں فخر زمین زمان دا اے
اسدے وصف بیان نہ ہو سکن دنگ عقل ہو یا انسان دا اے
محمد شفیع میاں کعبہ عاشقاں دا ایہ تاں خاص عنوان ایمان دا اے

د

دھوڑ پُماں اس راہ دی میں جس راہ میرا رشک ماہ گذرے
لائق ادب اوہ ہون نہ کیوں جائیں جہاں جائیں اُتوں میرا شاہ گذرے
زنگ دے کیوں نہ جان دھوتے جتھے آپ دی پاک نگاہ گذرے
محمد شفیع اس پیر دے لڑ لگیاں کیوں فر عمر وچ فسق گناہ گذرے

ذ

ذبح اس حیدری تیغ کولوں ہوندے حُسن دے میر شکار ڈٹھے
قدم چمڈے اس شاہزادے دے آساں ملک دے وڈے سردار ڈٹھے
فیضیاب ہوندے اس پیر کولوں ظالم چور فاسق گنہگار ڈٹھے
محمد شفیع جو بُو ہے تے آن کھلن اوہناں جھڑکدے نہیں سرکار ڈٹھے

ر

رب میرے حضرت صاحب تائیں جگوں وکھرا شان انعام کیتا
جھنڈے جس دے فوق سماء جھلن جس دا عرش کولوں اُچا بام کیتا
جس دے نام دا ورد عشاق رکھدے عالی اس دا قدر مقام کیتا
محمد شفیع اس حُسن دے شاہ آ کے جاری دلاں وچ عشق نظام کیتا

ذ

زور جاندے ٹٹ دوتیاں دے میرے پیر دی جتھے تلوار چمکے
اُتھوں کفر سیاہیاں چان ڈیرے جتھے آپ دا مہر انوار چمکے
اوتھے مہر محبتاں لان ڈیرے جتھے آپ دا خلق پیار چمکے
محمد شفیع حضور دے فیض کولوں میرا شعر جہیوں دُر آبدار چمکے

ذ

زہد عبادتوں بہت اُچی منزل آکھدے عشق طیور دی اے
عاشق غیر امور تھیں دُور رہندے مشہور گل شاہ منصور دی اے
سینے سوز پریم دا بلے دیوا جلی جان جہیوں طرح مہنور دی اے
محمد شفیع مجذوب محبتاں دے بلے دلاں وچ اگ تندور دی اے

س

سخی جھگا سنیا چشتیاں دا ہر آن داتا پُئن دان کردا
ولے مول نہ کدے سوالیاں نوں مشکل حل ہر کام آسان کردا
ڈٹھا انت کریم حلیم ایہ تاں نال ویریاں مہر احسان کردا
محمد شفیع اوہ نظر اکسیر سید مملکت گلی دے پکڑ سلطان کردا

ش

شان اس پیر دا رقم کرنا میری قلم دا نہیں مقدور ایتھے
عقل خام تے مدح دا بام اُچا منزل لمبڑی تے پینڈا دور ایتھے
رہندے مدح ممدوح دے وچ اوہ تاں سینہ عشق تھیں جہاں محرور ایتھے
محمد شفیع ایہ شوق بیان تیرا سن کے ہویا حیران منصور ایتھے

ص

صفِ تقلین وِچ بہن تیرے جھنڈے جنہاں دے وِچ ہوا جھلڈے
تیرے راہ وِچ کفش نہ پان پیریں نازک پیر جہانڈے وانگ پھلڈے
تیری حُسن دی شمع تے جہڑے وکے اوہ تاں غیر دے حُسن تے نہیں بھلڈے
محمد شفیق جناب دے فیض سندے طلبگار ڈٹھے گلیاں وِچ رُلڈے

ض

ضو اس حیدری شمس والی قلعے قلب دے نوں پُر نور لکھے
خواجہ پیر دی گلی دے ذریاں نوں دے کے شرف خورشید دا نور لکھے
میرے شوق نوں بخش کے ذوقِ ارنی جلوہ پیر دا صاعقہ طور لکھے
محمد شفیق بلند پردازیاں چھڈ، تیرے فکر نوں ناطقہ پور لکھے

ط

طبع اس مدح دے بحر اندر بیٹھی عقل دے روہڑ جہاز سارے
جدوں مدح دا پیش عنوان آیا بھلے قلم نوں ناز انداز سارے
فکر سٹ اعناقِ غمناک بیٹھا گئے بھج ادراک دے ساز سارے
محمد شفیق نہ مدح نوں ہتھ پائیں مئے کھل جاوَن تیرے راز سارے

ظ

ظلمات دی اوتھے جا ناہیں جتھے بدر منیر دا نور چمکے
دنیا دین سرکار درکار ناہیں منگاں آپ دا عشق غیور چمکے
ملک فلک دے کفِ افسوس ملدے کدی اساں تے قرب حضور چمکے
محمد شفیق رکھ جوش وِچ ہوش قائم تیرا فکر مونہہ زور ضرور چمکے

ع

عشق پریم محمدی دا ممدوح مرے ساغر نوش کیتا
آ کے کفر دے زور نوں زیر کیتا جدوں آن توحید نے جوش کیتا
کیتا ظاہر راز محبتاں دا ناہیں پردیاں وچ روپوش کیا
محمد شفیع رہیا وچ گھائیاں دے سبق پیر دا جس فراموش کیتا

غ

غوث اعظم چشتی پیر میرا جس دی جگ تمام تعظیم کردا
جس دے خلق تے خلق مفتون ہوئی جس دا امر جہان تسلیم کردا
رہبر پیر امیر زمانیاں دا وحدت فکر تے ملی تنظیم کردا
محمد شفیع میاں دل دیاں انھیاں نوں قلبی نظر اکرام کریم کردا

ف

فیض حضور دی منگتی میں کرو دروں نہ دور دلگیر تائیں
رکھو کہف اصحاب دے وانگ مینوں بدھا اپنی زلف زنجیر تائیں
بخشو اپنے عشق دا جام مینوں نہ کر نظر انداز فقیر تائیں
محمد شفیع غریب نواز تسیں منگاں آپ تھیں خیر کثیر تائیں

ف

فکر مرید دا دور ہووے کیوں نہ تده جیسے کامل پیر ہوندے
دامن آپ دے لگ جو کرن زاری اوہ نہیں جگ دے وچ زہیر ہوندے
وکھ درد سریر دے جان ٹٹھے مٹھے ہدف مراد تے تیر ہوندے
محمد شفیع کیوں رہے انھیریاں وچ خولجہ آپ جیہا روشن ضمیر ہوندے

ق

قَاب قَوْسِینِ اُو اَدْنِی غَرْتِ اِیہ شَرَف تے شانِ مُحَمَّدی اے
 ہوئی عَرشِ عَظِیمِ تَکْرِیمِ کَس نوں عالی شانِ اِیوانِ مُحَمَّدی اے
 عَرشِ فَرش تے لَامَکَانَ اَنَدَرِ ہویا حَکَمِ رِوانِ مُحَمَّدی اے
 مُحَمَّد شَفِیعِ فِہاہ تھیں پار اگے باقی عینِ عَنوانِ مُحَمَّدی اے

ق

قَفلِ زنجیرِ اسیرِ جہڑے تیری نظر تھیں ہون آزادِ شاہا
 دکھی عمر دے روندڑے مدتاں دے تیری مہر پاروں ہون شادِ شاہا
 میں بھی آ دربارِ پکارِ کیتی لگھاں پان مریدِ مرادِ شاہا
 مُحَمَّد شَفِیعِ میاں ڈبے ترن بیڑے مدد کرے جاں شاہِ بغدادِ شاہا

ک

کَم کَرِیمِ دا کَرَمِ کرنا گنجِ بخشِ سخی داتا پیر ہیں توں
 کٹو مشکلاں باہوڑو بھیڑ پیاں قطبِ وقت تے غوثِ کبیر ہیں توں
 تکِ حالِ کنگالِ بدحالِ سندا لچالِ جے خیرِ نظیر ہیں توں
 مُحَمَّد شَفِیعِ درویشِ فقیرِ تیرا صاحبِ کرمِ اکرامِ امیر ہیں توں

ک

کون چاسی ذمہ داریاں نوں تساں باجھ کھڑا ضامنِ ہور میرا
 تیرے نال ہے مانِ وجودِ اندر توہیں مانِ میرا توہیں زور میرا
 تیری کیمیا نظرِ اکسیرِ کولوں ہووے سبزِ گلشنِ کلرِ شور میرا
 مُحَمَّد شَفِیعِ میاں تیری ہو رہیاں، بدھا روحِ پریمِ دا ڈور میرا

ل

لان پئے لگھ زور دوتی تده ہوندیاں نہیں پرواہ کوئی
خطرہ خوف نہ ویریاں حاسداں دا تساں ہوندیاں پشت پناہ کوئی
فیض یاب جناب تھیں عام خلقت ہوندی شام دوپہر پگاہ کوئی
محمد شفیع تسیں سخی لگھ داتے سید ذات والا عالی جاہ کوئی

م

مہر دی واگ ولا میں تے کریو مہر دی نظر ارشاد سائیں
دکھی جان بیمار ضعیف میری کریو روح ناشاد دلشاد سائیں
رکھ مہر دی اکھ مرید اتے، نامراد نوں کر بامراد سائیں
محمد شفیع تے آن کے بنی اوکڑ نام رب دے کرو امداد سائیں

ن

نفر غلام قدیم اُتے رکھ مہر دی نظر ضرور قبلہ
منگاں دان تیری خوشنودیاں دا اللہ پاک تھیں شام سحر قبلہ
تیرے عشق دی ملے برات مینوں ہوون دلوں غیریتاں دُور قبلہ
محمد شفیع اساڈی یاد اندر رہن یاد نہ غیر امور قبلہ

و

وچ جلاپور جا وائے میری طرف تھیں عرض گزار ہوویں
ہتھوں ادب نوں دئیں نہ مول اتھے چمیں قدم نالے خاکسار ہوویں
کراماں والڑے ادب نصیب ہوندے نہ توں اس گلوں شرمسار ہوویں
محمد شفیع سجادہ نشین اگے میرا حال تمام اظہار ہوویں

۵

ہور سندے ہوندے نہیں طالب قبلہ آپ دے جو طلبگار ہوئے
کتے جان جوگے اوہ تاں رہے ناہیں جہڑے آپ توں جان نثار ہوئے
کارن خیر دیدار سرکار تیرے حاضر صاحبِ آن دربار ہوئے
محمد شفیع صدقہ بندہ پروری دا عاشق ہجر تھیں سخت لاچار ہوئے

لا

لا علاج ایہ مرض میری تیری نظر تھیں دُور آزار ہوندے
جتھے آپ دی مہر دا ابر وے سکے رُکھ ڈٹھے میوہ دار ہوندے
آوے نظر نہ قلب ناہیںیاں نوں بھاویں چمکدے سے انوار ہوندے
محمد شفیع کیوں فیض تھیں رہیا خالی، قبلہ آپ جیہی سخی سرکار ہوندے

الف

آس دھرواں درویش دی توں سائیاں ہور کوئی میری جاء ناہیں
چائے چت بھائیاں چکی ماپیاں نے میتھوں خاوندنا نظر بھنوا ناہیں
سد کول انھول میں گھول گھنتی مٹھا بول غصہ فرما ناہیں
محمد شفیع مقصود اکرام ہووے کمی خیر دی آپ نوں کا ناہیں

الف

آ اُس حیدری لاڈلے توں سو سو وار قربان نثار جائیے
ساری عمر دیاں خدمتاں چا لئیے گھر بار تمام وِسار جائیے
کریے خار ببول قبول اُس دے چھڈ باغ بہار گلزار جائیے
محمد شفیع جے ملے نہ دید ماہی تاں فرزندگی تھیں ہو بیزار جائیے

ی

یا حضرت صدقہ چشتیاں دا مینوں عشق دا جام انعام ہووے
ہور لوڑ نہ مال تے دولتاں دی حرص خام والی گل خام ہووے
رنگن حیدری عشق دی چاہڑ مینوں ہوس دُور دل تھیں نفس رام ہووے
محمد شفیع تده سخی کریم ہوندے کیوں نہ میں ناکام دا کام ہووے



☆ ”ارمغان چشتی (قلمی)“۔ صفحہ 79 تا 91۔

☆ حاشیہ از شاعر:

”18 اگست 1955ء (تصنیف اول)۔ سی حرفی ہذا دوبارہ بتاریخ

24 جولائی، 1961ء بوقت عصر بمقام دو میلی تحریر یافت۔

العبد فقیر حقیر پر تقصیر ابوالرشید محمد شفیع اختر ڈھاگرووی چشتی حیدری

(بنبرہ میاں سید محمد مرحوم ساکن بھیٹ) متصل ٹلہ

جوگیاں (جہلم)۔

.....

مایہ لوبھی دھرم کھڑائے کامی کے کچھ ہاتھ نہ آئے

کام سے لوبھ سے جو بچ جائے مہا پرش کہلائے

(اختر ڈھاگرووی)“

.....

[سی حرفی نمبر 18]

نالہ درد انگیز : یادگارِ مظہر



الف

اس جہان توں اوہ گئے جہاں واسطے گن ارشاد ہويا
ملک جہاں دے کفش دی دھوڑ جھاڑن جیندے قدم تھیں عرش آباد ہويا
اوہ بھی چھوڑ ایہ رُے سراں خالی جہاں لئی ایہ جگ آباد ہويا
محمد شفیع اوہ موت دی راہ چلے تھ جہاں دے موم، فولاد ہويا

الف

ایہ سراں مسافراں دی اتھ راہی تاں رات گزار چلے
مالک مال انبار خزانیاں دے بھرے چھوڑ کے ہٹ بازار چلے
مہلت گھڑی دی دتی نہ موت اوہناں حکم جہاں دا وِچ سنسار چلے
محمد شفیع میاں جیوکر چاہے مالی کھڑے پھل نے چھوڑ گلزار چلے

الف

اس جہان وِچ آئی کے تے اتھ نہیں کسے سدا سُکھ ڈٹھا
جھولے جھلدے خزاں دے وِچ باغاں سدا نہیں کوئی ساوا رُکھ ڈٹھا
لکھاں وِچ بھی کوئی نہ رکت ایسا اتھ آئی کے جس نہیں دُکھ ڈٹھا
محمد شفیع میاں مُدتاں گزر گیاں اساں پیاریاں دا نہیں مکھ ڈٹھا

الف

اس جہان توں کوچ کیتا محمد مظہر محمود⁽¹⁾ فرزند میرے
میرے جگر پارے مٹھے شکر پارے بارے قند پارے بالا چند میرے
مٹھا سب سی سب جیوں سمرقندی مٹھے سخن اوہدے قلاقت میرے
محمد شفیع طاقی کھلی غماں والی بوہے خوش سندے ہوئے بند میرے

الف

اساں نوں ایہ نہ سار آہی چلیوں موت دے جام نوں پین مظہر
تینوں موت دی کالیوں سد پئی اسیں لوڑ دے ساں تیرا جین مظہر
تیری درد جدائی دیاں تیز چٹھریاں میرا کالجہ پیاں کپین مظہر
محمد شفیع نوں کیوں تیری موت سندا نہیں آوندا پیا یقین مظہر

الف

اساں تھیں ہو جدا ٹریوں مظہر وت نہ وٹیاں واہیاں فی
جا کے گور پورے وچ وس رہیوں حرصاں نانکیاں کیوں دلوں لاہیاں فی
جا گھت نہ غم دے چاہ بچہ گلاں ایہ نہ چنگیاں چاہیاں فی
محمد شفیع میاں مظہر نال میرے ایہ کی ورتیاں بے پرواہیاں فی

ب

برا جدائی دا روگ ہوندا قسمت اپنی نوں اسیں رو بیٹھے
جہاں نال سی دلاں دی سانجھ ساڈی اوہ تاں آج کنڈیترے ہو بیٹھے
وچ زندگی دے ہونے نہیں میلے اسیں اس عملوں ہتھ دھو بیٹھے
محمد شفیع میاں چکی غماں والی ساری عمر لئی اسیں جھو بیٹھے

ت

تیر جدائی دے لائی کے تے سینہ سل گئیوں ایہ کی گل بچہ
جاندی وار نہ لئے پیار مونہوں لائیوں رج کے نال نہ گل بچہ
کرساں زاریاں وانگ یعقوب بیٹھی گنساں پئی گھڑیاں پل پل بچہ
محمد شفیع پر توڑ دی لکھی جہڑی ناہیں کسے کولوں سکی ٹل بچہ

ت

ترت تیاریاں ہو پٹیاں لمے سفر تے پیاریاں بھار بدھے
کیتا ترس نہ پیاریاں پک رتی ساڈے کالجے تاں سردار بدھے
سکھاں نال نہ ہوگ سنجوگ ساڈا دکھ بھوگنے لئی دکھیار بدھے
محمد شفیع میاں بیٹھے توڑ آساں قیدی ہون جیوں وچ حصار بدھے

ت

تاب نہ رہی وجود اندر ہوئیاں سندیاں اشک آلود اکھیں
ہویا رون دے نال وپار اکھیں جدوں ڈٹھا نہ مظہر محمود اکھیں
اکھیں مظہر دا ویکھنا منگدیاں نیں میریاں ہون گیاں کد خوشنود اکھیں
محمد شفیع دے سجا جگ سارا ہوئیاں مظہر دیاں جدوں مفقود اکھیں

ت

ثابتی صبر دا رہن اوکھا مظہر ہجر دیاں کانیاں لا ٹُریا
مینوں سٹ کے ہجر دے وچ اوجھڑ ساری عمر دا رووناں پا ٹُریا
اودے مٹھڑے پیار نہ بھلن مینوں اوہ تاں پیار وچ زہر ملا ٹُریا
محمد شفیع آپوں ستا نیند مٹھی گلی رون دی آساں دکھا ٹُریا

ٹ

ثابتی صبر دی بات کہی جتھے موت قہاریاں پا جاوے
گل مینڈھیاں وانگ بیراگناں دے جتھے موت تشریف لیا جاوے
غم عمر دا چھاؤنی پا بہندا سُکھ اُس جانیوں ڈیرا چا جاوے
محمد شفیع ایہ موت دی سٹ ڈاڈھی کوئی پیش نہ نال قضا جاوے

ج

جان میری دکھاں آن گھیری محمد مظہر جدایاں پا گیا
لکھی لوح محفوظ دی ٹلے ناہیں سوہنا عمر دا ساتھ لٹا گیا
سوہنا ماہ لقا اوہ مکھ نوری پردے کفن دے وچ چھپا گیا
محمد شفیع نہیں زندیاں میل ہونا مظہر ملن دی گل مکا گیا

ج

جمع وچ کس تفریق پائی تقدیر دے نال نہ زور کوئی
گڈی ٹٹ کے وچ ہوا اڈی رہی ہتھ میرے خالی ڈور کوئی
مالی موت دے پھل تروڑ لئے ڈور بھور اداس نے بھور کوئی
محمد شفیع کس لٹیا پیار میرا پیا آن مینوں کتھوں چور کوئی

ح

حال میرا نہ توں بچھ بلی میتھوں دور پیا محرم حال میرا
ہوسی حال کے نال وچھوڑیاں دے کیتا اُس نہیں کجھ خیال میرا
اندر وڑاں تے کھان مکان دُھکے دکھاں نال دُکھے وال وال میرا
محمد شفیع میاں جانی وداع ہوئے کون کٹسی غماں دا کال میرا

ح

حال غم دا کس نوں پھول دساں ڈانواں ڈول ہو بھراں ڈولاوندی میں
سرتے بانھ رکھ اُچڑے دین کردی بھراں ویہڑیاں وچ کرلاوندی میں
ہوندی سار بے جاوئی ہار بازی کدے بھل کے پیار نہ پاوندی میں
محمد شفیع پر لکھیا کون موڑے مظہر سوہنے دے گیت ہاں گاوندی میں

خ

خواب خیال ایہ موت ناہی مظہر ماریائی بُرے حال کر کے
سسی ہار تڑفاں تتی ریت اُتے پُوں گیا کتھے پائمال کر کے
کہڑے گھاٹ جا کے تڈھ واٹ ملی مظہر نال میرے انفصال کر کے
محمد شفیع میاں چھری پھیر گردن گئیوں مرغ دے وانگ حلال کر کے

خ

خیر دا خیر نہ پیا جھولی پُڑیاں زہر دیاں گھول کے پیتیاں میں
تیری خیر کارن خیر الدین⁽²⁾ کولوں مُڑ مُڑ پیاں دوائیاں لیتیاں میں
نُسخے ہوئے بے کار بے اثر پُڑیاں دساں کس تے کھول کے پیتیاں میں
محمد شفیع میاں عرضاں نہیں پیاں منظور جو رب تے کیتاں میں

خ

خاطراں خدمتاں وچ حاضر رہے اسیں تاں مظہر محمود تیرے
کہی مرض اولڑی آہی تیری رہی رت نہ وچ وجود تیرے
بن کے موت دا ڈھونکسیر ڈھکی رستے زندگی دے ہوئے مسدود تیرے
محمد شفیع میں گلے دے نال لاواں کپڑے ویکھ کے خون آلود تیرے

د

دکھاں دے پندھ نہ لے ہوسن غم خوار کوئی نہ غماں ماریاں دا
 لہی لاہھ نہ کسے طیب تائیں داروں کوئی نہ ہجر دیاں ماریاں دا
 جہڑے سکھ دیاں نیندراں سون راتیں پتہ اوہناں کیہ شب بیداریاں دا
 محمد شفیع میاں ناہیں خبر مینوں انہاں درد مصیبتاں بھاریاں دا

د

دید تیری آہی عید میری چناں چڑھیں کھاں فیر بنیریاں توں
 کریں آ آباد برباد تائیں میری کنبدی جان انہیریاں توں
 تیرے پاک جمال دی بھکھ مینوں صدقے جاں میں صبح سویریاں توں
 محمد شفیع کدوں آنہار ہوئیں چایوئی چت کیوں ساڈیاں ڈیریاں توں

ذ

ذرہ نہ صبر قرار آوے اکھیں روندیاں خون جھلار مظہر
 تیری پاک تصویر اسیر کیتا تیرا بھلنا نہیں سانوں پیار مظہر
 تیرے مٹھڑے سخن نے مٹھڑی میں تیری وانگ نبات گفتار مظہر
 محمد شفیع میں دے دا حال اپنا کراں کس تے جا اظہار مظہر

ذ

ذکر تیرا مینوں بھلنا نہیں سدا رہے گی پیاریا یاد تیری
 سوئی چوڑی جیہی جان پڑنج کھڑی ظالم موت دے حیف صیاد تیری
 تیکے پلنگ تے چادراں سنج دسن ہوئی قبر دی خاک آباد تیری
 محمد شفیع گئی ورت قضا ہر تے سنی رب جی نہیں فریاد تیری

د

روز سارا جاندا راہ ویہندے پئی شام میرا ناہیں شام آیا
پئی خبر نہ پرت پردیساں دی نہ کوئی خط آیا نہ پیغام آیا
میتھوں جدوں دا کندُ ولا گئیوں میرے دے نوں نہیں آرام آیا
محمد شفیع پرناڑے وہن آنسو جدوں لباں اُتے تیرا نام آیا

د

رین جگراتیاں وِچ جاندی مظہر جدوں دا کوچ فرما گئیوں
بھاوَن باغ بہار گلزار ناہیں میتھوں جدوں دا کندُ ولا گئیوں
میرے چت وِچ نت خیال تیرا چت اساں توں جدوں دا چا گئیوں
محمد شفیع اس ہجر دے زخم اُلھے نہ کوئی مرہم نہ دس دوا گئیوں

د

راہ تیرے ممتاز⁽³⁾ تکے تیرے باجھ فیاض⁽⁴⁾ اُداس ہویا
تیرے اَبے دیاں لباں تے سَر د آہیں تیری 'بے' دا جی نراس ہویا
تینوں پئی اکاس تھیں سد بچے تیرے بچن دا غلط وسواس ہویا
محمد شفیع تقدیر دے وِچ دفتر تیرا نام سی مظہر کراس ہویا

د

زاریاں کراں دن رات بیٹھی مینوں صبر دی کرو تلقین ناہیں
میں مظہر دے بھلنے نقش ناہیں میرے مظہر جیہا کوئی حسین ناہیں
پاکے غماں دے وس کیوں نس گیوں گھوڑے اجل دے تے کس زین ناہیں
محمد شفیع اج ڈھوک ہے کھان ڈھکی مظہر باجھ لگے چنگا جین ناہیں

س

سکھ میرے تیری موت لٹے مینوں دکھاں دی دے رسید گئیوں
میرے درد رسید رشید⁽⁵⁾ تائیں کہی مار کے ضرب شدید گئیوں
مظہر جیوندیاں مار مکایا ای میری توڑ کے کمر خمید گئیوں
محمد شفیع میں تاں بیٹھا لاہ ہیکھی مظہر نرا ہی کرنا اُمید گئیوں

ش

شوہ دریا دے وچ پٹیاں مینوں سجھدا پار اُرار ناہیں
ٹھاٹھاں ماردا آب چناب اندر رہیا جیو تک وچ قرار ناہیں
گئی پھس گرداب دے وچ کشتی خولجہ خضر نوں بھی میری سار ناہیں
محمد شفیع میاں سر تے بھیڑ پٹیاں کوئی باجھ اللہ مددگار ناہیں

ش

شاد تے سدا آباد رہنا ایہ تاں وچ میرے مقصود ناہا
تینوں لاوناں گلے دے نال میرا سدا محمد مظہر محمود ناہا
باجھ حکم اُس حاکم حکیم مطلق ہونا راہ ایہ نا مسدود ناہا
محمد شفیع ایہ رب وودود جانے ساڈے واسطے ایہ بہبود ناہا

ص

صبر دیاں پٹیاں بنھ تھکی میرے زخم چمانڈے مولدے نہیں
جھڑے سکھ نصیب نہ درد لٹے میرے وانگ اوہ تاں ہنجو ڈولدے نہیں
پتر جہاں دے جاوندے سل سینہ اوہ تاں رہن شوہدے کسے ٹول دے نہیں
محمد شفیع میاں صابر صبر کردے مونہوں حرف اوڑے بولدے نہیں

ض

ضرب فراق دی مار سوہنا آپوں جا وِچ گور کنار سُتا
مینوں عمر دا رون ارشاد کر کے اکھیں میٹ آپوں دلدار سُتا
دکھی بے، ریاض، اعجاز⁽⁶⁾ سندا چٹی تان چادر برخوردار سُتا
محمد شفیع نہیں پرت بیدار ہويا میرا کہیا ایہ بخت بیدار سُتا

ط

طالع مند فرزند مظہر میرا خوبیاں دا بالا چند مظہر
ورہے چار پونے اودھی عمر ساری کرے گل سوہنی ارجمند مظہر
ٹریا وداع ہو عمر دیاں پا وِتھوں مٹھے مونہہ اندر مٹھی قند مظہر
محمد شفیع جا گور مقیم ہويا کچی پیار دی توڑ کے تند مظہر

ظ

ظلم آکھاں گنہگار ہوواں چارہ چلدا نال تقدیر کوئی نہ
عقل ہوش میری فراموش ہوئی کارگر ہوئی تدبیر کوئی نہ
مظہر دلاں تے لوٹیاں پا ٹریا میرے جیہا غمگین دلگیر کوئی نہ
محمد شفیع میں سلیاں نال سولاں تکے آ میرا سینہ چیر کوئی نہ

ع

عام ہووے بھاویں خاص ہووے بناں پیڑ نہ نیر اوہ چون اکھیں
بناں درد نہ رنگتاں زرد ہوون آہیں لبائ تے سرد تے رون اکھیں
پتر جنہاں دے خاک سپرد ہوئے اوہ نہ سکھ دیاں نیندراں سون اکھیں
محمد شفیع نہ کچھ سکھ لٹیاں دی پٹیاں نہجوں دے ہار پروں اکھیں

غ

غماں دی دماں تے دھاڑ پئی گئیوں خوشی دی جھوک اجاڑ بچہ
تیرے ہجر دے نال جو حال میرا کس نوں پھول دساں سینہ پھاڑ بچہ
رخت صبر قرار دے چاک ہوئے سیڑے موت دے کون لنگار بچہ
محمد شفیع ریاض دے ہار توں بھی گیوں صبر دے رخت تاں ساڑ بچہ

غ

غم دی غزل دا ہر مصرعہ میں تاں ہنجواں نال تحریر کیتا
تیرے ہجر نے جگر نوں ہتھ پایا بے آواز ایہ راز تشہیر کیتا
تیرے مٹھڑے پیار نے شعر میرا پرسوز کیتا پُر تاثیر کیتا
محمد شفیع اس جہنڈے ہجر مظہر مینوں آن کے سخت ظہیر کیتا

غ

غم دی کوئی نہ حد تیری میریاں اکھیاں تھیں جاری خون ہویا
تیرے درد فراق ہلاک کیتا پاواں خاک سر حال زبون ہویا
گئی مت نہ ہوش پرت آئی چنگی بھلی نوں آن جنون ہویا
محمد شفیع میاں بناں درد آہیں کوئی یاد نہ ہور مضمون ہویا

ف

فیاض، ممتاز دی بانہ بھی شیماء، شاہدہ⁽⁷⁾ دا سوہنا ویر مظہر
گیا تیر جدائی دے لا سینے چھاتی امہڑی دی گیا چیر مظہر
خانہ شاد آباد سی نال جس دے روندے اج صغیر کبیر مظہر
محمد شفیع انہیریاں جھول ٹریا میرا لاڈلا بدر منیر مظہر

ق

قلب میرے وچ طلب تیری اسیں منگدے ساں کدوں دُوریاں نوں
پیا خیر مراد نہ وچ دامن خنی بخشا نہیں حضوریاں نوں
ہوندا رب دا امر قضا ناہیں اتھے ویکھدے نہیں مجبوریاں نوں
محمد شفیع میاں اساں ترناں سی اوہناں سوہنیاں چن جیہاں نوریاں نوں

ک

کون مظہر تیری خبر آنے اساں عاجزاں درد رنجانیاں تے
تیری مرض دی لاہھ نہ کسے لہھی دانشمند حکیم سیانیاں تے
تدبیر دی ڈھال نہ کم آئی لگا ہجر دا تیر نشانیاں تے
محمد شفیع آہا ایویں امر ربی ڈھکی موت دی گل بہانیاں تے

ک

کدوں تشریف لیاونی توں کدوں موڑسیں پرت مہار مظہر
کدوں درد نصیب غریب تائیں دیسیں آئی کے پاک دیدار مظہر
کٹھی غماں دی کون زنجیر میری بڈھی جس دے وچ دکھیار مظہر
محمد شفیع کوئی کٹ نہ کرے داروں تیرے ہجر دا بُرا آزار مظہر

ک

کملی جھٹڑی ہوئی بُوری تیری امبری درد نصیب مظہر
اگے دکھ ریاض اعجاز دے تھیں آہی سخت نزار غریب مظہر
دتی آن دکھاڑی ہور اُتوں تیری موت دی شکل مہیب مظہر
محمد شفیع اوہ جیوندیاں ہوئی شوہدی قسم رب دی موت قریب مظہر

ک

کم اس رب قدیر والے بالا بندے دے ہوں ادراک کولوں
بھلا بندے دی عقل پرواز کر کے پار نہ ہو افلاک کولوں
بناں عاجزی تے لب دوخنگی دے گئی پیش نہ عقل چالاک کولوں
محمد شفیع میاں ارشاد عالی کرنا صبر دُکھیں نبی پاک کولوں

ل

لواں پئی جھاڑ کلاوڑے میں بھالاں جنڈ کریر ببول میں تاں
گھروں نس کے بستیوں باہر جاواں پوے کالجے وِچ جاں سول میں تاں
تیرے ہجر دے جگر تے چلے آرے کیتا نہیں آرام قبول میں تاں
محمد شفیع دِن رین نہ چین رتی کردی وین نت رہاں ملول میں تاں

م

منگدی نت میں خیر تیری اپر جھوڑی پیا نہ خیر تیرا
رکھ فلک نوں سامنے کراں شکوے میرے نال ہئی کہہا ویر تیرا
مینوں بھلناں مول نہ حشر توڑیں کہنا صبح ویلے شب بخیر تیرا
محمد شفیع میاں اتھوں تیک ہئی ساڈے ملک اندر مظہر سیر تیرا

م

منع کریو ناہیں رون کولوں میریاں اکھیاں ایہ میرے دَس ناہیں
بس بس روناں میرے دَس ناہیں گلی جان دُکھیں متیں دَس ناہیں
میرے بختاں ہر پے بھس گئی پھاتھی قفس اندر سکاں نس ناہیں
محمد شفیع اوہ سُنکھ دے گیت گاوے گیا جس نوں ایہ زہری دَس ناہیں

م
مظہر میں تہنڈڑا نام پیارا چُم اکھیاں تے صبح و شام لاواں
ترے مٹھڑے ہاسڑے یاد آون لباً نال جد اپنے جام لاواں
مرے ازل تھیں بخت اوڑے سن دسو کسے تے کے الزام لاواں
محمد شفیع میاں محمد مظہر جیہا نعم البدل کتھوں گلفام لاواں

ن
نام تیرا لذت نال بھریا مظہر مٹھڑا شہد تے شیر پیسی
جیکر سچ پچھو نور اکھیاں دا ٹھنڈک دے دی بدر منیر پیسی
اوبدے پیار دے زلف دے پیچ اندر میرے دے دا کبک اسیر پیسی
محمد شفیع میں وقت بڈھپڑے دے کھاونان مظہر دے ہجر دا تیر پیسی

و
ونگ جنیوں کچ دی بھج جاندی ٹھوکر لگدے سار فریاد اللہ
لارے چڑھی ہوئی پینگھ ترٹ گئی ڈھٹی فرش تے نار فریاد اللہ
بیڑی ٹھیل مہانے نہ لائی کندھی رہی ادھ وچکار فریاد اللہ
محمد شفیع پر رب دے امر اگے کردا کون انکار فریاد اللہ

ہ
ہار گیا بازی سکھ دی میں دُکھاں آن میں تے گھیرا پایا اے
کُلُّ نَفْسٍ ذَائِقَةُ الْمَوْتِ والا پیالہ مونہہ میرے مظہر لایا اے
ہوندا رب دا امر قضا ناہیں ناقص عقل دے ہتھ کیہ آیا اے
محمد شفیع پر صبر دی واٹ اوکھی درجہ صابراں دا آ چایا اے

۵

ہسدیاں و سدیاں رسدیاں نوں اچن چیت اتھے روناں پے جاندا
سوہنے بوپڑے مکھڑے چن ورگے قاصد موت دا آئی کے لے جاندا
منزل اُنت قریب ہے موت والی پینڈا پل وچ ہو ایہ طے جاندا
محمد شفیع میاں جاندے ہتھ خالی نال لے ناہیں کوئی شے جاندا

لا

لا گیا سینے وچ کافی جانی وِت ایس دیس تے آوناں نہیں
مظہر اساں ترساوناں عمر ساری اپر تہہ سانوں نظر آوناں نہیں
قبر تیک اڈیک آہ ٹھیک رہی تیرا خیال میں دلوں بھلاوناں نہیں
محمد شفیع اوہ خاک سما ہو گئے پھلاں ترٹیاں باغ سوہاوناں نہیں

الف

اس جہان وچ آئی کے تے سدا سدا دی صدا لگان گُوڑی
اتھے سدا نہ جھنڈڑے جھلنے نی اتھے سدا لئی چھاوئی پان گُوڑی
اتھے سدا دی گُوڑ سوداگری آ سدا بادشاہاں شوکت شان گُوڑی
محمد شفیع زَر زور نہ سدا رہنا کدھ دے تھیں حرص نادان گُوڑی

ی

یاد وچ مظہر محمود تیری یادگار رہسن اشعار میرے
تیرے مٹھڑے حسن نوں جس ڈٹھا زار و زار روندا اوہ بھی ہار میرے
ظالم درد جدائی کہی پیش آئی بُرے بخت ناہے بختیار میرے
محمد شفیع ہو جاوسی پار بیڑا کیتا کرم جاں پیر سچیار میرے

☆ ”مجموعہ اشعار پنجابی (قلمی)“۔ صفحہ 47 توں 66۔

☆ حاشیہ از شاعر:

”تمام شدی حرفی یادگار مظہر از بندہ میاں محمد شفیع اختر چشتی حیدری،

بمہ مئی 1970ء بہ اختتام پذیرفت۔

ج: جنہاں دے پتر جوان مَر دے اوہ تاں سکھ دیاں نیندراں سون ناہیں
دلوں اوہناں دے سوز دی آہ نکلے کون آکھدا جے مایو روں ناہیں
صبح و شام اوہ بے آرام رہندے میلے کپڑے رہن تے دھون ناہیں
محمد شفیع ایہ لوٹیاں پن جس نوں کیوں اوہ خون دیاں اتھروں چون ناہیں“

1- میاں محمد شفیع اختر ڈھانگری وانی دانوا سا۔ اونہاں دی سب توں وڈی بیٹی شفیعہ بیگم دا بیٹا۔

2- علاقے دا حکیم / معالج۔

3- مظہر محمود اُبھائی۔

4- مظہر محمود اُبھائی۔

5- میاں عبدالرشید ولد میاں محمد شفیع۔ مظہر محمود دے ماموں۔

6- مظہر محمود دے بھائی۔

7- مظہر محمود دیاں بھیناں۔

[سی حرفی نمبر 19]

بروفات حسرت آیات خواجہ غریب نواز ابوالبرکات سید محمد فضل شاہ رحمۃ اللہ علیہ



الف

آس میری آج بچ گئی گیا پاس ولایکے یار سوہنا
جیہڑا سوہ سگار سی مجلساں دا جس تے ناز آہے کردے یار سوہنا
جسدے یوسفی حسن تے خلق وکی جسدے حسن دا گرم بازار سوہنا
محمد شفیع کیہ تاریاں ریس کرنی میرا سوہنا سی شمس التہار سوہنا

الف

آہ فراق دے نال ماراں تاراں صبر قرار دیاں ٹٹ گئیاں
جہاں نال میں عمر دی آہی نیتی اوہ تاں راہ اُدھے مینوں سٹ گئیاں
نکے ہجر دے شجر نہ ہوں ساوے موسم چیت پھلایاں پھٹ گئیاں
محمد شفیع میاں روواں کراں زاری وگاں صبر دیاں ہتھوں چھٹ گئیاں

الف

آسرا سیں توں بے آسری دا سائیاں کس لینی ہُن سار میری
دھندوکار اندھیر چوہیر دے پئی آن بیڑی منجھدھار میری
کھلی بانہہ کرلاناں واسطہ ای کوئی سنے نہ کوک پکار میری
محمد شفیع پا کرم دا خیر جھولی گولی سدّی میں جگ سرکار تیری

الف

اساں آہیاں تیرے نال لایاں سنگ غیر ناہیاں گلاں پریت دیاں
کعبہ جان محبوب نوں کرن سجدے جہڑیاں عشق نماز نوں بیتدیاں
جہاں جان جہان دا نہیں صرفہ اوہو عشق میدان وچ جیتدیاں
محمد شفیع اس ڈوگھڑے شوہ وچوں ہوں پار جہڑیاں سچی نیت دیاں

ب

بل اٹھی آتش ہجر والی سینہ سلیا غماں دے تیر میرا
جائے ٹھلایا نیر نہ اکھیاں دا ہویا تب تندور سریر میرا
پائے پچّ محبوب دی زلف کالی پیا واسطہ نال تقدیر میرا
محمد شفیع ہتھ بندھ کران نت عرضاں ہووے خاتمہ خیر اخیر میرا

ب

بحر سی فیض کرامتاں دا جاری وچ جلاپور شریف لوکو
حیدر شاہ جی غوث دا جگر گوشہ سید فضل شاہ ہم ردیف لوکو
جسدی ذات دا فخر سی چشتیاں دا جسدی کردا سی جگ تعریف لوکو
محمد شفیع آج لٹ اوہ کھڑی دولت جسوں آکھدے موت حریف لوکو

ب

برکتاں نال منسوب سید سچّا لال ایہ یمن دی کھان دا سی
تے غواص سی بحر معانیاں دا واقف کار اسرار قرآن دا سی
دولت حُلُق محمدی بخش ہوئی ایہ فیضان اس نور عرفان دا سی
حیدر شاہ دا جگر پیوند سید تے ایہ نک سارے خاندان دا سی

ب

بے مثال بے مثل سید بے نظیر مرشد بے نظیر مرشد
بھری نال تاثیر کلام جس دی میرا ہدف مراد تے تیر مرشد
دنیا رتجھدی جس دیاں خوبیاں تے میرا مٹھرا ستھرا شعیر مرشد
محمد شفیع سید بادشاہ میرا اوہ تاں پیراں دا پیر ہے پیر مرشد

ب

بال کے تھنڈے عشق والی سینے اگ میں نشر بازار ہوئی
طعنے دین سہیلیاں سنگت دیاں ہائے میں وچ ترنخاں خوار ہوئی
کیتا عشق دا نوش میں زہر تتی گم عقل تے ہوش فرار ہوئی
محمد شفیع میاں آوے نظر ناہیں جیندی سانگ کلیجیوں پار ہوئی

ت

تک تصویر اسیر ہوئیاں سستی ہار محبوب دے نین تک کے
خنجر ابرؤاں دے جگر چیر کیتا رہی ہوش نہ قاب قوسین تک کے
منزل دور تے ملن ضرور ہويا سوئی ڈری ناہی کپڑ پین تک کے
محمد شفیع دل عاشقاں ٹھنڈ پوندی پاکاں حاجیاں جیوں حریم تک کے

ت

تاہنگ تساڈے پیار والی سینے وچ میرے جانی بھڑکدی اے
تیرے پریم دی تار دلدار میرے سدا وچ کلیجڑے رڑکدی اے
ترئی آس وسواس خناس پائے سانگ ہجر والی سینے اڑکدی اے
محمد شفیع میاں آئی رات بیلے بدلی شوکدی تے بجلی کڑکدی اے

ت

تکدی میں کھلی راہ تیرے دس کدوں تشریف لیواناں توں
یوسف مصر دیا وِچ اڈیک تیری کدوں وِچ جلالپور آواناں توں
دُکھی وانگ یعقوب دے کراں زاری کدوں روندی نوں آن ہساواناں توں
محمد شفیع میاں دل دے وِچ میرے کدوں قدم رنجہ فرماواناں توں

ت

تاب نہ رہی وجود اندر چڑھیا ہجر دا آن کے تاپ ایسا
تھکی لا صبون زبون تتی ہووے دُور نہ داغ سراب ایسا
ہائے میں بھل کے عشق نوں گل لایا بُرا بیجیا ہائے میں آپ ایسا
محمد شفیع میاں اکھیں لان جیہا ناہیں جگ اندر ہور پاپ ایسا

ٹ

ثابتی صدق دی ونگ تیری ہوندے وس نہ پیاریا توڑساں میں
جاں تک جان وجود دے وِچ میرے اکھیں غیر دے نال نہ جوڑساں میں
گلی گلی درویش فقیر بن کے تیرے پیار نوں پیاریا لوڑساں میں
محمد شفیع تیرے در دی خاک پُماں خنجر کبر ڈونگھی ندی بوڑساں میں

ٹ

ثابتی دا شیشہ پُور ہویا ٹٹ صبر قرار دے تار گئی
جس روز دا پیارڑے کوچ کیتا اس روز دی ہاں میں بیمار پئی
ہونا دور نہ درد آزار میرا داروں کراں جے لکھ ہزار پئی
محمد شفیع جس روز دا یار ٹُریا لکھاں غماں دے درد اشعار پئی

ج

جرم کیتا اکھیں لاونے دا نام رب دے بخش خطا میری
دروں دُور نہ کریں معذور تائیں منظور کر لیں التجا میری
سارے جگ تھیں اج الگ ہاں میں حامی بھرے نہ کوئی بھرا میری
محمد شفیع بیمار محبتاں دا تیرا دید ہے خاص دوا میری

ج

جا نہ غم دے چاہ پا کے اسیں رکھدے ہاں دلوں چاہ تیری
میری دل دی لوح تے نقش ہوئی صورت پاک سوہنی فضل شاہ تیری
جہاں لٹیا سکھ تے چین میرا اکھیں منگدیاں اوہو نگاہ تیری
محمد شفیع نہ بھل دی یاد مینوں میریا سوہنیا شام نگاہ تیری

ح

حیدری نسبتوں جگ جانے بھریا نال گناہ پلپتیاں میں
گیا پھس وچ نفس دے قفس میں تاں کوئی نیکیاں خاص نہ کیتیاں میں
کوئی دوس ناہیں کسے دوسرے تے ہتھیں زہر صراحیاں پیتیاں میں
محمد شفیع میاں جانے رب نیتاں ہویا کے جے رہی چُپیتیاں میں

ح

حور قصور ضرور ناہیں میں تاں دید حضور دا منگدی ہاں
گوکاں واگ کنگ میں سنگ لٹی ڈھونڈاں سنگ مٹھی جس سنگ دی ہاں
میں تاں گولڑی تیریاں کتیاں دی تیری خیر میں رب تھیں منگدی ہاں
محمد شفیع میاں چشتی پیر باجھوں پئی کندی قید فرنگ دی ہاں

خ

خبر افسوس نہ ملی مینوں سوہنا الوداع فرما گیا
لا کے تیر کلیجڑے پیر بھائیاں سوہنا پیر جدائیاں پا گیا
خالی چھوڑ کے جسد شریف تائیں روح اُڈ کے فوق السما گیا
محمد شفیع فنا دی جھاگ منزل سید رب دی من رضا گیا

خ

خاص غلام فرید خادم جہاں توڑ نبھایا یاریاں نوں
حاضر رہیا حضوریاں وچ سدا کر کے ترک خویشاں ساکاں چاریاں نوں
نیندر بھکھ آرام حرام کیتا حضرت صاحب دیاں خاطر داریاں نوں
محمد شفیع غلام فرید ہووے گئے کٹ ایہ منزلاں بھاریاں نوں

د

دلوں منوں مینوں آپ نالوں پیارا جگ اندر ہونا ہووے کوئی نہ
تیرے حسن دے پھل تے روح میرے ورگا ہووے کسے ہونا بھور کوئی نہ
تیرے جیہا سوہنا اتے من موہنا ہونا لگ لہور پشور کوئی نہ
محمد شفیع جو دلاں تے پائے لوٹی سوہنا ناز بھریا ایسا چور کوئی نہ

د

درد دی چاشنی ہووے ہوندی اتے عقل کچھ ہووے سواد رکھدا
آون راس اُسُنوں دینا داریاں نہ خانہ عشق دا جو آباد رکھدا
پھابی زلف والی جہڑا پھسیا نہیں طبع اپنی اوہو آزاد رکھدا
محمد شفیع جے اپنے وس ہوندا تیشہ سرے تے کیوں فرہاد رکھدا

ذ

ذکر زبان تے نت تیرا میری لبیاں دے وچ مٹھاس تیری
تیرے دید دا آپ درکار مینوں میرے جگر دے وچ پیاس تیری
بلبل تھنڈے حسن دے گیت گاندی کرے زاریاں نت اداس تیری
محمد شفیع اج درد فراق ہتھوں گئی لنگھ فریاد اکاس تیری

د

راہ تیرے قبلہ گاہ ویکھاں گئیوں رُس نہ پتا نشانیاں میں
گلبرگ کالونیوں دھاڑ پئی پیاں جھوڑی درد حیرانیاں میں
سستی ہار بلوچ دے کھوج بھالاں جنگل بار بیلے دل جانیاں میں
محمد شفیع میاں تیری موت پاروں ہوئیاں غم دیاں درد مہمانیاں میں

د

رب رحیم کریم جانے میرے پیر دے شان دا شان کس دا
میرے پیر دے حُسن جیہا حُسن دسو اج وچ سارے پاکستان کس دا
گھلے آپ دے باب فضیلتاں دے اس تھیں ودھ کے ہور عنوان کس دا
محمد شفیع جتھوں خلقت فیض پاوے میرے پیر جیہا آستان کس دا

ذ

زہر نواڑے خورش مٹھی چٹھی موت دی درد سہماں ہوئی
جگر ہجر تھی پھٹ ہو گیا لیراں میرے حال دی بُری مثال ہوئی
اکھیں سرخ جگر اتیوں لال ہوئیاں دہی بد تھیں گھٹ ہلال ہوئی
محمد شفیع جدائیاں پیش آئیاں گھڑی ہجر سندی وانگوں سال ہوئی

ذ

زور نہ نال تقدیر کوئی کراں زاریاں بیٹھ کے رین ساری
صبر ضبط دی حد نہ رہی ثابت اٹھے پہر رہندے ہنجو نین جاری
لگے آپ دے ہجر دے تیر ظالم میرے جگر دے وچ نے ہین کاری
محمد شفیع دل دی کشتی ڈولدی اے ڈونگھے نین ہاؤ کپر پین بھاری

س

سیدا عرض فقیر کردا ہوسن نظر دے جام انعام کس تے
کرسی دے دے کبک شکار کہدا پاسی پھاہیاں زلف دے لام کس تے
سینے وچ ناسور حضور غم دے کرن عرض ناکام خدام کس تے
محمد شفیع اس موت کسوف ہتھوں پئی قہر نزول دی شام کس تے

س

سیدا صاحبہ بادشاہا ہتھ بنھ کے عرض فقیر کردا
ملکی اج کوئی نویں دروئی نہیں میں ہاں جمدیاں دا منگت اس گھر دا
خنی ولدے نہیں سوالیاں نوں پاؤن خیر جھولی دیندے جو سردا
محمد شفیع چھانی کون مینوں تیری نظر دی اے مینوں لوڑ مردا

س

سج حویلیاں دس دیاں اوہ جتھے رکھدا یار تشریف ہسی
طبع خیر تھیں خیر معمور جدی ناہی طبع موصوف کثیف ہسی
زہرہ مشتری جسدے دید دا سی حسن یوسفی جس ردیف ہسی
محمد شفیع میاں جانے رب کتھوں کچھے پیا ایہ ہجر حریف ہسی

ش

شوق تیرے اندر جانیاں او میریاں اکھیاں تھیں نیندر نس گئی
جانی پیاریا او تیری پاک صورت میرے وچ قلبوت دے وس گئی
میری جان انجان نادان مجھی تیری زلف دے دام وچ پھس گئی
محمد شفیع ایہ عشق ہے ناگ زہری اوہدی بس میرے لوں لوں دھس گئی

ش

شق ہويا دردوں جگر میرا میری زندگی سخت محال دے
رہی ڈھونڈھ جنوب شمال اندر نہ اوہ یوسفی حسن جمال دے
جسدی پاک تصویر اسیر کیتی نہ اوہ لاڈلا ماہ تمثال دے
محمد شفیع میان گئیاں پے وتھوں ہونا دُور ایہ نہیں زوال دے

ص

صوفیاں صادقان سالکاں دے بکو نظر تھیں کم بنان والے
فاسق آپ دے ہتھ تے کرن توبہ گمراہاں نوں راہ وکھان والے
منبر نبی تے بیٹھ کے وعظ کردے مسئلہ حق دا سچ سنان والے
محمد شفیع صدقہ بندہ پروری دا سینے عشق دی اگ چان والے

ض

ضرب توحید دی مار کے تے سٹے دلاں نوں کرن بیدار آئے
میرا پیر سی پیر زمانیاں دا وچ مجلساں سو بھ سنگار آئے
سینے صاف آئینے دے ہار کیتے دُور کبر دا کرن غبار آئے
محمد شفیع میاں دلوں ایک ہوئے جہڑے خاص بندے نیکو کار آئے

ط

طبع شریف حضور دی وِچ بھریا خلق محمدی پیار آہا
جس تے آپ دے کرم دی نظر ہندی اُسدا ہو جاندا بیڑا پار آہا
سید سخی بھرپور کرامتاں تھیں گنج فیض دا بحر ذخار آہا
محمد شفیع جلالپور شریف اندر کھلا ساکلاں لئی دربار آہا

ظ

ظاہری طور ہن کون کرسی میرے نال پیار حضور جیہا
سد کول بہاوسی بول مٹھا اُس فیض گنجور پُر نور جیہا
چہرہ چمکدا چن دے نور ورگا اوہدا پاک تَجَلُّدَا طور جیہا
محمد شفیع میاں مونہوں جھڑن موتی اوہدا سخن شریف زبور جیہا

ع

عجب ہويا يارو غضب ميں تے پئی سار ناہیں اوہدے جان دی میں
سستی ہار رہی سستی تیج اُتے پئی دھاڑ سیو پنوں خان دی میں
کسے وَل نہ وَل کے نظر پاواں بدھی یار دے عہد پیمان دی میں
محمد شفیع نہ کرن قبول اکھیں کسے ہور نوں قسم قرآن دی میں

غ

غم آ ہم ہما ڈھکے کسے دیوناں دم دلا سڑا نہیں
میرے پیار دی جھوک اُجاڑ ہوئی آوے نظر آباد اوہ پاسڑا نہیں
کوئی سین ناہیں کوئی ساک ناہیں کوئی پھپھوڑا نہیں کوئی ماسڑا نہیں
محمد شفیع پا کرم دا خیر جھولی جاناں اساں اتھوں خالی کاسڑا نہیں

ف

فقر فاقہ منظور مینوں ایپر دوریاں دی دے گل مشکل
بھکھ دکھ بیماریاں جھل لہیاں ایپر یار دے ہجر دا سل مشکل
پیا درد فراق دا ول سینے اس دل دا ہووناں ول مشکل
محمد شفیع میاں مشکل پیش آئی درپیش مسئلہ ہونا حل مشکل

ق

قبر شریف حضور دی نوں چُماں ادب دے نال پیار صدقے
گویا صدف دے وِچ محفوظ موتی قیمت جسدی لگھ ہزار صدقے
نازل فوق سما تھیں ہون جس تے لگاتار جیوں مینہ انوار صدقے
محمد شفیع تسکین دی ملے دولت حاضر ہوئی کے پیش مزار صدقے

ق

قرب شریف حضور تیرا نت منگدی رب وودود تھیں میں
ہووے جگر نہ خون آلود میرا خنجر تیز اُس ہجر حسود تھیں میں
اتھے اصل تھیں مَوَل بھی گیا ہتھوں پلے پئی نہ دمڑی سود تھیں میں
محمد شفیع پا کر دا خیر جھولی دولت مند ہاں تھنڈے جود تھیں میں

ق

قبر وِچ بھی تیری یاد رہی اسیں صبر دیاں ڈھیریاں ڈھاہ بیٹھے
ہائے اسیں وِچ اس حیاتِ زری دے تیرے ملن والی ہیکھی لاہ بیٹھے
اساں غیر دی چاہ وِچ چاہ گھتی اسیں تھنڈی چاہ نوں چاہ بیٹھے
محمد شفیع ادھناں مکھ پھیرنا نہیں جہڑے ہو تیرے قبلہ گاہ بیٹھے

ق

قلب وچ طلب حضور والی طالب منگدے نے کدوں دُوریاں نوں
اوہ تاں چاہوندے رب وودو کولوں مقصود محمود حضوریان نوں
گلی پیار دی دار تے چڑھن سوکھا اتھے پچھدے نہیں منصوریان نوں
محمد شفیع میاں سچی طلب والے ہتھ گھتدے جا منظوریان نوں

ک

کس تے دلاں دے پھول دساں گجھے راز گئے رازدار کتھے
حل ہوندیاں جس تھیں مشکلاں سن میرا پیر سوہنا سچیاں کتھے
ملے دے نوں آج قرار کتھوں میرے دے دا گیا قرار کتھے
محمد شفیع میاں سینے سول چھن دسو گئی اوہ مری بہار کتھے

ک

کون بہاسی کول مینوں اتے کون بلاوسی پیار کر کے
کون شفقتاں ورتی نال میرے مہر لطف دا خاص اظہار کر کے
جانے رب جانی کہڑے پاس گئے میرے دے دی کوئج شکار کر کے
محمد شفیع نہ وٹیاں یار واہیاں گیا جدوں دا یار بیمار کر کے

ک

کرم کریمیاں کون کرسی میرے حال خوار زبون اُتے
کیڈی کرم دی نظر کریم دی سی خستہ حال میں نا موزون اُتے
میری قلم جولانیاں دس دی رہی اوہدے پیار دے پاک مضمون اُتے
محمد شفیع نہیں حشر تک شاد ہونا اوہدے دید بن نیک شگون اُتے

ل

لعل سُچا قیمت دار موتی سبط حیدری صدف سادات وچوں
وقت اپنے دا اوہ تاجدار ہویا پاک چشتیاں دے حضرات وچوں
یوسف حُسن دے بدر اکاس اُتے چلی عشق دی بات جاں بات وچوں
محمد شفیع سید فضل شاہ آہے عالی قدر برکات کرامات وچوں

م

موڑ مہار اکوار شاہا اسیں راہ تیرا صبح شام ویکھاں
جس روز دا مکھ چھپایا ای اس روز دا راہ مدام ویکھاں
ساقی یار کد مجلساں لا بیسی کدوں ورتدے پیار دے جام ویکھاں
محمد شفیع کد لطف دی نگہ کولوں پختہ کار ہو جاوندے خام ویکھاں

م

ماہ کنعائیاں جانیاں او رہے دے وچ نت خیال تیرا
میریاں اکھیاں تھیں ہوندا دُور ناہیں میریا سوہنیا پاک جمال تیرا
تیری غمز انداز دیاں گشتیاں وچ میرا قلب ایہ جان غزال تیرا
محمد شفیع مجبوریاں کون گئے پورا کرے ایہ کون سوال تیرا

م

ماہ گنبدیاں سال گزرے نگہ منگدی آپ دی خیر دا خط
میرے قلب نوں ہدف بنائے جہڑی اس اکھ دو نالڑی فیر دا خط
اودے پیار تے وکی ایہ جان میری ہُن ایہ جان نہیں منگدی غیر دا خط
محمد شفیع میان وچ زندگی دے میرے لئی سی جنت دی سیر دا خط

ن

نظر کولوں گیا ہو اوہلے مسند حیدری دا تاجدار سوہنا
جہڑا عالماں فاضلاں کالماں دا اتے ساکال سردار سوہنا
مقتدا بیسی جہڑا صوفیاں دا اتے عاشقاں دا غمخوار سوہنا
محمد شفیع میاں عید اکھیاں دی جدا دید اوہ ماہ انوار سوہنا

ن

نظر افروز کس روز ہوسن جلوے آپ دے نظر نواز قبلہ
نظر باز دہلیز تے آن بیٹھے کارن دید سعید دی آز قبلہ
میں اوہ درد سامان درمان جدا ناہیں کر سکے چارہ ساز قبلہ
محمد شفیع مسکین غریب تائیں سدو پاس غریب نواز قبلہ

و

وائے خدا دا واسطہ ای میرے یار دی خبر لیا صدقہ
جسدی زلف زنجیر اسیر کیتا اُسدی پاک تصویر دکھا صدقہ
پوہتی لبان تے جان نراس میری قطرہ آب حیات چوا صدقہ
محمد شفیع میاں دل دے وچ خانے کدی قدم رنجہ فرما صدقہ

و

واسطہ پیر سیال دا ای جائیں یوسفی دس جمال سوہنا
ہونا نہیں تیرے جیہا کوئی ہوو جانی وچ شرق جنوب شمال سوہنا
صورت انت سوہنی سیرت انت سوہنی انت سوہنا توں بے مثال سوہنا
محمد شفیع نہ اکھیاں رجدیاں سن جسوں ویکھ جدا وال وال سوہنا

۵

ہنس کے دس ادھ مکھ نوری جھڑا دلاں تے لوٹیاں پاوندی سی
جھڑا عاشقاں درد رنجائیاں نوں سوہنے ناز نیاز وکھاوندی سی
قبلہ آ کے محل شریف اندر جھڑا سوہنیاں مجلساں لاوندی سی
محمد شفیع میاں کنیں سال ہوئے پیا ملن نوں جی ترساوندی سی

لا

لبھدی پھراں انوار تیرے مینوں کوئی نہ پاوندی دس تیری
حشر تیک اڈیک دے وچ رہسن میریاں اکھیاں دید دی تس تیری
تیرے خن شریف نوں گوش ترن مینوں بھلنی نہیں مٹھی چس تیری
محمد شفیع میاں جاگل رین ساری گئی نیند نیناں وچوں نس تیری

الف

اگ لگی رگ رگ اندر شاہ رگ وچوں تیرا ناں بولے
جنت لوڑ نہ تیریاں کشتیاں نوں گلی تھنڈی قبر دی تھاں بولے
مینوں لوڑ نہ مال خزانیاں دی منگ تھنڈا جگ جہان بولے
محمد شفیع قبلہ میرے درد سندا سنیا آپ دے کول درمان بولے

ی

یار دلدار غنوار باجھوں مینوں جگ دے وچ ہنیر دے
سر تے غماں دی شوکدی رات کالی مینوں ہوندی پی نہیں سویر دے
کھلے گھیر آفات حیات مینوں دشمن گھات دے وچ چوہنیر دے
محمد شفیع میاں دکھ دُور ہوون سوئی جہات جیکر ہک دیر دے

ي

یم در یم پُر نم اکھیں اٹھے پہر رہندے دیدے زار میرے
سُونہ رب دی دید وچ عید میری کدوں ہوگ دیدار دِلدار میرے
دلی دلاں دی اسیں لٹا بیٹھے صبر ضبط لٹی جانی یار میرے
محمد شفیع ایہ جان ناتان میری کٹھی غمز دی تیر کٹار میرے

ي

یار دے ہجر نے خوار کیتا حائل برزخی پیش حجاب ہويا
کر زاریاں ہاریاں یار باجھوں جیندے ہجر دی نذر شباب ہويا
بلی اگ فراق دی وچ سینے سڑے ہڈ تے جگر کباب ہويا
محمد شفیع میاں پیاں دُور وُتھوں ہتھوں ہجر دیوں حال خراب ہويا

ي

یار شعبان شریف اندر پئی آپ نوں سَد حضور وچوں
جمعات دے روز پرواز کیتا ملکی روح وجود پر نور وچوں
میرا شاہ اوہ ماہ افروز سوہنا بیسی چاننا چن دے نور چوں
محمد شفیع میاں ہوندي موت وارد اللہ پاک دے خاص دستور وچوں

ي

یار حضور دے ہجر اندر میرا جگر فگار فگار ہويا
میلے ہون گے حشر دے روز ہُن تاں اتھے میل محال دشوار ہويا
گئے اِس جہان توں ہو اوہلے پردہ موت دا بیچ دیوار ہويا
محمد شفیع میاں طلب اکھیاں دی حضرت صاحب دا پاک دیدار ہويا

ی

یاد رکھیں جس روز گیا میرا شاہ سوہنا چھاتی چیر غم دی
ست دس۔ ۱۷ شعبان شریف دی سی کھاہدی جان تے جاں شمشیر غم دی
تیرہ سو چھیاسی سال ہجری پئی پیش جدوں تقدیر غم دی
محمد شفیع میاں پہلی بارہویں دی سن چھیاٹھ سی گھری دگیر غم دی

ی

یار دے درد فراق اندر لکھاں لیل نہار اشعار غم دے
ناہیں سکھ دے نیندرے مول سستی دیدے جدن دے ہوئے شکار غم دے
کدوں سکھ دا گن آواز پوسی کدوں ہون گے بخت بیدار غم دے
محمد شفیع کد ہوگ دیدار مینوں کدوں ہون گے سائے فرار غم دے



☆ ”وصال امیر حزب اللہ (قلبی)“ - صفحہ 21 تا 38۔

☆ حاشیہ از شاعر:

”بہ اختتام رسید از بندہ فقیر حقیر پر تقصیر میاں محمد شفیع اختر ڈھانگروی
چشتی حیدری ابن میاں محمد عظیم نوری حضوری، ساکن ڈھوک محمود داغلی
ڈھانگروی مرزا متصل ٹلہ جوگیاں، تحصیل و ضلع جہلم۔ 10 جمادی
الآخر 1391ھ بروز سوموار بمطابق 02 جولائی 1971ء۔“

[سی حرفی نمبر 20]

مدت ہوئی میں دید سے نا مستفید ہوں
جس کو نہ کوئی سن سکے میں وہ پکار ہوں



الف

اگ پریم دی لگ اٹھی پیتے یار سنگ رَج پیالڑے نہ
سرتے آ فراق دی ہاٹھ گئی پنوں ہار رہے ہوش سمہالڑے نہ
رہی ورج ہزار میں اکھیاں نوں روو اکھیو خون پرناڑے نہ
محمد شفیع جس بھر دی سانگ لگے سکھ سووندا ہاڑ سیالڑے نہ

ب

باجھ پیاریاں جانیاں دے ہووے باغ بہشت جیہی جا کیوں نہ
بھاویں ہووے اوہ سیر کوہسار اُتے یا کہ ہووے اوہ لب دریا کیوں نہ
ہوندی دل دیاں جانیاں نال جُست بھاویں ہووے اوہ ریگ صحرا کیوں نہ
محمد شفیع بن یار دے نار ورگی بھاویں ہووے اوہ بادِ صبا کیوں نہ

ت

تکدیاں تکدیاں جانیاں او! میرے دِلے دی کونج شکار ہو گئی
تیری رمز دی غمز نہ سمجھ سکی تیری نظر کلیجیوں پار ہو گئی
چنگی بھلی میں ہسدی کھیڈدی ساں ستیاں نال میں ثرت بیمار ہو گئی
محمد شفیع میں ہیر دِلیگر واگلوں اُج نشر وچ گلی بازار ہو گئی

ٹ

ثابتی عشق دی منکدی میں رہا قدم نہ اس میدان ڈولے
جائے ڈول ایہ زمیں اسمان توڑے میرا کدے نہ قول زبان ڈولے
جس نوں لیا قبول کر اکھیاں تے ہوواں کیہ جے فر ایمان ڈولے
محمد شفیع اوہ مرد میدان دا نہیں جہڑا عشق دے وچ انسان ڈولے

ج

جہاں نے عشق دے جام پیتے طلب تہاں نوں جام طہور دی نہ
جہاں یار دے دید دی جھلک پائی خواہش اوہناں بہشت دی حور دی نہ
گلی یار دی ہتھ زنبیل کاسہ طلب خیر بن دید مہجور دی نہ
محمد شفیع سنگ غیر نہ جڑن اکھیں مرضی یار دے عشق غیور دی نہ

ح

حال تھیں ہو بے حال جاندا جہڑا اکھیاں دے سودے تولدا ای
جہڑا توڑ نہ چاہڑدا یاریاں نوں رہندا اوہ فر کسے نہ ٹول دا ای
سچی نیت نوں کرے پلّیت جہڑا اوہ تاں دودھ وچ اک نوں گھولدا ای
محمد شفیع میاں چڑھے سولیاں تے جہڑا گجھڑے راز نوں پھولدا ای

ح

حاجیاں نوں طلب حج دی اے اتے عاشقاں طلب دیدار دی اے
حاجی کرن طواف تے صفا مروہ کعبہ عاشقاں دا گلی یار دی اے
حاجی کرن وقوف عرفات اندر اتے بلبلان طلب گلزار دی اے
محمد شفیع جس دلاں دے سکھ لئے اوہ تاں اکھ میرے دلدار دی اے

خ

خوب محبوب مرغوب تیری صورت دلاں تے لوٹیاں پا گئی
مَن موہنیاں سوہنیاں نظر تری چنگے بھلے مرے دل نوں کھا گئی
سُکھ نیندراں خواب خیال ہوئیاں تیری نظر کہی جام پلا گئی
محمد شفیع خدا دا واسطہ ای میں تے آ، ڈاڈھی سدھرا گئی

د

دلاں تے لوٹیاں حُسن تیرے پایاں دلبرا ماہ کنعانیاں او
بدھی تہنڈڑے زلف دے پیچ اندر میریا نازگمانیاں جانیاں او
بیٹھے غمز دے تیر نشانیاں تے گئیاں خطا نہ تیریاں کانیاں او
محمد شفیع دل و پیچ خرید لئیاں ساری عمر دے لئی حیرانیاں او

د

دار منصور منظور کیتی انا الحق دا قول وساریا نہ
صادق صدق تے اپنے رہیا قائم حق سچ دے بول نوں ہاریا نہ
متھے کفر دا تِلک لگائیکے کے تے جنجو عشق دا گلوں اُتاریا نہ
محمد شفیع گل اپنی توڑ چاہڑی کیتی ناقصاں دے اگے آریا نہ

ذ

ذرہ میں مہر دی نظر منگاں مینوں لوڑ نہ گنج خزانیاں دی
ہوندی شمع تے جان قربان کرنی سچی طلب آکھن پروانیاں دی
سُنن لاه پوشاک سر خاک پاوَن مستی چڑھی جاں آن پیمانیاں دی
محمد شفیع جو لئیاں عشق تیرے پچھو گل نہ اوہناں دیوانیاں دی

ر

رج کے دیکھناں منگدیاں نے جانی یار نوں درد اُداس اُکھیں
جلوے لیلۃ القدر دے بہوں چنگے اپیر یار دی رکھن پیاس اُکھیں
تارے گندیاں رہندیاں رات ساری زاری کردیاں رہن زراس اُکھیں
محمد شفیع میاں جیکر سچ پچھو، ہائے نہیں آیاں مینوں راس اُکھیں

ز

زلف شب گیر اسیر جہڑے اوہ تاں منکدے نہیں آزادیاں نوں
سُستی تھلاں وچ رُلن منظور کیتا پاوے عشق ایہ وخت شہزادیاں نوں
واگ و حشیاں ملن اُجاڑ جنگل عاشق دیوندے تیج آزادیاں نوں
محمد شفیع جہاں اُکھیں لا لیاں سدا ترسدے رہن اوہ شادیاں نوں

س

سمجھ نہ پئی نادان تائیں اچن چیت کی دِلے نوں ہون لگا
کون لُٹ کے سکھ لیجان لگا کون غماں دی پُنڈ پکُون لگا
چنگی بھلی ترنجیں کھیڈ دی نوں کون دِلے تے زاریاں ڈھون لگا
محمد شفیع نصیباں نے ہار دتی پُٹھا چرخ مرے لئی بھون لگا

ش

شرع شریف کجھ ہور آکھے اپیر عشق دا ہور دستور اتھے
اعظم، شافعی تے مالک دے ہور مسلے ہور آکھدا شاہ منصور اتھے
کعبے دلاں دے کرن آباد عاشق کر کے کبر دے بُناں نوں پُور اتھے
محمد شفیع ایہ عشق دا فیض سارا ساقی نظر تھیں کرے مخمور اتھے

ص

صرف تساڈڑے دید سندی جانی پیاریا او طلبگار ہاں میں
پاؤ خیر سرکار دیدار سندا کھلی آن تیرے دربار ہاں میں
خالی ٹور نہ صاحباً منگتیاں نوں بیٹھی یو ہے تے جھول کھلار ہاں میں
محمد شفیع دی دے مُراد سائیاں رہی ادب تھیں عرض گزار ہاں میں

ص

صدف دیا موتیا سچیا او! تیرے حسن دی تاب نہ جائے جھلی
پیا سوہنیا دلاں وچ شور تیرا گلی گلی اندر تیری گل بُلی
کلی کھڑی گلاب دی باغ اندر سینے بلبلان دے وچ آگ بکی
محمد شفیع اک مدت مدید ہوئی جانی یار مجید نہیں خبر گھلی

ض

ضرب مضرب دی حُسن تیرا مرے ولے دی تار رباب اُتے
میری طبع دا کبک بے تاب ہویا اڈ پہنچ نہ سکے مہتاب اُتے
زلن پئے عشاق مشتاق تیرے گٹھے تھنڈڑے پاک شباب اُتے
محمد شفیع اوہ پھول کے کیہ دساں جھڑیاں ورتیاں حال خراب اُتے

ط

طرف محبوب دیوں کدوں ہوئی دسو شرف مینوں منظوریاں دا
ہوئی وصل وصول دل جانیاں دا جاسی حرف وچوں اڈ دُوریاں دا
متم رب دی عشق دے دیس اندر لیندا نام نہ کوئی مغروریاں دا
محمد شفیع میاں اوہو بھاگ بھریاں پیتا جہاں نے جام صبوریاں دا

ط

طعن تشنّع ملامتاں نوں سن کے پاؤں عاشق مَتھے گھُوریاں نہیں
ہویا خاص احسان انسان اُتے ملیا عشق دا دان ایہ نوریاں نہیں
کیہ فائدہ اکھیاں لاوے دا مقصود ہے خاص حضوریاں نہیں
محمد شفیق پا وصل دا خیر مینوں منظور حضور ایہ دُوریاں نہیں

ظ

ظلم کیتا نیناں ظالماں نے سُکھی سسڑی نوں دے تھل مائے
پُوں یار دے باجھ سنسار ورگے ڈھکے کھان ایہ رنگ محل مائے
گھڑی ہجر دی حشر دی گھڑی وِرگی سال سال واگوں پل پل مائے
محمد شفیق میان دکھی نین میرے ہنجوں خون روندے ڈل ڈل مائے

ع

عشق دے عین دا عین اصلی رمز عین دی پاوند ہر کوئی نہ
لام ڈنگڑا زُلف دے نال دا اے اس تے دل رجھاوند ہر کوئی نہ
پڑھیں ی معروف موصوف والی چُم کے اکھیں تے لاوند ہر کوئی نہ
محمد شفیق وِج الف دے گم ہو کے غم بے دا کھاوند ہر کوئی

ع

عرش عظیم تھیں لنگھ گئی میری دُور فریاد فریاد سائیں
دکھی درد نصیب غریب تائیں دیوے کون امداد فریاد سائیں
مرے حال خوار زبوں اُتے کیتی چرخ بیداد فریاد سائیں
محمد شفیق میں عشق اسیر تیری کرے کون آزاد فریاد سائیں

غ

غماں دی پَند پَوا سرتے جانے رب جانی کہڑے پاس گیا
گیا مصر یا عرب عراق اندر نیشاپور یا نورٹ عباس گیا
اودھی دس وِچ قلعے روہتاس پوندی یا اشان نوں راج کٹاس گیا
محمد شفیع جد دا لڑیا ناگ زہری سڑی رت میری سک ماس گیا

ف

فکر اندیشیاں آن گھیری آگے سکھ دے نیندرے سوندڑی ساں
مینوں غم دے نال نہ واقعی سی رل کے نال سہیلیاں بھوندڑی ساں
ونگاں سنگاں سنگ رل چھنکاوندی ساں رنگا رنگ کشیدڑے چھوہندڑی ساں
محمد شفیع پر عشق دی سار ناہی، ہائے میں اکھیوں خون نہ پوندڑی ساں

ق

قہر سرکتوں نزول ہویا چڑھیا عشق دا آن میں تاپ مائے
جیکر لوڑدی ایں میرا جیوناں توں کریں رانجھے نال ملاپ مائے
جس دا درد سراپ میں بھوگ رہیاں ہویا بھل میں توں کہڑا پاپ مائے
محمد شفیع میں بول کے دس دتا کریں کوئی ہاڑا میرا آپ مائے

ک

کرم نکھترے آن میرے جہاں نال لایاں اکھیں دُور گئے
گئے روندڑی چھوڑ چھوڑ کے تے متھے لا نہ کوئی قصور گئے
گئے کون مہم فراق والی میرا لٹ اوہ عقل شعور گئے
محمد شفیع میں کھلی گُرا رہیاں سینے غماں دے تپ تندور گئے

ل

لا سینے جانی پیاریا او تیریاں وچ سکاں میں تاں سُک گئی
بھانبر ہجر دے بلن وچ جگر میرے ایہو جان جے میں نری مُک گئی
تیرا پیار نہ مُول سی چت میرے گل ایہ تقدیر تھیں دُھک گئی
محمد شفیع میاں آکھاں دلوں پیاں میں تاں دلوں ساری تیں ول جھک گئی

م

مہنڈا بدر منیر توہیں تک تک تینوں اکھیں رجدیاں نہ
تیرے باجھ اندھیر غبار دے تیرے باجھ میں تاں کسے چچ دیاں نہ
تیرا دید سعید ہے عید میری لوڑاں رہ گئیاں مینوں حج دیاں نہ
محمد شفیع میں اوہناں توں جان واراں کیتے قول کر کے جھڑیاں بھج دیاں نہ

ن

نام تیرا جٹاں جانیاں میں ما سوا تھیں قطع بُرید کیتی
تیرے حُسن دا دلوں مرید ہویا جس روز دی تہنڈی دید کیتی
تیرا اسم وظیفہ جسم دا اے تیرے پیار دی پئی تجدید کیتی
محمد شفیع میاں کشتہ عین دا میں غین غیر دی دلوں تردید کیتی

ن

نظر افروز انداز تیرے تینوں پیاریا ماہ تمثال آکھاں
کشتہ تہنڈی نگہ دے ہر پاسے تینوں خنجر یا تیغ ہلال آکھاں
تیرے خال دل لُہدے راہیاں دے تینوں حُسن دا پاک جمال آکھاں
محمد شفیع کیوں نہ جانی یار تینوں فرخ فال بلند اقبال آکھاں

و

واؤ دے ہتھ پیغام گھلاں میں تے آ خدا دا واسطہ ای
ڈبدی ہجر دے بحر عمیق اندر ہئے لا خدا دا واسطہ ای
کیٹی عرض میری کرو غرض پوری خیر پا خدا دا واسطہ ای
محمد شفیع نہ پیا ترساں مینوں واگاں چاء خدا دا واسطہ ای

۵

ہوڑ رہیاں سیاں سنگ دیاں لہیں عشق دا نام نہ بھُل کے توں
کفن پا نہ کسے دفناوناں ایں مر جائیگی تھلاں وچ رُل کے توں
گردش کھانیکے گریں گی خاک اُتے سرو باغ وانگوں جھل جھل کے توں
محمد شفیع میاں سُر مہ اکھیاں دا بن کے رہو بھاون جائیں ڈُلھ کے توں

لا

لا اَکھیں سوہنی نال مرزے لُج شرم حیا نوں تجیا ای
ڈھول عشق دا مار کے ڈھول راجا آ کے شمس دے سرے تے گجیا ای
چھوڑ ہیر کرلانڈی جھنگ اندر ٹلے جوگیاں ول رانجھا بھجیا ای
محمد شفیع چناب دے آب اندر کچا گھڑا کھاری دا بھجیا ای

الف

اوہ کتھے جسدے غزیاں نے میرے دلے دا صبر قرار لُٹیا
جس دیاں ناز انداز کرشمیاں نے مری خوشی دا اُڑد بازار لُٹیا
بول مٹھڑے بول میں گھول گھتی میں غریب دا دلِ نادار لُٹیا
محمد شفیع جگیاں گل کھلر گئی سوہنے یار تاں سر بازار لُٹیا

ی
یار نہ دلوں وسار دیویں رکھیں یاد امانتاں پیار دیاں
تیرے عشق دیاں بجلیاں دلاں اُتے اٹھے پہر پیاں چمکاں مار دیاں
دلوں دُور نہ کریں دلدار مینوں رکھیں پاس میں عرض گزار دیاں
محمد شفیع میں کونج شکار ہوئی تہنڈے حُسن دے باز طرار دیاں



☆ ”مجموعہ اشعار اختر (قلمی)“ - صفحہ 11 تا 111 -

☆ حاشیہ از شاعر:

”12 ستمبر، 1970ء بروز ہفتہ (تصنیف اوّل) - تحریر ہذا

11 جون، 1978ء بوقت عشاء“

.....

[سی حرفی نمبر 21]

نہ کسے طیب دلہا نہ کسے شفیق دلہا
بجز ایں کہ در رخ تو ہمہ درد را درائے



الف

آ جانی پھیرا پا جانی مینوں نت سکاں تیرے دید دیاں
خیر پا گولی کھلی اڈ جھولی تیرے دید اندر خوشیاں عید دیاں
دو گھڑی سسولکھنی ہوگ کھڑی کلیاں کھڑن وچ باغ اُمید دیاں
محمد شفیع میاں ہوون دلاں اُتے نازل رحمتاں عرش مجید دیاں

ب

بانوری تھنڈی جگ سدے تیرے عشق دے پیتڑے جام میں تاں
بھلی ہوش حواس جہان والی رہی یاد نہ خورش طعام میں تاں
اٹھے پہر پھوہاریاں ہار و سن اکھیں ہور کوئی نہ طمع خام میں تاں
محمد شفیع میاں دلآرام باجھوں ہوئیاں مدتاں نہیں آرام میں تاں

ت

تھنڈی پاک پریت سندا جس روز میں پیالہ نوش کیتا
میریاں لبہاں تے چپ دی مہر لگی تیرے حُسن دے رُعب خموش کیتا
ترے عشق دے جوش نے ہوش ماری گجھا عشق دا راز سرپوش کیتا
محمد شفیع ایہ عشق خرید کارن دل حُسن دے ہٹ فروش کیتا

ث

ثابتی صدق خلوص باجھوں ہو جاندیاں یاریاں خواریاں فی
سولی چڑھن سوکھا، یاری لان اوکھا، ریتاں پریت دیاں ہون نیاریاں فی
رانجھا تخت ہزارے دا چودھری سی جا کے ہیر دیاں مجھیں چاریاں فی
محمد شفیع میاں عزت بیگ مرزے چائیاں گوہے دیاں سرتے کھاریاں فی

ج

جہاں اس پریم دے نگر اندر پایا پیر اوہ ہوش و نجا بیٹھے
منصور دے ہار اوہ دار اُتے جان اپنی جان چڑھا بیٹھے
ہوئے انگ تے سنگ انگ سارے دشمن جان دے ہو اقربا بیٹھے
محمد شفیع ایہ بھار پہاڑ جیڈا عاشق جان کزور تے چاء بیٹھے

ج

جدن دا میریاں اکھیاں نے ڈٹھا تھنڈا پاک جمال جانی
قسم رب دی سونیاں صورتاں دا گیا دلے توں بھل خیال جانی
پئی شام تے جیویں پتنگ شوہدے ہوندے شمع تے آن حلال جانی
محمد شفیع میاں ایویں حال میرا ایہدے وچ نہ جھوٹ روال جانی

ح

حسن محبوب مرغوب تیرا ترے بھلنے سخن رسیلوے نہیں
تیری زلف دے کالڑے سہ زہری منتر پانیکے کسے نے کیلوے نہیں
تیرے جیسے پیاریا جاناں او سوہنے کسے دے نین رنکیلوے نہیں
محمد شفیع میاں تیرے جیسے سوہنے ہونے پیاریا انت جکیلوے نہیں

خ

خواریاں دی سرتے چاء کھاری عاشق گلی گلی دیندے پھرن ہوکا
نیڑے عشق دے مول نہ جاونان بے رہنا ہٹ کے اس تھیں دُور لوکا
رہنا بچ کے نین غزلیاں تھیں کھانا اوہناں دا کدے نہ مول دھوکا
محمد شفیع ایہ حُسن دا زہر قاتل مٹھے سُتھرے شیر دا نہیں ڈوکا

خ

خشک ملوانڑے جاندے نہیں، مسئلے درد تے سوز گداز والے
پچھو جائی کے شاہ منصور کولوں جہڑے بئن محرم اس راز والے
اوہ کیہ ناز نیاز نوں جاندے نی، جہڑے ہون بندے حرص آز والے
محمد شفیع جس عشق نہ راس آوے اوہ نی ٹھیکرے بول براز والے

د

دمڑیاں پیر دیاں سُخ بیٹھی جھنڈے پیر اُتے جھنڈا لاوساں میں
جیکر دِلے دی ہوئی مراد پوری دیوا وِچ مسیت جگاوساں میں
جانی یار جے آن دیدار دیوے رب دا شکر بجا لیاوساں میں
محمد شفیع صد شاد آباد ہوساں جیکر یار جانی گل لاوساں میں

د

درد سندی وگی کرد سینے سُنے کون قصہ درد ناک میرا
درداں ماریاں دا کس پاس دینا دسو کون اتھے انگ ساک میرا
میلے کون پیارڑے یار تائیں جیندے ہجر کیتا سینہ چاک میرا
محمد شفیع جدائیاں دُور ہوں مہربان ہووے اللہ پاک میرا

د

دیکھ ۲ نبض طیب میری رگ رگ میری لیندی نام تیرا
گئی ہوش تمام وجود وچوں جس روز دا نوشیا جام تیرا
میرے دلے تے کنڈیاں پا بیٹھا کالی زلف دا ڈنگڑا لام تیرا
محمد شفیع ایہ چھوڑ دہلیز تیری کتے جائے نہ ہو غلام تیرا

ذ

ذوق دے جہاں نے جام پیتے چڑھیاں عشق دیاں آن خماریاں فی
ہو کے مست مجذوب محبوب دیاں مارن جلیاں درد سواریاں فی
ہک رُل موئی تے تھل اندر لائیاں ہکس چہاں وچ تاریاں فی
محمد شفیع ایہ مرد میدان آہیاں کون آکھدا اوہناں نوں ناریاں فی

د

راکھ مل خاک سیاہ مونہہ تے رانجھے اپنا آپ چھپایا ای
جوگی ہوئی کے یار دے ملن خاطر روڈ بھوڈ کرائیکے آیا ای
ایہو حال فرہاد لوہار کیتا نہر دودھ دی کھٹ لے آیا ای
محمد شفیع چمن قدم کتیاں دے حضرت قیس دا ایہ فرمایا ای

د

رنگ اندر پوے بھنگ ناہیں شالا ٹٹن نہ سنگ سہیلیاں دے
شالا دیکھنے پون نہ کدی منظر جانی یار دیاں اکھیاں میلیاں دے
مینوں یار دی غمز دے وچ دِن جلوے کہیں ہیراں سیاں لیلیاں دے
محمد شفیع سواڑی دید سندے طلبگار نہ زر دیاں تھیلیاں دے

ذ

زہر مثال ایام غم دے میری زندگی تلخ تمام ہوئی
پاسے ماردیاں جاوندی رین ساری میری سکھ دی نیند حرام ہوئی
ٹٹی صبر قرار دی تار میری جَل باجھ مَجھی بے آرام ہوئی
محمد شفیع میں تھنڈے ناز لٹی ہائے میں وچ سنسار بدنام ہوئی

س

سوہنیا تے من موہیا او دل کھوہنا ایں ناز ادا دس کے
مرے دے تے کنڈیاں پائیاں فی سوہنی کالڑی زلف دراز دس کے
پینکھی دے دے ہوئے اسیر تیرے سوہنے بلبلے خوش آواز دس کے
محمد شفیع تھ کبک شکار کیتے کجے والڑے نین شاہباز دس کے

ش

شام پئی ناہیں شام آیا میریاں اکھیاں طلب دیدار دی اے
گلی یار دی عاشقاں صادق لئی جیوں بلبل نوں سیر گلزار دی اے
برقار اوہ اکھ دلدار تیری تیکھی تیز جیوں دھار تلوار دی اے
محمد شفیع دل دی دلی لٹن کارن ہتھ تیج جیوں فوج قندھار دی اے

ص

صورتاں سوہنیاں وچ تیری صورت سوہنیا اُپر اپار دے
چندرمان دی چودھویں جوت سندر کولوں ودھ تیرا رخسار دے
دیس سوہنیاں دے وچکار جیوکر وچ باغ دے سرو چنار دے
محمد شفیع میاں تیرے عشق سندا ہوندا دُور نہ درد آزار دے

ض

ضرب فراق تھیں جگر میرا ہویا پھٹ لیراں فریاد اللہ
کیتا کابلہ چھانی ہار میرا ہائے درد تیراں فریاد اللہ
دساں کس نوں کھول کے زخم دل دے دیوے کون دھیراں فریاد اللہ
محمد شفیع میاں اٹھے پہر پٹیاں سوراں پیر میراں فریاد اللہ

ط

طالع مند نے اوہو اکھیں جہاں دید وصول مدام تیرا
اوہو گوش باہوش نے خوش قسمت جہڑے سوہنیا سنن کلام تیرا
دل جاناں میریاں لباں اُتے رہے تذکرہ صبح تے شام تیرا
محمد شفیع میں منگدی رب کولوں سدا دید سعید انعام تیرا

ظ

ظن گمان دے وچ میرے ناہی بات ایہ یار گمانیاں سی
ہونا مہنڈڑے دے شکار تیرا میریا سوہنیا ماہ کنعائیاں سی
کرنا چاک سی عقل دیاں پردیاں نوں تیری لاڈلی اکھ مستائیاں سی
محمد شفیع ایہ پیارے نوش کرنے آہے تہنڈڑے دست فیضائیاں سی

ع

عقل تے ہوش نے مار کھادی لمبر لے گئیاں اوہ مستوار اکھیں
دیدے لُددے دے دیاں بستیاں نوں پاؤں لوٹیاں سر بازار اکھیں
خزاں ہجر دی جگر تے تھہ پایا کھڑی دے دی لُٹ بہار اکھیں
محمد شفیع کھاء ضرب شدید سینے اٹھے پہر روون زار و زار اکھیں

غ

غیر دے نال نہ سیر میری بدھی جھنڈی زلف زنجیر ہاں میں
بانہوں پکڑ کنارے لا مینوں غوطے کھانڈی ڈونگھڑے نیر ہاں میں
رہی ہک تے وک غلام تیری نال غیر نہ رکھدی سیر ہاں میں
محمد شفیع میں رانجھیا! ہتھ بدھی، چرناں وچ تیرے بیٹھی ہیر ہاں میں

ف

فائدہ کی دسو کھٹیا میں دھر کے تکی تے چٹیا زہر سیو
نساں وسدیاں دُور آبادیاں توں مینوں کھان ڈھکا وسدا شہر سیو
گڑا غماں دا گجیا آن سر تے بھلی سُر تے تک کے صورت قہر سیو
محمد شفیع پرناڑے رَوں اُکھیں جاری ہنجواں دی ہوئی نہر سیو

ق

قلم دا کی مقدور لکھے میرے دے دی دھڑکدی تار تائیں
لکھے مہنڈے خون دیاں ہنجواں نوں سوزش نبض دی بھڑکدی نار تائیں
کرے واضح سوختہ بخت میرے نالے گجھڑے درد آزار تائیں
محمد شفیع بالفعل نہ لکھ سکے سرراہ میرے انتظار تائیں

ک

کس تے جائی کے دُکھ پھولاں میریاں دُکھاں دا کوئی بچھال ناہیں
ہووے کون جہڑا میرے دُکھ وڈے اتھے کوئی میرا محرم حال ناہیں
وچوں وچ میں رجھدی کھپدی آں آوے لبّاں تے حرف ملال ناہیں
محمد شفیع جہڑا میرے دل پُویا آوے نظر اوہ پاک جمال ناہیں

ل

لواں میں تھنڈا نام جس دم چم اکھیاں دے اُتے لاوونی آں
تیرے نام دا ورد پکاوونی آں تیرے نام اُتوں صدقے جاوونی آں
آ رب دے نام دا واسطہ ای فالان پاوندی کانگ اڈاوونی آں
محمد شفیع میں پاک خیال تیرا کسے وقت نہ دلوں بھلاوونی آں

م

موڑ مہار وراگیاں میں دس ایڈ کاہنوں ڈھلاں لائیاں نی
یا کہ اساں توں چت پرچتیا ای یاداں ساڈیاں دلوں بھلایاں نی
کدوں قدم رنجہ فرما ہونا گیوں پا کیوں وس قصایاں نی
محمد شفیع نہ سکھ دی نیند سوواں آیاں جدوں دیاں پیش جدایاں نی

ن

نگہ میری وچ جانیاں او اتھے غیر اغیار دی جا ناہیں
مرے دے دے وچ مقام ترا اتھے ہور سکے پھیرا پا ناہیں
میرے لبان تے تذکرے نت تیرے کوئی اس دے وچ خطا ناہیں
محمد شفیع کیتا زخمی ہجر تیرے باجھ دید کوئی ہور دوا ناہیں

و

وچ میرے سینے کھچ مارے تیری نگہ نے گجھڑے تیر جانی
اکھیں نیر جاری روواں کراں زاری گیوں نس واری چھاتی چیر جانی
تیرے پیار نے کیتڑی خوار تٹی پھر دی پیروہنی بیلے ہیر جانی
محمد شفیع جس روز دا عشق لگا سکھ ڈھونڈا پھرے سریر جانی

و

وصل فراق دے بعد بہتر اپر بعد وصال فراق مندا
طبع شاد تے خانہ آباد تائیں جیوکر آکھدے لفظ طلاق مندا
گلو بند گل سو بھدا سوہنیا دے پھندا پھابی وچ اعناق مندا
محمد شفیع نفاق سنگ دوستاں دے اتے ویریاں نال میثاق مندا

۵

ہوئی کے آپ دی دلوں جانی اساں غیر سندا دم مارنا نہیں
توڑے جان جاوے جانی یار کچھے اساں اس میدان وچ ہارنا نہیں
حق سچ دی دوستی نال تیرے اساں کوڑ دا کوٹ اسارنا نہیں
محمد شفیع وچ جسم دے جان جاں تک تینوں پیاریا دلوں وسارنا نہیں

لا


لا لیاں اکھیں نال تیرے ہن ہور کوئی سودا تولنا نہیں
آن عشق دی رکھنی فرض آکھن توڑے جان جاوے دلوں ڈولنا نہیں
پہرہ دیوساں تہنڈڑے پیار اُتے اساں دودھ وچ اک نوں گھولنا نہیں
محمد شفیع دل عشق دا راز رہی قبر تیک اس راز نوں کھولنا نہیں

الف

اگ لگائیے وگ گئے دل ٹھگ میرا کہڑے پاس گئے
گئے دس جنوب شمال ناہیں دے کے درد تے سرد اوساس گئے
ہونا جیوندیاں نہیں آزاد اوہناں جہڑے عشق والی پھابی پھاس گئے
محمد شفیع میاں مُرد کے ملے ناہیں کر کے عمر دے لئی او اُداس گئے

ی

یار خدا دا واسطہ ای میری اُجڑی جھوک آباد کر دے
قیدی اپنی زلف زنجیر دے نوں نام رب دے جھب آزاد کر دے
اظہار کر مہر مروتاں نوں راضی نامیوں حرف ارشاد کر دے
محمد شفیع کر دان دلداریاں دا میں ناشاد نوں پیاریا شاد کر دے



☆ ”مجموعہ اشعار اختر (قلمی)“ - صفحہ 13 تا 24۔

☆ حاشیہ از شاعر:

”تصنیف بتاریخ 22 ستمبر، 1970ء (تصنیف اول)۔

تخریر ہذا جون، 1978ء“

[سی حرفی نمبر 22]

دل ڈوب ڈوب جاتا ہے آتے ہو یاد جب
پر کیا کروں کہ موت پہ یاں دسترس نہیں



الف

انسان نوں شرف ہویا خلعت درد تے سوز گداز والا
ہوئے وچ سکوت ملکوت سارے تک حوصلہ اس شاہباز والا
سروں کمر غرور نوں دُور کر کے کیتا یاد اس سبق نیاز والا
محمد شفیع حقیقتاں لہ لیاں پردہ پائیے عشق مجاز والا

ب

بول ریلوے خن مٹھے زندہ باد محبوب دے پیار دی اکھ
رکھ برچھیاں جگر وچ چھید کردی اس لاڈلے ماہ انوار دی اکھ
ربا رکھ اس اکھ دے قہر کولوں سچ پچھو تے ایہ تلوار دی اکھ
محمد شفیع دا جگر فگار کیتا اُس مست شباب نگار دی اکھ

ت

تخت تے تاج تیاگ کے تے ابراہیم ادھم جنگل ملیا سی
گھر بار پروار وِسار دتا جدوں عشق آ کے سینہ سلایا سی
سولی شاہ منصور منظور کیتی جوش عشق دا گیا نہ جھلیا سی
محمد شفیع میاں رانجھا ہو جوگی ٹلے بال گندائی تھیں ڈھلیا سی

ٹ

ٹور شریف دی غار اندر حضرت عشق تشریف لیا یا سی
ابوبکر صدیق دے صدق تائیں جانی یار دے عشق ازما یا سی
جھلیا جان تے ناگ دا ڈنگ زہری سُنے یار نوں نہیں جگایا سی
محمد شفیع صدیق دے مرتبے نوں کس باجھ خلوص دے پایا سی

ج

جان میری فریاد کردی میں تے آ دل جانیاں واسطہ ای
بدھے ہتھ غلام بیدام تیری نہ کر بدگمانیاں واسطہ ای
چڑھ اُچڑے تے دیکھاں راہ تیرے میریا یوسفا ثانیاں واسطہ ای
محمد شفیع فراق ہلاک کیتا کریں دید ارزانیاں واسطہ ای

ح

حیف کس تے جانی پیاریا او دساں کھول کیفیتاں ساریاں میں
درداں ماریاں دی کوئی جاء ناہیں پایاں جھوڑی مفت خواریاں میں
سودے سراں دے ٹلدے اِس منڈی چائیاں تہمتاں والیاں کھاریاں میں
محمد شفیع پریم دی مدھ پیتی گئیاں بھُل سیو ہوشاں ساریاں میں

خ

خزف ریزے جانی یار سندے لعلائ سچیاں توں منظور مینوں
قدم تیریاں دی کراں خاک سُرْمہ، کدی کریں ناہیں دُور مینوں
رہے دل وچ طلب ہمیش تیری، سدا رکھ وچ اپنے حضور مینوں
محمد شفیع ایہ جام انعام ہوون دست خاص تھیں شام سحر مینوں

د

درد دی کرد لگا سینے او بے درد کدھر واگاں چائیاں فی
بیٹھی وچ اڈیک دے مل رستے جھب آ کاہنوں دیراں لائیاں فی
آسین وچ وراگ دے مر چلے دینں بخش قصور خطائیاں فی
محمد شفیع نج اکھیاں چار ہوئیاں رو رو دیوندی کھلی دوبائیاں فی

ذ

ذوق تے شوق مانوق سندے جہاں جام پیتے بالا بخت نے اوہ
بھائیں ہون درویش دل ریش عاجز حضرت عشق ہتھوں صاحب تخت نے اوہ
جہاں عشق دے جام نوشید کیتے بیٹھے ساڑتاں خودی دے رخت نے اوہ
محمد شفیع میاں دنیا داراں تھیں مونہہ موڑ بیٹھے یک لخت نے اوہ

د

راہ محبوب دے دیکھدی میں صبح شام بیٹھی ہور کم کوئی نہ
پناں یار دی یاد دلشاد باجھوں خالی جاوندا اے میرا دم کوئی نہ
بکو ہجر دے سول ملول کیتا میرا جگر مینوں ہور غم کوئی نہ
محمد شفیع محبوب مرغوب باجھوں بنیا ہمدردی میرا جم کوئی نہ

ذ

زور کیہ لاوناں عاجزاں تے کیتی اگے ہی غماں نے زیر ہاں میں
پئی بھیڑ مرید دی بھیڑ گھو لئی دوتیاں ظالماں گھیر ہاں میں
ناہیں مان تران وجود اندر تھدھ ہوندیاں ہادیا شیر ہاں میں
محمد شفیع میری بنے لاء بیڑی تینوں سوردی شام سویر ہاں میں

ذ

زرد پیلی کیتی وہی دُکھاں مینوں ہور کوئی سیو روگ ناہیں
میں کد عشق دا بھار ساں چان جوگی میرے جیہا دکھی کوئی ہوگ ناہیں
اوہو رہے سکھیا رڑے جگ اندر جہاں عشق سندی چگی چوگ ناہیں
محمد شفیع کیوں پئے پسند کردے ساڈے پیار تائیں دُکھی لوگ ناہیں

س

سنگ اندر پوے بھنگ ناہیں شالا رہن ایہ انگ سلنگ ثابت
شالا ٹٹے نہ پیار دی تئد کچی رہا رہے ایہ کچ دی ونگ ثابت
رہا کج لئیں عیب نمازی دے رکھیں دوہیں جہانیں لنگ ثابت
محمد شفیع نہ جان دا کرے صرفا بلدی شمع تے رہے پتنگ ثابت

ص

صدق صفا دی سڑک سدھی اس نوں چھوڑ کے پویں کوراہ ناہیں
جاسیں بچ منزل مقصود اُتے کوچہ عشق دا چھوڑ کے جاہ ناہیں
نظر پیار دی رکھ کے ہک اُتے کسے دوسرے نوں دلوں چاہ ناہیں
محمد شفیع جو عہد نوں توڑ دیندا اُہدے جیہا کوئی ہور گمراہ ناہیں

ض

ضرب کاری سینے یار ماری بیٹھی کراں زاری دن رین میں تاں
اٹھے پہر روواں ہنجوں خون چوواں ناہیں سکھ سوواں ہاں بے چین میں تاں
وال وال بدھا غماں نال میرا ہجروں جگر اندر پیراں پین میں تاں
محمد شفیع جدو کرے نین لگے ڈٹھا نہیں مُڑ کے سکھ چین میں تاں

ط

طرف محبوب دیوں کدوں ہوسی مینوں شرف صدور پیار دا خط
کرے روشنی وچ تاریکیاں دے تابدار اس ماہ انوار دا خط
لاواں چُم میں اپنی اکھیاں تے ادب نال اس یار نگار دا خط
محمد شفیع جہیوں بلبلوں لئی ہوندا بھریا پھلاں دے نال گلزار دا خط

ظ

ظاہری باطنی دلوں جانوں میں تاں وکیاں یار پیارڑے تے
بھالاں انگ ننگ پتنگ وانگوں شمع حُسن دی نور نظرڑے تے
بدل رحمتاں دا بن کے وس جاویں میرے دل دے خشک کیاڑے تے
محمد شفیع میاں رکھیں اوہو اکھیں میں مسکین غریب وچارڑے تے

ع

عشق دا سبق میں پڑھن بیٹھی تیرے حُسن دے درس وچ آئی کے تے
تھہ قاعدہ عشق دے واندے دا بیٹھی ہوو خیال بھلائی کے تے
لام ڈنگڑی زلف دے پیچ اند پھسی جان مسکین دی آئی کے تے
محمد شفیع میاں صاد ضاد اکھیں بیٹھی جہاں وچ اکھیاں پائی کے تے

غ

غیر نہ کرن قبول اکھیں تیری زلف دی خاص اسیر ہو کے
میرے جیسے بھی ہوو کنیں مُٹھے رُلن تہنڈڑی گلی فقیر ہو کے
سودے دلاں دے کرن تے بھرن چٹئی سدا لئی اوہ رہن زہیر ہو کے
محمد شفیع میاں دل دا خون میرا وھندا اکھیاں دے راہوں نیر ہو کے

ف

فیض نگاہ دے رہے طالب مطلوب میرے طلبگار تیرے
کُتھے جان ایہ مرہم جبر کارن زخمی نگہ دی تیز تلوار تیرے
ساقی بخش پیالڑے دید والے خالی رہن نہ ایہ مستوار تیرے
محمد شفیع میاں ترے شوق اندر کراں نت تحریر اشعار تیرے

ق

قسم کراں تیرے حُسن دی میں میرے دلے دے وِچ قیام تیرا
میریاں اکھیاں وِچ تصویر تیری رہے لباں اُتے نت نام تیرا
گئی ہوش میری فراموش ساری کیتا نوش جس روز دا جام تیرا
محمد شفیع میاں جائے چھوڑ کُتھے تیرے بُو ہے نوں دس غلام تیرا

ک

کدوں قدم رنجہ فرمائی ہوئی دسو آپ دی میں مسکین دے گھر
کدوں ہوگ تشریف شریف تیری میں درویش دل ریش حزیں دے گھر
شہریار کد ہوگ تشریف آور میں دہقان تے خاک نشین دے گھر
محمد شفیع میں وِچ اڈیک جس دی کدے آدناں بے تسکین دے گھر

ل

لاف گزاف دی بات ناہیں اوہدے نین جیلوے مُٹھیاں میں
کیتا ترس نہ مُول صیاد ظالم کارد ہتھ قصاب دے کُٹھیاں میں
دُکھاں نال ہمیش وپار رہیا گھڑی سُکھ دی ہک نہ وُٹھیاں میں
محمد شفیع اوڑی تند پئی گھیاں ہو گلاں سبھے پُٹھیاں میں

م

مرن تھیں مول نہ ڈرن عاشق موت عاشقاں تھیں پرے نسی اے
ساہوئیں ہو سوہنا نظر آوندا نہیں جس دی شکل سوئی دل وچ ویدی اے
چارہ کجھ تدبیر دا چلدا نہیں تقدیر پئی کائیاں کسدی اے
محمد شفیع میاں راہ جانڈیاں تے اوہدی زلف دی ناگنی ڈسدی اے

ن

نفعے نقصاں نوں سوچدے نہیں عاشق نال ماہی اکھیں لان ویلے
سر تے بدی خواری دی چان کھاری گلی یار والی قدم پان ویلے
لیندے کسے دی مت نہ مول شوہدے دولت ولے دی مفت لٹان ویلے
محمد شفیع نہ جان بچان اپنی سینے غمز دیاں کاتیاں کھان ویلے

و

وچ فراق وراگ تیرے گاواں جوگ پہاگ دے راگ میں تاں
لیا جان تے جن چوڑ غم دا بیٹھی سکھ سواد تیاگ میں تاں
منتر ماندری دا کرے اثر ناہیں لڑیا عشق سندا زہری ناگ میں تاں
محمد شفیع میاں انگ سواہ مکی لیا سادھواں ہار بیراگ میں تاں

و

واسطہ پاک پریت دا ای میری عید اوہ دید تساڈڑی اے
جاں تک جان ہے وچ وجود میرے، میری جان مرید تساڈڑی اے
اساں توڑنی پریت دی ریت ناہیں مینوں طلب شدید تساڈڑی اے
محمد شفیع ایہ جان نہ جان میری، میری جان تاکید تساڈڑی اے

و

وِچ میں تیری اڈیک بیٹھی کتھے گئی تیرے اقرار دی گل
اسیں اپنے دلے تے لا بیٹھے جانی پیاریا تیرے پیار دی گل
کوئی پتہ نہیں موت دے جھوڑے دا سُن جاوناں اِس بیمار دی گل
محمد شفیع میاں ودھ عمید کولوں تیری دید تیرے دیدار دی گل

۵

ہوش حواس نہ رہے ثابت ماری عشق نے آن کے مَت میری
ہوئی نشر اِج گلی بازار اندر رُلی خاک اندر عزت پَت میری
میرے روح دا بھور اُداس ہويا سڑی وِچ وجود دے رت میری
محمد شفیع بھلاوناں دِلوں ناہیں کدے خبر لیویں آ کے وِت میری

لا

لا لیا تیرا پیار دل تے بیٹھی ہوو خیال وِسار سارے
گنیاں درد انہیریاں جھل سر تے ہوئے خوشی دے بند بازار سارے
دِن خار ببول دے ہار مینوں پھلاں نال ایہ بھرے گلزار سارے
محمد شفیع میاں جانی یار جیہا سوہنا نہیں کوئی وِچ سنسار سارے

الف

آ جانی پھیرا پا جانی گل لا جانی دُکھیار تائیں
میں تے آ خدا دا واسطہ ای داروں دید دا دے بیمار تائیں
طلب بلبلاں دی ہوندے پھل تازے سینے کون لاندَا دَسو خار تائیں
محمد شفیع میاں دل تے لا بیٹھی میں تاں تہنڈڑے پاک پیار تائیں

الف

اس پریم دے نگر اندر نہیں موت سندا دستور کوئی
سوئی مار کے چھال چناب اندر کیتا موت دا بحر عبور کوئی
پی کے موت دا جام چڑھ سولڑی تے ہویا شاہ منصور منظور کوئی
محمد شفیع ہر دیتاں باجھ اتھے منزل عشق دی آکھدے دُور کوئی

ی

یاریاں نوں پالن یار سچے اوہ تاں عہد میثاق توں بھج دے نہیں
جہڑے لا بیٹھے یاری سچ والی اوہ تاں ہور کسے ول بھج دے نہیں
جہڑے پالدے پاک پریت تائیں کون آکھدا اوہ کسے چج دے نہیں
محمد شفیع الست دے روز کیتے وعدے عشق دے نویں کوئی آج دے نہیں

☆ ”مجموعہ اشعار اختر (قلمی)“۔ صفحہ 33 تا 43۔

☆ حاشیہ از شاعر:

”تصنیف بتاریخ 29 نومبر 1970ء (تصنیف اول)۔ تحریر ہذا

تحریر ہذا جون، 1978ء۔“

[سی حرفی نمبر 23]

پیا ساقی بہ من کاس الکرے
چرا ارزاں نہ پیغام و سلاے



الف

ایہ کہی عشق دی مار وگی، کر کے گیا ٹھگی جانی نال میرے
ڈھکی کھان حویلی باجھ بلی کئے ہجر دے کون وبال میرے
دل دی دلڑی گیا اُجاڑ جھڑا اٹھے پہر وچ رہے خیال میرے
محمد شفیع میاں کیتا جگر بیرے نگہ ناز والی پھری نال میرے

ب

بری توں بُری فراق وِ رگی ہوندی مرض نہ وچ جہان سائیں
جس دی نہیں دوا فرما گئے بو علی سینا لقمان سائیں
جس نوں عشق دے درد دی کرد وچی اس دیاں اکھیاں اشک سامان سائیں
محمد شفیع سواد نہ زندگی دا سدا رُون دے نال دھیان سائیں

ت

تہنڈا پیار درکار مینوں بیٹھی ہور خیال وِ سار ہاں میں
اللہ پاک تھیں اڈ کے جھوڑی میں تیرا منگدی پاک پیار ہاں میں
توڑے خار بے کار نہ کسے کم دا تیری نسبتوں آج گلزار ہاں میں
محمد شفیع پا کرم دا خیر ٹھوٹھے تیرے ہجر تھیں گور کنار ہاں میں

ٹ

ٹالٹی دی ایہ گل کہو دئیں دِلے نوں پیا بھنوالیاں نہ
رکھیں پیر اڈول نہ ڈول جائیں سوچیں پیاریا خام خیالیاں نہ
اوہ کیہ جاندے سار محبتاں دی آگیں شوق دیاں جہاں بالیاں نہ
محمد شفیع میاں ہئی عشق والی جاوَن عقل دیاں پیش دَلالیاں نہ

ج

جانیاں تہنڈڑے دید کارن آسیں ایڈ ولاکڑے مار آئے
پئی بھر دی چوٹ تھیں گھوٹ سینے کندھاں کالیاں کوٹ حصار آئے
ڈھکی کھان اوہ جانیاں جا سُنئی کھڑے پھل جیوں لگدے خار آئے
محمد شفیع پیار دی تار بدھے جیوں عشق دے اُٹھ قطار آئے

ح

حیف نہ ہوندیاں چار اکھیں کدے اکھیاں دا سودا پکدا نہ
آج خون پرناڑے روندیاں کیوں اکھیں اکھیں وِچ پا جے تکدا نہ
پردہ ننگ ناموس دا چاک ہویا اوہلا رکھیا پَت تے نک دا نہ
محمد شفیع تقدیر تقدیر اگے تدبیر بندہ کر سکدا نہ

خ

خار گلزار تساڈڑے دے میرے لئی نے گلِ ریحان جیوکر
تیری گلی پیاریا جانیاں او میرے لئی اے باغِ بستان جیوکر
تیرے باجھ ہے چیت بہار مینوں دل جانیاں کھیت ویران جیوکر
محمد شفیع آبادیاں باجھ تیرے جنگل بار اُجاڑ سنسان جیوکر

د

دلے تے لوٹیاں پان اکھیں صبر ضبط نوں لٹ لیجان نالے
نیز بھکھ آرام نہ یاد باقی سکھ چین تمام گوان نالے
نین چین نہ لین دن رین شوہرے نالے کرن فریاد فغان نالے
محمد شفیع محبوب دے نین ظالم کر کے دلے نوں جان حیران نالے

ذ

ذبح کرینڈی اکھ تیری کارد تیز جیوں ہتھ قصاب دے وچ
تیرے پاک جمال دی جھلک اگے برق فلک نہ کسے حساب دے وچ
میرے دلے دی تار دا ہور نغمہ ایسی تار نہ ہوگ رہاب دے وچ
محمد شفیع میں نگہ دی اگ سڑیا ایسی تپش نہ ہوگ شہاب دے وچ

د

راہ میں جھنڈے رت ویہندی میریا سونیا او کدوں آوناں توں
تیری وچ اڈیک دے رہاں بیٹھی کدوں کرم دی واگ ولاوناں توں
میں غریب مہجور دے وچ ویہڑے کدوں قدم رنجہ فرماوناں توں
محمد شفیع میں اونسیاں پاوندی آں کدوں روندی نوں آن ہساوناں توں

ذ

زور تے مان تران کوئی نہ اٹھے پہر بیٹھی کراں زاریاں میں
اس دا کوئی پیغام لیا دیوے جس دے عشق دیاں چکیاں کھاریاں میں
گئے سکھ آرام وجود وچوں غمدیاں وچ جھلاں کٹاں خوریاں میں
محمد شفیع نوں پکڑ کے لا دندے ڈونگھے بحر غم دے لاواں تاریاں میں

س

سُکھ دے پندرے سون ناہیں جہڑے بھل کے اکھیاں لا بہندے
ساری عمر اوہ مست ملنگ رہندے جہڑے عشق دوارے آ بہندے
سارے جگ دیاں تہمتاں چان سر تے جہڑے دل دا سُود کھڑا بہندے
محمد شفیع اوہ سدا حیران رہندے دولت دے دی جہڑے لٹا بہندے

ش

شع تے جلن پتنگ آ کے بلبل پھلاں تے گاوندی پیار دے گیت
عاشق گاوندے رخ محبوب تک کے مٹھیاں لبھاں تے سُرخ رخسار دے گیت
جہاں دلاں نے غمز دی چوٹ کھاہدی اوہ تاں گاوندے رہن نگار دے گیت
محمد شفیع کیوں نہ اٹھے پہر گانواں اس لاڈلے ماہ انوار دے گیت

ص

صرف دیدار دا دان منگاں طلبگار میں کوئی تخت تاج دی نہ
لاچ حرص نہ مال خزانیاں دی خواہش مند میں ملک تے راج دی نہ
کبیں پاج تاں پیار یا لگھ دی میں نہیں تاں ککھ کسے کم کاج دی نہ
محمد شفیع میری بھری کون حامی رکھی لاج جے تدھ بے لاج دی نہ

ض

ضعف دے نال موصوف ہوئی میری جان ضعیف خفیف سائیں
جس روز دا عشق ایہ ہڈ پیا گیا چھوڑ نہ درد حریف سائیں
ویری لوک ایہ بُرے رقیب دوتی بہت نویں پئے دین تکلیف سائیں
محمد شفیع پر دلوں نہ دور کرساں تیری پریت تے پیار شریف سائیں

ط

طلب تیری جانی پیاریا او اٹھے پہر رکھاں صبح شام رکھاں
رہاں شاد میں تہنڈی یاد اندر تیرے نام دا ورد مدام رکھاں
دل جانیاں وچ تھوڑاں دے تیری زلف دا ڈنگڑا لام رکھاں
محمد شفیع کیوں وصل وصول ناہیں شاید طلب میں اپنی خام رکھاں

ط

طلب تیری اٹھے پہر مینوں تیری دید کد ہوگ وصول مینوں
نام رب دے جھدے پا پھیرا نہ کر وچ فراق ملول مینوں
کراں طلب میں دید سعید تیری ناہیں لوڑ ایہ خار بھول مینوں
محمد شفیع خدا دے واسطے دا کریں پیاریا دلوں قبول مینوں

ط

طلب تیری اٹھے پہر مینوں منگاں رب تھیں جانیاں سنگ تیرا
میری جان دا جان مطلوب ہیں توں مینوں آکھدے لوک ملنگ تیرا
رگ رگ میری وچ وس گیا سوہنا روپ تیرا سوہنا رنگ تیرا
محمد شفیع محبوب دے حسن سندی بلدی شمع تے قلب پتنگ تیرا

ط

طرف محبوب دیوں کدوں ہوسی مینوں شرف پیغام حضوریاں دا
بندہ بندگی کرے تے بنے بندہ کرنی بندگی مرتبہ نوریاں دا
ہس ہس کے دس اوہ کھ نوری طلبگار نہ مٹھے دیاں گھوریاں دا
محمد شفیع کد ہووسی بخش مینوں تیرے دروں سروپا منظوریاں دا

ظ

ظاہراں وچ خیال تیرے نتِ نت ایہ رہے مشتاق تیرا
توڑے جگ تھیں چ نکارڑا میں حاضر کھلا وچ صفِ عشاق تیرا
مرے قلب وچ طلب دی اگ بھڑکے جانی حُسن ہے وانگ چقماق تیرا
محمد شفیع میں دلوں قبول کیتا مٹھا پیار وچ روز میثاق تیرا

ع

عشق دا نام نہ لئیں بھُل کے آباں والیاں نوں ایہ بے آب کردا
جس دے پے جاوے کھیرے عشق ظالم اس نوں چ کے جگ خراب کردا
بادشاہاں دے لنگ وچ ہتھ گتھے پردے والیاں دے بُری باب کردا
محمد شفیع ایہ حلق تے چھری دھردا بیرے کٹ کے تیخ کباب کردا

ع

عقل دی نگہ کچھ ہوو ہوندی نظر عشق دی فلک توں پار ہوندی
عقل مطرب دے ہتھ مضرب دے کے نظر عشق دی تار وچکار ہوندی
رنگ روپ نہ عشق دی غرض اصلی گل ہوو جو وچ دیدار ہوندی
محمد شفیع وچ غمزیاں راز گچھے بچھے سو جس عشق دی سار ہوندی

ع

عجب اس عشق دا طور ڈٹھا دل لٹ لیندے نازاں نال سوہنے
دھاڑا لوٹیاں پاوندے پھرن گھر گھر کرن چھری دے باجھ حلال سوہنے
دلوں صبر دلیریاں بنھ کھڑدے روناں پاوندے خیر رومال سوہنے
محمد شفیع میاں عزت بیگ مرزا، ہويا عشق ہتھوں مہینوال سوہنے

غ

غم تیرا جانی لے جاسی پوہتے لباں تے دم نراس میرے
اکھیں ویکھدیوں ہوندیاں بند اکھیں ہوندے ختم تکدیوں جانی ساس میرے
رہندی ایہ نہ سک، میں وک چکی جس تے اوہ نہ سی اوڑک پاس میرے
محمد شفیع نہ سکھ دی گھڑی ڈھکی رہندے نین بے چین اداس میرے

غ

غماں نے گھیریا آن مینوں میریاں لباں تے دم رک گئے
مطرب رہ گیا سخت حیران جس دم تاراں کھڑکدیاں وچ زیر و بم رک گئے
میری لب فریاد خاموش ہوگئی میرے اشک وچ چشم پرغم رک گئے
محمد شفیع جدوں منزل آئی نیڑے چلدے قدم میرے کیوں یک دم رک گئے

ف

فائدہ اکھیاں کھٹیا کیہ دن رات روواں صبح و شام روواں
ہوئے سکھ سواد حرام سارے ہر قدم روواں ہر گام روواں
اکھیں جڑن نہ مڑن پیار کولوں جانی یار سندا لے لے نام روواں
محمد شفیع میاں وجی کرد غم دی ظالم درد ہتھوں بھر بھر جام روواں

ق

قتم مینوں تیریاں اکھیاں دی اساں ہور کسے ول تکلناں نہیں
اساں تھنڈڑے پیار دی سیر کرنی زہر غیر سندا اساں پھکناں نہیں
اساں پاک پلٹ نکھیر کرنا لکاں کٹیاں دیاں وچ لگناں نہیں
محمد شفیع بناں بھٹی سوز والی اٹاں قلب دیاں کدے پکناں نہیں

ک

کندی عشق دا ناں سُن کے میری جان ایہ جان ناتان سائیں
 جہڑا بھار اسمان نہ چا سکے مشکل وِسدی پُنڈ اُٹھان سائیں
 منصور گیا چڑھ سوڑی تے اوکھا عشق دا راز چھپان سائیں
 محمد شفیع اس عشق دی دھاڑ لے بھلے بھلے اُچے خاندان سائیں

ل

لعل ہیرے مانک موتیاں دی قسم رب دی لوڑ نہ عاشقاں نوں
 شاہی وِچ فقیری وِچ مست رہندے کسے چیز دی تھوڑ نہ عاشقاں نوں
 کرن بھکھ منظور تے دُھپ پالے تے دوشاڑے لوڑ نہ عاشقاں نوں
 محمد شفیع ہتھ جوڑ کے کراں عرضاں چنگی لگے اجوڑ نہ عاشقاں نوں

م

من میرا نازاں نال موہ کے ہُن پرے پرے نسدے ہو
 میرے حال بے حال نوں ویکھ کے تے کردے ترس ناہیں پئے ہسدے ہو
 میری جان نُحیف خفیف اُتے تیر غمزیاں دے پئے کسدے ہو
 محمد شفیع است دے روز کولوں تسیں من میرے وِچ وسدے ہو

ن

نال نیاز تے بندگی دے اسیں پیاریا ہوئے سواڑی آں
 پلے دین تے دنیا دا دان ناہیں منکت آپ دے جھوڑی خاڑی آں
 تیرے عشق دی دل وِچ آگ بلدی ہویا کے جے کوچھڑی کاڑی آں
 محمد شفیع جے لہیں گل لا مینوں کجیں پانج تاں میں کرماں واڑی آں

ن

نام دا ورد مدام میرا تیری ذات دے نال پیار رکھاں
تیری یاد تھیں روح ہے شاد میرا تیری یاد میں لیل نہار رکھاں
بلبل تہنڈڑے حُسن دے پھل دی میں تیریاں ویریاں نال میں خار رکھاں
محمد شفیع میں اپنے قلب اندر تیرے عشق دے سوز دی تار رکھاں

و

وَل میرے خط خیر سدا کدے گھل خدا دا واسطہ ای
جائے سال مثال محال میرا پل پل خدا دا واسطہ ای
درد تیل کڑاہ دے وچ مینوں ناہیں تل خدا دا واسطہ ای
محمد شفیع میں جل منور ہوئی پٹھاں جھل خدا دا واسطہ ای

ہ

ہجر نے جگر تے سانگ ماری سینے وچ کاری درداں رولیاں میں
اٹھے پہر میں زہر دے گھٹ پیواں اک تپ کے پیاریا بولیاں میں
ہنجوں خون پرناڑے چون اکھیں غماں ککھ تھیں کیتڑی ہولیاں میں
محمد شفیع پیاریا جانیاں او تیں تے دے دیاں کھول نہ پھولیاں میں

لا

لاف گزاف دی بات ناہیں عشق ہے کجھ ہور انصاف دی گل
پھیری شمع تے ہور پتنگ دی اے اتھے کعبے دے نہیں طواف دی گل
ایہ نی سولیاں شاہ منصور دیاں اتھے جنت تے نہیں اعراف دی گل
محمد شفیع معقول منقول کولوں وکھری عین تے شین تے قاف دی گل

الف

اللہ کوئی کرے سبب ایسا ملے آ اوہ یار پیار والا
میرے دلے دیاں خشک کیاریاں تے وے آن کے ابر بہار والا
میرے سترے بخت بیدار ہوں آوے پرت نہ دور ادبار والا
محمد شفیع میاں ملے یار دل دا جائے دکھ تمام بیمار والا

ی

یار بہک وار قرار اُتے پھیرا پا خدا دا واسطہ ای
دس مکھ نوری میری کٹ دوری ناہیں تا خدا دا واسطہ ای
تیرے ملن سندے کراں نت حیلے گل لا خدا دا واسطہ ای
محمد شفیع فراق دی نار اندر ناہیں پا خدا دا واسطہ ای

ی

یار خدا دا واسطہ ای مینوں اپنے دید دا جام بخشش
میں تے رکھ کے اکھ مروتاں دی اپنی مہر دا خاص انعام بخشش
میتھوں دور رکھیں سدا دُوریاں نوں مینوں اپنا قرب مدام بخشش
محمد شفیع میاں نازاں پالیا او میں ناکام دے کام دا کام بخشش



☆ ”مجموعہ اشعار اختر (قلمی)“ - صفحہ 49 تا 60۔

☆ حاشیہ از شاعر:

”25 فروری 1971ء بروز پنج شنبہ (تصنیف اول)۔ تحریر ہذا

29 جون 1978ء غروب آفتاب۔“

[سی حرفی نمبر 24]

فرقت کے شند شعلوں میں آہ جل بجھا ہوں میں
بجھ جائے خود بخود جو سحر وہ دیا ہوں میں



الف

آوٹاں جاوٹاں چھڈیا ای ایہ کی پیاریا دلے تے لائیاں فی
کئی دناں تھیں اساں اڈیک آہی دتے پئے پیغام تھہ راہیاں فی
سیاں کہن دس کاہنوں جھلیے توں رو رو اکھیاں پیاں سُبائیاں فی
محمد شفیع میاں میں تاں لٹ لئیاں تیریاں غمزیاں ناز ادائیاں فی

الف

آج مینوں آوے نظر ناہیں ہائے اوہ یار جانی سوہنے ڈھب والا
جیندے نین غزالے پان لوئی سوہنی باکڑی پھیل تے چھب والا
پاوے لوٹیاں دلاں تے خال جس دا سوہنی ذقن ڈونگھے غبغب والا
محمد شفیع ایسا ڈٹھا نہیں مٹھا کوئی ہور سوہنا مٹھی لب والا

ب

بانہہ رکھ سر تے گوکدی میں مینوں ٹھگ لاہور دا ٹھگ گیا
مینوں دس کے وار تاریخ پکی جانے رب کتے سوہنا وگ گیا
طعنے جگ دے جھلنے پئے سر تے کس اوتری دے آکھے لگ گیا
محمد شفیع دن رین نہ چین رتی سینے تڑوی دے بال اگ گیا

ت

توں کر کے آکھاں نہیں تینوں تے توں جانیاں سرے دا تاج میرا
تیرے نال میں بھاگ سولکھنی ہاں تیری زندگی نال ہے راج میرا
تیرے دید وِچ پیاریا عید میری تیرا ویکھنا عین معراج میرا
محمد شفیع میں خاندان تہہ بدھی تیری گولی ہاں کج لئیں پانچ میرا

ث

ثابتی قول تے دین پہرہ جہڑے ہون اصیل اوہ بھجڈے نہیں
دیندے عمر دے ساتھ دا ساتھ پکا مندے ہون ساتھی بُرے چچ دے نہیں
بُری نیت دے ہون پلّیت جہڑے پردے اوہ تاں کسے دے کجڈے نہیں
محمد شفیع میاں آکھن لوک دانے بدل اوہو دسن جہڑے گجڈے نہیں

ج

جا نہ جانیاں گنڈ دے کے اسیں دید کارن طلبگار بیٹھے
مئے کتوں چا پوے کنسو تیری کر کے راہاں اُتے دیدے چار بیٹھے
کوئی دس نہ پووندى ترس رہیاں اکھیں لیل نہار بیزار بیٹھے
محمد شفیع کد ہوگ سنجوگ ساڈا اسے سوچ تے وِچ وچار بیٹھے

ح

حُسن مئے ڈٹھے ٹھگ کُوڑے ڈٹھے اساں ایہ خوب ازمانیکے تے
دولت دے دی لٹ لیجان اوّل فر جاوندے گنڈ ولانیکے تے
آہا کے جے جانیاں پیاریا او جاندیوں قدم رنجہ فرمانیکے تے
محمد شفیع ایہو کھٹی کھٹی سی اساں نال تیرے اکھیں لانیکے تے

ح

حُسن دی تہندڑی تیج کولوں میری جان عزیز ہلاک ہوئی
تیرے عشق دے درد دی کرد کولوں نی میں سکھ لئی سینہ چاک ہوئی
اٹھے پہر افلاک دی تیز گردش ہتھوں خاک برسر غمناک ہوئی
محمد شفیع پو پو پوندی رس دھرتی سلی کنڈیاں نال جہیوں تاک ہوئی

خ

خمر محبتاں تیریاں دا جس روز دا جھلڑی نوش کیتا
عقل ہوش ساری فراموش ہوئی ہائے بھل پیالہ تتی نوش کیتا
گئے صرف دے بھل ابواب سارے مخو مخو ہوئی عشق جوش کیتا
محمد شفیع مڑ کے لدھی ہوش ناہیں جس روز دا ایہ نغمہ گوش کیتا

د

دوس ناہیں کسے دوسرے تے اکھیں اکھیں تے ہو فدا گئیاں
اسماعیل جہیوں چھری دے پٹھ آیا یا جہیوں یوسف جا مصر وکا گئیاں
اوہناں اکھیاں پھٹیا ہیر تائیں ایہو رانجھے دے گن پڑوا گئیاں
محمد شفیع میاں ایہو اکھیاں سن جہڑیاں سوئی نوں ندی رڑھا گئیاں

ذ

ذکر مذکور کیہ اکھیاں دا پھٹے اکھیاں دے پھر دے گلی گلی
ہتھ کھری ناد تے سر ٹوپی گھر گھر پان جھاتی گوکن علی علی
مارن جلیاں جلدی جان والے بھٹھ عشق والے وچ جلی جلی
محمد شفیع اس عشق دی اگ ہتھوں مخلوق رب دی جلی بھلی بھلی

د

رہے نہ لکھاں وِچ اگ چھپی اوڑک بھڑک پوندا بھانہڑ اگ دا ایہ
پھر دا خوار ہو گلی بازار اندر مہناں سرے اُتے سارے جگ دا ایہ
نِشتر نگہ دے جگر وِچ چیر کردے یا فر لہو کدھن شہ رگ دا ایہ
محمد شفیع پر عشق دیاں زخماں دا رہندا رت پرنا لڑا وگدا ایہ

د

رب رسول دی گل یارو لگے بندیاں نوں سینے تیر بن کے
من رب دا امر نہ مول بندے آکھے نفس دے لگ شریر بن کے
ٹھکدے جگ نوں پھرن بے دید ظالم بانے فقر دے پہن تے پیر بن کے
محمد شفیع پیار محبتاں دی گل کرن نہ ویر ہمیشہ بن کے

ذ

زہر دی پُوی دا کھان سوکھا ہوندا اکھیں دا فیر بچان اوکھا
سُولی شاہ منصور دی چڑھن سوکھا ہوندا اکھیں وِچ اکھیاں پان اوکھا
بادشاہاں نوں پاندیاں وخت اکھیں ہوندا کسے تے دلوں وکان اوکھا
محمد شفیع میاں دل لٹیاں دا رہنا یار دے باجھ دھیان اوکھا

س

سکھ نصیب نہ عاشقاں نوں ایہ تاں غماں دے نال منجھال ہوئے
ڈٹھے گلی محبوب دی صدا کردے بھاویں کیڈ اوہ با اقبال ہوئے
اچے خان نواب سدان والے گجرات وِچ آ مہینوال ہوئے
محمد شفیع وِچ عشق دے آئی کے تے ہتھوں مول کھڑا کنگال ہوئے

س

سچ دا رہیا نہ سچ کوئی پئے جھوٹ نوں سچ بنان بندے
ظالم ڈرن نہ رب دے قہر کولوں پئے جھوٹے قرآن سر چان بندے
کوئی گل نہ دے فریب باجھوں سدھی ہک ناہیں تند پان بندے
محمد شفیع ایہ ہو رواج گیا جتھے دین دھیاں اُتھوں کھان بندے

ش

شع تے جلن پتنگ آ کے ایہ تاں مرن کولوں بلی سنگدے نہیں
مزه چکھ کے جان جلاوے دا پچھاں ہندے نہیں جیون منگدے نہیں
مرن جنگ وچ جائی کے سورے جیوں بناں خون ہتھ مہندیوں رنگدے نہیں
محمد شفیع جس عشق دے جام پیتے طلبگار اوہ تاں خمر بھنگ دے نہیں

ص

صورتاں وچ مرغوب صورت میرے لاڈلے ناز بردار دی اے
مٹھی قند دے ہار گفتار جس دی رنگت سرخ انار قدھار دی اے
یا ایہ حسن دی کھڑی بہار تازہ یا ایہ مشک نافہ ہرنی بار دی اے
محمد شفیع طبع غزل خواں میری بلبل بار جس دے گلزار دی اے

ض

ضرب کھادی جہاں اکھیاں دی مُڑ اوہ رہے نہ پڑھن پڑھان جوگے
بیٹھے ٹھپ اوہ کنز قدوریاں نوں مُڑ اوہ رہے نہ درس وچ جان جوگے
بھلیا حافظاں حفظ قرآن سارا قاری رہے نہ قرأت سنان جوگے
محمد شفیع میاں اکھیں لائیے تے مکھی وانگ بیٹھے پچھتان جوگے

ط

طور اُتے موسیٰ نور ڈٹھا جس دے وچ سی رمزِ حضوریاں دی
رَبّ آرئی دے جوش وچ ہوش بھلی، آکھے رہی ہن تاب نہ دُوریاں دی
طلبِ صدق دی دھوتیوں نہیں جاندی ہوندی کھنڈ ناہیں کالی بھُوریاں دی
محمد شفیع منظور بن عاجزی دے اتھے کچھ ناہیں مغروریاں دی

ط

طرفِ محبوب دیوں کدوں ہوسی مینوں شرفِ پیامِ حضوریاں دا
سسی ہارِ بلوچ دے ہجر اندر روڑا کٹناں پے گیا دُوریاں دا
اودھی زلف دی مست خوشبو ہوندے نافہ سَنگھناں نہیں کستوریاں دا
محمد شفیع کبی عشق دی بھا بھڑکی جگر سوز ایہ سیک تندوریاں دا

ظ

ظلم کرینڈے نین ظالم راہیاں جاندیاں دے سینے پھٹ کر دے
دُوم ڈاگری بھیل تے بھٹ بھائیں کسے نال ایہ نین نہ گھٹ کر دے
مارن چھٹ کلیجے پھٹ کر دے ظالم نین ایہ سرے دی سٹ کر دے
محمد شفیع ایہ حسن دیاں دُنکیاں تے منترِ ماندری دے ناہیں کٹ کر دے

ع

عینِ حقیقتاں نظر آئیاں جلوہ یار دا نظر نواز واہ واہ
ہویا واضح رازِ دقیقِ مشکل گچھا درد تے سوزِ گداز واہ واہ
کعبہ دیکھ کے دل دیاں نال اکھیں لئی عشق دی نیت نماز واہ واہ
محمد شفیع میاں یکجا ڈٹھا گلی عشق وچ نازِ نیاز واہ واہ

غ

غیر نوں کڈھ وجود وچوں شیشہ کبر دا زنگ آلود تیرا
لے کے توبہ دا آب کر پاک اس نوں اُجے تیک پلیت وجود تیرا
حسد کبر کینے غصے بغض پنجاں کیتا خیر دا راہ مسدود تیرا
محمد شفیع جاں تک ہوئیں صاف ناہیں حاصل نہیں ہونا مقصود تیرا

ف

فتح نہ ہوں ابواب دل دے جاں تک وچ سینے جھاتی پاویں نہ
ہوں دور کدورتاں دلوں ناہیں جاں تک دوئی نوں مار مکاویں نہ
جاں تک منسیں نہی تے امر ناہیں جانی یار تاکیں کدے بھاویں نہ
محمد شفیع نہ مارسیں ”میں“ جاں تک کدی وصل دیاں لذتاں پاویں نہ

ق

قسمتاں پھول نہ ڈٹھیاں سن رہیاں دُوریاں وچ نصیب مائے
جہاں نال میں سلسلہ جوڑیا سی میتھوں دُور اوہ گئے حبیب مائے
مرے دے تے لوٹیاں پایاں سن جانی یار دے حُسن نقیب مائے
محمد شفیع میاں میرے پیش آیا بُرا ہجر فراق مہیب مائے

ک

کعبیوں کدے نہ کم جاتی اساں حاضری وچ حضور تیرے
کراں طوف پروانیاں ہار تیرا اس وچ کراں نہ کدے قصور تیرے
اکھیں سڑن جے میریاں جُون اکھیں ہوئے کالجے وچ ناسور تیرے
محمد شفیع دِن رِن ایہ نین میرے جلوے منگدے شام سحر تیرے

ل

لال کد ہوگ نہال تیرا عاشق چہنڈڑے پاک جمال کولوں
کدوں دید دا خیر رومال پوسی چھٹی جان کد ہجر ملال کولوں
دیدے ترسدے برسدے ابر وانگوں مزا عشق دا کچھ بلال کولوں
محمد شفیع میں کدے نہ رہیا خالی تیری یاد تے پاک جمال کولوں

م

موڑ مہار وراگیاں میں کر یاد بھائیں وعدہ آونے دا
کتھے گیا اوہ قول قرار تیرا تشریف شریف لیاونے دا
جے نہ آونا سی جانی پرت اتھے کہڑا فائدہ حرف لاونے دا
محمد شفیع چمانڈڑے زخم اُتے ایہو وقت جانی مرہم لاونے دا

ن

نہیں اس عشق تھیں نفع کوئی بناں زاریاں درد خواریاں دے
ویکھاں نظر دوڑا چودھار تینوں کھلے رہن بُوہے نت باریاں دے
جاں تک سیس نہ ٹلن ترکڑی تے سودے پکدے نہیں کدی یاریاں دے
محمد شفیع منصور تھیں کچھ تکو مزے عشق دیاں ناز برداریاں دے

و

وَل اتھے کدوں آوناں توں کہڑے دیس جا کے واٹاں ملیاں فی
جلی جان میری تیرے ہجر ہتھوں خبراں خیر دیاں مول نہ گھلیاں فی
جہان دلاں دے سودڑے نہیں کیے اوہ تاں جگر وچ رہیاں سوکھلیاں فی
محمد شفیع میاں میرے ہار لکھاں آتش عشق والی وچ جلیاں فی

۵

ہار گئے میرے ہار کہیں بازی عشق دی اس میدان اندر
منصور ورگے چڑھے سولیاں تے سکے رکھ نہ راز نہان اندر
پایا عشق دا کسے نہ انت پایا رہی ڈھونڈھ ہر تھاں مکان اندر
محمد شفیع ایہ عشق دا راز مخفی پایا کسے نہ زمیں آسمان اندر

لا

لان سوکھلوی کہن اوّل اپر باجھ وفا بے آب یاری
طالب نفس دے ہوس پرست لوکاں کیتی جگ دے وچ خراب یاری
حسن یوسفی موسوی نظر ہووے کچھو سچ تاں عین ثواب یاری
محمد شفیع تحقیق تصدیق ہوئی باطل حق دے وچ حجاب یاری
کہناں لئی تجلوا عین ذاتی، کہناں لئی ظلمات دا آب یاری
کہناں لئی ایہ سلسبیل کوثر، کہناں لئی ایہ ریگ سراب یاری
کہناں قلب قلوب دے باب کھلے، کہناں لئی ایہ زرا عذاب یاری
زینت زیب ایہ تخت تے تاج والے جیوکر وچ مسیت محراب یاری
کہناں لئی ایہ تار رباب دی اے، کہناں لئی ایہ صوتِ غراب یاری
کہناں لئی سنجاب کنجواب اطلس، کہناں لئی ایہ کرد قصاب یاری
یا جینوں کالڑی رات دے وچ چمکے نکل ابر تھیں عین ماہتاب یاری
بے کنار تے بحر ذخار ہے ایہ ناہیں چھڑی نہر تالاب یاری
کہناں لئی خطاب مروّتاں دا، کہناں لئی ایہ خاص عتاب یاری
کہناں دلاں تے اثر نہ کرے ماسہ، کہناں دلاں نوں کرے خراب یاری
جیوکر زندگی متن کتاب دا اے زینت اُس دی نال اعراب یاری
محمد شفیع منظور خلوص باجھوں ہوندی نہیں ہے وچ جناب یاری

الف

اَنب انار درکار ناہیں دیکھن دے مینوں پھر کے باغ مالی
گل لالڑے وانگ ہے وِچ سینے میرے ہجر دا کالڑا داغ مالی
لیندے پھرن اُڑایاں ہر پاسے طوطے سبز تے کالڑے زاغ مالی
محمد شفیع پتنگاں ہار منگاں بلدی عشق دی لاٹ چراغ مالی

ی

یار مجاز دے رنگ اندر تازہ قلم دی ایہ تحریر میری
ذوق شوق تے عشق مانوق اندر تگلو شعر دے وِچ تاثیر میری
کارن زلف زنجیر دیاں قیدیاں دے تازہ دلاں دے لئی تسخیر میری
محمد شفیع جی دل دیاں زخمیاں لئی رہی یاد ایہ مرہم جبیر میری



☆ ”مجموعہ اشعار اختر (قلمی)“ - صفحہ 61 تا 72۔

☆ حاشیہ از شاعر:

”16 جولائی، 1971ء بہ اختتام رسید اختر منزل ڈھوک محمود

(تصنیف اول)۔ دوبارہ تحریر ہذا بتاریخ 10 جولائی، 1978ء

بدستخطی بندہ میاں محمد شفیع اختر ڈھانگروی مصنف سی حرفی ہائے

ہذا۔“

[سی حرفی نمبر 25]

بروفات حسرت آیات محمد نسیم اطہر جگر پارہ عزیزی مقبول بیگم⁽¹⁾



الف

آہ تقدیر دے تیر چھٹے جہڑے گئے کلیجڑا چیر پچی!
میرے اظہر⁽²⁾ دے ویر نسیم اطہر سندی بھلنی نہیں تصویر پچی!
ظالم موت دی مرض طیب جس دے کر سکے نہ کوئی تدبیر پچی!
مقبول قبول دعا تیری کیتی کوئی نہ رب تدبیر پچی!

الف

اللہ دیاں مہر کریمیاں دا میں تاں رہیا نت شکر گزار پچی!
آگے مظہر، ریاض، اعجاز⁽³⁾ سندی کھادی جگر وچ تیز کٹار پچی!
اُتوں آ نسیم دی موت تازہ کیتا زخم سینے وچکار پچی!
محمد شفیع بڈھپڑے وقت میری کیتی غماں نے جان شکار پچی!

ب

بالے تے سینہ جانے ئوں ساڈے دیس نسیم توں آیا سیں
سکھ چین سواد سیں والدہ دا جیوں دی زندگی دا سرمایا سیں
آیوں عدم تھیں جدوں وجود اندر دے دے نوں سونیا بھایا سیں
محمد شفیع میاں چانن اکھیاں دا بن کے اکھیاں وچ سمایا سیں

ت

تکدیاں ماسیاں راہ تیرا کدوں آوسیں نانکے دیس بچہ
اٹھے پہر کرلانڈیاں رہندیاں نی پا کے گل وچ کھلڑے کیس بچہ
جہڑا موت دی وادیوں پار جاوے، آوے پرت نہ بدل کے بھیس بچہ
محمد شفیع فریاد فریاد گوکاں پوندی دے دے وچ کلبھیس بچہ

ث

ثابتی رہے نہ مول اوتھے جتھے موت قہاریاں پاوندی اے
تکدی موت ضعیف جوان ناہیں ایہ تے کسے تے ترس نہ کھاوندی اے
اس موت دے الھڑے زخم اُتے کوئی راس نہ مرہم آوندی اے
محمد شفیع اس موت دیاں ماریاں دی بھل ہوش جہان دی جاوندی اے

ج

جن والی کھلی گودکی آ گھر آ نسیم وراگڑی میں
تیری موت دے ہوت بلوچ ہتھوں ڈاڈھی سخت مصیبتاں جھاگڑی میں
پلے پیا سی دان نسیم تیرا، جگوں تچ آج رنج ابھاگڑی میں
محمد شفیع کیہ کرے تدبیر اتھے گئی دس تقدیر دی ناگڑی میں

ح

حسن دے باغ بہار اندر کھڑیوں گل دوپہری دے وانگ بچہ
لے کے نام نسیم دا خزاں آئی لگی وچ کلیجڑے سانگ بچہ
سوہنا چن مہتاب دے ہار چہرہ جس دی رکھدی میں دلوں تانگ بچہ
محمد شفیع میں تاں نس جاں کدھرے چڑھی غماں دی آ سر کانگ بچہ

خ

خیر میں منکدی رہی تیری، تیری خیر دا پیا نہ خیر بچہ
جانے رب جے اس آسمان تائیں بیسی نال میرے کہڑا ویر بچہ
سیمیں ادہ کوئی گھڑی ککھنی سی جدوں کڈھیا توں گھروں پیر بچہ
محمد شفیع میاں آیوں دیس ساڈے چار دناں لئی کرن توں سیر بچہ

د

دادی نے نال پیار رکھیا تیرا نام نسیم دے نام تے سی
بئی سال دے بعد فر زخم تازہ ڈھکی گل تدبیر دی خام تے سی
اوہو ماہ نومبر اتوار دا دن گردش فلک دی پھری ایام تے سی
محمد شفیع میاں وارد موت ہوئی جھٹ پٹ اس گل اندام تے سی

د

دو نومبر دے روز میں تے مائے جھلیاں درد ہمیریاں فی
پہلی عمر بیٹھی ویبھلی گود کر کے، ایویں لکھیاں توڑ تھیں میریاں فی
میریاں دکھدیاں ہڈیاں رہن گیاں، پنڈا چانیاں پٹیاں بھریریاں فی
اللہ جی کوئی عذر مقبول دا نہیں منظور جو مرضیاں تیریاں فی

ذ

ذره نہیں آوندا صبر مینوں اٹھے پہر کرلاناں سیمیا او
میریا جگوں نیاریا پیاریا او میریا جگوں لاثانیاں سیمیا او
کدوں آ سوہاوسیں گود میری میں تاں نہیں بھل جانیاں سیمیا او
تیری امی وراگڑی، موڑ واگاں تیرے گیت میں گانیاں سیمیا او

ر

روندڑی رہے گی عمر ساری وڈی امبری درد رسید تیری
اوہدے دلبرا سکھ سواد سنیں توں اوہدی عید سعید سی دید تیری
پائیاں موت آ عمر دیاں دُور وِتھوں ہوئی ملن دی قطع امید تیری
محمد شفیع کلیجڑے کار وَجی لا کے بھر دی ضرب شدید تیری

ز

زاریاں کراں دن رین بیٹھی جدوں آندراں دین اُبال آ کے
میریا سیمیا چنے دیا ٹوٹیا او کدی وَت وی دَس جمال آ کے
تیرے ابے دا درد فراق ہتھوں دَساں کیہ ہویا بُرا حال آ کے
محمد شفیع گھر ناکلیاں دادکیاں دے ہوئی غم دی درد سمہال آ کے

س

سکھ دی نیند کد سون ماواں ہائے جہاں نوں موت دے چور پئے
تازے پھل گلاب روئل ورگے ہسڈے کھیڈ دے گود تھیں گور پئے
اچن چیت تدبیر دی ڈور ترٹی اسیں سوچدے ساں کجھ ہور پئے
محمد شفیع نہ نلڈے لکھ لکھے لائیے لکھ جے عقل دے زور پئے

ش

شاد کد ہوگ ناشاد خاطر دیسی کون دلاسرے روندڑی نوں
ایہو بچیے توڑ دا لکھیا سی کوئی روک نہ سکدا ہوندڑی نوں
دل دے پھٹ تے کٹ نہ کرے مرہم پئی سٹ ہر نیندرے سووندی نوں
محمد شفیع میاں کریو منع ناہیں دردوں کوکدی تے ڈلفاں کھوندڑی نوں

ص

صبر دارو اس روگ دا نہیں مائے جھیلے خام خیال تیرا
بھائیں صبر دا اجر عظیم اے پر دُکھے غماں ہتھوں وال وال میرا
ہنجوں خون دے رَوَن زبون اُکھیں کیتا موت نے حال بے حال میرا
دیتاں رُب دیاں پئی مقبول گلاں دے پچن دا حال محال میرا

ض

ضرب شدید اس موت والی بند بند میرا ہائے پُور کیتا
سونہ رُب دی اس فرزند سندا ناہا بھُل کے کدی غرور کیتا
اُٹھے پہر میں روندیاں گزر جاوے رُب دے تھیں صبر کیوں دُور کیتا
محمد شفیع کلجے دے زخم آ کے مینوں رَوَن اُتے مجبور کیتا

ط

طالع جے ہووندے نیک میرے مینوں سیک نسیم دا ساڑدا نہ
ساری عمر دے لئی مقبول مینوں ہائے سُولڑی دے اُتے چاڑھدا نہ
آیوں غم دی گھڑی وکھاونے نوں تیرا ہجر اس جگر نوں پھاڑدا نہ
محمد شفیع نسیم دی موت سندا چانا پوندنا بھار پہاڑ دا نہ

ظ

ظرف نسیم دی زندگی دا ٹھوکر لگدے سار ہی پُور ہویا
کھردے سار ایہ پھل کرما گیا جس تھیں جگر دے وِچ ناسور ہویا
جا کے حضرت یعقوب تھیں کچھ تلو جس دیاں اُکھیاں تھیں یوسف دُور ہویا
محمد شفیع اس موت دے زخم الھے جس تے مرہم دا نہیں دستور ہویا

ع

عین عنوان سی زندگی دا اَبے لئی نوید سیں عید دی توں
دُکھی بابے شریف⁽⁴⁾ دیاں اُکھیاں دی ہے یں روشنی گھڑی سعید دی توں
دادی جی دے دے دی خوشی سندی بھیجی رٹوں سیں کرن امید دی توں
محمد شفیع پر کسے نہ ڈھب لگی قسمت دُکھی ہمیشہ رشید دی توں

غ

غماں دے جال وچ ڈال کے توں آپوں ہو بیٹھوں اک پاس بچہ
اوہو جاندی درد رنجائزی آ جہڑی آخری وقت سی پاس بچہ
بھٹلسی مشن دا بیڈ نہ جس اُتے ہوئے ختم اخیر دے ساس بچہ
محمد شفیع ایہ ویکھنی گھڑی آہی مڑیوں آئی دی توڑ کے آس بچہ

ف

فجر دی جدوں اذان ہوئی بھری غماں دی جھول مقبول آئی
خالی روح تھیں گود وچ گھن بچہ بے نصیب دِلیکر ملول آئی
پیا موت دا چور کر زور جس تے ہتھیں ضائع کر نقد سمول آئی
محمد شفیع میاں ہسپتال وچوں لے کے وچ کلیجڑے سول آئی

ق

قہر ہويا بھریا شہر سارا خوشیاں نال دے فریاد اللہ
کیوں نہ کوئی نسیم دی آ مینوں خوش خبر دے فریاد اللہ
مینوں بھلدا نہیں نسیم سیو پھلاں وانگ ہسے فریاد اللہ
محمد شفیع ایہ موت دا نانگ زہری ناہیں کسے دے فریاد اللہ

ک

کدوں توں آدیں دیس ساڈے تیریاں ماسیاں سخت دراگیاں فی
کھڑی رُت آہی تیرے جان دی ایہ لئے لاگ اہے ناہیں لاگیاں فی
تیرے ہجر دیاں جہاں دے جگر اندر پیڑاں ٹویاں ایہ آن کے جاگیاں فی
محمد شفیع تدبیر نہ راس آوے جدوں قسمتیاں ہوں ابھاگیاں فی

ل

لا گئیوں غماں دے تیر سینے ساری عمر آرام ہُن آوناں نہیں
جہڑی اگ کلچرے وچ لگی اس اگ نوں کسے بجھاوناں نہیں
سوچے نقش نقاش نے گھرے تیرے مینوں سیمیا توں بھل جاوناں نہیں
محمد شفیع ہر اپنے جھل تیرا اتھے کسے نے غم ونڈاوناں نہیں

م

محمد نسیم فرزند میرے گئیوں توڑ دلبریاں میریاں توں
میری جان ضعیف نجیف اُتے پنڈاں گئیوں چوا بھیریاں توں
جاواں نس میں دس ہُن کس پاسے گئیوں غماں دیاں جھول ہنیریاں توں
محمد شفیع اخیر ملاپ کارن لایاں نانکے دیس تے پھیریاں توں

ن

نام نسیم دا رکھیا سی وڈے شوق تے نال پیار دادی
چھاتی لائی کے پیار دی رس لیندی گورے مکھ تے دے پیار دادی
کلمے پاک دیاں لوریاں دیوندی سی صبح و شام تے لیل نہار دادی
محمد شفیع نسیم دے نام والا ہويا زخم تازہ دوجی وار دادی

و

وَاء وچھوڑے دی کہی دگی گئی خوشی دی اُجڑ بہار میری
ہنجوں خون پرناڑے رون اکھیں ٹٹی صبر قرار دی تار میری
کراں کیہ نہ لگدا جی میرا ہوئی زندگی بسر خوار میری
محمد شفیع اوہ گنڈ ولا ٹریا پیسی جس توں جان نثار میری

۵

ہسدیاں وِسدیاں رسدیاں دے سرتے ایہ دوکارڈا وِجیا کیہ
نال سکھ آرام دے سوندڑی تے گڑا قہر تے غضب دا گجیا کیہ
تاری لا نہ پار چہاں کیتی سوئی ہار میرا گھڑا بھجیا کیہ
محمد شفیع آج نالکے دیس اُتے تیری موت دا وجکا وِجیا کیہ

لا

لا علاج ایہ مرض تیری، تیری موت دا گھن پیغام آئی
ڈیرہ وِنج نسیم دے کول کیتا پردے وِچ نسیم دے نام آئی
مہلت ملی نہ کسے نوں ملن سندی ہائے ایہ موت تیری تیز گام آئی
دو نومبر اتوار دی صبح صادق بن کے غماں دی کاڑی شام آئی

ی

یاد کر کر تینوں پئے رسن، افتخار، رزاق، رشید (۵) بچہ
تیریاں پھپھیاں ماسیاں پیاں رسن ہے سیس جہاں دے دے دی عید بچہ
اظہر سنے افضال حیران دوویں کیتوئی جہاں سنگ قطع برید بچہ
محمد شفیع شریف تے سنے دادی امی لئے جس غم خرید بچہ

ی

یاد نسیم دی وِچ لکھے دُکھی دِلاں کارن ابیات غم دے
دُکھی دِلاں دے ہائے پرچان کارن کیئے شعر وِچ عرض حالات غم دے
میرے سَکھ سواد دی ہائے بیڑی ہوئی غرق وِچ آب فرات غم دے
محمد شفیع دن حشر دے بند ٹٹسن، صدقہ نبی کریم دی ذات، غم دے

الف

ایہو تاریخ شفیق⁽⁶⁾ دی سی جدوں گیا سی لوٹیاں پائی کے اوہ
اسے ماہ نومبر نسیم ٹُریا گیا خوشی دی شمع بجھائی کے اوہ
ایہو ماہ نومبر تاریخ دوجی نسیم اطہر اُتے آئی دھائی کے اوہ
محمد شفیع ایہ دِلاں دے سَکھ لٹن مُڑ مُڑ آوے ایہ بھیس وٹائی کے اوہ

☆ ”مجموعہ اشعار پنجابی (قلمی)“۔ صفحہ 84 تا 94۔

☆ حاشیہ از شاعر:

”بتاریخ 24 نومبر 1975ء بوقت عشاء در تحریر۔۔۔ شد، بقلم خود

میاں محمد شفیع اختر ڈھانگروی۔

- 1- میاں محمد شفیع اختر ڈھانگروی دی صاحبزادی۔
- 2- اظہر رشید: نسیم اطہر دے ماموں زاد (میاں محمد شفیع اختر ڈھانگروی دے پوترے)۔
- 3- مظہر جمیل: نسیم اطہر دے ماموں زاد۔ ریاض، اعجاز: خالہ زاد۔
- 4- نسیم اطہر دے دادا۔
- 5- افتخار: نسیم دے چچا۔ رزاق: نسیم دے والد۔ رشید: نسیم دے ماموں۔
- 6- شفیق: نسیم دے والد دے چچا زاد دایا جس دی وفات بائی سال دی عمر وِچ ہوئی سی۔

[سی حرفی نمبر 26]

”فریادِ سیدہ“

بہ فراق جگر گوشہ سیدہ بی بی ضیا مرحومہ مغفورہ دختر نیک اختر
حضرت قبلہ سید محمد فضل شاہ



الف

ازل دیاں درد نوشتیاں نوں فریاد اللہ کون ٹال سکے
کون قدر قضا دی تیغ اگے تدبیر سندی رکھ ڈھال سکے
دیون درد اُبال جاں آندراں دے کون صبر دی واگ سنبھال سکے
واری انہڑی مہنڈڑے جگر وچوں خار غماں دے کون نکال سکے

ب

برم ایہ رہے گا عمر ساری بی بی جان اوہ وقت اخیر تیرا
ہتھیں اپنی وداع نہ کیتوں توں رکھ جھوڑی وچ سریر تیرا
پئی حرم شریف وچ سد تینوں پیسی ازل تھی پاک خمیر تیرا
واری انہڑی مکے شریف وچوں ٹریاں وچ سینے کھا کے تیر تیرا

ت

تازیوں تازہ ایہ زخم تازہ کسے وقت نہ بھل دی یاد تیری
کسے وقت نہ اکھیوں ہمدی اے صورت پاک اوہ نیک نہاد تیری
تکلیں دکھ نہ حشر میدان اندر کرے رب رسول امداد تیری
واری انہڑی تہد توں لکھ واری سدّی گئی میں جگ برباد تیری

ٹ

ثابتی صبر سہاریاں تھیں رہیا ککھ نہ وِچ وجود میرے
 دِن رَین نہ چین آرام آوے رهندے نین ایہ اشک آلود میرے
 ہويا وقت اخیر خراب میرا کہتے جاں میں رب وودد میرے
 واری اَنبڑی بھلیں نہ کسے ویلے وسیں اکھیاں وِچ موجود میرے

ج

جال کے بال سواہ کیتا تیری اجل نے صبر سکون میرا
 تیری موت دی خبر سی قہر گویا کیتا رگاں دا سرد جس خون میرا
 تیرے درد فراق دا داغ جہڑا ہوسی دُور نہ نال صبون میرا
 واری اَنبڑی کدی پک وار آئی کے چا ویکھدیوں حال زبون میرا

ح

حال تھیں ہو بے حال گیا میرا حال فی الحال ضیا بچی
 تیرے ہجر دی پیڑ پیڑیاں میں وال وال گئے دکھ دھا بچی
 میری رَین جگراتیاں وِچ جاندی ملے ہجر دی کتھوں دوا بچی
 واری اَنبڑی پھوہڑیاں پا بیٹھی روندی رہاں مونہہ پلڑے پا بچی

خ

خواب خیال دے وِچ ناہا تیری موت قہاریاں پا جاسی
 چھوڑ روندیاں دھوندیاں بچیاں نوں تیرا روح پرواز فرما جاسی
 دکھی والدہ دے دل تھیں کون پچھے جسوں غماں دی پُنڈ چوا جاسی
 واری اَنبڑی تھیں بی بی جان پیاری ساری عمر لئی مکھ چھپا جاسی

د

دیکھ رہے برخوردار تیرے بیٹھے راہ تیرے کدوں آوٹا توں
اوہناں سجیاں کوٹھیاں وچ واپس کدوں قدم رنجہ فرماوٹا توں
صوفے کرسیاں میز قالین سُنے سُنجا صحن کد آ سوہاوٹا توں
واری اُنہڑی گولیاں ہتھ بدھے بی بی جان کد ہس بلاوٹا توں

ذ

ذکر تیرا اُٹھے پہر رہندا مینوں یاد رہیاں ناہیں ہور گلاں
میری عمر دا ساتھ تروڑ چلیوں میرے دے اندر آہیاں ہور گلاں
سینے سیک جدائی دے چھیک کیتے ظالم فلک آہیاں چاہیاں ہور گلاں
واری اُنہڑی تھنڈی عقل دانش آہیاں نیک صلاحیاں ہور گلاں

د

روگ ایہ عمر دا بھوگنا سی سکھی وسدیاں تے پئی دھاڑ غم دی
عاجز جان ضعیف نحیف اُتے ڈھٹھی آئی کے پوٹ پہاڑ غم دی
جاوے پیش نہ نال تقدیر ربی وئی سانگ کلیجڑے کاڑ غم دی
واری اُنہڑی تھنڈی سکھ داسی ملی تھنڈرے باجھ اجاڑ غم دی

ذ

زلزلہ تھنڈی موت سندا آیا وچ سارے خاندان بچی
مونہ تے ڈال رومال بے حال تیرے روندے درد لُٹے اخوان بچی
روندے ویکھ برکات شفقات بھائی طارق ترک کیتا پین کھان بچی
واری اُنہڑی کس تے پھول دے تیرے ہجر سندی داستان بچی

س

سامنے کعبے دے صحن اندر بی بی بی وچ سجدے دم تم ہوئے
کچھ زور ناہیں رب ڈاڈھڑے تے سیس پیش رضا دے خم ہوئے
بھاجڑ پئی ازغیب تھیں حرم اندر جتھے پیش اساڈڑے غم ہوئے
واری انہڑی بجپیرے میرے نی کتھے دفن ہوئیوں کتھے جم ہوئے

ش

شاد تے بامراد حاجی واپس گھراں نوں لے تشریف آئے
بھلے لوگ سچے ذوق شوق والے نیک پاک جوان ضعیف آئے
جیویں گئے گھراں وچوں خوشی خوشی تیویں واپسی نال تعریف آئے
واری انہڑی مہنڈڑا سنگ ترقا کیوں نہ نال میرے ہم ردیف آئے

ص

صحن اوہ حرم شریف والا میریاں اکھیاں تھیں ہوندا دُور ناہیں
ساہویں اکھیاں دے دے بیت ربی جسدے شان نوں پہنچدا طور ناہیں
کُریاں دے قربانی میں بچڑی دی کیتا ادب دے وچ قصور ناہیں
واری انہڑی حشر دے روز میلے ہوناں ہجر دا ول ناسور ناہیں

ض

ضرب لگی سینے وچ کاری دن رات بیٹھی کراں زاریاں دے
اس زخم دی ملے نہ مرہم کتوں رہی بھال میں ہٹ پاریاں دے
دے کوئی طیب لبیب ناہیں داروں موت دیاں درد بیماریاں دے
واری انہڑی میل محال تیرا راتیں جاندیاں وچ بیداریاں دے

ط

طبع شریف مزاج دلوں میری بچری نیک نہاد آہی
 ابا جان حضور دے وانگ ایہ بھی بچی دلاں دے وچ آباد آہی
 دانش عقل تمیز دے وچ پوری قدم رکھدی وچ ڈہاد آہی
 کھلا حیدری ہتھ سی دان داتی نال مال اولاد دے شاد آہی

ظ

ظرف عالی بھلے بھاگ والی صاحب شرم حضور زمانیاں دی
 شفقت وردی عاجزاں نال آہی مرہم دکھیاں درد رنجانیاں دی
 مظہر فضل تے مہر دی ذات جسدی عزت لُج سی کل شہانیاں دی
 واری انہری زندہ درگور ہو گئی رہی ہوش نہ پلنگ سرہانیاں دی

ع

عرب تے عجم دے وچ پئی اس موت دی کہا فریاد اللہ
 میری بچی شہید دی خبر سن کے روندے مرد نساء فریاد اللہ
 دساں کس تے کھول کے حال دل دا ہجر بُری بلا فریاد اللہ
 واری انہری جنت معلی وچ ملی قبر دی جا فریاد اللہ

غ

غم سارے خاندان تائیں ڈٹھی آخری وقت نہ ٹور تیری
 شفقات جمیل دے باجھ تیجا ناہا کول جتھے ہوئی گور تیری
 اسیں اپنے عقل دی گل کریے آہی ہتھ تقدیر دے ڈور تیری
 واری انہری پئی اڈیکدی آ سنجی کوٹھی جو وچ لاہور تیری

ف

فرقاں تیریاں وِچ بچی خاندان سارا سوگوار اتھے
بھائی جان برکات حسنا احمد لمعات طارق نے بے زار اتھے
کھلی راہ تکینڈڑی بھین تیری کد ہوگ آپا آونہار اتھے
خدمتگارناں تیریاں پچھدیاں نی تیرا حال میں توں بار بار اتھے

ق

قلب وِچ طلب ہمیش میرے وسیں اکھیاں دے نزدیک بچی
واپس مڑے گھر قافلے حاجیاں دے تیری اتھے ہے نت اڈیک بچی
ہوندے دینہ دے چن دے جگ سارا میریاں اکھیاں وِچ تاریک بچی
واری انبری میاں دماں اُتے رہسی بھار میرے قبر تیک بچی

ک

کرم نکھڑے بچیاں دے گئی والدہ حج توں مڑی کیوں نہ
جس روز دیاں اکھیاں ٹوٹیاں توں میری اکھ اس روز دی جڑی کیوں نہ
اس بُرے اوڑے جین کولوں مراں کھانیکے زہر دی پڑی کیوں نہ
واری انبری وِچ درگاہ ربی میری پئی منظور کیوں بھڑی کیوں نہ

ل

لبھدی پھراں انوار تیرے اکھیں روندیاں خون زبون بچی
دل دے درد دا کراں اظہار بیٹھی کر کے غماں دے شعر موزون بچی
گردش فلک دی پلک وِچ پلٹ دتا تختہ خوشی دا ہوئی محزون بچی
واری انبری وقت بدھپڑے دے ہوئے جان تے غم افزون بچی

م

مگدی مت دعا ہاں میں اللہ مالکا صبر اکرام ہووے
راضی ہاں میں تیری رضا اندر مینوں بخش رضا دا جام ہووے
قائم صبر دی ثابتی رکھ میری طبع خام میری پختہ کام ہووے
واری انہڑی کراں دعا بیٹھی تیرا خاتمہ خیر انجام ہووے

ن

نظر نہیں آوندی اوہ رونق جہڑی نال تیرے بی بی جان آہی
مٹھے سخن پیار دے نال بھائیاں کسے وقت نہ تلخ زبان آہی
نرم خو سادات دی زیبائی نبی پاک دے خلق دی کان آہی
واری انہڑی جیوندیاں مار گئی جیکر سچ کچھو میری جان آہی

و

واسطے رب دے گھت رہی آں اکوار جلالپور آ پچی
حضرت صاحب دے شہر شریف اندر تشریف شریف فرما پچی
دلریش دُکھ پیش درویش سارے بیٹھے رب دی من رضا پچی
واری انہڑی تاپ وچھوڑیاں دا جسدی کتوں نہ ملے دوا پچی

ہ

ہک ایہ دے وچ سک میرے ظاہر زندگی وچ محال دے
کراں زاریاں بے شماریاں میں کون صبر دی واگ سنبھال دے
اٹھے پہر خیال دے وچ میرے تیرا بچیے پاک جمال دے
واری انہڑی وچ درگاہ ربی دم مارن دی نہیں مجال دے

۵

ہوڑ رہیاں ہتھ جوڑ رہیاں مرا سنگ دا ساتھ نہ رو بی بی
بی بی جان دے درد فراق اندر خون اکھیاں دا ناہیں چو بی بی
مینوں صبر دی کرن تلقین سبھے راضی اُپر رضا دے ہو بی بی
واری آنہڑی باجھ ضیا تیرے کتے دے نہ جگ تے لو بی بی

الف

اللہ سائیں تیری قبر اُتے بھیجے رحمتاں بے حساب پچی
درجہ پا شہید دا ہوویوں زندہ ظاہر موت دا پا نقاب پچی
تیری درد فراق دی سانگ ہتھوں رو رو اکھیاں بھرے تالاب پچی
واری آنہڑی کراں دعا پاویں منظوریاں وچ جناب پچی

الف

الف اس فناہ دے گھاٹ اُتے ہونا گزر امیر فقیر دا جی
ہووے شاہ یا ہووے گدا کوئی ہونا ہدف اس موت دے تیر دا جی
کل نفس ذائقۃ الموت اندر مطلب واضح ربّ قدیر دا جی
واری آنہڑی نزع آسان ہووے مثل آکھدے وقت اخیر دا جی

لا

لے لے تھنڈا نام روواں ہر آن حیران شہید پچی
ورلی ہووسی وچ جہان سارے تیرے جیہی کوئی روح سعید پچی
نبی پاک دی پاک زمیں وچوں لیا تھنڈا درد خرید پچی
واری آنہڑی جگر ضعیف اُتے کھادی ہجر دی ضرب شدید پچی

ی

یاد تیری وِج جان میری رخصت اس جہان توں ہو جاسی
تیرے ہجر کولوں میرا جگر زخمی اس زخم اُتے مرہم کون لاسی
جتھے موت دے قدم شریف آئے کون کہے اوہ لوک نے سکھ واسی
واری اُبڑی من رضا رب دی بیٹھی خبر ضیا دی کون لاسی
لا الہ الا اللہ محمد رسول اللہ



☆ ”وصال امیر حزب اللہ (قلمی)“۔ صفحہ 59 تا 71۔

☆ حاشیہ از شاعر:

”تاریخ وفات جناب صاحبزادی صاحبہ سیدہ بی بی ضیا رحمتہ اللہ
علیہا ہمشیرہ سید شقائق احمد میجر جنرل، جلاپور شریف۔ 19 ذی
الحجہ بمقام مکہ شریف 1400ھ بمطابق 29 اکتوبر 1980ء۔
دفن بہ پہلو سیدۃ النساء خدیجہ الکبریٰ رضی اللہ تعالیٰ عنہا۔ از بندہ
میاں محمد شفیع اختر ڈھانگروی۔ 11 فروری 1981ء۔“

.....

[سی حرفی نمبر 27]

بروفات حسرت آیات محمد سلیم ولد محمد بشیر (بڑا گواہ) (1)



الف

اس انسان تے رب سچے کیڈے کرم تے فضل احسان کیتے
روح پھوک کے خاک دے وِچ پُتلے عقل علم تے فہم دے دان کیتے
نظر گوش عطا کر ہوش بخشی نفس ناطقہ قول زبان کیتے
محمد شفیع ہک موت نوں رکھ پاسے ہور مرحلے سب آسان کیتے

الف

اس جہان وِچ سدا لئی صرف بادشاہی اللہ پاک دی اے
رب جی قیوم قدیم قادر اوہدے ہتھ وِچ دُور افلاک دی اے
سورج چن تارے اوہدے اُمر اندر جتھے پہنچ نہ فکر چالاک دی اے
محمد شفیع واحد لاشریک اللہ بندہ جان عاجز مشیت خاک دی اے

الف

اللہ اللہ دنیا جان گُوڑی اتھے کُوڑ دے محل اُसार ناہیں
گنپوں رُجھ اِس بھرے بازار اندر دُنیا داریاں دے بنجھ بھار ناہیں
اوڑک کوچ کر جاوناں اِس دیسوں اِس زندگی دا اعتبار ناہیں
محمد شفیع ہے فعل مختار بندہ اپر موت اُتے اختیار ناہیں

الف

اللہ اللہ فریاد اللہ شلا مَرے نہ کوئی جوان لوکو
پئی خبر سلیم دے مرگ سندی ڈھٹھی پوٹ پہاڑ سر آن لوکو
مندا روگ رنڈپے دی زندگی دا نہ کوئی ہووے یتیم حیران لوکو
محمد شفیع بچہ میری بچری دا پیسی نیک نہاد انسان لوکو

الف

اس سلیم دیاں کے گلاں ہمہ صفت موصوف عنوان آہا
سوہنی ٹور جنیوں پاوندے مور پایل بھریا خوبیاں نال جوان آہا
مٹھا بول تے قول دا مرد پکا مٹھی طبع تے شیریں زبان آہا
محمد شفیع میاں کہتا جس روشن نام اپنا تے خاندان آہا

الف

اللہ اللہ فریاد اللہ اوہدی زندگی تاں اتھوں تیک آہی
اوہدی عقل نالے ہنرمندی سندی پئی دھم تاں دُور نزدیک آہی
پئی شام سلیم نہ ہويا واپس گھر والیاں سخت اڈیک آہی
ناہی خبر جے کھوہ وِچ لہن والی ملک الموت دی خاص تحریک آہی

الف

ازل تھیں بخت کرخت کھوٹے آہے اساں غریب نمائیاں دے
دارموت دی گتر⁽²⁾ داکھوہ بنیا موت آوندی نال بہانیاں دے
ہوت موت دے بنھ لے گئے پنوں سنجی تیج تھیں پیڑ پلاناں دے
محمد شفیع تقدیر دا تیر کاری بیٹھا آن کے وِچ نشانیاں دے

الف

آن آ پی از غیب وچوں اچن چیت ایہ سٹ سلیم تیری
گئی صبر دا رابطہ کٹ میرا میریا سوہنیا موت غنیم تیری
میری خوشی دا باغ برباد ہويا جھلی موت دی باد حریم تیری
محمد شفیع نہ بھلسی عمر ساری مٹھی طبع سلیم حلیم تیری

ب

بے دیا پیاریا بچیا او بھیناں ڈاڈھیاں درد وراگیاں نی
ڈونگھے موت دے پے کے وہن رہڑیوں ناہیں ستیاں ہمتاں جاگیاں نی
پائے اجل نے عقل تے کہے پردے ہوشاں دُور میتھوں کتے بھاگیاں نی
محمد شفیع کے کسے نوں دوس دیناں آہیاں قسمتیاں مڈھوں ابھاگیاں نی

ت

ترت اوہ ہو بے سُر ت گیا جا کے موت دے کھوہ وچ روح تیرا
ہائے کدوں دا کھلا اڈیکدا سی افضل خان⁽³⁾ سندا خالی کھوہ تیرا
ہتھیں اپنے موت دی گیس چھڈی گیا عقل دا بھج سبُو تیرا
محمد شفیع نہ عقل دی پیش گئی کھڑیا موت نے روح دھرو تیرا

ث

ثابتی رہی نہ مول ثابت جتھے موت قہاریاں پاوندی اے
غالب حکم تقدیر دا ہر گلوں اتھے کسے دی پیش نہ آوندی اے
تخت ڈولیا رضا شاہ پہلوی دا فرح چھوڑ ایران سدھاوندی اے
محمد شفیع محرم دا چن چڑھیا ساہویں سانگ کلیجزا کھاوندی اے

ج

جھلی نہ جاوندی جھیل تیری سوہنی ڈیل ڈولی اللہ پاک تیری
سوہنا قد تے بُوڑا خد تیرا صورت خوب آہی سیرت پاک تیری
لکھت پیشانی اوڑک پیش آنی گل بات آہی ٹھیک ٹھاک تیری
گیا نکل وجود تھیں روح تیرا پی ویکھنی خاک مغاک تیری

ح

حال کیہ پچھنا ایں ماسیاں دا ہکلی کونج وانگوں کرلا رہیاں
بھیناں سکیاں تہنڈڑی امبڑی دیاں رو رو اپنا حال گُما رہیاں
منجی پئے سندا پیاں چمن مَتھا رَوون زار تے گھول گھما رہیاں
محمد شفیع کجھ وِس نہ ماسیاں دے ہوکے بھردیاں نیر وہا رہیاں

خ

خبر سلیم دی موت والی سُن دے سار جگ پے کہا گئی
سنگی موت دے زہر دی قہر والی لوں لوں اندر گویا دھا گئی
ڈین موت دی میرے سلیم سندا ہائے ڈچھ کلیجڑا کھا گئی
محمد شفیع نہ اکیوں نیر چکے تقدیر انہیریاں پا گئی

د

دُکھ دُکھ میتھوں سَکھ چکے اسیں مَر مَکے میریا سیمیا⁽⁴⁾ او
اٹھے پہر رواں ہنجوں خون چوواں بھر بھر لپ چکے میریا سیمیا او
کتھے نس گئیوں نہ توں دس گئیوں کوئی پتے پکے میریا سیمیا او
محمد شفیع میاں تقدیر ربی تیرے پتے لکے میریا سیمیا او

د

دلوں نہ لہے تصویر تیری میرا لاڈلا بدر منیر بچہ
گئی ورت تقدیر تقدیر ربی لگا وچ کلیجڑے تیر بچہ
کوئی ہونی نوں ہوڑ نہ سکدا اے ہونی ہوئی جو لوح تحریر بچہ
محمد شفیع سر آن پہاڑ ڈھٹھا بُرے حال ہے آج بشیر⁽⁵⁾ بچہ

د

دلاں دے وچ ایہ وسدا سی ہمہ صفت سی ایہ موصوف بچہ
میرے چن جیہے بدر منیر تائیں ہائے کھا گئی موت کُوف بچہ
تھوڑی عمر وچ جان پہچان ایڈی دُور دُور توڑیں سی معروف بچہ
بردبار حلیم سلیم میرا واقف کار ہر دا فیلُوف بچہ

د

روندیاں رہے گی عمر ساری تیری امہڑی درد رسید بچہ
روندی زار مختار سلطان خاور⁽⁶⁾ پوہتی جہاں نوں ضرب شدید بچہ
بھیناں بکلیاں روندیاں مار چیکاں ہوویں جہاں تھیں دُور بعید بچہ
اصغر نے احسان عرفان⁽⁷⁾ سندی گم خوشی دی ہوئی کلید بچہ

د

رب وَلوں چلے وچ چھاتی جھلے تیر بشیر، سلیم تیرے
جہاں دلاں تے آن کے پائی لوٹی وٹے گئے نہ موت غنیم تیرے
اکھر لوح محفوظ دے کون میٹے میرے نیک نہاد فہیم تیرے
محمد شفیع میاں بندہ ہتھ بدھے آکھے امر تمام تسلیم تیرے

ر

روندیاں ماسیاں پھپھیاں نی سینے جہاں کر کے توں چھیک چلیوں
دل کسے دا تَدھ دکھایا نہ اس دنیا توں پاک تے نیک چلیوں
دُکھ امبری تے پھپھی سَید⁽⁸⁾ تائیں دے کے عمر دا سوز تے سیک چلیوں
بھینیاں روندیاں چھوڑ کے گور پیوں بھن باپ دلگیر دی ٹیک چلیوں

ز

زور نہ نال تقدیر چلے قدرت اپنی کھیڈ دکھاوندی اے
بادشاہاں نوں پکڑ کے قید کردی پنن والڑے تحت بہاوندی اے
مَرے کونت تے بحر ویایاں دے سارے مان تران گواوندی اے
محمد شفیع عزیز: سلیم جیہاں سندا داغ کلیجڑے لاوندی اے

س

سنگ تروڑ کے دوستاں دے کہڑے دیس سلیم تیار ہوویوں
نہ کوئی سونپ سپونیاں کیتیاں نی گھوڑے اجل دے تے اسوار ہوویوں
سُجی سیج کرلانڈی چھوڑ سسی پنوں ہار جا تھل مزار ہوویوں
محمد شفیع کہی موت دی دھاڑ پئی گوشہ گیر جا وِچ مزار ہوویوں

ش

شوہ دریا دے وِچ بیڑا وِچ آب چناب غرقاب ہويا
سکھ واسڑے خواب خیال ہوئے جگ جیونا سخت عذات ہويا
ساڈی اکھیاں تھیں گیوں ہو اوہلے تیری موت دا وِچ حجاب ہويا
محمد شفیع میاں ہوسن حشر میلے سینہ ہجر تھیں بھج کباب ہويا

ص

صبر دی کرو تلقین ناہیں آساں دُکھیاں نوں ذرا رَوَن دیو
لگی ساگ کلیجڑے وچ ڈاڈھی خون اُکھیاں دے راہوں پُون دیو
جہڑا عمر دیاں گیا پا وِتھوں گاؤن اوہڈے ہجر دے گاؤن دیو
محمد شفیع کیہ صبر دی مَت دینی چکی غماں والی ساناں جھون دیو

ص

صاف انصاف دی بات ایہو بندہ موت دے بہت قریب ہے جی
گھوڑا موت دا کوئی نہ روک سکے ظاہر موت دی شکل مہیب ہے جی
داروں موت دا ہٹ پساریاں تے اج تک لبھا نہ کوئی طبیب ہے جی
محمد شفیع ایہ ذائقہ موت والا چکھیا رب دے خاص حبیب ہے جی

ض

ضرب کاری سینے موت ماری ہائے میں بخت ہاری فریاد اللہ
تیتھوں لکھ واری میں ایہ جان واری مَر دی تیری واری فریاد اللہ
دِنے کراں زاری روواں رین ساری اکھیں نیر جاری فریاد اللہ
محمد شفیع سلیم مل ہک واری پھیرا پا واری فریاد اللہ

ط

طرف تِساڈیوں کدوں ہوسی مینوں شرف پیغام سلیم تیرا
تیرے دید سعید دی کدوں ہوسی مینوں عید انعام سلیم تیرا
طبع خام میری شادکام ہوسی پیساں پور کے جام سلیم تیرا
محمد شفیع میاں جاں تک جیوساں میں رہی لبّاں تے نام سلیم تیرا

ظ

ظاہری اس جہان اُتوں پردہ موت دا تان جوان سُتا
ہیبت اس جوان دی کیہ آکھاں گویا شیر کوئی وِچ میدان سُتا
مہلت ملی نہ سخن الاونے دی لیکے دل وِچ کئی ارمان سُتا
ملک الموت نے پھل تروڑ لئے رہیا باغ اندر باغبان سُتا

ع

علم علیم دے وِچ آہی دیسی جان سلیم ایہ جا کتھے
کتھوں بنھ کے موت نے ٹور آندا دَم تَم اوہدے ہوئے آ کتھے
اوہدی عقل تے سوچ تے پیا پردہ بکھے دیوے تقدیر تھیں آ کتھے
لکھی لوح محفوظ دی پیش آئی بھلا جائے ایہ قدر قضا کتھے

غ

غم تیرا میرے دَم اُتے دَم دَم ہے یاد سلیم تیری
کدوں باغ وجود دے وِچ میرے عطر بیز اوہ ہوگ نسیم تیری
ہائے نکدی رہے گی راہ تیرے فرح ناز پروین⁽⁹⁾ یتیم تیری
محمد شفیع پرناڑے روندڑی اے قلب زار زرینہ⁽¹⁰⁾ دو نیم تیری

ف

فیض، فیاض، ریاض⁽¹¹⁾ دے سنگ او سلیم نہ چنگیاں چاہیاں نی
ایہ تاں رہے اُڈیک دے وِچ بیٹھے مُڑ کے ابے نہ وٹیاں واہیاں نی
اظہر، مظہر تے بدر سہیل⁽¹²⁾ روندے حرصاں نانکیاں دلاں توں لاہیاں نی
محمد شفیع ممتاز، اقبال خالد⁽¹³⁾ سنگ ورتیاں بے پرواہیاں نی

ف

فاتحہ خیر الان کارن آئے دور نزدیک تھیں یار آئے
پدھری ہنی دھمکار تے علی پوروں ہور گرد نواحوں بسیار آئے
غازیوٹ گھنیاں کسپال سیری گتر کوئی نہ انت شمار آئے
پوٹھ ڈھانگری بھیٹ کدلوٹ مار جاہلی تیک سارے رشتہ دار آئے

ق

قدر تیرا اسماں ساریاں نوں تیرے جان دے باجھ معلوم ہويا
بندہ کون جبرہا تیرا نام سُن کے نہیں زار رویا مغموم ہويا
تیری زندگی تاں اتھوں تیک آہی کھایا تدھ جو رزق مقسوم ہويا
محمد شفیع میاں کٹوڑی مالکی دا معلوم ہے اج مفہوم ہويا

ک

کس تے جا فریاد کواں میرے لئی تاں کل جہان ڈبا
میری خوشی دا غرق جہاز ہويا وچ بحر عمیق عمان ڈبا
بیٹھا وانگ یعقوب دے کراں زاری جس دا کھوہ وچ ماہ کنعان ڈبا
محمد شفیع محرم دا چن چڑھیا سر شام بر فلک کیوان ڈبا

ک

کرم ہارے اسیں گئے مارے پکی فصل آ گڑے برباد کیتی
سُنی گئی نہ وچ درگاہ ربی توڑے عاجزاں پئی فریاد کیتی
جانے رب جے کس قصور پچھے ساڈے حال تے چرخ بیداد کیتی
محمد شفیع جاں سرے تے پئی اوکڑ ناہیں کسے نہ آ امداد کیتی

ک

کون جو نہیں نمناک اِتھے غمناک اِتھے پروار سارا
چھتی ڈھوکاں جہڑیاں بڑے گواہ دیاں در بند ہے بند بازار سارا
گیوں سٹ غریب احسان اُتے سنے باپ توں اپنا بھار سارا
محمد شفیع اُج بھج کباب ہويا کیونکر کراں میں غم اظہار سارا

ل

لستا نیاں ہے رو دینا ڈاڈھے نال نہ کسے دی واہ چلے
چارہ باجھ تسلیم نہ ہور کوئی بندہ سو جو من رضا چلے
اوہدے امر بن ہلدا نہیں پتر اوہدے حکم بن نہیں ہوا چلے
اوہدے حکم بن حکم نہ حاکماں دا وِج دفتر اں بے خطا چلے
اوہدے امر بن چلن انہیریاں نہیں تیز لہر نہ وِج دریا چلے
پینکھی اُڈدے وِج ہوا ویکھو اوہدا حکم فی جو السما چلے
اوہدی کنہ نوں عقل نہ پا سکے دانشوری اُڈ وانگ ہوا چلے
سورج دُبے تے فر طلوع ہووے ایہو سلسلہ صبح و مَسا چلے
اُس ماؤ دی زندگی، زندگی نہیں جس دا پُت قہاریاں پا چلے
اوہدا جین بھی بسر خوار ہووے بازو جس دا بھن بھرا چلے
جس باپ دا پُت کھڑاپ جاوے دوہری کمر اوہ ہو دو تا چلے
جہڑا بچہ یتیمیاں وِج ہووے داخل اوہ تاں اپنی خوشی مٹا چلے
واجے کوچ دے گئے وجا اوہ تاں تحت جہاں دا وِج ہوا چلے
جدوں موت آ بو ہے تے دے دستک نال کوئی نہ بھین بھرا چلے
ہائے جہاں دے نال سی پیار ساڈا اوہ تاں اساں نوں کنڈ ولا چلے

بچ دوستی دا گیا بچ سارا اسیوں اکیوں نہر مکا چلے
 چھڈ انگ تے ساک سلنگ سارے ساڈے دیس وچوں واگاں چا چلے
 کوڑا مان ہے اس حیاتری دا سانوں ایہ سلیم فرما چلے
 فرح واسطے قرح دی گھڑی آئی لو جس دے خاک سما چلے
 دکھی درد زرینہ دا کے جیناں جس دی عمر دی سانجھ مکا چلے

م

مہر بلب کیوں بولدا نہیں چادر تان سٹا جگر بند میرا
 ہائے ہاٹھ فراق دے پیٹھ آیا سوہنا بدر ثانی بالا چند میرا
 ٹریا توڑ کے ساک پیوند سارے پیا پنہ لمیں فرزند میرا
 محمد شفیع کدوں آونہار ہوئی جس دے ہجر دکھے بند بند میرا

ن

نظر نہیں آوندا کسے پاسے میں تاں ڈھونڈ رہیاں وچ بیلیاں دے
 اوہدے سل فراق دے وچ سینے جھڑا سو بھدا سی وچ میلیاں دے
 ویراں نال بھرانواں دی کنڈ بھاری پئے شہر نہ کدے اکیلیاں دے
 سوہنا سو بھدا سی وچ مجلساں دے جیویں باغ اندر رکھ کیلیاں دے

ن

نہیں کوئی ہور سلیم ورگا سارے جگ وچ با اخلاق بچہ
 نظر پاک بے داغ شباب جس دا سرو قد بالا سیم ساق بچہ
 لکھی گئی اوہ لوح محفوظ اُتے روزی رزق جو وچ میثاق بچہ
 کھانا تیر سی جگر بشیر جس دا کیتا حال فقیر فراق بچہ

ن

نظر نہ آؤں عمر ساری رہن حشر توڑیں انتظار اکھیں
اوہ تال اکھیاں خاک سپرد ہوئیاں جہاں لئی ایہ رہن بیدار اکھیں
آؤں یاد جاں دلاں دے یار جانی برن ابر بہار دے ہار اکھیں
محمد شفیع نہ ملے دوا کدھروں اٹھے پہر ایہ رہن بیمار اکھیں

و

ورج رہیاں اکھیں روندیاں نوں اکھیں رون باجھوں ہائے رہندیاں نہیں
چاون بھار بھارے بارے درد مارے چھٹی پھل سندی جہڑیاں سہندیاں نہیں
اکھیں خون پرناڑے وہن ہتھیں رنگ رتڑے لاندیاں مہندیاں نہیں
محمد شفیع خموش نہ ہوش قائم مونہوں بول کے حال نوں کہندیاں نہیں

و

ورہے چھ ماہیاں گذر جاسن سبیاں سنجیاں چھوڑ وچ گور پے
ستے چُپ چپیتڑے مار بکل وچ گور تکو کس طور پے
اجے پھٹ حمید⁽¹⁴⁾ دا مولیا نہیں ہائے زخم اُتے زخم ہوو پے
تکو صبر حاجی سردار⁽¹⁵⁾ سندا جسوں موت دے آن کے چور پے

و

ورہے چھ ماہیاں گذر جاسن گنتی کردیاں دے جاسن سال اتھ
اوہناں سوہنیاں تے من مونہیاں دا ہونا پاک دیدار محال اتھ
ایہو اس جہاں دی چال مڈھوں ہوندى درد دی رہی سمہال اتھ
محمد شفیع ایہ گھاٹ فناہ دا اے ڈٹھا نہیں کوئی خوشحال اتھ

۵

ہار گیا بازی صبر والی برخوردار سلیم دا باپ لوکو
کرے اثر نہ پڑی طبیب والی چڑھیا درد فراق دا تاپ لوکو
ایسی سمجھ نہ پوے تدبیر کوئی ہووے نال سلیم ملاپ لوکو
محمد شفیع وجود اس ہجر پاروں سک سک ہويا جیوکر ٹاپ لوکو

لا

لا علاج ایہ مرض گجھی ایہدی سمجھ نہ پئی سیانیاں نوں
آکھے دست ریکھا کجھ ہور میری عقل چھوڑ کے گئی ٹکانیاں نوں
سکھی سکھ دے نیندرے سون راتیں رکھ سراں دے پٹھ سرہانیاں نوں
محمد شفیع میاں نہ کوئی ٹال سکے رب جی قیوم دیاں بھانیاں نوں

لا

لا فناہ دے گھاٹ اُتے ڈیرا آن کے غافلا ماریا ای
گیوں رجھ سنار دے لوبھ اندر کیہا حرص دا جال کھلاریا ای
تیرے ساتھ دے ساتھ لدا گئے دلوں موت دا خوف اتاریا ای
محمد شفیع ہٹ غفلتوں اکھیاں توں کاهنوں رب رسول وساریا ای

الف

اس سراں وچ آئی کے تے لکھاں خاک دے وچ سما گئے
اسفندیار جمشید تے کینخرو اتھے اپنا حکم چلا گئے
بابر اپنی شان دکھا گیا شیر شاہ جیسے قلعے پوا گئے
محمد شفیع پر موت جاں پائی پھیری پُپ چاپ اتھوں ڈیرے چا گئے

ی

یاد تیری قبر تیک مینوں نہیں بھلنی ماہ افروز بچہ!
ساہویں سانگ بن کے سینہ سلدی اے تیر یاد پیاری روز روز بچہ
ترے ہجر دے جگر تھیں پار ہوندے نالے درد انگیز دلدوز بچہ
محمد شفیع میاں میرے وچ سینے تیرے پاک پیار دا سوز بچہ

ی

یاد سلیم دی وچ میں تاں درد اپنے دا اظہار کیتا
چھیڑ اپنے درد دی تار میں تاں بھجا ٹٹا ایہ شعر تیار کیتا
سادے طرز وچ عرض اظہار غم دا مشکل قافیہ نہیں اختیار کیتا
محمد شفیع اوہ نیک نصیب جس نے کلمے پاک دے نال پیار کیتا

ی

یارہویں اج محرموں سی جدوں ایہ تصنیف تمام ہوئی
میری عمر دا سال چھہترواں سی گل درد دی جدوں ارقام ہوئی
ویہ ست ستائی ستمبروں سی آسیں بارہویں تاں اُتوں شام ہوئی
محمد شفیع وساہ کوئی ساہ دا نہیں کلمے پاک اُتے اختتام ہوئی

إِنَّا لِلّٰهِ وَإِنَّا إِلَيْهِ رَاجِعُونَ



☆ ”سی حرفی محمد سلیم ولد محمد بشیر بڑا گواہ (قلمی)“۔ صفحہ 1 تا 22۔

☆ حاشیاء از شاعر:

”پاسخا طر عزیزم محمد بشیر ولد حاجی سردار خاں بڑا گواہ۔ بندہ

نیاز مند میاں محمد شفیع اختر ڈھانگروی چشتی حیدری تاریخ تحریر 15

اکتوبر 1985ء“

- 1- میاں محمد شفیع اختر ڈھانگروی دانوا سا
- 2- بھیٹ (جہلم) دے نزدیک اک گاؤں۔
- 3- افضل خان موضع گتر داوسنیک، جس دے کھوہ اندر سلیم دی موت واقع ہوئی۔
- 4- میاں محمد شفیع ہو ریں محمد سلیم نوں پیار نال کہندے سن۔
- 5- محمد سلیم دے والد۔
- 6- محمد سلیم دیاں بھیناں۔ میاں محمد شفیع دیاں نواسیاں۔
- 7- محمد سلیم دے بھائی۔
- 8- محمد سلیم دی پھوپھی۔
- 9- محمد سلیم دی بیٹی۔
- 10- محمد سلیم دی بیوہ۔
- 11- فیض محمد سلیم دے خالو۔ فیاض اور ریاض پھوپھی زاد۔
- 12- محمد سلیم دے ماموں زاد۔ میاں محمد شفیع دے پوترے۔
- 13- محمد سلیم دے بہنوئی۔
- 14- محمد سلیم دے چاچا۔
- 15- محمد سلیم دے دادا۔

حصہ سوم



فرہنگ



فرہنگ

﴿.....الف ممدودہ: آ.....﴾

آزار:	دُکھ، مرض، تکلیف، سختی، بکھیرا۔
آرے:	۱۔ آرا کی جمع، لکڑی کا ٹٹے یا چیرنے کا اوزار ۲۔ کلمہ ایجاب، ہاں
آس دھرواس:	دھیرج کی امید، سہارا، تسلی۔
آفاق:	آسمان کا کنارہ جہاں زمین و آسمان ملے ہوئے دکھائی دیتے ہیں۔ مراد زمین
وآسمان۔	

آفرین:	مرحبا، شاباش، واہ واہ۔ تحسین کے موقع پر مستعمل۔
آونہار:	آنے والے، جس کی آمد کا انتظار ہو۔

﴿.....الف مقصورہ: ا.....﴾

ابھالیاں:	بد نصیب، بد قسمت۔
اٹھے پہر:	اٹھوں پہر، کنایہ ہر وقت۔
اجرام فلکی:	سورج، چاند، ستارے، سیارے وغیرہ۔
اجل دامیاں:	اجل دامہ سے ہے۔ یعنی موت کا نقارہ۔
اجوڑ:	جوڑ کا متضاد۔ ناموافق، نامناسب، بے ربط، بے تعلق۔
اجوڑی:	آج کی (اجوکی)۔
اچڑے اچڑا:	بلند، اونچا، گھر میں کوئی اونچی جگہ جہاں سے گاؤں یا راستے کے
	آنے جانے والے لوگوں کو دیکھا جاسکے۔ دیہاتوں میں تنور والی
	جگہ کو بھی اچڑا کہا جاتا ہے۔
اجن چیت:	اچانک، فوراً، یکدم، عالم بے خبری میں۔
احراق:	حدت، شدت حرارت۔
اختصار:	مختصر کرنا۔
اُھین:	۱۔ فرمانبردار، تابع، ماتحت، مطیع ۲۔ رعایا، ملازم، مسکین محتاج
اڈول:	نڈولنے والا، مضبوط، مستحکم، ثابت قدم۔
اڈیک:	آس، امید، انتظار۔


- اربع عناصر: قدیم یونانی حکما کے نزدیک ناقابلِ تحلیل چار بے انتہ تھے۔ یعنی: مٹی، پانی، ہوا، آگ۔
- ارجمند: قدروقیمت والا، باوقار، عالی مرتبہ۔
- ارزائیاں: بہتات، کثرت۔
- آرینی: دکھا مجھے (حضرت موسیٰؑ نے کوہ طور پر درخواست کی تھی: رَبِّ ارِنِی۔ الہی مجھے اپنا جلوہ دکھا۔ جواب ملا: اِن تَرَانِی۔ تو مجھے نہ دیکھ سکے گا۔
- ارژنگ: چین کے مشہور مصورمانی کی شاہکار تصاویر کا مرقع۔
- ارژد بازار: اُردو، ماش (غلہ) کا بازار۔
- ارژدھام: بھیڑ، مجمع۔
- اُسارنار اُسارنی آں: تعمیر کرنا، بلند کرنا۔
- اساں توں چت پر چتیا ای: ہم سے دھیان یا توجہ ہٹا لی ہے۔
- اسواری: سواری۔
- اُستیں: دیسی رہندی مہینے کا نام۔
- اشنان: غصیل کرنا، نہانا۔
- اشنائی: آشنائی، دوستی، تعلق، محبت، جان پہچان۔
- اصیل: خالص نسل کا، شریف، عالی خاندان۔
- اطلس: ایک قسم کا ریشمی کپڑا۔
- اعناق: علق کی جمع۔ گردنیں۔
- اغیار: غیر کی جمع۔
- اکاس: آکاش، آسمان۔
- اکسیر: وہ مرکب جس کے متعلق کہا جاتا ہے کہ اس سے تائبے سونے اور راتلگے کو چاندی بنایا جا
- سکتا ہے، رسا، کیمیا۔
- اکناف: کنف کی جمع، اطراف، سمیتیں، کنارے، طرفیں۔
- اکھ: ۱۔ آنکھ، ۲۔ پاس، مروت، لحاظ۔
- اُلارنی آں: لہراتی ہوں (اُلارنا: لہراتا)۔
- الامزے رالاسے: الزام، بدنامی، شکوے، شکایتیں۔

- الست: کیا نہیں ہوں میں؟ الست و بر بکم (کیا میں تمہارا رب نہیں ہوں؟)
کی طرف اشارہ ہے۔ اللہ تعالیٰ نے ارواح کو پیدا کرنے کے بعد ان سے یہ سوال کیا تھا۔
- الفتان: الفتیں، مجتہدیں۔
القی: کفی، بغیر آستین کا گریہ، فقیرانہ لباس۔
- الکھ: سادھوؤں کا ایک فرقہ، مجازاً نیک لوگ۔
- الھے: کچے، نا پختہ۔
- اُنْب (اُنْب): آم۔
- اُنْجول: سادہ مزاج، نا تجربہ کار، نا واقف۔
- انفصال: جدا ہونا، الگ ہونا، علیحدگی۔
- انگ: ا۔ بدن، جسم، ۲۔ رشتہ۔
- اور تراو تری: بے اولاد، فضول، مد مزاج، دقیق، مشکل۔
- اُوج: بلندی، برتری۔
- اوجھڑ: صدمہ، چوٹ۔
- اُوڑ: مقام، حد، انتہا، گہرائی۔
- اُوڑک: آخر، آخر کار۔
- اُوکڑ: مشکل، مصیبت۔
- اوغنہاری راو گنہار: گنہگار، پاپی، مجرم۔
- اُوڑی: انوکھی، بڑی، عجیب۔
- اونسیاں: فال، قیافہ آرائیاں، زمین پر لکیریں کھینچ کر یا تیلیوں کو لپیٹ کر کھولنے اور کسی عزیز کی آمد کی فال نکالنے کا طریقہ۔
- اوبلا: پردہ، پوشیدگی۔
- ایاغ: پیالہ، جام، ساغر۔
- ایانے: نادان، احمق، موڑکھ۔
- ایزاد: اضافہ۔
- ایقان: یقین، عقیدہ۔
- ایمان بالغیب: خدائے تعالیٰ، کتب آسمانی، انبیاء و رسل، جنت و دوزخ اور جزاء و سزا وغیرہ پر یقین رکھنا۔

﴿.....ب.....﴾

خراج یا محصول ادا کرنے والا۔ کنایہ محکوم۔	باج گزار:
دروازہ۔	باب:
زخم، چوٹ۔	باجھڑ:
۱۔ بادل ۲۔ حیثیت	بادر:
جنگل، بیابان۔	بار:
بہت تیز اور عیار باز (شکار، عقاب)۔ شکار کا ماہر باز۔	باز طرار:
بالوں کی مینڈھیاں بنانا۔	بال گندائی:
ناقابل سمجھ، انسانی عقل یا سمجھ سے باہر۔	بالا تر از فہم:
ماؤ نو، ہلال، نیا چاند۔	بالا چند:
چھت کے اوپر کا حصہ، بالا خانہ، کوٹھا۔	بام:
بانگی، خوبصورت، الیللی، وضع دار۔	بانکڑی:
بدحواس، نادان، عاشق۔	بانوری:
بولے، کہے۔ پوٹھو ہاری میں مستعمل۔ (بہڑاگلاں تیریاں باوے جی)	باوے:
میرا بازو پکڑنا، المدد۔	ہاہوڑیں:
ککیر، ایک خاردار درخت۔	بول:
بہت زیادہ، متعدد بار۔	بہتر:
علم یا علوم کا سمندر۔ بہت بڑا عالم۔	بحر العلوم:
وہ سمندر جس میں بہت سے طوفان اٹھتے ہوں۔	بحر موج:
نصیبہ ور، کامیاب، اقبال مند۔	بختیار:
روشن کرنے والا، تاریکیوں میں نور پھیلانے والا چاند۔	بدر منیر:
بدشگونیاں، نحوست۔	بدفالیاں:
آسمان کی بلندیوں تک۔	براؤچ سما:
قسمت، بھاگ، حصہ، فرمان، حکمنامہ۔	برات:
بڑھاپا۔	بڑھپڑے / بڑھپڑا:
برداشت کرنے والا، صابر، متمل۔	بردبار:
غلام، کنیریں، جنگی قیدی۔	بروے:
دیوانہ، پاگل۔	برڑ:

برق بار:	بجلیاں گراتی آنکھیں، شوخ آنکھیں۔
برق پاش:	بجلی گرانے والا۔
برق خاطف:	آنکھوں کو خیرہ کرنے والی روشنی، بہت تیز اور شعلہ ریز بجلی جو آنکھوں کو چکا چوند کر کے آنا فنا غائب ہو جائے۔
برور:	سرکندے کا پھول، سخت قسم کی ایک گھاس۔
برہوں / برہا:	ہجر، جدائی، فراق، فرقت۔
بُستان:	بوستان، باغ، چمن۔
بسترے گول کرنا:	فرا را اختیار کرنا، بھاگ جانا، چلے جانا۔
بلند اقبال:	خوش نصیب۔
بلند پروازیاں:	اعلیٰ خیال، بلند تنخیل۔
بندہ پروری:	احسان، عنایت، غلام کو پالنے کا عمل۔
بندی:	بانندی، خدمتگار، ملازمہ۔
ہتے:	کنارے۔
بو پڑا / بو پڑے:	خوبصورت، دلکش
بوڑر بوڑنا:	ڈوبنا۔
بوستان:	باغ، چمن۔
بول براز:	فضلہ، پاخانہ۔
بُو ہار بُو ہے:	دروازہ، در، چوکھٹ۔
پہاگ:	بلاول ٹھاٹھ کا ایک راگ جو آدھی رات کے وقت گایا جاتا ہے۔ اس کا مزاج پرسکون ہے۔
بہبود:	بھلائی، بہتری، فائدہ۔
بے:	دادی یا نانی (بے جی)۔
بے آب:	بے عزت، بدنام۔
بیداو:	ظلم و ستم، نا انصافی۔
بیرا بیرے:	گوشت کے ٹکڑے، بوٹیاں۔
بیراگ:	نفس کشی، ریاضت، جوگ، تیاگ، ایثار۔
بیلی:	دوست، محبوب۔
بیلے:	چراگاہ، دریائی جنگل۔



- بھاگ سو لکھنی: خوش نصیب، خوش قسمت۔
 بھال: تلاش، جستجو، تجسس، ٹوہ۔
 بھانے: خیال میں، رائے میں (دید مابھی داساڈے بھانے چوکر جام طہوری)۔
 بھاہ: آگ۔
 بھٹ: برہمنوں کا ایک فرقہ۔
 بھٹھ: آگ، آگ کی بھٹی۔
 بھجڈے (بھجنا): ۱۔ بھاگنا، دوڑنا، ۲۔ ٹوٹنا، توڑنا، وعدے سے مکر چانا۔
 بھروٹیاں بھروٹے: ابرو۔
 بھس: خاک، راکھ۔
 بھل گئی دی بھل معاف کر دے: گنہگار کی خطا معاف کر دو۔
 بھلہ ہار: بھولنے والا۔
 بھنسوالیاں: تسلیاں، بہلانا پھسلانا۔
 بھوچھن: دوپٹہ، اوڑھنی۔
 بھوری والا: بھورے رنگ کی کلمی والا۔
 بھوگر بھوگنا: سہنا، برداشت کرنا، جھیلنا۔
 بھوندڑی ساں: پھرتی تھی۔
 بھیراں بھیر: ایک قسم کا بجز، نقارہ (بھیروں ایک راگ کا نام ہے)۔
 بھیل: ہندوستان کی ایک قدیم نسل کے لوگ جو راجپوتانہ کے علاقے میں پائے جاتے ہیں۔



- پانچ: جھوٹ، بھید، اصلیت، گناہ۔
 پارا رار: اُدھر اور اُدھر۔ پار: اُس پار، اُرار: اس طرف۔
 پاڑ: سوراخ، شکاف، پھٹی ہوئی جگہ۔
 پاسے ماریاں جاوندی زین ساری: کروٹیں بدلتے ساری رات گزر جاتی ہے۔
 پاکباز: زاہد، پارسا۔
 پاک خیر: عالی نسب۔
 پاندھیاں پاندھا: چوٹی، نجوی، رمال۔
 پانکلاں پانکلاں: ناچ، مور کا ناچ۔

پولیا / پولنا:	۱۔ بغیر دانتوں کے چبانا، ۲۔ بولنا، کہنا۔
ہفت:	آبرو، عزت، ساکھ، نیک نامی، حیا، شرم، اعتبار، لاج۔
پٹھان:	لوہے کو بھٹی میں گرم کرنے کا عمل۔ آمیزش کرنا، چاشنی دینا، تمباکو وغیرہ کو مزید کڑوا کرنے کے لیے آک وغیرہ کے پتوں میں دفن کرنا تاکہ اس میں آک کا اثر سرایت کر جائے۔
چٹ:	حیثیت، استعداد، ہمت، طاقت، رسائی، مراد، اپروچ۔
پختہ کام:	آزمودہ کار، ماہر۔
پرتو / پرتوے:	پرتو، عکس۔
پرتی پال:	مزارع۔ کسی کی زمین پر کاشتکاری کرنے والے۔ غلام۔
پرنالڑے:	پرنالے (پرنالہ)، کوٹھے کے پانی کی نالی یا پانی کی دھار، پانی نکالنے کی نالی۔
پردار:	گھرانہ، خاندان۔
پرداروے:	پردانے۔
پریوں:	پنجایت، جرگہ، مجلس، ٹولی۔
پریت:	پیار، محبت۔
پریم:	پیار، محبت۔
پڑنج:	جھپٹ مارنا، جیسے شاخ سے پھول توڑتے ہیں یا پھول سیپتیاں اکھاڑ لیتے ہیں۔
پشت پناہ:	حمایتی، حامی، مددگار، معاون۔
پشور:	پشاور۔
پکاساں / پکاونا:	یاد کرنا، ورد کرنا۔
پگاہ:	تڑکا، سحر، صبح۔
پلنگ:	چیتا، ایک درندہ جس کے بدن پر سیاہ دھبے ہوتے ہیں۔
پلھنگ:	مسہری، بڑی چارپائی۔
ہُن دان:	بخشش، خیرات، خیر خیرات۔
ہُن کال:	وہ قحط جو بارش کی کثرت سے ہو۔
چٹھال:	حال پوچھنے والا۔
پندہ:	راستہ، فاصلہ، مسافت، سفر۔
پوٹ:	پہاڑ کی چوٹی، بوجھ، وزن دار چیز۔
پوہ پالے:	پوہ کے مہینے کی سردی۔ پوہ ایک ہندی مہینے کا نام۔

پہنچے:	پہنچے۔
پریت:	پریت، عشق، محبت۔
پیر وانی:	ہنگے پاؤں۔
پیشوا:	راہبر، راہنما۔
پھاتی:	پھنسی، پھنسی گئی، جکڑی گئی۔
پھاس:	پھنسنے کی حالت۔
پھاہی:	پھندا۔
پھٹیا:	زخمی کیا۔
پھلیل:	معطر تیل، خوشبو۔
پھو ہاریاں ہار:	نواروں کی طرح، نواروں کی مانند۔
پھو ہاڑے:	گندم، اناج یا بھوسے کے ڈھیر۔
تاب:	حوصلہ، ہمت، سکت۔
تائیں رتان:	سنتان، اولاد۔
تاہنگ رتا گھ:	انتظار، امید، آس۔
تائب:	توبہ کرنے والا۔
تبتی رترتوی:	ابھائی، بد نصیب۔
تج:	چھوڑنا، دستبردار ہو جانا، کنارہ کش ہو جانا۔
تخلیل:	کسی چیز میں شامل ہونا۔ محلول میں کسی چیز کا حل ہونا، آہستہ آہستہ ختم ہونا۔
تخصیص:	مخصوص کرنا، خاص کرنا۔
ثرت:	فورا، جلدی سے۔
تردید:	رو کرنا، جواب دینا۔
ترقیم:	لکھائی، نگارش۔
تس:	پاس، ضرورت۔
تصریحات:	تصریح کی جمع، توضیحات، تشریحات۔
تعظیم:	بزرگی، عظمت، احترام، وقعت۔
تفضیل:	ترجیح، فوقیت، فضیلت۔

تقصیر:	قصور۔
تقلید:	پیروی۔
تَم:	اختتام۔
تُمبنا:	تو منا، دُھنا، روئی کو دُھنا۔
تنبو:	خیمہ۔
تنویر:	نور، چمک، روشنی کرنا۔
تیاگ:	ترک، ترک تعلق، چھوڑنا، دست برداری، کنارہ کشی۔
	﴿.....تھ.....﴾
تھاؤ:	تھماں، جگہ
تھوڑ:	کمی۔
	﴿.....ٹ.....﴾
ٹنب:	چبھن، چھیڑ، ٹیس۔
ٹورنا:	بھیجنا، رخصت کرنا۔
ٹول:	ٹولا، گروہ۔
	﴿.....ٹھ.....﴾
ٹھاک:	روک، رکاوٹ، بندش۔
ٹھگی:	دھوکہ، فریب۔
ٹھوٹھے:	کشتول، کا سے، مٹھی کے برتن۔
ٹھیل:	دھکا لگانا، سرکانا، ایک جگہ سے دوسری جگہ لے جانا۔
	﴿.....ٹھ.....﴾
ثابتی:	ثابت قدمی، حوصلہ۔
ثبت:	کنڈہ کیا ہوا، تھری کیا ہوا، مندرج۔
	﴿.....ج.....﴾
جاتی:	سمجھی، خیال کی۔
جاچیا/جاچنا:	اندازہ لگانا، پرکھنا۔
جال/جالنی/جالنا:	برداشت کرنا، جھیلنا (جال دیتا بمعنی ساڑ دیتا)
جام زلال:	صاف اور تھری ہوئے پانی کا پیالہ۔
جامع ذات:	ایسی ذات جس میں تمام خوبیاں پائی جاتی ہوں۔

جان و کاہندے:	جان قربان کر بیٹھتے ہیں۔
جاں تک:	جب تک۔
جائیں:	جگہیں۔ پہنچانی میں جا بمعنی جگہ کی جمع: جائیں۔
جبال:	جبل کی جمع۔ پہاڑ۔
ججیم:	دوزخ، جہنم۔
جدو کتناں رجدو کڑے:	جب سے۔
جراں رجرناں رجرن:	برداشت کرنا، سہنا۔
جرعہ:	گھونٹ، پانی کو وہ مقدار جو منہ میں لی جاسکے۔
جرّھ:	جرّ، بنیاد۔
جگ بیتی:	دُنیا کی سرگزشت، زمانے کے حالات۔
جگر بند:	فرزند، بیٹا، اولاد کی طرح پیارا۔
جلیاں:	صدائیں، بلند آوازے۔
جم:	جمشید کی تخفیف، ایران کے پیشدادی خاندان کا چوتھا بادشاہ۔ جو اپنے پیالے میں جھانک کر واقعاتِ عالم کی جھلک دیکھ لیا کرتا تھا۔ اس پیالے کو جامِ جم یا جامِ جمشید اور جامِ جہاں نما کے نام سے شہرت حاصل ہے۔
جنجو:	زنار، وہ وہاگہ جو ہندو گلے سے بغل کے پیچھے تکیڈا لیتے ہیں۔
جنڈ:	ایک جنگلی درخت۔
جواد:	سخی، بہت بخشش کرنے والا۔
جوت:	روشنی، اجالا۔
جود:	سخاوت، فیاضی۔
﴿.....جھ.....﴾	
جھات:	جلوہ۔
جھاڑ:	جھاڑیاں، خاردار پودے۔
جھگے:	جھونپڑے، گھر، مکان۔
جہال:	چمک، روشنی، خوبصورتی۔
جھانجھا:	جھانجھٹ، جھگڑا، فکر، اندیشہ۔
جھب:	نوراً، آنکھ جھپکنے کا لحظہ۔
جھل:	خاردار جھاڑی یا درخت، جھنگڑ۔

جھلاں:	جنگل، دریا کے کنارے کا گھٹا جنگل۔
جھلکے:	۱۔ شعلہ، جھلسا ہوا ۲۔ تندوری روٹی کو بھی جھلکا کہا جاتا ہے۔
جھوٹے:	جھوٹے، جھوٹا۔
جھور:	چھالا جو پھوٹ گیا ہو۔
جھورا:	۱۔ پکھتاوا، پشیمانی، ندامت، جلن، اضطراب۔ ۲۔ مرجھایا ہوا، خشک، پژمرده۔
جھولی:	جھولی، دامن۔
جھونس:	مرجھانا۔

﴿.....ج.....﴾

چار چوہیز:	چاروں طرف، ہر طرف۔
چاک:	نوکر، مجازاً عاشق یا رانجھا۔
چاک کیتا:	پھاڑیا، پھاڑ دیا۔
چاٹا:	چالا۔ چال چلن، عادت، طرز، خو۔
چاننا:	چانن۔ روشنی، نور۔
چاہ:	۱۔ چاہت، ۲۔ کنواں۔
چت:	جی، خیال، توجہ، دھیان۔
چٹئی:	نقصان، جرمانہ، بھگتان۔
چٹھا:	حساب کتاب کا رجسٹر، کھاتہ۔
چرخ:	آسمان۔
چرناں وچ:	قدموں میں۔
چڑھتل:	شان و شوکت، رعب۔
چلیٹی:	نوکر، چاکر، خادمہ۔
چم:	چمڑی، کھال۔
چمارئی:	چمار کی موٹ۔ ایک بچ جاتی، موچی، کمینہ، رذیل۔
چمانڈے زخم:	ایسے زخم جن میں جلن اور غارش ہو رہی ہو۔
چٹھی:	غوطہ، پانی میں تیراکی سے متعلق۔
چندرمان دی چودھویں:	چاند کی چودھویں۔
چنہاں:	چناب۔

چودھار:	چاروں طرف، ہر طرف۔
پوڑ:	بربادی، تباہی، نقصان۔
پوہڑ:	پوہڑا کی تخفیف۔ ایک سچ جاتی، خاکروب، بھنگی۔
چیت:	چیتڑ، ہندی میں کانام۔
	﴿.....چھ.....﴾
چھب:	زیب و زینت، آرائش، ناز و انداز، معشوقانہ انداز۔
چھل:	۱۔ مکر، فریب، دھوکا، ۲۔ زخمی کرنا۔
چھوندڑی:	کڑھائی کرنا۔
چھیک:	چھید، سوراخ، رخنہ۔
چھیل:	بانک پن، خوبصورتی، وضع داری۔
	﴿.....چ.....﴾
حاضر باش:	ہر وقت حاضر رہنے والے، مصاحب۔
حدوث:	قدیم کی ضد، تازہ، نیا، پیدائش، وجود میں آنا۔
حرص آز:	طمع، لالچ۔ دونوں الفاظ ترکیب کے طور پر مستعمل ہیں (حرص و آز)۔ دونوں مترادف ہیں۔
حرص و ہوا:	طمع، لالچ، ہوس۔
حرف گیر یوں / حرف گیری:	نکتہ چینی، عیب جوئی۔
حریر:	ریشم، ریشمی کپڑا۔
حریف:	دشمن، بدخواہ۔
حریم:	خانہ کعبہ کی بیرونی دیوار، گھر، مکان، گھر کی چار دیواری حاجی کا خاص لباس۔
حزین:	غمگین، رنجیدہ۔
حُسن یوسفی:	حضرت یوسف کا حسن۔ بہت حسین محبوب کے لیے تشبیہ کے طور پر استعمال ہوتا ہے۔
حُصود:	حاسد کی جمع، حسد کرنے والے (حُصود: بڑا بدخواہ)۔
حصر:	گھیرنا، احاطہ کرنا، محدود علاقہ۔
حلیم:	بردار، صبر والا، متحمل۔
حیات دوام:	ہمیشہ کی زندگی۔ ابدیت۔
حیف:	افسوس، حسرت، تعجب یا نفرت کے اظہار کے لیے۔
حضیض:	پستی، گڑھا، ناشیب۔

﴿.....خ.....﴾

خار:	۱۔ دشمنی، عداوت، ۲۔ کانٹا۔
خار بول:	کیکر کے کانٹے۔
خاک سا:	مٹی میں مل جانا، دفن ہو جانا۔
خاک مغاک:	زمین، مٹی کا گڑھا، مراد انسانی جسم۔
خال:	تل، ایک سیاہ نقطہ جو قدرتی طور پر چہرے یا جسم پر ہوتا ہے۔
خام طبع:	کمزور کردار کے لوگ یا کچی فطرت والے۔
خاند زاد:	غلام، مالک کے گھر پیدا ہونے والا غلام۔
خد:	رخسار، گال۔
خزف ریزے:	ٹھیکریاں، ٹھیکری کے چھوٹے چھوٹے ٹکڑے، کنکر۔
خصم:	شوہر، مالک۔
خصوصیات:	کینہ، بغض، دشمنی۔
خفی جلی:	مراذخ اور باطن، اندر باہر۔ خفی: پوشیدہ، چھپا ہوا، مخفی، جلی: ظاہر، روشن، واضح لکھا ہوا۔
خفیف:	ہلکا، سبک، کم ظرف، ذلیل، رسوا، شرمندہ، نادب۔
خلاصی:	چھٹکارا، آزادی۔
خلعت:	لباس۔
خلود:	بیہنگی، دوام، ابدیت۔
خمر:	شراب۔
خمید:	خمیدہ، خم کھائی ہوئی، جھکی ہوئی، ٹیزھی۔
خوردلوں:	خوردہ سے۔ نذر نیاز کی شیرینی سے۔
خورش طعام:	خوراک، کھانے پینے کی اشیاء۔
خوشنودیاں:	رضامندی۔
خوک:	سور، خنزیر۔
خیر:	۱۔ خیرات، ۲۔ خیریت، صحتمندی۔

﴿.....و.....﴾

واتے:	داتا کی جمع، بنی۔
وانے:	مقلد، صاحب فہم۔ پنجابی میں دانا کو جمع کی صورت میں دانے کہا جاتا ہے۔

دارتے رس:	سولی تے پھاسی۔
دار الفیض:	روحانی مرکز، مرشد خانہ۔
داڑوں:	دوا، علاج۔
دُر آبدار:	چمکیلا پتھر۔
دُر یتیم:	وہ موتی جو سیپ میں اکیلا ہو، بڑا موتی۔
دراڈی:	بہت دور، فاصلے پر۔
دُر بار:	موتی برسانے والا، دولت نواز نے والا۔
در در سیدیاں:	در در سیدہ۔ غمگین، رنجیدہ۔
در در نجائیاں در در نجانے:	غمزوہ، رنجیدہ، غمگین۔
درس:	ا۔ دیدار، نظارہ، ۲۔ سبق۔
درس گیر:	درس یا سبق لینے والا، شاگرد۔
دُر کاریاں:	دھتکاری ہوئی۔
دبیر:	کاتب، لکھنے والا۔
دل آرام:	دل کو آرام دینے والا۔
دل پذیر:	دل پسند، مرغوب۔
دل ٹھگ:	دل موہ لینے والا، معشوق۔
دل دی دلی لٹن کارن:	دل کی دلی لوٹنے کے لیے۔ مراد دل کی آباد دنیا کو برباد کرنے کے لیے۔
دل رُبا:	دلکش، دل بھانے والا۔
دل ریش:	رنجیدہ، غم زدہ۔
دل شاد:	خوش، بشاش، مسرور۔
دل گیر:	مغموم، اداس، رنجیدہ۔
دندے لا:	کنارے لگاؤ۔
دن رین:	دن رات۔
دُود:	دُھواں۔
دوتی ردوتے ردوتیاں:	دشمن، شہر پسند، رقیب، منافق۔
دوس:	دوٹ، الزام۔
دوئی:	وحدت یا یکتائی کی ضد، شرک کرنا، غیریت۔
دہاڑے:	دِن (دہاڑے)۔

دہقان: گاؤں یا دیہات کا باشندہ، کسان۔
وہی: جسم، بدن۔
ویدیال / ویدے: آنکھیں۔

﴿.....وہ.....﴾

دھاڑ: مصیبت، مشکل، جملہ۔
دھاوند اے: ڈراتا ہے، خوفزدہ کرتا ہے۔
دھرت: زمین، ارض۔
دھرو: گھسیٹنا، کھینچنا۔
دھروں: ازل سے (پنجابی میں ازلوں)، شروع سے۔
دھگانے: زبردستی، جبر، ظلم، نا انصافی۔
دھم: دھوم، شہرہ۔
دھمدی نہ: طلوع نہ ہوتی، برپا نہ ہوتی۔
دھن: گرمی، لگن، شوق۔
دھن بھاگ: خوش قسمتی، اقبالمدی۔
دھندوکار: اندھیارا، ظلمت، تاریکی، آفرینش جہاں سے قبل کا وہ دور جب چاند سورج وغیرہ کی روشنی نہ تھی۔

دھوڑ: خاک، دھول۔
دھوپیں: چھپر، جھونپڑی۔
دھیراں: تسلیاں۔

﴿.....ڈ.....ڈ.....﴾

ڈابو: ڈبو دینے والا، غشی، گھبراہٹ۔
ڈانگری: ڈانگری یعنی مویشی چرانے والا۔
ڈانواں ڈول: ڈمگانا، پریشان، متذبذب۔
ڈچھ: کھا جانا، نگل جانا۔
ڈل: جھیل، تالاب۔
ڈنڈ: شور و غل، چیخ و پکار۔
ڈنڈول: درد کی لہر، درد شکم۔
ڈور بھورا: فریفتہ بھورا، مجازاً عاشق۔

ڈوم: مرثی، مغنی۔

﴿.....ڈھ.....﴾

ڈھائیں:

چیچ و پکار، بلند آواز میں نین۔

ڈھنگر:

کانٹے دار جھاڑیاں، خشک خاردار جھاڑیاں یا لکڑی۔

ڈھو:

سہارا، ٹیک، پناہ، آوٹ۔

ڈھوئی:

آسرا، پناہ، سہارا۔

﴿.....ڈھ.....﴾

ذاتی اسم: اسم ذات، اللہ۔ جس سے کوئی وصف معلوم نہ ہو۔ خدا کے صفاتی ناموں کے علاوہ یعنی ”اللہ“

ذقن:

ٹھوڑی، چہرے کا نچلا حصہ۔

﴿.....ر.....﴾

رب رکھے:

رب سلامت رکھے۔ دعائیکلمہ (سلامت رہو)۔

راٹھ:

راجا، حاکم، سردار، امیر، چودھری۔

رافت:

مہربانی، رحمت کی شدت۔

راگ وراگ:

جدائی کا راگ۔ ہجر و فراق کے نغمے۔

راہ وچ کھٹ نہ ٹوئے:

رکاوٹیں یا مسائل پیدا نہ کرو۔

راہبیاں:

راہی، مسافر، راستے پر جاتے لوگ۔

رت:

خون، بہو۔

رُجھ:

مصرفیت، مشغول ہونا۔

رُخ انوار:

روشن چہرہ، دمکتا ہوا چہرہ۔

رخت:

۱۔ سامان، اسباب، ۲۔ بدن۔

رڈی ررڈی گئی:

نامنظور شدہ، ٹھکرائی ہوئی، مطلقہ۔

رُکھ:

درخت۔

رملی:

رمال، جوتشی، نجومی، علم رمل کا ماہر۔

رنجور:

رنجیدہ، غمگین، افسردہ۔

رنڈ پنا:

بیوگی، رنڈاپا، شریک حیات کے فوت ہو جانے کے بعد کا زمانہ۔

رنگن:

رنگ روپ، رنگت، رنگین مٹی کا لپ جو کمہار برتنوں پر لگاتے ہیں۔

روال:

ذرہ بھر، قدرے، تھوڑا سا۔

روڈ بھوڈ:

استرے سے مُنڈا ہوا سر۔ بالکل مُنڈا مُنڈ جس کے سر، داڑھی، مونچھیں اور بھویں

صاف ہوں۔ ہندو جوگی ایسا روپ دھارن کرتے ہیں۔

روگ و نجان والا: دکھ درد و ور کرنے والا۔

رُول: رفتار، سفر، چکر۔

ریتی: سوہن، رگڑنے کا اوزار۔

ریگ صحرا: صحرا کی ریت۔

﴿.....فر.....﴾

زاری: رونا دھونا۔

زاغ: کٹوا۔

زبوں: خراب، معیار سے گرا ہوا، نچلے درجے کا۔

زضرور: دولت۔

زلف دے بیچ: زلف کے بل، زلفوں کا آپس میں الجھنا۔

زلف شب گیر: رات کی طرح کالی زلف۔

زنبیل: تھیلی، جھولی۔

زندیق: وہ شخص جو خدا کی وحدانیت کا قائل نہ ہو، کافر۔

زہیر: کمزور، تاتواں، پریشان۔

زیر نکیس: تصرف میں، اختیار میں، مطیع، محکوم، مسخر۔

زیروم: نیچا اور اونچا، ساز بجاتے ہوئے اونچی نیچی آواز۔

﴿.....س.....﴾

ساتھ: ساتھ، بھروسہ۔

سادھواں رسادھو: جوگی، تارک الدنیا، ہندو درویش۔

سار: خبر۔

ساس: سانس۔

ساک سین رسین تے ساک: عزیز رشتہ دار، اقربا، نانا، رشتہ۔

ساکلک: صوفی، سلوک کی منازل طے کرنے والے۔

سام: سنبھال، کسی چیز کو سنبھال لینا یا سنبھال کر رکھنا۔ (سام سمہال)

سانجھ: شراکت، حصہ داری۔

سانگ: نیزہ، بھالا، ٹوک۔

سانسیاں رسا ہنسی: سانس یا سانس کی ایک قبیلہ۔ سانس ہی قوم کے فرد۔

سیو:	جام، پیالہ، گھڑا۔
سنبھلاں:	اکوش، ارادے۔ ۲۔ برسرِ راہ پانی پینے کا انتظام۔
سپ زہری:	زہریلے سانپ۔
جھیلوے:	جھیلے، خوبصورت، سجا سجاوا۔
سچدھار:	سچا۔ سچ اپنانے والا۔
سحاب:	بادل، گھٹا۔
سحور:	سحر کی جمع۔ صبحیں۔
سخن:	بات، کلام۔
سد:	بلا، بلاؤ۔
سیدھر گئی:	تمنائی ہونا، ملنے کی آرزو، طلب کا شدید ہونا۔
سیر نہان:	گہرا راز، پوشیدہ راز، چھپے ہوئے بھید۔
سرپ:	بددعا، لعنت، دھتکار۔
سراجا منیر:	روشن چراغ، حضور کا ایک خطاب۔
سیر اند:	آخر۔ تکمیل۔ چارپائی کے نیلے یا سروالی طرف کو سیر اند کہا جاتا ہے۔
سیر پوش:	دوپٹہ، اورھنی، چٹری، سر ڈھکنے کا کپڑا۔
سُمرت:	ہوش، سوچ، شعور۔
سرداوساس:	سردا ہیں۔
سردا زاد:	ایک شاخ کا بالکل سیدھا سرو جس کی شاخیں بالکل سیدھی تہی رہتی ہیں۔ اس میں پھل نہیں آتا اور کچی بھی نہیں آتی۔ اس لیے اسے آزاد کہتے ہیں۔
سُر و پے سُر و پیا:	لباس، خلعت۔
سُرمیر:	۱۔ تخت شاہی، حکومت، بادشاہی، ۲۔ بدن، جسم۔
سطھی:	اوپری، سرسری۔
سقر سقر:	دورخ کا بھڑکتا ہوا طبقہ۔
سقم:	نقص، بیماری، غلطی، خرابی۔
سکدی:	ترستی ہوئی، تڑپتی ہوئی۔
سکندیاں:	سکندیتی ہوئی، پڑپتی ہوئی۔
سکھ لٹیاں:	جن کا سکھ چین لٹ گیا ہو، برباد، رنجیدہ۔
سکھنا:	خالی۔

- سلبیل: بہشت کی ایک نہر، خوشگوار چیز، شراب۔
 سبک: مچھلی، کنایہ زمین کا سب سے نچلا طبقہ۔
 سُنَّے رُخبا: خالی، سنسان، ویران۔
 سنجاب سمور: ایک باریک پشم والا چوہے سے ذرا بڑا برفانی جانور جس کی کھال سے پوتین بناتے ہیں۔ سمور اس جانور کی کھال کو کہا جاتا ہے۔
 سنجوگ: میل ملاپ، رشتہ، تعلق، واسطہ۔
 سنگ تے انگ انگ ہوئے: رشتہ داریاں یا تعلق ٹوٹ گئے یا بچھڑ گئے۔
 سنگ پارس: ایک پتھر جس کی نسبت مشہور ہے کہ لوہے کو سونا بنادیتا ہے۔ کنایہ فیاض، داتا، بخشنے والا۔
 سنگ چھماق: ایک قسم کا پتھر جس کے رگڑنے سے آگ پیدا ہوتی ہے۔
 سڈگاں: شرماؤں۔ شرمانا۔
 سٹکیاں: سینگ کی جمع، جو علاج کے لیے جسم پر لگاتے ہیں۔
 سواٹیاں: اضافہ، سواگنا، کافی زیادہ۔
 سو بھجن رسو بھنا رسو بھدا: چچنا، پھینا، مناسب ہونا، موزوں ہونا۔
 سوختہ: مصیبت زدہ، افسردہ، جلا ہوا۔
 سوراں رسورنا: ورد کرنا، یاد کرنا۔
 سورمے: بہادر، شجاع، دلیر۔
 سوکھلوی (سوکھی): آسان، بہل۔
 سوئپ سپوئیاں: جانے سے پہلے کسی کو ذمہ داریاں دینا، حوالے کرنا۔
 سوئہ: قسم، سوگند۔
 سوہار یا رسوہارا: خوبصورت، دلکش، سُندر۔
 سوہاندا رسوہاندی رسوہانا رسوہاؤے: زیب دینا، مناسب یا اچھا لگنا، خوبصورت لگنا، چچنا۔
 سوہلے: خوشی کے گیت، شادی کے گیت۔
 سوںے: سونے کا نانوے کے بعد اور ایک سو ایک سے پہلے کا گنتی کا ہندسہ۔
 سیاہیاں: اندھیرے، ظلمتیں۔
 سیرا: حصہ، شراکت، ساجھا پن۔
 سیس نوائی: سر جھکانا، عزت و تکریم کرنا۔
 ستیمیں ساق رستم ساق: جسمانی طور پر خوبصورت۔
 سین: سائیں کی تانیٹ بمعنی مالکن، ساک کے ساتھ مستعمل لفظ جیسے ساک سین۔

سیو ادار: خدمتگار، خادم۔

﴿.....ش﴾

شاد کام: خوشحال، خوش، خرم، کامیاب۔

شام: محبوب۔

شباب: جلدی، نوراً۔

شش جہات: چھ اطراف، کنایۃً تمام عالم یا ہر طرف۔

شعیر: جو۔ اناج کی ایک قسم، جو کی خاص قسم جو مریضوں کے لیے کام آتی ہے۔

شقی: بد بخت، بد نصیب۔

شمس بازغہ: روشن چمکتا ہوا سورج۔

شمس رخشاں: چمکتا ہوا، منور، روشن سورج۔

شنید: سنوائی، شنوائی۔

شوہ: گہرا دریا۔

شوہدا: غریب، بے آسرا، بے چارہ۔

شہاب: شعلہ جوالا، بلند شعلہ، شہاب ثاقب ایک ستارہ جو آسمان سے گرتا ہوا

دکھائی دیتا ہے یا آتش بازی کی طرح چھوٹتا ہوا دکھائی دیتا ہے۔

شیر: دودھ۔

شینہ: شیر۔

﴿.....ص﴾

صاعقہ: زمین پر گرنے والی بجلی۔

صبری: صبر۔

صرف: کلموں کی شناخت اور ادل بدل معلوم کرنے کا علم۔

صرفہ: بچت، کنجوسی، کفایت شعاری۔

صف تفلین: سوالیوں کی صف۔

صوت غراب: کوئے کی آواز۔

صوری: معنوی کی ضد، ظاہری۔

﴿.....ط﴾

طاقی: طاقت یا طاقتی، کھڑکی۔

طبع زار: پریشان طبیعت، افسردہ، بے کس۔

طالع:	نصیب، قسمت، اقبال۔
طامات:	شیشی خوری، ریاکار صوفیوں کی مبالغہ آمیزی۔
طرح:	انداز، ڈھب۔
طرف:	طرف
طعن تشنیع:	لعن طعن، جلی گلی باتیں، لعنت ملامت۔
	﴿.....ظ.....﴾
ظفر مندی:	کامیابی، نصرت، فتحیابی۔
غل ہما:	ہما نام کے پرندے کا سایہ، کہتے ہیں کہ جس شخص پر یہ سایہ پڑ جائے اسے بادشاہی مل جائے۔
ظلمات:	تاریکیاں، اندھیرے۔
	ظلماتناں جہل ناوانیاں دی: جہالت، اچڈ پن، کم علمی، گمراہی کے اندھیرے۔
	﴿.....ع.....﴾
عارفان عارف:	صوفی، زاہد، عبادت گزار، پہچاننے والا۔
غیر:	مشک گلاب اور صندل سے تیار کردہ سفوف، خوشبو۔
غتاب:	غصہ، ناراضی، خفگی۔
عشاق:	عاشق کی جمع۔
عشق شوریدیاں / عشق شوریدہ:	عشق میں پریشان۔
عشق طیور:	کنایہٴ عاشق۔
عشق عدول:	عشق سے منہ پھیرنا، روگردانی، انکار۔
عطر بیز:	خوشبو پھلانے والی روالا۔
عقدے:	گرہیں، گتیاں، گانٹھیں۔
علم عروض:	وہ علم جس میں شعر کے اوزان، بحر، زحافات کے اصول بیان کیے جاتے ہیں۔
علم لدنی:	خداداد علم، وہ علم جو الہام یا وحی کے ذریعے حاصل ہو۔
علم معقول منقول:	علم معقول سے مراد علوم عقلیہ جیسے ریاضی، اور فلسفہ وغیرہ۔ اسے سائنسی علوم کے لیے بھی استعمال کیا جاتا ہے۔ علم منقول سے مراد علوم نقلیہ جیسے حدیث، فقہ، تاریخ یا ماضی میں لکھی گئی باتیں۔
علوم مروجہ:	وہ علوم جو رائج یا رواں ہوں۔ اپنے زمانے کے رائج علوم و فنون۔
عندیب:	بلبل۔

عہد الست: روز ازل کا وعدہ، اللہ تعالیٰ اور انسان کے مابین پیمان جس کا ذکر قرآن میں آیا ہے، روز اول کا قول و قرار، خلقت، عالم سے پہلے عالم ارواح میں خدا تعالیٰ کے حضور اس کی الوہیت کا قول و قرار۔

﴿.....غ.....﴾

غوغب: ٹھوڑی کے نیچے لٹکا ہوا گوشت، ٹھوڑی کا گڑھا۔

غربال: پھلنی، آنا وغیرہ چھاننے کا آلہ۔

غرقاب: گرداب، مضور، ورطہ۔

غلاف کرسی: پردہ ڈالے گا۔

غلام کی جمع، نوعمر لڑکے، جنت کے کم سن خادم۔

غلم چھیننے والا۔ (ربا فارسی مصدر ربودن کا صیغہ امر جو کسی اسم کے بعد آ کر اسے اسم فاعل ترکیبی بنا دیتا ہے اور چھیننے والا کے معنی دیتا ہے جیسے ہوش رُبا۔

غمر غمرہ: آنکھ کا اشارہ، ناز۔

غمیم: لوٹنے والا، دشمن، حریف۔

غائب کی جمع۔ پوشیدگی، غیر موجودگی۔

غیریت، دوئی، شرک۔

﴿.....ف.....﴾

فدکاری، گمراہی، بدچلنی۔

فچین کے قدیم بادشاہوں کا لقب۔

فجی، گھائل، مجروح، مرکبات کے آخر میں آتا ہے جیسے جگر فگار،

دل فگار وغیرہ۔

فوق سماء: آسمان سے اوپر۔

فہم و عقل رکھنے والا، سمجھدار، عقلمند۔

فیض عام، سب پر لطف و کرم۔

فیض بخشنے والا، جس سے فیض حاصل ہو۔

فیلوف: دانشمند، حکیم، عالم، فاضل۔

﴿.....ق.....﴾

قاسم: تقسیم کرنے والا۔

قاطع کرنے والا، رد کرنے والا، ختم کرنے والا۔

قاتل:	بات، گفتگو، تقریر۔
قحط الرجال:	آدمیوں کا کال، بھلے مانسوں اور لائق لوگوں کی کم پایا جانا۔
قدم رنج فرمائی:	آمد، تشریف آوری۔
قضیئے:	جھگڑے۔
قطب مدار:	مرکزی مقام کا حامل۔ وہ مقام جس کے گرد سیارے گردش کرتے ہیں۔
قرح:	زخم، گھاؤ، مصیبت۔
قطع برید:	قطع کرنے یا کاٹنے کا عمل۔
قند پار یا قند پارے:	شکر پارے، مٹھائی، شیرینی۔
قند نبات:	شیرینی، مٹھائی، کنایہ بہت شیریں۔
قہاریاں:	ظلم، غضب، عذاب، روگ، مشکل۔
قیل مقال:	گفتگو، بات چیت، بحث، تکرار۔
﴿.....ک﴾	
کات:	کاٹنے کا اوزار، لے بانس کے ساتھ لگی ہوئی درافتی۔
کاج:	شادی، بیاہ، خوشی کی تقریب۔
کاری:	سخت، شدید۔
کاسنوں:	کس لیے، کیوں۔
کاسے / کاسا:	پیالہ۔
کال:	تقدیر، مصیبت، قحط، کمی۔
کامیاں / کامے:	ملازم، نوکر، خدمتگار۔
کانگ:	کوا۔
کانیاں:	کانی کی جمع، تیر۔
کاہلاں / کاہلا:	بے صبر، جلد باز۔
کاہی:	کانی، گھاس، بھچھوندی۔
کانی:	کوئی۔
کبک:	چکور۔
کھڑ:	بھنور، بڑی لہر، موج۔
کُتری:	کتیا، بچ، کمین۔
کُتتا:	کاتنا، سوت کاتنا، دھاگہ پارسی بنانا۔

گٹ:	اثر۔
کناری:	خنجر، نیچے۔
گٹھا:	ذبح کیا، قتل کیا۔
کٹھیا لڑی رکھیا لی:	سنار کی دھات پگھلانے والی چھوٹی سی پیالی، پتھر کا گڑھا جس میں دھات کو ٹٹے ہیں۔
گج:	جیا، شرم، پردہ، اوڑھنی۔
کچڑی:	نادان، کم عقل۔
کدورتاں:	نفرتیں، رنجش، آزدگی۔
کراس:	گمریزی کا لفظ۔ کاٹنے کے معنی میں مستعمل ہے۔ کاٹنا یا مٹانا، قلم زد کرنا۔
کرد:	کارو، لمبا چاقو، چھری۔
گرا وندی رکرا لان رکرا لاٹ:	چیخ، پکار، شور، کراہنے کی آواز۔
کرتگ:	برساتی نالہ جو بارشیں نہ ہونے سے خشک ہو جاتا ہے۔
کڑوبیاں:	کروبی کی جمع۔ مقرب فرشتے، اعلیٰ درجے کے فرشتے۔
کریر:	ایک خاردار جھاڑی۔
گسا کے:	کم تر، کمزور۔
کسوف:	سورج گرہن، چاند کا زمین اور سورج کے درمیان آکر سورج پر اپنا سایہ ڈالنا۔
کشف:	انکشاف کرنا، کھولنا، ظاہر کرنا۔
کشف قبور:	صاحب قبر کا حال معلوم کرنا۔
کشاد:	کشادہ، کھلی، وسیع۔
کف افسوس ملنا:	ہاتھ ملنا، افسوس کرنا، پچھتانا۔
کفش برداریاں:	جو تے اٹھانے، سنبھالنے یا سیدھے کرنے کی سعادت۔
گکارا:	پکار، لوک، ڈہائی۔
کلاں:	عقل، فہم، ہنر، فن۔
کاڈوے (کلاوہ):	بازوؤں کی گرفت میں لینا، بازوؤں کے گھیرے، گلے ملنے کا فعل۔
کلر شور:	کلراٹھی زمین، بنجر زمین، ناقابل کاشت زمین۔
کمل:	بے چین، مضطرب، پڑمردہ۔
گُلنگ:	بلبل۔
گُلکیہ:	گُلکیہ سے گُلکیہ۔ بد قسمت، بد نصیب۔

کھواب:	ایک قسم کا ریشمی کپڑا جو زری کے تاروں کی آمیزش سے بنا ہوتا ہے۔ زربفت۔
کھوت:	بری موت، خودکشی۔
کندھی:	کنارا۔
کندھوتی رکندھوتی:	مونہ پھیر لینا، بے رخی دکھانا۔
گن فیکون:	ہو جا پس وہ ہو گیا۔ خدا تعالیٰ کو جب عالم کو پیدا کرنا منظور ہوا تو لفظ ”گن“ ارشاد فرمایا۔
کنز قدوریاں:	مدارس میں پڑھائی جانے والی کتابیں۔
کنسو:	بھنک، خبر، سراغ۔
کنگرہ:	کلس، گنبد کے اوپر کا نوکدار حصہ۔
گنہ:	۱۔ حقیقت، انتہا، تہہ۔ ۲۔ دشمنی، کینہ۔
کوٹ:	قلعہ، حصار، شہر۔
کوچڑی:	بد صورت، بد وضع، بھدا۔
کورہ:	اُلٹا یا غلط راستہ، بھٹک جانا، سیدھا راستہ چھوڑ دینا۔
کوڑے رکوڑا:	قبیلہ، خاندان، برادری، گھرانہ، نسل۔
کول:	پاس، نزدیک۔
کونت:	شوہر، خاوند۔
گمبا:	کہرام، چیخ و پکار۔
گمباڑیاں:	کلباڑیاں۔
کیکناں رکیکناں:	ایک خانہ بدوش قبیلہ جو جرائم پیشہ شمار ہوتا ہے۔
کیراں رکیرنا:	بکھیرنا، اوپر سے نیچے کرنا، اناج کی صفائی کا عمل۔
کیلوے رکیلے:	منتر جس کے ذریعے بھوت، جن یا سانپوں کو رام کیا جاتا ہے۔
گیوان (گیواں):	سانپ کو قابو کرنا۔
	زحل ستارہ جو قدیم ہیئت کے اعتبار سے ساتویں آسمان پر ہے، سنچر۔
	﴿.....کھ.....﴾
کھاڑے رکھاڑا:	ضد، ہٹ، واسطہ، راستہ۔
کھیری ناد:	تو نے کا بنا ہوا برتن، کٹھول، فقیروں یا گداگروں کے پاس خشک کدو یا تر بوڑکا
	بنا ہوا ایک ساز ہوتا ہے جسے بجا کر صدا لگاتے ہیں۔
کھدیڑ کھدیڑنا:	دھکیلنا، دور ہٹانا۔
کھڑاپ:	جدا ہونا، بچھڑ جانا، کھوجانا، گم ہو جانا۔

کھلوت:	تھہراؤ، رکاوٹ، آرام، سکون۔
کھوٹ:	گیند۔
کھیرا:	ضد، ہٹ پیچھا۔
	﴿.....گ﴾
گال دتا:	برباد کر دیا، مٹی میں ملا دیا۔
گانچ:	ایک جالی دار کپڑا۔ کسی پودے کو ایک جگہ سے اکھاڑ کر دوسری جگہ لے جانے کے لیے اس کے گرد کھودی ہوئی مٹی۔
گاہی:	گانے کا فعل، فصل یا گھاس پھوس کو مسلانا۔
گرگ:	بھیڑیے کی طرح داؤ لگانے والا جانور، مجازاً ظالم، سفاک، ہتھکڑ۔
گڑا:	ثالہ، اولہ، بادل۔
گزافیاں:	بیہودہ گفتگو، بکواس۔
گل خام:	ایک قسم کا پھول۔
گل ریحان:	تلسی کا پھول۔
گال:	سرخ، لال، لالی، گل لالہ۔
گنج:	خزانہ۔
گوت:	خاندان، وُٹش، ذات۔
گوش:	کان۔
گولی:	خدمتگار، ملازمہ۔
گوہ:	جانوروں کا گوبر جسے خشک کر کے ایندھن کے طور پر استعمال کرتے ہیں۔
گیری:	لال مٹی، بر گل ارنی۔
	﴿.....گھ﴾
گھاٹ:	کمی۔
گھنڈیاں:	شکوے، شکایتیں، نفرتیں۔
گھول:	دنگا فساد، لڑائی۔
گھولی:	فریب۔
	﴿.....ل﴾
لامکان:	وہ مکان جس میں مکانیت کی تخصیص نہ ہو، عالم قدس جس کی کوئی سمت اور جگہ متعین نہیں۔

لاٹ:	شعلہ، لو، چمک، روشنی۔
لاج:	آبرو، عزت، شرم، حیا۔
لافاں:	لاف زنی، شیخی، گپ، ڈینگ، تعلی، خود ستائی۔
لاگ گزاف:	بیہودہ سرائی، شیخی، تعلی۔
لا بجا، لا بجا:	البحاؤ، جھگڑا، پریشانی۔
لتاڑ:	۱۔ ملامت، سرزنش، مصیبت، ڈانٹ ڈپٹ، پامالی، ۲۔ تھکاوٹ کی وجہ سے بدن کو لاتوں سے دبانا۔
لکدا لکدا:	ناز و ادا سے چلتا ہوا، جھومتا ہوا۔
لج:	عزت، نام، بھرم۔
لچال:	لاج پالنے والا، خلوص کیش، نجی، دانتا۔
لخت:	جزو، ٹکڑا۔
لے لسا:	کمزور، غریب، ناتواں۔
لعل مذاب:	سرخ انگور یا سرخ انگوروں کا رس، کنایہ شراب۔
لمبر:	نمبر، سبقت، بازی۔
لکھاں:	وہ برتن جن میں کتوں کو کھانا پانی دیا جاتا ہے۔
لکناں:	کتے کے کھانے یا پینے کا عمل۔
لمعائیاں / لمعان:	چمک، چمکیلا، چمکنے والا۔
لنگ:	پردہ، ستر، شرم، حیا، آبرو، دھوتی کا آگے لٹکتا حصہ۔
لنگھ جاوٹا:	گزر جانا۔
لو بھ:	لاچ، حرص۔
لوڑاں / لوڑ:	ضرورت، کمی۔
لولاک:	حدیث قدسی لولاک لما خلقت الافلاک کی طرف اشارہ ہے۔ یعنی اگر تیری (رسول ﷺ کی) ذات نہ ہوتی تو میں (اللہ) آسمانوں (کائنات) کو پیدا نہ کرتا۔
لو بچے:	ویران، خالی، بچے۔
لیتیاں (لیتتا):	حاصل کیں۔
لیراں:	پھٹے ہوئے کپڑے کے ٹکڑے، قطرنیں۔
	﴿.....م.....﴾
مافی الصدور:	سینوں میں پوشیدہ راز یا بات۔

ماڑیاں:	ماڑی کی جمع محل، مندر، بنگلہ۔
ماسہ:	ماشہ: آٹھ رتی کا وزن۔ تولے کا بارھواں حصہ۔ کنایت بہت قلیل یا کم کے لیے مستعمل ہے۔
ما فوق:	اعلیٰ، برتر، بلند بالا، جوا پر ہو۔
مان تران:	عزت، ناموس، وقار۔
ماندری:	منتر جاننے والا، سانپ کے ڈسے کا علاج کرنے والا، مندل بجانے والا، عام طور پر سپیروں کو کہا جاتا ہے۔
مانی:	ایک قدیم رومی نقاش و مصور، ارڈنگ نامی کتاب اس کی تصنیف بتائی جاتی ہے۔
ماہ انوار:	روشن چاند۔
ماہ تیشال:	چاند کی طرح، بہت خوبصورت۔
ماہ کنعان:	کنعان کا چاند، حضرت یوسفؑ سے مراد ہے۔ بہت خوب صورت۔
ماہ لقا:	چاند جیسی صورت والا۔
ماہ منیر:	روشنی بکھیرنے والا چاند، کنایت محبوب، معشوق۔
مبین:	بیان کیا گیا، ظاہر کیا گیا، واضح، روشن۔
متعال:	عالی، بلند، بزرگ، خدا کے لیے مستعمل۔
متھے:	پیشانی
متیں رمت:	نصیحتیں، سبق۔
مٹھی:	فریفتہ، شیفٹہ، لٹی ہوئی۔
مٹیل:	مشابہ، برابر، کے جیسا۔
مجیب الدعوات:	دعائیں قبول کرنے والا۔
محرو:	گرم، گرم مزاج والا، خشم ناک، بخار میں مبتلا۔
محکم:	پکا، مضبوط، ثابت قدم۔
مخول:	مذاق۔
مدام:	ہمیشہ، دائم، متواتر۔
مدھ:	ایسا مشروب جس سے نشہ طاری ہو جائے۔ شراب۔
مرزبوم:	جائے پیدائش، جنم بھومی، وطن۔
مرہم جبیر:	زخم کو جلد بھرنے والی دوا، تیز اثر کرنے والی دوا۔

مریلوئی رمریلوے رمریلیاں:	مارنے والا، قاتل۔
مِس:	روشنائی، لکھنے والی سیاہی۔
مَسَا:	بمشکل، مشکل سے (= مساں)۔
مستور:	چھپا ہوا، پوشیدہ، خفیہ۔
مسدود:	بند کیا گیا، روکا گیا، رکا ہوا۔
مسرور:	خوش، شاد۔
مسکروی:	ہنسی، مسکراہٹ۔
مُخت خاک:	مٹھی بھر خاک، خاک کی مٹھی۔
مشفق:	شفیق، مہربان، شفقت کرنے والا۔
مٹک نافہ:	ہرن کی ناف سے حاصل ہونے والی خوشبو، کستوری۔
مضا عف:	دو گنا، دو چند۔
مضرب:	انگلی کے ذریعے بجایا جانے والا موسیقی کا آلہ۔
مضروب:	زخمی، چوٹ کھایا ہوا۔
مضغہ:	لوٹھڑا، گوشت کا ٹکڑا۔
مطرب:	گوپا، خوش کرنے والا، گانے والا، قوال۔
معنوی:	معنی سے منسوب، اصلی، ذاتی، حقیقی، اندرونی، باطنی۔
مفتون:	عاشق، مبتلا، شیدا، فریفتہ۔
مفقود:	ناپید، نثار، کھویا ہوا، غائب۔
مقتدا:	پیشوا، رہنما، جس کی پیروی کی جائے۔
مقدور:	تاب، ہمت، حوصلہ۔
مقصود بالذات:	وہ چیز جو اصل مقصود ہو۔ مقصد اصلی۔
مکشوف:	کھولا گیا، واضح، ظاہر۔
ملفوف:	لپیٹا ہوا، لفافے میں بند۔
ملول:	غمگین، رنجیدہ۔
مملوک:	ملکیت، غلام۔
من بھرمایا:	فریفتہ کرنا، دل لگانا، عشق لگنا۔
مندل:	زخم کا بھرتا۔
مندری ہوئی:	برّی ہوئی۔

منقاد:	اطاعت کرنے والا، فرماں بردار، تابع۔
منکت:	منگتے، گداگر، مانگنے والے۔
مُور:	ایک قسم کا کشتہ، بو ہے چون، بو ہے کی میل۔
مور:	فروکش یا وارد ہونے کی جگہ، اترنے کی جگہ، اٹھانے والا۔
موصوف:	تعریف کیا گیا، س کی صفت بیان کی گئی ہو۔
مُولِ رُمُو لے:	اصل، بنیاد، سبب، کارن، شروع، آغاز، ذرہ بھی، بالکل بھی۔
مولو انڑے:	مُلاں۔
مُولی:	مولوی۔
مونڈھے:	اُلٹے، واڑگوں۔
مونہہ چُو اپانی:	ہتھیلیوں کا پیالہ بنا کر پانی پینا یا پلانا۔
مُوہرہ:	زہر۔
مُہار:	رُخ، لگام۔
مُہانے:	ملاح، کشتی بان۔
مُہر:	کرم، رحم، محبت۔
مُہر بلب:	خاموش، چُپ، پرسکون۔
مہنڈڑے:	میرے۔
مہنے ر مہنا:	طعنے، شکوے۔
مہیب:	خوفناک، خطرناک، بھیانک۔
میراں:	کلڑے۔
میلان:	جھکاؤ، التفات۔
میلوے:	میلے۔



نابود مطلق:	کامل طور پر فنا ہو جانا۔
نا تان:	نا توان، کمزور۔
نار:	ا۔ آگ، ۲۔ عورت۔
ناشاد:	ناخوش، رنجیدہ، غمگین۔
ناطقہ:	بولنے یا گفتگو کرنے کی صلاحیت۔ قوت گو یائی۔
نافر جام:	جس کی عاقبت بخیر نہ ہو، بد انجام۔

ناقص مس:	مس خام، وہ تانبا جو کان سے نکالنے کے بعد صاف نہ کیا گیا ہو، کچا تانبا
ناکس:	مہذب، کمینہ۔
نام کنٹھا:	گلے کا زیور۔ نام اور کنٹھا الگ الگ زیور ہیں۔ کنٹھا تسبیح کی طرح کا ہار۔ فقیروں کی مالا۔
نانگ:	ناگ، سانپ۔
نانواں:	نام، عزت، مقام۔
نٹھے رٹھا:	بھاگے رہا گا۔
نچ:	نفی کے لیے، نہ، نہیں، ان، بے۔
نجوم:	ستارے، تارے، کواکب۔
نحو:	وہ علم جس سے کلمات کو جوڑنا، توڑنا، ان کی ترکیب اور ان کا باہمی تعلق معلوم ہو۔ جملوں کا علم۔
نجیف:	کمزور، لاغر، ناتواں۔
نراس:	نامید، مایوس۔
نروکی:	صحت مند، تندرست، خوش، مسرور۔
نزع:	کھینچنا، نکالنا۔ کنایۂ موت کے لیے مستعمل ہے۔ یعنی جسم سے روح کے نکلنے کی گھڑی۔
نسنگ:	بے لاگ، بلا روک ٹوک، بلا شبہ، فوراً، بے شک۔
نسیان:	بھول چوک، فراموشی، ایک بیماری جس میں انسان کے ذہن سے گزشتہ واقعات محو ہو جاتے ہیں۔
نسیم:	نرم ہوا، بھینی بھینی خوشگوار ہوا۔
نشر:	مشہور۔
نفر:	نوکر، غلام۔
نفس خناس:	نفس امارہ، شیطانی وسوسے۔
نفی اثبات:	ذکر کی ایک قسم۔ لا الہ الا اللہ کو نفی اور محمد رسول اللہ کو اثبات کہا جاتا ہے۔
نقیب:	تشہیر کرنے والا، خبر دینے والا، مدح خوان۔
نظر افروز:	نگاہ کو روشن کرنے والا، دلکش، جاذب نظر۔
نظر باز:	اچھے برے کی پرکھ رکھنے والا، صاحب نظر۔
نگ آئی:	تنگ ہوئی، بے زار ہوئی۔ پنجابی میں ”تنگ و تنگ ہو جانا“ بھی مستعمل ہے۔
	برداشت سے باہر معاملہ۔

- نک نکیر: ۱۔ ناک سے زمین پہ لکیریں کھینچنا یعنی معافی مانگنا،
۲۔ ناک سے نکیر پھوٹنا، ۳۔ ٹکیل ڈالنا۔
- نکاری: بے کار، ناکارہ۔
- نکتہ چین: عیب ڈھونڈنے والا۔
- نکرمی: بد نصیب، بد قسمت، منحوس۔
- نگھاریاں نگھارنا: ڈبونا، غرق کرنا۔
- نلاج: بچ، کم ذات، بے شرم۔
- نمائی: بے کس، بے چاری، کمزور۔
- نمناک: آنسوؤں سے تر، بھیگا ہوا۔
- نندیے: نندی سے نندیے۔ بیٹی، اولاد۔
- نگ ناموس: شرم و حیا، عفت و عصمت۔
- نوش: پینے والا۔
- نوش کیے: پینے۔
- نوشید: پینا، نوش کرنا۔
- نہال: ۱۔ خوش، مسرور، ۲۔ پودا، شجر۔
- نیاریاں نیارا: سب سے الگ، نرالا، جداگانہ۔
- نیاں: انصاف، عدل، فیصلہ۔
- نیر: آنسو۔
- نیم بسل: اُدھ مٹا، گھٹیل، آدھا ذبح کیا ہوا۔
- نمین غریباں: ہرن کی مانند خوبصورت آنکھوں والے۔
- نیدرے: نیند۔
- نیونہہ: پیار، محبت، عشق، چاہت۔




- وات: منہ / مونہہ۔
- واٹاں رواٹ: مسافت، فاصلہ۔
- واڑے: جانوروں کے پاڑے، زمین کا مخصوص احاطہ۔
- واسرے (واسا): قیام، سکونت، رہائش۔
- واصل: ملنے والا، ملاقات کرنے والا، شامل ہونے والا۔


واک:	دسترس میں ہونا، رویہ، اسن، محبت۔
واگ:	لگام، مہار، نکیل۔
واندہ:	وعدہ۔
وقت:	پھر، دوبارہ۔
وتاں:	پھر ال۔ وندی: پھر دی۔
وٹھیاں روٹھی روٹھنا:	بسر کرنا، بسنا، آباد ہونا۔
وجھاپ:	گلے، شکوے۔
وچار رے روچارے روچارا:	بے چارے، مسکین۔
وچدوں:	بچہ میں سے (وچوں)۔
وچھنی:	پھڑی ہوئی، مجبورہ۔
وخت:	مصیبت، مشکل۔
ودان:	بڑا، تھوڑا۔
ودود:	اللہ تعالیٰ کا صفاتی نام۔
ورج:	روکنا، ٹوکنا، منع کرنا۔
ورع:	پرہیز گاری، اتقا۔
ورھے:	سال۔
ورھیاں:	کاٹنے والی چیز کا زخمی کرنا، چبھنا، لگنا، کاٹنا۔
وس:	بس، اختیار۔
وسار:	۱۔ ہلدی، ۲۔ بھولنا (منوں وسار یا: بھلایا یا دل سے نکال دیا)
وساہ:	اعتبار، اعتماد، یقین، بھروسہ۔
وسواس:	اندیشہ، وہم۔
وصال:	ملاقات، عاشق و معشوق کی محبت۔
وگاری روٹگاری:	وگارا روٹگارا کا موٹ۔ مزدور، دوسروں کے کام میں بغیر اجرت مشقت کرنے والی۔
ولالیا:	راضی کر لیا، بہلایا، منالیا۔
ولاونان:	بہلانا، منانا۔
ولا کڑے رو لا کے:	پھیرے، چکر، بار بار جانے کا عمل۔
ولی مادر زاد:	پیدا آئی ولی۔

وَلے:	واپس کرے، واپس ہو۔
وہا جھروہا جھنا:	کاروبار کرنا، بیوپار کرنا۔
وہن:	پانی کا بہاؤ، روانی۔
ویر ہمشیر:	بھائی بہن۔
ویریاں رویری:	دشمن، مخالف۔
وین:	بٹن، لوح، ماتم، آہ و زاری۔
ویہندی:	دیکھتی، دیکھنا۔
﴿.....﴾	
ہاٹھ:	گھنگھور گھٹنا۔
ہاڑا:	منت، خوشامد، واسطہ، گڑ گڑا ہٹ، بندوبست۔
ہاڑیا لڑے:	سردیوں کا موسم، ہاڑ: ہندی مہینے کا نام۔
ہاویے/ہاویہ:	دوزخ کا سب سے نچلا طبقہ۔
ہٹ:	دکان۔
ہٹکن رہٹکنیدڑی:	روک رکاوٹ، منع کرنا، آڑے آنا۔
ہدف:	نشانہ، منزل۔
ہربول:	متذبذب ہونا، اوسان خطا ہونا۔
ہرج:	نقصان، مضائقہ۔ (محمد شفیع کوئی ہرج حضور ناہیں، تشریف شریف فرماندیاں نوں)۔
ہس بلاق:	گلے کا زیور، ہس گلے کی ہڈی یا ہنسی جب کہ بلاق صراحی نما موتی کو کہتے ہیں۔
ہفت تعلیم:	سات ولایتیں یا ملک۔
ہکلی کوچ:	غول سے پھڑی ہوئی کوچ، چیخ و پکار کرتی کوچ۔
ہلائیں رہلاوٹا:	مشہور کرنا، تشہیر کرنا، سب کو بتا دینا۔
ہل من مزید:	کوئی اور ہے؟۔ جب سب دوزخی دوزخ میں جا چکیں گے تو دوزخ پکار پکار کر کہے گا کچھ اور بھی ہو تو لاؤ۔
ہمہ صفت:	ساری خوبیوں کا مالک، بہت سی خوبیوں کا مالک۔
ہندالولی:	پورے ہند کا ولی۔ اولیاء کے لیے لقب۔ زیادہ تر حضرت معین الدین چشتی اجمیری رحمۃ اللہ علیہ کے لیے مستعمل ہے۔
ہوت:	پُوں، بلوچ قوم کا فرد، سسی کا عاشق، مجاز عاشق، یار۔

ہوڑیاں رہوڑنا:	روکنا، منع کرنا۔
ہوکا:	ڈھنڈورا، سر آہ۔
ہوگ:	ہوگا، ہوگی۔
ہول:	ڈر، خوف۔
ہیتوں:	ہیت سے، خوف یاد ہشت سے۔
ہٹھ:	نیچے۔
ہٹکھی:	گھمندا، غرور۔



ہیم:	بڑا دریا۔ سمندر۔ بحر۔
ہیمن:	برکت، سعادت، اقبال مندی، کامیابی۔



مآخذ

صرف بنیادی مآخذ، لغات تے راویاں دی فہرست دتی جا رہی اے۔

الف: میاں محمد شفیع اختر ڈھانگروی دے قلمی نسخے/بیاضاں:

☆	فریاد عاشق، 1925ء	☆	حدیث غم، 1939ء
☆	صبوچے، 1954ء	☆	پنجابی غزلاں، 1959ء
☆	سازشکت، 1960ء	☆	ارمغان اختر، 1960ء
☆	نقش آخریں، 1971ء	☆	سی حرفی ہائے پنجابی، 1972ء
☆	مجموعہ اشعار اختر، 1978ء	☆	ارمغان چشتی، 1980ء
☆	مجموعہ اشعار پنجابی (الف)، 1980ء	☆	وصال امیر حزب اللہ، 1981ء
☆	سی حرفی محمد سلیم ولد محمد بشیر، 1985ء	☆	انشائے اختر ڈھانگروی، 1987ء
☆	نعتیہ کلام، 1987ء	☆	مجموعہ اشعار پنجابی (ب)، 1989ء
☆	روزنامہ گنجینہ اسرار، جلد نمبر 1 تا 8		

ب: لغات:

- ☆ المنجد، کراچی، ادارہ دارالاشاعت، طبع یازدہم، 1994ء
- ☆ ابوالفضل بیلالوی، مولانا، مصباح اللغات، لاہور، المصباح، سن،
- ☆ پنجابی، ارشاد احمد، اردو پنجابی ڈکشنری، لاہور، مرکزی اردو بورڈ، 1974ء
- ☆ تنویر بخاری، پنجابی اردو لغت، دوسرا ایڈیشن، لاہور، اردو سائنس بورڈ، 2000ء
- ☆ حسن عمید، فرہنگ عمید، بانیسواں ایڈیشن، تہران، مؤسسہ انتشارات امیر کبیر، 1969ء
- ☆ حسن اللغات، لاہور، اورینٹل بک سوسائٹی، سن
- ☆ دہلوی، سید احمد، فرہنگ آصفیہ، جلد دوم، مطبع رفاه عام پریس، لاہور، مئی 1908ء
- ☆ دہلوی، سید احمد، فرہنگ آصفیہ، جلد سوم، لاہور، اسلامیہ پریس، جنوری 1898ء
- ☆ سردار محمد خان، پنجابی اردو ڈکشنری، لاہور، پاکستان پنجابی ادبی بورڈ، 2009ء
- ☆ علی رضا سید نقوی، ڈکٹر، فرہنگ جامع، نیشنل بک فاؤنڈیشن، اسلام آباد، 1994ء
- ☆ فیروز الدین، مولوی، فیروز اللغات، لاہور، فیروز سنز، 2005ء
- ☆ محمد ثقلین بھٹی، الحاج، اظہر اللغات، اظہر پبلشرز، لاہور، سن
- ☆ ڈراکسن ٹیر، مولوی، نور اللغات، طبع سوم، اسلام آباد، نیشنل بک فاؤنڈیشن، 2006ء

ج: راوی (انٹرویوز):

- ☆ میاں عبدالرشید، صاحبزادہ میاں محمد شفیع اختر ڈھانگروی، تحصیل سوہاؤہ، ضلع جہلم۔
- ☆ فریدہ بیگم، صاحبزادی میاں محمد شفیع اختر ڈھانگروی، دوہیلی، ضلع جہلم۔
- ☆ امینہ بیگم زوجہ میاں عبدالرشید، تحصیل سوہاؤہ، ضلع جہلم۔
- ☆ اظہر رشید (پوتا میاں محمد شفیع اختر ڈھانگروی)، بھارا کھو، اسلام آباد۔
- ☆ مظہر جمیل (پوتا میاں محمد شفیع اختر ڈھانگروی)، بھارا کھو، اسلام آباد۔
- ☆ بدر سہیل (پوتا میاں محمد شفیع اختر ڈھانگروی)، بھارا کھو، اسلام آباد۔
- ☆ مدر فاروق (پوتا میاں محمد شفیع اختر ڈھانگروی)، بھارا کھو، اسلام آباد۔
- ☆ محمد اصغر (نواسا میاں محمد شفیع اختر ڈھانگروی)، اسلام آباد۔
- ☆ فاروق احمد (ہمسایہ میاں محمد شفیع اختر ڈھانگروی)، بھیت، تحصیل سوہاؤہ، ضلع جہلم۔